

少室山房集 (明) 胡应麟

钦定四库全书

集部六

少室山房集

别集类五

明

提要

臣等谨案少室山房集一百二十卷明胡应麟撰应麟字符瑞更字明瑞兰溪人万历丙子举人尝与李攀龙王世贞辈游其所作诗藪类皆附合世贞艺苑卮言后之诋七子者遂并应麟而斥之然其诗文笔力鸿鬯又佐以雄博之才亦颇纵横变化而不尽为风气所囿当嘉隆之季学者惟以模仿剽窃为事而空疎舛陋皆所不免应麟独能根柢羣籍发为文章虽颇伤冗杂而记诵淹博实亦一时之翘楚矣是编前有王世贞所撰石羊生传称应麟有寓燕还越计偕岩栖卧游抱胜三洞两都兰阴畸园诸集凡二十余卷朱彝尊明诗综内别载邯郸华阳养疴娄江白榆湖上青霞等集而无三洞畸园之名盖应麟在日诸集皆随作随刻别本单行世贞彝尊各据所见故名有异同此集为万历戊午歙人江湛然通判金华时所刊乃其合编之本也

乾隆四十三年五月恭校上

总纂官 (臣) 纪昀 (臣) 陆锡熊 (臣) 孙士毅

总校官 (臣) 陆费墀

●少室山房集原序

明兴以帖括俳偶之文笼士士不复知有古文词正嘉以来搢绅先生始名古学盖滥觞于北地而娄江新都始畅其流焉当二子角峙海内如唐昌黎柳州士闯其阃涉其阶墀即可以傲睨当世况其服膺避席而不敢与齿于当世又何如哉兰溪胡明端以殆庶之姿策勲竹素于文无不工而尤工于韵语自汉魏流开元大历以还皆字摹句拟如循枝揽叶以探厥本根意得之余泯然与之合辙其致辩成都鳃鳃不倦余季幼清以为忠告其然乎又何恠当世方闻博雅之士闻声而色飞望景响而股弁矣尝一登娄江之堂娄江曰吾不能讳献吉昌谷輩之疵也融而超之于鳞庶几焉后我而作其在此子矣交新都新都曰成都博而不核也江左核而未精博而核核而精宜莫如明瑞夫济南之秀句娄江之东野也江左之赅练新都之退之也若曰吾终身所服膺在是余子録録不复置齿牙矣一旦得明瑞而遽跻之二君之上此宁可虚词浮说相假借哉苞籀之富位置之高骋鹜之弘放诚有以服其心折其喙如尹望邢而泣季咸见壶子而却走固不自知其如此也夫当明瑞罢公交车脱尘鞅高卧蓉山灵洞之间目视云汉非其人即贵倨弗友傲然以千古自命庄生有云谈二子于戴晋人之前犹一哂也岂不然哉昔喻君邦相尹兰江慕交明瑞相徙于山颠水涯唱咏连日夕余心实向往之适视瑒兹土而明瑞

已骑云烟去我而游寥廓■〈广外勤内〉购其遗文读之而板复漶漫纷错回以公事之余稍为铨次又得兰溪令君卢尔腾以襄其役鸿胪赵君文镇以董其成孝廉徐伯阳章无逸輩以校其似皆闾览博物君子也卷计为诗八十文半之胪分部列犖然可观矣余尝读弇山羊石生传时明瑞年纔三十有八耳而所著诗已二十卷他所撰述计二十四种共为卷二百三十有三制作之富逾于古人后其年复不少也计所论著当有所散轶伏匿而不出者购成全书将在来喆嗟乎兰阴之间激水之上高门华阙上第元僚指不胜僂矣其间道德功业昭垂于日月者殊不乏人而明瑞裹敝帙弄三寸柔翰直与争不朽于穹壤天嗇之于彼而昌之此于世正得失半也乃世或为明瑞扼腕一第夫唐以诗赋取士犹失之李杜况夫俳偶帖括之习又乌足笼吾明瑞哉史氏传文苑要当置是子娄江新都间耳万厯戊午中秋日新安江湛然书于金华郡斋

●少室山房集

石羊生传（王世贞）

胡元瑞者名应麟一字明瑞尝自号少室山人已慕其乡人皇初平叱石成羊事更号曰石羊生人亦曰元瑞殆非人间人也仙而谪者也遂呼之石羊生元瑞父曰按察公僖母宋宜人按察公为行絕类万石君而文藻过之所至好行阴德名位不甚称以云南按察副使归今尚壮无恙元瑞为儿时肌体玉雪眈目郎秀五岁按察公口授之书輒成诵见客客使属对輒工九龄徙里社师日估■〈亻毕〉习经生业而心厌之俄悉祛按察公篋得古文尚书周易国风雅颂檀弓左氏庄列屈原两司马杜甫诸家言读之按察公竒其意弗禁也稍长遂能为歌诗藉藉传里中而于经生业亦不废十五补博士弟子员非其好也会按察公拜尚书礼部郎挟与俱渡钱塘过吴阊泛杨子北厯齐鲁赵魏之墟至燕市而止所经繇吊古即事往往于诗歌发之而是时南海黎惟敬欧楨伯吳郡周公瑕吳兴徐子与嘉禾戚希仲沈纯父永嘉康裕卿先后抵燕发元瑞藏诗览之咸啧啧折行请交至於琳宫梵宇高会雅集元瑞以齿坐未坐词组一出无不恍然披靡自失也曰使用昔贤隶事夺席例吾曹无坐所矣临淮小侯李惟寅慕元瑞甚使客纂而致之为上宾旬日不聽出惟寅用是亦以诗名而周宗正灌甫雅自负风雅有人伦之鉴贻元瑞三十韵首以北地信阳相属元瑞益自信寻以按察公外除元瑞归徙母里中母患头风甚剧元瑞委身医药间日夜扶侍不休母头风良愈而身过劳得清羸疾矣因跳匿金华山中而会大司空万安朱公衡还过兰溪朱公故徙燕见元瑞诗而惊赏者至是发使山中踪迹得元瑞以书要之而泊舟待三日元瑞感其意为长歌七百言以赠朱公公袖示督学使者滕君伯轮曰天下竒才也滕君輒超格檄受饩学宫且趣入试两御史再试再为诸生千人冠已荐乡书上公交车报罢元瑞意殊不在一第其所游从皆天下贤豪长者然所当心独余兄弟与李观察于鳞汪司马伯玉吳叅政明卿会于鳞死余皆散处不相及久之意邑邑不自得而余弟敬美与观察公同年过兰溪谓观察吾欲就阿戎谈当胜卿遂即元瑞剧语二夕皆申旦临别眷眷不忍释曰吾於诗独畏于鳞耳已矣今庶几

得足下又曰幸与家中丞同世胡不一及门即卒然抱于鳞恨若何时余方谢客县阳观闻元瑞来喜不自胜力疾启闕与为十日饮间出所著少室山房诗余得而序焉所以属元瑞甚重而用是颇有断断者余二人俱弗顾元瑞乃高卧山中不复就公交车而兰溪令喻邦相豪于诗与元瑞意合忘形尔汝尝偕过赵学士山房倡和连日夕元瑞之卧山中凡六载而始上公交车至都下遇张观察助甫助甫余兄弟友也读元瑞诗击节曰二十年亾此调矣元瑞亦奇助父诗契密无间且各自怅相遇晚试复罢归时大司马张公肖甫靖浙难过元瑞里元瑞避弗见张公谓按察公公儿佳甚故知之今难我得非以使者惠文岳岳耶为我致之钱塘请得具宾主礼元瑞乃强为钱塘谒张公果以上客客之会伯玉来湖上大将军戚元敬系至伯玉数与元瑞相闻问把臂剧驩出元敬七絶句诩之曰大将军健儿也乃能作文语不下沈太尉曹竟陵生亦能赋赠我乎元瑞援笔千余言立就奇思滚滚既大将军集相向叹赏不置伯玉因曰我欲之海上访王元美兄弟生复能従我乎元瑞曰吾心也遂同过弇州园伯玉道为少室山房集序其重不下余时偕元瑞至者伯玉弟仲淹仲嘉而张大司马亦以内召迹伯玉而来寻先别去余兄弟与伯玉元瑞诸君积日游弇中甚乐也元瑞性孤介时时苦吟沉思不甚与客相当至其挥麈尾挖艺文持论侃然尤慎于许可有莫生者躁而贪以品不登上中侧目元瑞甚属伯玉元敬游西湖故遍詈坐客为閔端元瑞夷然弗屑也及在弇仲淹被酒狎元瑞元瑞拒弗受客谓元瑞曩湖上之役胡以异兹元瑞徐曰莫生者庸詎足校也仲淹司马公介弟吾侪当爱之以德独奈何成人过耶客乃服元瑞自髻髻厌薄荣利余子女玉帛声色狗马服玩诸好一切泊然而独其嗜书籍自天性身先后所购经史子集四万余卷手钞集録几十之三分别部类大都如刘氏七畧而加详密筑室三楹贮之黎惟敬大书其楣曰二酉山房而属予为记旦夕坐卧其间意翛如也恒自笑蠹鱼去人意不遠又谓我故识古人恨古人乃不识我其托尚如此好称说前辈风节尝怪其郡若梁刘孝标之介唐骆宾王之忠而世仅仅以文士目之当由作史者盲于心故且史第知有狄梁公宋广平贤皆俯首而従周裸将以视宾王何径庭也上之采风使者苏君禹君禹雅敬信元瑞趣下其事宾王得以乡贤祀郡城而孝标亦暴显元瑞所著诗有寓燕还越计偕岩栖卧游抱膝三洞两都兰阴畸园等集二十余卷诗藪内编外编十二卷他撰述未行世者有六经疑义二卷诸子折衷四卷史藪十卷笔丛十卷皇明诗统三十卷皇明律范十二卷古乐府二卷古韵考一卷二酉山房书目六卷交游纪畧二卷兜玄国志十卷酉阳续俎十卷隆万新闻二卷隆万杂闻四卷骆侍御忠孝辨一卷补刘氏山栖志十二卷搜辑诸书有羣祖心印十卷方外遐音十卷考盘集十卷谈剑编二卷采真游二卷会心语二卷类萃诸书有经籍会通四十卷图书博考十二卷诸子彙编六十卷虞初統集五百卷盖生平于笔砚未尝斯须废去元瑞壮未有子迺始举二子戊子冬复以按察公命赴公交车至瓜洲而病病积久不愈慨然曰吾其殆乎谓余知应麟者唯子幸及吾之身而传我使我有后世后世有我也王子曰元瑞年三十有八耳神清而意甚舒即偶犯霜露何恙不已而

虑至此也夫以元瑞之生仅三十年而著作充斥乃尔过此以往所就当又何如耶元瑞於他文无所不工绩学称是顾不以自多而所沾沾独诗彼固有所深造也元瑞才高而气雄其诗鸿鬯瓌丽迴絶无前稍假以年将与日而化矣至勒成一家之言若所谓诗薮者则不啻迁史之上下千载而周密无漏胜之其刻精则董狐氏韩非子也吾长于元瑞二纪余姑为传以慰之且谓元瑞子后当竟传我

●钦定四库全书

少室山房集卷一

（明）胡应麟 撰

○乐府十八首

拟大明饶歌曲十八首（有序）

夫鼓吹饶歌之作肇自有熊所以象成功昭盛美凡圣王受天明命摧陷廓清之烈非此亡以被诸声容粤自商周以征伐定天下一时播告之章勿可覩已汉饶歌十八曲其辞迄今尚存虽文义讹脱难以尽谐歌中之辞亦匪専为武功而设至味其音节隱然发扬蹈厉之风视汉诸古诗优柔驯厚者迴絶不伦则饶歌所由作可知已两汉而下魏繆袭吴韦昭晋傅玄宋何承天唐柳宗元代相拟袭赵宋无闻则皇明宋濂氏尝追述之寻诸家制作即风格词藻未能抵掌西京一时可颂之绩固咸取以被诸乐章矣高皇帝提三尺起淮甸扫邊尘而遏絶之大荒之外此其勲德巍巍亾论汤武即轩辕氏不无逊心独饶歌之作诸文章家往往缺焉间一二仅见而辞义寂寥音节迂缓未足以揄扬大造垂示无穷夫魏吴偏闰唐宋下衰繆韦何传于骚坛未槩作者彼且龟勉步趋以自侈一时殊际焉明臣子目击高皇帝震古无前之伟树以安享二百禩之太平即草莽山林疇匪帝力而默默终身不能效一辞之赞甚非所以效康衢击壤野老细人之义也应麟不敏呻吟占毕余二十年蠡海管天颇测毫末谨按我圣祖发轫之初以迄于四方底定之日叙次其事为大明饶歌曲一十八章诚知謏闻謏识上不足以鸣昭代之鸿庥下不足以警西京之遐轨以较唐宋诸家庶几近之綴属既成不忍焚掷爰录笥中附诸康衢擊壤之末异时鸿生硕彦制作迭兴盛演歌辞登诸鼓吹俾圣神勲德永揭千秋此或为之嚆矢云尔饶歌本二十二曲其四曲亡魏吴所拟仅十二曲说者咸以十曲仍用旧名然其辞亦不复传何也今止据存者十八曲拟之考诸家词惟繆韦傳常被施用承天宗元辈率私作之以备异时采择者而凭依名义流播迄今故敢窃取其例焉

黄河清

元至正末黄河清大圣启运协符载辟宇宙为黄河清第一

黄河清圣人出应昌期诞至德着戎衣奋三尺靖四方建都邑干戈偃弧矢戢统九有主社稷神与鬼咸受职烽烟扫燭火熄维大明照中国万千禩与天一

右黄河清二十句句三字

凤之翔

高皇帝起濠上追王迹肇今名为凤之翔第二

凤之翔在濠梁义师起帝网张二十四将驱天狼兵锋所指定四方薄海内外以莫不来王威加六合返旧疆征歌悉发诸儿郎复彼人民世世无有所与为我沐与汤击筑大风云飞扬千秋万岁乐未央

右凤之翔十一句四句三字六句七字一句九字一句十五字

揽羣雄

龙飞淮甸豪杰景从得大将达遇春等二十四人以一海内为揽羣雄第三

揽羣雄盗如猬大圣握符起淮汭与神为谋蓄锋锐提三尺剑驱海内驱海内揽羣雄真人出天下同四方六合咸景从如风从虎云从龙汛扫大漠如飞蓬扶桑曈曈朝日红驱海内揽羣雄

右揽羣雄十五句八句三字七句七字

克建业

师济采石长驱金陵定皇畿系万国为克建业第四

克建业定皇畿皇畿定举义旗天兵百万任所之东吴南汉西蜀七闽六诏从风靡天下大定一戎衣

右克建业六句四句三字二句七字一句十三字

婺归德

大驾东征首下宁越婺女之郊圣躅驻焉为婺归德第五

天兵十万下东国婺以先宁驻皇躅景星荧荧耀城邑我战则胜攻则克四海从风靡弗一势如破竹烽燧息天命曷归归有德

右婺归德七句句七字

四友

兵入浙聘刘基宋濂等四人置帷幄中为四友第六

于维文王是亲四友疏附后先以翼元首峩峩高踪异代曷有天威是临匍匐奔走猗与圣祖广延羣雄如天如海为万物宗王师所向六合景从爰率车徒以定浙东浙东底平大统未集蚤作暮思思布文德曰基曰濂曰琛曰溢玄纁奕奕交布东国曰四先生论道经邦坐而弗名匡朕弗遑呜呼盛节庆流无疆德六五帝功百三王

右四友三十二句句四字

战鄱阳

伪汉陈友谅率徒数十万来抗高皇帝躬督大将达遇春等鏖战湖口灭之为战鄱阳第七

明日大战战鄱阳简师料徒百万强烈风吹沙湖水扬烟焰涨天焚大航三十六将死康郎再战湖口殲余皇我舟胶沙敌尚强疾呼奋臂来冲撞鲸鲵蔽空云日黄拍江巨浪何茫茫如血巨鹿尸昆阳维天命我明车轮碎螳螂百矢定边背若芒一矢贯睛谅死

亡谅死亡理出降威加四海莫不来王

右战鄱阳十九句二句三字二句四字二句五字十三句七字

盘门入

张士诚据姑苏命将覆其巢兵不血刃为盘门入第八

盘门入士诚泣前歌后舞大师集兵不血刃下城邑谁其帅者公魏国归市弗止麤
弗易万姓欢呼颂皇德二敌既殲皇之土东极沧溟南亘楚长驱入中原孰敢余阻

右盘门入十句二句三字七句七字一句九字

降谷珍

岛夷首乱元末慑我大威束缚待命海口为降谷珍第九

方谷珍起盗藪乘元之乱窃据一方地如斗耗金币大官酒海上时时飞且走如鬼
如蜮鸡与狗大明当空烛九有举宗乞命窜海口帝悯其愚印加肘以较羣雄最小丑

右降谷珍十一句四句三字六句七字一句十一字

七闽

陈友定保闽粤师傅之为七闽第十

七闽保岩阻连亘皆山梁友定据其巢负固如金汤我皇命将谕谕以开茅疆自谓
故元臣负义不肯降王师十万下戈船逐长江兵入如破竹如虎吞羣羊委身系尺组支
体磔分张自谓故元臣守节甘丧亡大都以沦覆谁为招国殇

右七闽十八句句五字

维中国

大将统六师北乡儒臣濂谕檄中土华夏扩清为维中国第十一

维中国帝王所自立櫜枪遍郊原天地黯无色天重开地重辟扶桑荧荧日月出照
八荒烂九域芟夷祸难四海一神龙夹助正统集帝愍边尘扰中国诏下大将军达副将
军遇春提兵九十六万戈鋌甲冑如浮云命词臣濂草檄谕彼中华民长驱入河洛壶浆
箪食来成羣

右维中国十六句五句三字三句五字四句七字二句十一字一句十二字一句十
三字

大都走

天兵入大都故元主弃社稷奔为大都走第十二

元都平四海清神鬼受职万方庭列大藩置神京汛扫烽烟混一区寓再造华夏开
文明

右大都走六句四句三字一句七字一句十五字

库库

元规复故都师捣之大战于定西古城夷其部落王保保絶塞遁为库库第十三

察罕起元末举代推鷹扬天命去胜国剗刃争战场维库库察罕子复良下益都伐

洮阳驱兵出没观以望帝三谕弥陆梁执囚我行人怒臂如螳螂命大将统武骠北征陇右一战捣其巢捣其巢万骑突至如风飙赖傅颖公却前茅两军就舍不得交夜分刳营足纳一靴身骑骠马逃骠马逃絶大漠我军四十万胜负互相角巨网漏吞舟竟死蕃部落帝称好男子维库库

右库库二十六句七句三字十句五字一句六字四句七字二句八字一句九字一句十三字

升面缚

蜀阻声教璟谕不从大兵入成都虏明氏母子归为升面缚第十四

升面缚出成都母子啞啞啼路途父旻玉珍一目枯贪饕乱亡起雄图不久身殉留遗孤大明区寓至化敷屡使遣谕如追捕犷兵悍将骄相扶骄相扶守瞿塘帝命颍国公东瓠王伐山通道开战场直捣阶文溃腹心腹心溃肝胆亡母子輿榱大道旁升也肉袒仍牵羊侯以归义戒杀降高皇帝德洪虞唐唐高宋武如豺狼

右升面缚二十一句六句三字十四句七字一句八字

北征

中夏略平分命诸上将耀兵沙漠朔庭一空为北征第十五

明受命海宇一前元余属负固北庭保其宅团结党类以俟我衅隙为我子孙愿皇帝遐思勿姑息乃眷西顾以北征桓桓大将统兵亿万犁其庭犁其庭心胆落单于遁絶大漠

右北征十一句六句三字二句七字二句十一字一句十四字

纳噶楚

宋国公出塞俘降元将悉收其众二十万余人为纳噶楚第十六

纳噶楚居金山二十余万众虎视一何眈眈帝命上公冯统兵出全燕天威所震慑敌骑不敢驰敌弓不敢弯二十余万众一时赴长安搃金伐鼓壮士欢筑三受降玉门关

右纳噶楚十三句二句三字八句五字一句六字二句七字

六诏

元孽负固滇中命沐英等督兵平之永镇其地为六诏第十七

六诏天西南惟滇号最巨残元厯数尽遗孽犹虎踞帝愍絶塞民使命驰风尘彼昏不奉诏虔刘我信臣皇赫斯怒命黔宁滕艮巨舶浮昆明昆明水涸殲长鲸碧鸡金马入我版图四海平

右六诏十二句八句五字三句七字一句十一字

受天命

四方底平九域以宁百千万禩统我皇明为受天命第十八

受天命定四方干戈偃鉄钺藏轶大武驾成汤媲轩辕俪虞唐扩地万里居中央整齐万国开明堂汉唐宋晋隋诸邦絜功比德如蝸蟠万八千岁永无疆

右受天命十三句八句三字五句七字

少室山房集卷一

●钦定四库全书

少室山房集卷二

（明）胡应麟 撰

○乐府三十首

汉饶歌十八首

朱鹭

朱鹭下汉道昌一双羽翻云中合沓而飞翔合沓而飞翔在我庭户以建华鼓导大辂鱼鱼雅雅佗彼行路朝食沆瀣夜濯风以露应期出世所慕五帝三皇巍巍福我祚

艾如张

艾如张张四维击高钲悬大旗戈鋌甲胄光陆离千灵从七校移虞人杂沓冠以皮臂苍走黄当路岐南山有虎豹北山麋狐兔若丘山缩足不敢驰我欲上天天门九重我欲入渊血肉蝼蚁鱼龙王者合三驱百兽一一归我樊笼不见青冥冥冥者鸿耸六翻乘长风游赤霄入无穷虽有罾缴罗网将安庸

思悲翁

思悲翁气结不能言儿长翁为娶妇思得奉晨昏白头以团栾妇恶如豺狼入门作灾患牝翼鸣前庭举室怆以烦知交各各缩舌亲戚断往还我有壶浆翁饥不得飧我有裳衣翁体不得完思悲翁气结不能言我欲诉上帝天门九重入以难我欲诉司命司命徘徊以盘桓念欲以高飞无羽翰以负翁去体毛何摧残不若城上乌反哺翁残年思悲翁气结不能言安得天雨雹霹雳震长夏雷霆半空下永永戒来者

翁离（旧辞缺今据补之）

翁离趾中可筑室何用葺之桂若兰翁离趾中可筑宫何用涂之椒以檀修竹夹广除一何檀栾千乘万骑缤纷哉往以还左长杨右甘泉汾阴后泰畤前黄鹄高飞极云天词臣献赋陛下之寿三千年

上之回

上之回祀甘泉金支扬翠旒旋雨师后风伯前鼓钟管吹声何填骈东达扶桑南逮于阗西径流沙北讫祈连天出景星地产醴泉报庆成致精虔肃雍哉愴以严五帝三皇享亿万斯年

战城南

战城南日无色壮士长征死愿作乌鸢食请谓乌与鸢壮士死国家委身丧其元汝食其肉一胡忍且残世有大豪元恶巨奸杀公吏探赤丸暴戾恣睢脍人肝一旦祸机发横尸道旁血如流泉腐肉如丘山汝胡不食甘此忍且残请为乌与鸢答君子言世有大豪元恶巨奸司命不敢录司败不敢拘司隶不敢纠弹十九老死牖下子孙贵盛冢墓象

祈连彼虽有肉血我安得淦壮士不自惜委身徇国家丧其元我固当得食彼复何言

巫山高

巫山高高望不可极日月蔽亏云雨出入有美一人曰维神女朝为行云暮为行雨
泠然入余梦贻我以翠羽郁陶乎余心将以畴语将舍余国都以往从女朝朝暮暮为云
为雨

上陵

上陵一何崔嵬宫殿若云屯观者为徘徊门有车马客驾言上陵回千乘万骑宵行
烈风雷我欲遐征憩望金银台封泰山禅梁父登日观观蓬莱蓬莱东见朝旭芝草藂生
醴泉满谷七十二家着编录

将进酒

将进酒乘乘黄列鼓吹鸣笙簧齐姜楚姬列两傍卫女秦娥左右以成行挟安陵戏
龙阳拥长剑佩琳琅缤哉纷盈高堂烹大彘炙肥羊五音和八珍良天瓢甘露臣以尝千
秋百岁逍遥以徜徉

有所思

有所思思美人美人渺何许大海天东南曷不往从彼游路途险且艰弱水不容舟
三山郁■〈山赞〉岍宫阙冠巨鳌遥遥极青天美人在其上三山高以寒我为钓巨鳌
截竹为长竿持竿坐沧海大水何漫漫巨鳌牵不动但见一双鲤鱼遥堕青云端呼童剖
此鲤中有美人尺素翰前有长相思后有劝加餐徘徊感此意踟躅不能言

雉子斑

雉子斑雉子斑一雄一雌抱子田野边雄飞摩天去不还孤雌养雏寄草间养雏寄
草间乳哺一何艰夜不遑寝昼不及淦毛羽既长成五色丽且鲜一鸣举世惊一飞上冲
天回头顾视我母六翮何阑珊老病倏已至恹恹向重渊有子不得养恸哭摧心肝有子
不得养恸哭摧心肝

君马黄

君马黄臣马苍飞轩蹀躞大道旁旁人顾见臣马以莫不谓良一朝中涓下明堂君
马入天闲意气何扬扬臣马老伏枥伶俜瘦骨朝逐水草暮逐斜阳背负盐车以西上太
行路逢伯乐造父王良停车振策为我彷徨念欲剪拂我以登明堂嗟筋力已尽莫能腾
骧长鸣短号断绝中肠

芳树

芳树芳树扬春华结秋实东风历乱而飞扬容色在朝夕美人坐高堂兀兀愁蛾眉
君心为他人冶艳能几时春华讵能久秋实那可期普天之下悠悠畴非轻薄儿班姬与
陈后解事一何迟黄金买词赋徒为世主疑不见芳树枝荣瘁各有时端居任大化何用
戚戚颦蛾眉

圣人出

圣人出明光宫万乘千骑升回中望祀天地禋于六宗百神来享以莫不肃雍肃肃雍雍四方同风唐虞之世比屋皆可封浩浩大化与天地无终

上邪

上邪我与君输肝委膈他人那得闻急难各相护救决绝妻子如浮云中心耿耿金石百年以为邻巢由抚六合尧舜下闾阖山崩石烂河枯海水竭十日并出天地裂我与君好永不绝

临高台

临高台望长安飞甍画棟嵯峨峭崿而■〈山赞〉岷苍龙九旂限重关我欲谒天阍一觐上帝颜手持长生药以奉心所欢上帝肯听臣亿万斯年苍龙九旂限重关限重关使我欲进心茫然临高台望长安抚膺三叹行路难远如期

远如期

游四方北碣石南潇湘西太华东扶桑凿混沌窍燕中央饮则食兮乐而康以寻列仙拾金光飞翔八极行七襄驰驱绝冥观大荒千秋万禩寿未央男儿堕地桑弧蓬矢射四方安得老死一丘局促若辕下驹守故乡

石流

石流南山有石北涧有流石何齿齿流何汤汤石以枕我流以漱我肠幽兰哉夹岸芬以芳芬以芳顺风扬彼美人兮今天一方安得寄此永永长相望

补蜀汉饶歌十二首（有序）

炎精既缺海■〈宀禹〉三分昭烈以汉室宗亲亲任武乡君臣一德托孤寄命比隆伊周自两汉以还大统故当以蜀为正王通氏抗言武乡不死礼乐可兴识者咸谓不诬顾汉氏而下魏吴晋各有饶歌以播扬功德蜀反缺焉盖武乡身任复汉之责魏吴未灭夙夜皇皇惟誓师鞠旅东乡是图舍是而播告声歌彰明得意此天下既平之事非枕戈待旦之日所暇为也又蜀之文人时尤不竞譙周郗正等辈槩之词赋咸匪所长亡论武乡未暇即欲有事焉未有可以肩草创之能洪润色之寄者也惟是魏吴制作流传迄今才流艺士簧鼓笔端动以昭烈武乡夷诸僭窃顺逆邪正郁而勿彰余甚憾之昔陈寿三国帝魏先晋紫阳一正其谬称快千秋不佞占毕词场余二十载于乐府杂调颇覩一斑每读鼓吹饶歌至缪袭韦昭傅玄诸作不胜搯腕至欲鼓而攻之噫彼各自尊其主势则宜然百世之后是非大明而操管握觚之俦從事乐府惟齐梁月露冶艳相沿迄未能一厝意于此余则何敢以谦让未遑也爰效缪韦诸体为蜀汉饶歌曲一十二章上以昭烈间闚戡定之绩下以明武乡夹辅尽瘁之忠即藻绘方之诸家未当鲁卫而理直义形据事陈词羣嗥自废忠臣志士之愤或赖此其一雪矣夫（宋无饶歌宋景濂尝追补之惟后汉独缺云）

帝车见

昭烈甫髻舍东南产奇树五丈余童童若羽盖望气者咸属心焉为帝车见第一

帝车见涿鹿墟童童立五丈余千灵卫七圣趋扬金支翼翠旗雨师道风伯驱气如龙殷里闾真人起握斗枢奠汉鼎抚皇輿炎精曜火德嘘亿万载帝方隅

顾隆中

先主屯新野三顾诸葛亮于隆中明良之盛夔絶千古为顾隆中第二

顾隆中一顾再顾三顾何從容千秋载觀明扬风君臣契合鱼水同莘野币交汤匪躬渭川一见罗非熊何如三顾勤隆中惜哉炎烬嘘残虹创业未半中道终三分鼎足宁称雄

克老瞞

曹操取荆师百万而东先主命诸葛亮谕权发兵大破操于赤壁为克老瞞第三

克老瞞厥功不可量瞞挟天子令四方以暴如虎贪如狼既定荆州下长江并兵八十三万强凶威所指横以张所触者碎当者亡遣军师亮谕孙权权奉命发兵助我屯江干桓桓烈炬战舰轰将士大呼冲敌坚贼兵百万尸如山操走乌林四海安

权进妹

既破操屯荆权慑大威诡媒缔好为权进妹第四

权进妹托同仇外戚内疎谐孙刘包藏祸心蓄愆尤床帷甲第图淹留戈鋌矛戟纷相求帝握大机与神游与神游众叵测刘郎欢孙郎泣周郎唇干口燥呼不得以头抢地长太息千秋齿冷笑吴国（史称瑜令权离间關张等临歿复以为言云）

定两川

成都底定遂图汉中馘渊驱合魏操鼠奔爰建大号即帝位为定两川第五

定两川皇图赫赫帝业安成都破竹万姓欢壶浆夹道食以箠西指定军夺前山夏侯来争馘斩渊馘斩渊众大崩合也弃马亡心魂操慑首鼠抱头奔抱头奔两川一顺天应人即皇帝位新万国

讨汉贼

关侯破襄围樊风动华夏操震怖欲奔权帅贼党蒙逊袭荆州汉事遂坏先主亲征权军于猓亭为讨汉贼第六

讨汉贼屯猓亭屯猓亭皇赫斯怒以亲征嗟关侯率众围樊城七军夜滄师徒崩操慑大威如雷霆贼权惴惴怖且惊怖且惊谋吕蒙逞虐焰乘奸凶为鬼为蜮与蠓遂亡荆州丧大功踰月蒙死尸流虫皇赫斯怒离巴中离巴中以亲征破秭归震夷陵蒙贼既死逊贼复兴嗟嗟昊穹汉事坏垂成

渡泸

丞相亮受遗辅政五月渡泸羣夷格心式归大化为渡泸第七

渡泸师徒一何劳五月盛暑深入不毛托孤寄命予惟伊咎陶劳实在予予曷敢逃五月盛暑深入不毛获彼大酋以令羣豪七纵七擒俾返其巢众慑天威永戴大朝振旅而还徒御弗号雍雍旆旌肃肃羽旄文德诞敷爰格有苗千秋两阶载觀唐尧

祁山

丞相亮将图中原上表出师三郡响应魏人震恐举国奔命为祁山第八

祁山出汉贼惊创业未半先帝崩丞相匪躬夜弗宁上表师东乡征卒徒十万如
风霆潜张箕谷为疑兵身率大众屯街亭三郡响答如流星惜哉马谡毁垂成毁垂成载
出军王双梟郭淮遁拔武都阴平魏大震

馘张合

司马懿帅众来攻命魏延等逆击大破之馘其将张合于阵魏人丧气不复出为馘
张合第九

馘张合在卤城蜀人欢忻魏震惊魏兵百万乘蜀营司马披甲仍先登我师一出殲
长鲸卒徒贾勇懿大奔积甲三千若丘陵司马匍匐亡旄旌贼徒合追木门万弩射合褫
合魂馘之不异鸡与豚桓桓八阵孰敢婴所当者破击者平如汤如武天下无敌十一征
蜀如虎

贼坚壁不战使以巾幅遗之懿辶感受焉魏众咸曰公畏蜀如虎奈人笑何为蜀如
虎第十

蜀如虎师甚武熊罴十万下天府仁义礼乐为盾櫓奸雄闭穴气销沮甘受巾幅呼
老姥嗟嗟懿如鼠亮如龙蜀如虎

五丈原

师上五丈原畊者杂于渭滨三代节制之师至是再覩为五丈原第十一

五丈原驻三师三代以还仅覩兹滨渭杂畊军无私刍粮百万饶余赍中原克复功
须斯功须斯定关洛灭魏斩叟懿殛权混一四海兴礼乐

余威慑

大星殒亮卒师魏众来追我兵反旆击之懿魄夺反走为余威慑第十二

余威慑走仲达胡天弗吊丧诸葛大星煌煌殒天末我师反旆丧不发魏人欢呼夜
来蹶鸣金展帜雷电掣懿也狼奔胆欲裂千秋壮士赞诸葛死诸葛走生仲达

少室山房集卷二

●钦定四库全书

少室山房集卷三

（明）胡应麟 撰

○乐府三十首

拟汉郊祀歌十九首

练时日

练时日候阴阳郊圆丘祀明堂焄哉蒿荐上帝灵来思思弗替灵之驾六飞龙天门
开誅九重灵之旃翼神鱼乘罡风载行厨灵之裳曳三光烂虹霓象玄黄灵之佩建苍玉
锵太虚答穷谷灵之下赴闾阖洋洋如走六合灵之歆稷用登告特性报维馨灵之留驻

苍虬纷万舞结绸缪灵之往遗胎鬻伊若思企余想奏咸池舞韶箭缤纷哉灵之乐臣八荒馭九夷岁千亿灵之贻

帝临

帝临中央以运四方苞孕万彙协和三光厥服载黄厥数载五克配上帝维我后土皇皇后土德周遍咸百谷告成大有斯年

青阳

青阳载临万物敷荣勾萌甲坼蠢动含灵雷乃发声云行雨施大造之仁品彙华滋跛行喙息繫以畴息东皇太乙莫匪尔德

朱明

朱明烨烨品彙嘉悦鲜洁齐均以莫不达祝融司造熏风维时皇人法天南面象离万物相见茂昭大夏昭告昊穹百神来下

西颢

西颢金方蓐收是秉卉木变衰霜露凄紧既蓂既穠我稼我苗实颖告成硕彼东郊爰馨黍稷殷荐上帝于亿千年永矢弗替

玄冥

玄冥水伯载司寒沍殒霜杀草昆虫闭户北风宵厉飞霰昼零木脱水涸雷蛰无声岁运既徂阳和在候万寶既成敢告明后

维泰元

于维泰元象帝之先纲纪三才遍周八埏皇皇天地畴阖畴辟于维泰元潜运无极风雨雷露维日月星咸若其时克顺克成胎卵湿化生育孳遂灭除灾凶增长福艾四序既宜八表既安孰司其柄于维泰元嘉牲烨烨陶匏涓洁聿来骏奔灵爽斯达以莫不虔以莫不馨元化網緼泰阶底平

天地

维天维地协尊并巨暇余一人六合和豫皇皇斋宫穆与神通臣邻景从肃肃雍雍报圜丘兮祀后土千童罗列讴且舞曳击笙鏞鸣琳球神如有知俨来游大小诸秩咸敬厥职整齐服章骏奔翼翼羣公秉德毋怠毋忽大君恭默式于列辟降天神兮下地祇朱雀为驾苍龙旗勾陈前导屏翳驰长剑幼艾纷陆离流商刻羽歌咸池神飙击穀河宿移箫韶九成鳳来仪皇人万寿登维祺

日出入

日出入旻谷扶桑间一何迅且疾百年若电光四序如风飘祝融驱火轮蓐收乘斗杓羲和掣神鞭玄冥扇狂飙安得驾六龙游遨遍八极长生不复死永永天地毕

天马

天马徕自渥洼度月支径流沙天马徕以蹠躩骨杈竒汗维血天马来骥为友丧骊黄牝与牡天马来蹶浮云日千里空而羣天马来服帝闲从法驾鸣和鸾天马来兆有德

瑞万方景四国

天门

天门开辟九重上帝居百灵从瑶为台璇为室枢紫贝牖金碧吐望舒宅曜灵建雷鼓树霓旌左苍龙右白虎守飞廉卫玄武灵光被六合周烛万景洞九幽励精诚荐嘉藻永如期锡难老灵烂烂兮载扬光清飙激云下羽■〈施，童代也〉牵牛织女行七襄蛾眉稚齿纷君堂灵目成兮悦而康合祝敌兮陈笙簧天门呀然豁扶桑双翼乘风朝紫皇揖西王母携东方食蟠桃实乘乘黄周歷八紘度九域吐纳真精戏无极

景星

景星见祠神鼎载出煌煌赤文以播有德经纬虹霓屈蟠蛟螭魑魅魍魉莫能逢之我鼎爰获我号爰建以祀汾阴光我大汉巍巍夏后锡此实劳阅歷商周肇见我郊敢告上穹肆逮下土作乐象成百兽率舞享帝享亲以莫弗歆甘露是凝昭我万龄

后皇

后皇降休介我景福以玄以黄黼黻章服靡迩弗洽靡遠弗蒙亿万兆庶视此成功斋房

斋房三秀柯叶九茎煜煜皇皇太和是蒸亭云烂霞嘘日月精句曲之天金液玉英羽驾罡风八翼上征春曲灵苗维王国祜于铄我皇禩亿万征

华烨烨

华烨烨黍载馨延庶旄驻翠旌神之来七圣俱虹为马蜺为车神之来百灵萃风为裳水为佩神之来荐嘉豆八珍辐众芳辘神之来肆长筵雷大鼓鸣钧天何以休神之留赤鳳至黄麟游何以豫神将遇庆云见甘雨澍躡鹿卢綦星辰佐昊穹佑下民酌斗杓和沆瀣揄长蛾拥幼艾日驰精月扬光烂昭昭乐未央昆仑墟瀛海滢以余归浩无际

五神

维五神五岳精德盛大包羣灵佐东皇赞太乙报圭璋达琮璧奠桂醕以椒浆牲肥腍祓斯皇女巫进姪以丽回云旂驻霞帟神偃仰以徘徊歷明堂升帝台维光华嘏大汉年岁登永嘉荐

朝陇首

朝陇首游白麟显光华（字说麇之来也光华不可正视从鹿从文）辅一人灵昭昭庆万国肇皇仁祗帝德八蛮共四夷王母怠荒纳嘉祥嬉余藪服余辂浴和风沐甘露左苍龙右紫鸾文狸后赤豹前图尔形辑尔瑞五千歷视兹岁

象载瑜

象载瑜粲六牙至万里自流沙入天闲服輿阜扈法驾彰大造翩翩哉赤鸿来超虞罗翔玉台翻五文丽以鲜衔灵芝咽醴泉兆嘉祥禋景福八荒来四夷服

赤蛟

赤蛟下苍龙游灵已醉不可留赤蛟翔彩虹馭灵欲归不可驻灵之逝观玉台戏闾

风宴蓬莱灵之升上无极挟宇宙傍日月灵般般亦享余下神雀降天厨灵殷殷肆余佑
亿万祀永以寿

蒲梢歌

天马来兮涉玉门服天闲兮朝至尊驾余车兮上昆仑阅万国兮超乾坤

太乙歌

贡骅骝兮自太乙若灭没兮亡其一以龙为驹麟为匹歷块万里昭帝德

灵芝歌

孕三秀兮毓灵芽承月精兮映日华烂辉光兮发云霞服紫茎兮咽胡麻乘赤霄兮
上无涯

琴操十一首

龟山操

龟之峻嶒兮望鲁之疆龟之凭陵兮蔽鲁之邦迟迟余行兮载贖于筐余怀以怍怍
兮胡为去父母之鄉

猗兰操

泛泛崇兰在彼空谷以芬以芳达于平陆达于平陆大国之香薄言掇之以遗明王
以遗明王畴适逢世岁月行暮芬芳将逝芬芳爰逝羌不可留忡忡我心曷维其忧

履霜操

嗟嗟皇考放余于野兮凜凜严霜雨雪交下兮雨雪交下夔弗可留兮念欲自明我
维君忧兮我维君忧逝将安适兮世岂有兹无父之域兮无父之域余曷以居兮载载上
天罪实在子兮

残形操

梦之憧憧兮厥形维狸形之蛩蛩兮胡首则遗茫茫吉凶兮畴克我期皇皇昊穹兮
庸豁我疑雉朝飞雉雉于田号维雌则随暮而无妃兮入而安归忧心怍怍兮将以告谁
援琴而歌兮以写我悲

采芝操

煌煌紫芝三秀五茎郁郁崇冈巃嵒眇冥爰卧其巔爰掇其英颜色丽鲜以敷以荣
身轻翼舒游六合外驷马高盖翳以畴赖巢哉由哉寤言弗猜唐哉虞哉亦已焉哉

秦女操

穀之襜襜兮可裂而朽兮屏之岩岩兮可越而走兮剑之嶮嶮兮可捍匕首兮

八公操

煌煌八公下帝庭兮贻我大药登遐龄兮婴儿姪女相和鸣兮飞翔九垓羽翼成兮
金支翠旗夹路迎兮万年不死居曾城兮俯视六合徒营营兮朝生夕枯如蠓螟兮

思归引

维鹿有由兮维鳩有仇兮尔徒余囚余宁尔留兮

别鹤操

羽翼双飞兮中道当乖汝翔安适兮余居曷谐彼伎则害兮为家庭灾汝淑则慧兮曷明余怀

牝晨操

维牝无晨兮尔胡以鸣兮维尔之鸣兮家胡以宁兮牝兮鸣兮鸣兮晨兮家兮庭兮怍兮营兮雷兮霆兮

少室山房集卷三

●钦定四库全书

少室山房集卷四

（明）胡应麟 撰

○乐府二十五首

王子乔

王子乔玉笙霞佩长飘飘王子乔玉笙霞佩长飘飘下游来王子乔缙山万桃花白日行逍遥倏忽上浮云腾身还九霄足蹑一双鳧虚空以游遨顾视世间人勿复劳相招蓬莱之水清且浅金银楼殿一何峩崹三神之山连巨鳌仙圣亿万计骖鸾跨凤纷纷而来朝苍龙为我车乌鵲为我桥道逢王方平拍手弹云璈麻姑十八九红颜髮垂腰要我擘麟脯进药长生瓢顾视世间人勿复劳相招今上神圣海晏河清曷不跨双鳧来覲汉家朝凝图奉策寿与天迢迢下游来王子乔

桂之树

桂之树桂之树轮囷偃蹇寂寞山之阿山阿者谁被薜荔带女萝淹留桂树枝以婆娑以婆娑岁月冉冉而蹉跎攀援桂树枝行且歌瞻彼桐栢之山桂树丛生其上高嵯峨高嵯峨吾欲采其实荫其叶憩其柯白日将暮熊罴虎狼夹路当奈何白日将暮熊罴虎狼夹路当奈何

猛虎行

南山有猛虎白额斑斓而锦文南山有猛虎白额斑斓而锦文目睛铄雷电齿牙决浮云出入乘风飙威加百兽熊罴豺狼狐兔惕息莫敢与共羣（一解）山头絶樵采山底无四邻终朝攫取行旅食黎氓妇女小儿骨骸若丘山腥秽不忍闻（二解）谓虎汝胡不仁胡不学彼驺虞鳳与麟百兽有恒食胡汝好食人汝胡太不仁吾将上诉汝诉汝司命君（三解）嗚司命君不汝罪傅汝角张汝翼砺汝爪距锋以銳俾汝飞而食食人万里外（四解）食人以足天道好还忽遇洛阳三河少年贲戎发机卞庄奋拳饮飞鼓刃裴旻控弦击鼓鸣钲张网树旗有角曷抵有翼曷飞割裂其肉寝处其皮以首承溺为百兽嗤永戒后人为恶勿长为善勿疑彼不余信请视此诗

乌生八九子

峩峩秦氏高楼桂树轮囷出云间上有一双头白乌毛羽何摧残喙彼头白乌生八

九子养雏坐树端八九子乳哺亦诚难朝不得食夜不得餐八九子羽翼以长成各各飞去忘来还啣彼头白鸟空腹坐树端饥饿顿欲死泪下如流泉啣彼秦氏少年子怒激壮士肝白玉为琯弓黄金为弹丸一发中羣雏魂魄飞上天八九子魂魄飞上天啣彼鸟不反哺谁当怜

西门行

綦隆世化日舒玉尊肴醴罗前除东邻子燕赵姝清歌妙舞扬罗襦贤豪过驷马车良辰日吉心相娱人命无百年日月同斯须胡为自约束怅怅常独居岂无仙人王子乔驾六飞龙游太虚岂无仙人王子乔驾六飞龙游太虚天地会有终千秋万岁后仙圣同凡愚不如命我友撞钟擗鼓鸣笙竽

东门行

出东门步且吁时世混浊难共居我欲乘长风东游扶桑西瑶池挥首向容成亿万不相疑归来告妻子牵衣蹬足长歔歔长歔歔上有垂白亲下有黄口儿孔雀东南飞十步五步不相离君今独行安所之君今独行安所之不如守穷巷鸡鸣狗吠相因依不见伯夷叔齐采西山蕨薇荣名被百世难等夷

顺东西门行

岁行暮时既昏设我肴醴开玉尊乐亲故延嘉宾轩车杂沓徒在门列五鼎罗八珍甘嘉溢口呈芳新饮麻姑招洛神擘红虬脯羞黄麟琴瑟和钟鼓陈樽菹六博何缤纷长袂掩羞蛾颿纈歌随风飘青云良夜半星河倾主人未醉客尚醒二难具五福并亿千万岁延遐龄

燕歌行

严霜萧萧白露溥三星在房月在天空闺思妇愁城南起看北斗何阑干楼头旅鴈鸣飞翰口衔尺书下云端同心为结缡瑶函下有相忆上加餐何以寄情双玉环念欲报之青琅玕山高水长浩漫漫我欲从之途路难罗帷倚灯曙不眠秋风飒飒吹重关安得送我置汝前

平陵东

平陵东气郁葱大雷电天以风启金滕告元功谁其辅者安汉公安汉公坐明堂发天兵下咸阳讨贼盗捕乱亡贼盗乱亡畴则使东郡太守翟氏子不量其力罔畏死天兵桓桓孰敢当所击者破御者殃烟尘扫荡清一方颈系诸累俘未央君不见翟义公今日系安汉公明日帝彼已之子甘若芥天鳳改元易汉制白水真人从东来昆阳百万成沙灰坐倚斗柄临高台胡不再开金滕谕九垓胡不再开金滕谕九垓

鞠歌行

携玉女邀僊童天门詆荡开九重揖金母拜木公躡蹻鹿卢乘罡风飞廉导屏翳从周游八极骑茆龙乘元化入无终千秋万亿齐乔松

上留田（用本调）

噫嘻人世大难（上留田）贵贱贫富相悬（上留田）富贵阡陌绵延（上留田）
）贫贱家无一廛（上留田）四体衣襦不完（上留田）毛翻凋疎摧残（上留田）
）气息恢恢自怜（上留田）赴诉司命君前（上留田）我独胡为蹇连（上留田）
）夙生期运致然（上留田）饮泣吞声何言（上留田）

董逃行（用本事）

东京城郭煌煌（董逃）冠盖罗列成行（董逃）天祸汉国彷徨（董逃）白昼
兵戈夺攘（董逃）刳制天子侯王（董逃）千乘万骑北邙（董逃）焚烧廩庾糗粮
（董逃）郿坞黄金作墙（董逃）天道好还有常（董逃）司徒祓除不祥（董逃）
）首恶刳胸裂肠（董逃）膏血燃灯道傍（董逃）百代箴规莫忘（董逃）永戒贪
饕陆梁（董逃）

悲歌

巫山之高淮水汤汤我欲东归洛大河无梁船道阻絶登高以望故乡故乡不可见
熊罴虎狼夹路而成行狐兔失羣我与为侣日暮途远傍无旅舍悒郁谁语悲风动地阴
云四起仰天悲歌泪堕不能止

前缓声歌

缘木求鱼譬彼入山采珠意气虽勤奈此道路殊总角相亲同室共居君心有他如
隔里闾身非草木根株他人有心忖度在余欲见子都乃值狂且嗟他心之人虫鸟之弗
如

蛺蝶行

飞来双蛺蝶羽翅一何翩翩掠春风而游东园彼姝者子朱为颜年十四五被发齐
两肩忽来覩此双蛺蝶心中以惨然春风浩浩岁月行蹉跎我欲捉蝶以婆娑蝶以双飞
奈蝶何

满歌行（感事作用本调）

嗟人世茕茕若过隙驹百忧填中当复谁与娱忆我年少时慈亲大悯惜中遭荼毒
展转愁闷岁以为日家室荆榛牝鸡夺晨罹此悍虐伶俜莫可告人彼妇之恶为鬼为蜮
潜行昏黑无从方物彼妇之恶为虺为蛇造作语言鼓吻摇牙慈亲积戾奄忽弃背黄口
嗷嗷壘埋山椒捶笞炮烙凶威灼铄姬妾彷徨进退错愕犹复蚤夜思维图覆厥宗仰面
叩天无地自容密计深谋狞不可近风波起咫尺白昼为陷弃而家弗殃彼念弗忘而家
弗祸彼业弗堕吞声饮泣以诉司命君彼司命之君杳若弗闻悍妇持门户胡以事严亲
严亲七十余风烛暮逡巡安能舍之远去去适沧海滨忧来起中夜揽衣不及晨皇灵会
动变沴气干天阊大雷电风雨永戒后人

两头纒纒诗二首

两头纒纒少嬪眉半白半黑枰中棋逼逼膊膊仓鼠驰磊磊落落道傍梨

两头纒纒麋鹿角半白半黑檐前鹊逼逼膊膊林鸦啄磊磊落落荆山璞

五杂组诗二首

五杂组中天霞往复还贯月查不获已遇龙蛇（古云岁在龙蛇贤人嗟）

五杂组芝为盖往复还咸阳塞不获已见襜襜

公无渡河三首

公无渡河大河扬波长鲸如山鬣鬣峩峩

公无渡河一苇奈何河水万丈出没蛟鼉

公无渡河谗言孔多不见申屠负石投河

枯鱼过河泣二首

枯鱼过河泣宛转沙泥侧神龙处九渊蝼蚁安能测

枯鱼过河泣定作盘中腊愿觅斗升水为君赴溟渤

少室山房集卷四

●钦定四库全书

少室山房集卷五

（明）胡应麟 撰

○乐府三十首

短歌行（五解）

日吉时良嘉宾满堂星河在天蟋蟀在房（一解）

欢娱易终白发苦蚤金罍玉尊长夜倾倒（二解）

舞袖纷纭兰膏载焚卫女齐姜左右如云（三解）

有美一人稚齿倩盼携手同车光华粲粲（四解）

翩若游龙遨嬉八埏荡意平心永宅大年（五解）

善哉行（七解）

来日大难肠干体疲今日不乐岁月如驰（一解）

访我亲知总角燕好踰陌度阡以赠芳草（二解）

何以延宾清酒百壶何以销忧五木擗菹（三解）

美人满堂巧笑便辟更长烛明今夕何夕（四解）

南箕在楹北斗在檐星河陆离肴醴泛澜（五解）

忽逢安期馈我灵药主客再拜洗盥酬酢（六解）

共饵大还身轻翼舒乘云御龙游戏六虚（七解）

日出东南隅行

日出东南隅照我陌上桑峩峩秦氏楼佳丽郁相望飞甍百余尺高栋五丈强琉璃
为门限桂树为中堂窈窕楼中女容华世无双提篮向朝日采桑大道傍腰悬琼瑜佩耳
缀珊瑚珥首戴金雀钗足蹑双凤凰吴丝作中襦蜀锦充下裳紫绮缘领巾绿罗随风扬
借问汝何名罗敷秦女郎借问汝何居第宅连明光问汝适何人家令殿中郎问汝年几

何十五正相当行者观罗敷五步一彷徨居者观罗敷耒耜相扶将赵王暮登台挟瑟奏
笙簧侍从数百人冠盖何煌煌举头见罗敷顾盼自生光遣吏前致辞可得充后房昔为
千乘妻辛苦行采桑今为万乘后与豢同匡床罗敷仰头答君侯一何狂国主位虽尊二
八盈高堂家令位虽卑糟糠亦难忘尊卑各有分贵贱各有双君非秦王子妾非邯鄲倡
名都篇

三河聚年少五都盛材雄倾赏灞上水结客咸阳东呼鹰过长乐走马游新丰左囊
插楛矢右箛弯良弓控弦疾流星鸣镝如追风穿杨竞百步蹲甲洞七重仰面落九乌俯
身拾双鸿万夫为辟易观者盈道中日暮还城郭华筵撞笙铺屏间拥稚齿坐右罗妖童
烹鲜割翠缕椎牛炙黄熊酣歌酌太白慷慨嘘长虹呼卢列明烛良夜未及终酒阑拔剑
去斜月犹朧朧

美女篇

长安出佳丽宛洛多名姝游戏芳春日踏青岐路隅银环约素手玉佩飘华裾丹霞
错绮袖惠风扬罗襦悬腰灿火齐充耳大秦珠珊瑚间四体寶钗直万余扬音若蕙兰吹
气胜芙蓉吴姬亮非偶卫女焉得如众观共叹息日暮罗长衢居者为忘殍行者各踟蹰
何来少年辈三五乘骊驹倾城靚明艳荡思欲忘躯岂无千金聘谐此百岁娱畴为伯鸾
匹偃蹇宁独居寄声侠游子相望徒区区

白马篇

白马谁家子扬鞭大道傍银鞍耀明月寶剑如秋霜十五隶金吾二十拜龙骧百千
聚游侠百万要名娼斗鸡入南内挟弹游平康京兆不敢呵司隶为彷徨征尘际天起边
烽达长杨长揖大将军慷慨事戎行横行絕大漠虎啸临穷荒矫诏袭楼兰飞书定朔方
左射中休屠右盼伏中行兵威慑絕塞奏凯向咸阳献俘诣平乐赐第连明光归来顾少
妇挟瑟宴华堂

升天行

九州岛非我宅五岳不足居乘蹻蹻浮云周览万里余朝游昆仑顶夕息瀛海隅举
头见三山城阙正透纡圆峤耸巨鳌方壶戴神鱼西行谒王母置酒行天厨灵妃酌金液
玉女吹笙竽燕乐未及终飞腾起太虚骖龙叩玉阙驾鳳翔灵旛长揖问轩辕俯身拾帝
车明霞为我佩素霓为我裾飘飘谢尘世万岁同斯须

仙人篇

我思忽不怵投袂起行游担簦蹻芒履去上嵩山丘王屋一何高太行亦阻修危峰
冠浮云巨石横道周青松数十围枝叶自相樛上有千岁禽下有万尺流矫矫浮丘公吹
笙跨灵虬投我不死药携我升蓬丘丹霞起素壁紫雾开琼楼横飞絕四海高举临九州
岛顾视世间人局促安可留朝生等舜华夕死同蜉蝣

相逢行

相逢狭路间骑从一何都借问来者谁中尉执金吾银鞍耀白日寶剑佩昆吾英声

走剧孟勇气凌灌夫西征破大宛北顾摧匈奴去年出湟中一战定边隅归来报天子赐第连皇都黄金为门限白玉中堂铺堂上何所有七尺红珊瑚十千治晨殄百万当呼卢乐工高渐离苍头冯子都长妇字莫愁中妇名罗敷少妇何名字顾盼日当垆弟兄八九人各各列当涂炙手势可热声焰絶代无行人但引避无事劳追呼

门有车马客行

门有车马客意气何扬扬千金饰玉鞭百金寶剑装传呼动里闾顾盼自生光长妇出迎客问客来何方客言自幽蓟乍者发渔阳道逢远征人寄书来故乡开缄竟何道细书八九行昔为丝与桐今为参与商参商各异地羽翼安得双长跪再拜客邀客暂徜徉烹庖出丰膳高宴罗酒浆愿为传语欢努力莫相忘

遠游篇

端居厌尘世飞步凌大荒左挟青龙驰右骖赤豹翔西游翳若木东望穷扶桑竦身昆仑颠息驾玄圃傍道逢安期生托手共徜徉携我黄金台坐我白玉床太虚为我宅沆瀣为我浆俯仰竟百世焉能辨彭殇

结客少年场行

长安富游侠骑射出名都飞扬结壮士慷慨聚屠沽百千市骏马十千装轳朝游上林苑暮宿卖酒庐赤丸报司隶白刃戕金吾笑傲金张第叱咤许史途盛年谅难再壮志不可孤鸣弓向张掖插羽飞平卢左发摧焉耆右发中休屠死当画麒麟生当雄万夫

筵篋引

良时率已迈蟋蟀鸣我床眷言召亲友旨酒罗中堂东邻饰妖女南陌招名娼绡衣随风举罗袜自飘扬秦声被金石楚曲流宫商清谈蔚霞烂妙舞若云翔颓阳倏西落明月出东方飞轩歷层囿改席临洞房华灯吐芳焰列宿澄清光齐心怀令德四坐咸尽觞芳辰谅难再嘉会讵可常人命一朝尽奄速如秋霜乐哉今日宴百岁遥相望

从军行

边尘起西北敌骑日相望仗剑报明主长揖辞故乡征行渡沙漠慷慨隶戎行羽书昨夜至匈奴寇渔阳吏士若云屯我兵精且强扬旌耀汉月吹角飞边霜一战摧月支再战歎名王弯弓月在手鸣镝星流光勒功燕然石传檄瀚海傍归来拜骠骑恩宠冠长杨

置酒篇

端居观大运去日常苦多幸有盈尊酒宾朋各来过佳人出后房被服绮与罗纖腰斗妙舞皓齿扬清歌轻飙荡浮云华星烂明河好鸟鸣高枝文鱼翔素波百年若朝露白日驰山阿乐哉今日宴不饮复如何

君子行

呜呼大圣人世或见疑猜周公被流言仲尼困桓魋贤材实累身忠信为祸媒苍蝇点白璧蚊蚋嘘风雷麒麟匿郊藪朱鳳成摧颓仰天再叹息沈忧热中怀扰扰蜗角争切怛劳形骸千秋万世后愚智同尘埃

豫章行

螭蛇自有翼未若应龙潜蠖屈重渊中润泽被八埏宣尼浴沂水武仲巢箕山于陵
饿仲子通国称其廉

孤儿行

步出北郭门荆榛夹路齐悲风起白杨叶落何凄凄道逢孤儿卧肌肤若螭蛭伶俜
瘦皮骨却立忘东西对我但长跪气咽不能啼自陈无罪过父惑后娶妻夙昔千金爱慈
母娇提携高堂倏背弃妖牝鸣晨鸡风波起骨肉咫尺如秦齐终朝拾橡栗薄暮食黄虀
榘笞动盈百卒岁无领绋弃置田野间冉冉白日低昔为掌上珍今为浊水泥千秋履霜
辙永永戒前蹊

白头吟

结褵奉明德精诚决浮云死生誓同穴富贵安足论一朝事势异缅邈若越秦风波
起对面谗慝来相仍盛衰捷反掌爱憎一何频昔者寒炉火今为甑下尘还君锦绣段着
我苧罗裙念彼求凰曲恨恨不能陈

斗鸡曲

翩翩五陵少挟弹游咸阳万钱饮侠客千镒招名娼走马东郊外斗鸡大道傍两雄
昂然出五色丽且光黄金介白羽绿沈铸玄裳双眸炯相射四距翼而张凭陵壮夫胆激
烈猛士肠俱呈庆忌捷竞逞黑卵刚犴牙攫豹虎怒臂撑螳螂先声骤恫喝后举剧披猖
朱冠碎鞮鞞彩颊掀琳琅宁论北宫挠肯避平阳创回身角伎巧耸翮驰精芒初交气方
盛再合势弥强捐生赴仇国效命临战场纵横掣惊电■〈足必〉跋挐秋霜摧锋若御
寇逐北如擒王干旄助踊跃钲鼓随腾骧天地黯无色尘沙剧飞扬欢呼压麇市登眺摧
山冈中原逐秦鹿大陆豨天狼雄雌久未决转战益慨慷迟迟白日堕两敌为彷徨安得
鲁阳刃一挥返扶桑

三妇艳二首

大妇拂花笺中妇理冰弦小妇学弹棋夭桃斗春妍良人定睛觑谁当最可怜

大妇贴花钿中妇理红妆小妇画蛾眉含娇踏春阳良人试垂盼良夜殊未央

广三妇艳四首

大妇出姬姜族望不可加中妇出燕赵容色鲜如花小妇出吴越盈盈娇浣纱丈人
但安坐四海方为家

大妇字若兰深闺理流黄中妇字罗敷陌上行采桑小妇字莫愁盈盈居画堂丈人
但安坐满目饶春光

大妇出迎客二十颇有余中妇起持觞二九曳罗襦小妇坐鸣箏二八正敷腴丈人
但行乐南面安得如

大妇年十九高堂坐擗蒲中妇方十七明琼角呼卢小妇正十五青春独当垆丈人
但行乐何羨执金吾

续三妇艳二首

大妇处华堂玉貌锦衣裳中妇处高楼玉指拨箜篌小妇处金屋玉簪髻初束白日欢未足良夜更秉烛

大妇妆初成一顾倾人城中妇妆乍毕一盼倾人国少妇妆未己一笑倾人主有酒清且旨交加学连理

反三妇艳二首

大妇吟白头沟水东西流中妇歌懊侬红颜空自红小妇咏团扇辛苦郎自见莫夸三妇艳丈人涕如霰

大妇气食牛千唤不回头中妇愁绪萦敢恕不敢嗔小妇诉卑贱终朝泪洗面莫夸三妇艳丈人肠欲断

少室山房集卷五

●钦定四库全书

少室山房集卷六

（明）胡应麟 撰

○乐府十八首

远别离（七夕感事作用李白体）

远别离古有之不见牵牛星荧荧河汉湄黄姑弄杼轴锦石为支机招要自成匹永永不相疑终朝卧闾阖折花事游嬉逡巡怒上帝立遣东西驰天孙尚尔尔世人了可知酌君一杯酒听我歌别离君不见重瞳堕地气食牛扫除六合朝诸侯美人娇爱置金屋彭城着绣夸遨游时危势屈走垓下楚歌四面兴仇雠蛾眉倏忽化黄土拔山力尽乌江头君不见隆準布衣奋三尺蹙项诛秦四海一淮阴蒞醢百虑空掌上娇儿夜啼泣回身楚舞涕泗横黄鹄摩天招不得未央美人居厕中地下谁呼宠姬戚古来豪杰流往往称二子裂眦摧天关五岳任驱使徘徊一妇人竟作别离死何况蚩蚩辈畴能不罹此房帷仅咫尺陷窞如丘山不信别离苦焉知行路难荆榛莽阨对面生尤愆逝将舍之去去去适荆蛮荆蛮非我乡念欲还长安载歌别离曲使人叹息摧朱颜远别离何匆匆浮世狭难为容胡不醉我美酒三千钟蒲萄之酿紫花泼绿尊翠杓春溶溶两手持蟹螯拍浮玉缸中落叶有时合明珠有时逢人生把酒当尽醉回头万事成虚空项刘两竖子齷齪非莫雄天孙与河鼓儿女徒怵怵二妃从游已百岁湘水底事流啼红屈原李白俱谩语谗浪分明欺乃公大人虎变挟宇宙傍日月驾双飞龙黄童姹女永相逐周游八极乘罡风安能低眉折腰局促相若辕下驹守樊笼远别离何匆匆安能低眉折腰局促相若辕下驹守樊笼（沈存中云二妃从游之时齿近百岁词人率以女子待之非实事也）

饮马长城窟

饮马长城窟长城多白骨白骨纵横如雪山风吹飞沙马不前借问何人骸暴露置其间云是当时秦王筑城卒被驱什九亡黄泉膏血饲蝼蛄肌肉餒乌鸢惟有白骨存安

能复持还歇马上长城覩此重辛酸令我中气咽徘徊不能言男儿立功名介胄辞上官
横行万里外勒勋赴燕然黄金络马头白玉饰马鞭胡不奋长剑平沙漠歎服诸部落勒
石燕然入长安生封定遠侯冢墓象祁连胡为老死长城下白骨支撑玉门关黄榆翳衰
草一望徒漫漫子孙不复知悲鸣裂肠肝肠肝痛欲裂子孙无奈何至今长城下白骨年
年多存亡信有命壮士悲蹉跎阅彼长城卒聊作长城歌长城歌歌莫哀秣余马登轮台
轮台浮云极天开我马玄黄以厯燼当时班定遠鬢发焦黄埃皓首博侯封慈亲溘蒿莱
其人至今亦白骨定遠之荣安在哉何异长城卒埋鬣长城隈不如驱我马舍之归去来
五花一掷换美酒竹林痛饮忘疑猜双眼瞢腾向天白飞行八极骑龙媒

登高丘而望遠海和李白

登高丘望遠海海水何茫茫齐州九点渺空阔东西日月悬扶桑扶桑宫阙连蓬莱
白虹照耀中天台六鳌踰负圆峤羣帝百千亿万纷纷跨鹤游崔嵬峩岿大舶走徐市
安期一去无时回我笑秦王乏灵骨人言汉武非仙才登高丘望遠海海水茫茫接天回
使我极目心悠哉心悠哉以彷徨何来龙伯人濯足临扶桑一钩连六鳌揽之不盈筐煮
鳌为臠充余粮鳌骨如山今已霜我醉欲卧黄金床呼吸灵和挟三光睥睨汉武嗤秦皇
周行八极还大荒

白纈四时词四首

东园桃李争春阳美人如花簇华堂弯弓舞袖褰罗裳沈香亭北春茫茫东风吹歌
绕画梁回眸一盼神飞扬我醉欲眠黄金床

南原日长蝴蝶飞朱楼画阁临芳池美人含娇拂罗衣歌喉宛转浮云驰流商刻羽
知音稀纖腰起舞光陆离我醉欲罢黄金卮

西堂雨霜胡鴈来中天皎月璫云开纖歌遏云夜徘徊美人击筑秋风哀华阳碣石
俱蒿莱荆卿渐离安在哉我醉欲上黄金台

北风萧萧撼陵谷白雪飘花满平陆何处阳春斗歌曲云锦缠头舞鸚鵡美人修蛾
无疹粟素手垂垂照寒玉我醉欲买黄金屋

虎穴行送曹秀才从军

男儿墮地气压鳌俯拾将相如鸿毛时来拥篲扫六合云霞五色飞宫袍君不见苏
秦微时卓貂泣一朝金印都六国位高金多归故乡妻嫂匍匐趋道傍一家骨肉尚如此
陌上行人谁家子丈夫耻作儿女悲世路滔滔竞青紫酒酣愤歌歌激烈双眼横天日星
裂便从东海批龙鳞更向南山搏虎穴宁能寂寂鸡鹜羣燕雀蝼蚁争纷纷金盘六博饮
美酒匣底芙蓉电光吼来朝挥戈大漠北辟易咸阳万夫走

悲歌行

滔滔百川逝还流夸父逐日不回头秋风鸿雁春风燕河东织女西牵牛牵牛织女
不相见一似秋鸿与春燕人生有钱付酒家何用殷忧涕如霰君不见黄河奔流下太行
鲁阳难返九日光黄金可成脑可补试问秦皇与汉武

长相思

长相思久离别单于台上秋草歇玉帐寒朱旗折三年灞陵梦万古阴山雪边笳日暮起塞门流水无声陇云咽长相思久离别

长相思路行难玉关鸿雁何时还张雾幄卷云鬟青灯夜未灭翠被晓犹寒荏苒红颜镜中老空闺日日望刀环长相思路行难

杨白花

杨白花随风漂泊天之涯深闺无人白日暮金舆玉辇空咨嗟惟有旧时杨柳树月明夜夜啼栖鸦

白鼻騮

逢欢白鼻騮驻妾青丝骑罗带结同心留连合欢被君作干将佩依作莫邪钩雄雌两物巧相遇安眠玉匣三千秋

拟李白蜀道难作梁父吟

抱膝南阳庐明时甘陆沈唐尧倦六合飞书入深林颍川之水咄嗟不足洗余耳拂衣长啸直上岱宗之嵌岑岱宗高高不得上卧龙之叟来相寻邀余憩梁父重作梁父吟我吟梁父君莫猜仰天叱咤浮云开晏婴侏儒忌贤哲二三力士庸堪哀古来封禅之君七十二其人一一俱尘埃请为梁父吟我吟君莫猜梁父中天十万八千有余丈一柱亭亭迥出泰山上■〈石含〉研巖崕独立标乾坤恍若元气浮昆仑龟蒙鳧绎以东诸阜尽培塿纷纭拜伏罗儿孙决眦断虹入荡胸明霞屯手接飞鸟度步学猿猱蹲竦身十八盘象纬渐可扞黄河一线绕山麓徂徕矫首势欲吞鹿卢之躄抟旋撇捩不遑息神人絶顶为我开天门开天门阅仙籍其间似有胡生名谪向金华煮白石朝从天门卧夜坐日观峰峰头望海色灏灏连长空五城十二楼峩峩驾天风天鸡乱鸣不知夕回飙忽卷大海立海水横飞十洲溢滟滟扶桑吐朝日红轮轳辘碾太虚我欲乘之走八极金银台殿咫尺间玉女携余掉臂入掉臂入谒元君呵赤蜺导黄麟右拍浮丘肩左顾招广成神农以还九千九百九十有余帝扬雷掣电纷纷跨鹤而来迎鸟篆鸿章闋灵迹仲尼扞崖怪难识（管子云古封禅文字万家仲尼观之不能尽识）蛟螭缺落狐兔跑对此抚膺重叹息翠华茫茫杳何处四顾中原日无色君不见秦祖龙云亭柴望拥列辟衣冠剑舄如云虹至今沦没尽荒草故物但有当时松君不见汉孝武驰驱栾大延文成卤簿干旄照东鲁东方小儿弄乃公寂寞荆榛翳坏土吁嗟乎秦皇汉武真蜉蝣我今胡为此滞留拂袖行歌下梁父下山竟作齐东游齐东道上逢李白飞扬跋扈心神投鸛鹤之裘五花马一醉五月眠高楼吴钩如霜雪花落纵横眼底无全牛我歌梁父属尔和遥空立降双青虬世人拍手笑轻薄我嗤人世真累囚渭滨老叟太多事行年八十图封侯鄙哉齐国三豎子沾沾一果同猕猴力排南山躯九尺杀身反堕侏儒俦隆中释耒大星殒人间事事当回头头上青丝一朝倏尔变白发九州岛之伯四岳之长如悬疣梁父吟歌莫愁男儿有身睥睨六合追巢由不然淋漓大白扫椽笔阳春百代鸣天球犹胜古来封禅之君七

十二伐功诩德夸蚩尤君不见七十二家文字总顽石汉碣秦碑半颓泐惟有青莲居士
梁父吟万古长悬岱宗日惟有青莲居士梁父吟万古长悬岱宗日

将进酒

将进酒乘飞龙满引大白嘘长虹舜百石尧千锺北斗奉杓南斗从天瓢出沆瀣大
乐鸣笙鏞绡衣万玉女绿发双仙童左拍浮丘肩侧睨容成公百年三万六千日一日不
醉令我行步如龙钟君不见泗上亭长隆準公斩蛇逐鹿驱羣雄鸿门高会割巴蜀肝肠
郁郁长思东结约五诸侯伐楚彭城宫一朝项氏自东至五十六万如飘风荥阳匍匐作
降虜何如饮酒来新丰信陵宾客但墟墓古木荒榛穴狐兔平原毛遂骨已灰黄金之馆
生尘埃何如一笑饮美酒白眼横吞三百杯长安桑落名最古山东秋露清且苦曲米云
安遠难得若下吴兴近堪数世人每病金华甘此酒名高弘正间只今天下贵三白积薪
后者常居前盛衰好恶若反掌时来不得论媿妍太白三闾岂庸俗一醉一醒操行独醉
者骑鲸上九天醒者反莖蛟鼉腹刘伶阮籍双酒狂竹林牛饮称高阳当时颇遭俗子骂
至今百代垂文章今晨何晨夕何夕魚鳖烹熊众宾集觞行瑟作不暂停玉椀银缸兴逾
剧三星在檐河汉入扶桑茫茫日东出安得八骏抟长风烂醉瑶池三万日

行路难二首

君不见东家叟昔日容华今老丑君不见西家翁昔时豪富今贫穷盛衰美恶反复
掌造化小儿剧罔两敝车羸马聊自储荡意平心态欢赏人心险阨如山川行路之难君
所谙有酒盈尊肉盈几明日咸阳过赵李

君不见原上草一夜霜飞净于扫君不见园中花一朝风荡随泥沙男儿快意在行
乐何用营营逐飞藿白日苦短秉烛游玉碗淋漓恣斟酌人心对面隔九疑行路之难君
所知速来就我饮斗酒倏忽华顛壮夫丑

东飞伯劳歌

西飞者燕东伯劳华堂锦帐生蓬蒿少年儿郎轻薄子弃捐比翼如鸿毛咫尺天孙
与河鼓岁岁年年隔银浦一朝乌鹊来填桥犹得相逢话辛苦脂车秣马夜不停漂流南
北如浮萍当时离别勿复道悲风再再来长檠机上双鸾手中线宛转流黄涕沾面铅华
落尽君不见东飞伯劳西飞燕

少室山房集卷六

●钦定四库全书

少室山房集卷七

（明）胡应麟 撰

○乐府五十五首

长安道

长安开大道佳丽壮秦京帝座悬双阙皇居控百城重关函谷气夹岸渭川声冠盖
凌云度轩车耀日行新丰花簇骑上苑树巢莺鼓吹元僚第旌旗大将营狭斜何处是北

里近西清

黄鹄

何处双黄鹄飞来自大荒声传北塞远影落汉宫长咽露过平乐街云入建章谁同
二千石万寿献君王

雨雪

雨雪霏霏下遥知行路难将军金甲重战士铁衣寒落叶边淮尽飞花度陇残城南
有思妇拥被独更阑

出塞

陇首雪花飘征人出渭桥长城屯万骑大碛下双鷗闪月朱旗静穿云画角遥横行
榆塞外一战静氛妖

梅花落

何处边声切迢迢逐暮笳天山飞雪暗万树落梅花度漠边云断飘空汉月斜那能
辽左客此夜不思家

陇首

九月被毡裘征人上陇头黄龙悬塞色白马赴边愁陇坂高无极寒泉咽不流梅花
何处折肠断在朱楼

入塞

九寨燧烟销将军罢度辽前军严阵垒大汉静氛器玉勒飞黄静金戈太白遥塞门
歌舞入红旆暮飘飘

十五卢家女

十五卢家女盈盈胜莫愁冰心持跳脱玉腕拨箜篌拾翠游川上流黄寄陇头生憎
双语燕比翼在青楼

折杨柳

送客灞陵桥娼楼雪未消当垆年少女十五正娇娆柳叶如垂手杨枝似舞腰相看
不忍别折赠最长条

小垂手

锦帐出红绡佳人斗步摇缠头矜稚齿入掌妬纖腰帝子回鸾辂天孙度鹊桥莫嫌
银漏短甲煎彻明烧

征妇怨

去年征巨鹿今岁入卢龙玉塞莺声断银河雁影重裁衣犹忆体临镜懒窥容秋风
起昨夜床下又闻蛩

班婕妤

长门秋已到昭阳欢未终绿苔积永巷黄叶闭深宫啼红祇自惜捣素为谁工惟将
旧团扇寂寂对西风

刘生

刘生何慷慨任侠冠东平五侯前筋借千乘下阶迎季布匿来久陶朱名已成谁言
一剧孟能重亚夫营

明妃曲

骢马载蛾眉明妆出帝畿含颦辞玉阙结恨向金微月疑秦地镜云忆汉宫衣传书
寄鸿雁一为报龙旗

后明妃曲

出塞涕沾襟遥望阴山阴旧宠汉宫薄新恩边地深紫骝涉长道黄鹄寄哀音千载
琵琶曲谁明去住心

董娇娆

素手拨箜篌盈盈在画楼玉钗翘紫燕金盒贮红虬楚台行雨过汉殿乘风游期门
诸侠少无处系骅骝（红虬脯见唐小说同昌公主传中）

洛阳道

迢迢洛阳道日暮正飞花公子青丝榼王孙白鼻骠骑吹金张宅歌钟赵李家遥传
丽人至偷眼七香车

秦王卷衣

春色醉秦楼秦玉夜宴游銮舆回鹵簿凤管叶箜篌七宝流苏帐千金集翠裘何人
最承幸卷赠龙阳侯

铜雀伎

松柏西陵路君王不复游高台铜雀暮故苑石麟秋舞将罗袖歇歌倚总帷愁浮云
渺天末漳水共悠悠

赋得盈盈楼上女

盈盈楼上女十五正婵娟照胆秦宫镜含情蜀国弦踏青回绮陌拾翠傍晴川轻薄
金吾子无劳问少年

少年行

翩翩游侠客结束自名邦过赵黄金百游秦白璧双鸣鞭中贵避插羽右贤降日暮
名姬肆飞花扑玉缸

紫骝

蹀躞天闲骑曾从大宛来悬金当骏市歎玉过龙堆伏枥心元壮鸣鞭气不回何辞
万里道逐北向轮台

关山月

绝塞生秋早空闺入夜愁光飞银阙上影抱玉门流露气溥丝管霜华拂锦裘征夫
犹北戍目断大刀头

剑侠行

少年学剑术飞身游沈寥鹿卢云气拥龙匣电光摇醉呵鲁句践怒骂霍嫖姚夜来风雪猛拂袖灞陵桥

骢马驱

骢马千金装日夕过平康寸心重衡岱片诺回沧桑白屋笑原季青云轻赵张明朝砍文吏竟夜赤丸光

公子行

新开平乐第红妆簇画楼骅骝金作埽鸚鵡玉为鞵汉宫鸣佩入梁园挟弹游海棠花正发选伎合梁州

侠少曲

鸣鞭白门道新柳正藏鸦七宝装羸弱千金散狭斜飞扬孟公坐调笑季伦家夜夜双龙气腰间挂赤霞

邯郸曲

夜宿邯郸花朝拔灞陵柳五侯竞献鯖七贵争持酒巨先胶漆契翁伯金石友纵死咸阳宫何负将军首

夜夜曲

褥隐芙蓉丽筵开玳瑁频绣屏朝选伎罗幌夜留宾艳曲梁间度纖腰座里陈渐看银漏促烏履杂华裯

采莲曲

桂楫漾沙棠向暮出横塘罗裙娇绿水玉腕映红妆拈花怜盖弱折藕爱丝长回桡弄斜影惊起双鸳鸯（仙人篇为李逸人题）

飞身下七襄驂驾六龙翔负局行中夏携壶出大荒蓬菜千日酒沆瀣万年浆勾漏砂如石蓝桥玉作霜

爱妾换马

行雨蛾眉去追风骏足来金羈沙苑秣宝屣画廊苔太息专房艳长鸣伏枥材何当效周穆騶耳上瑶台

邯郸才人嫁为厮养卒妇二首

乍辞鸾辂出回望鳳墀高幸脱君王难宁忘厮养劳生轻惭比叶命薄叹同蒿尚异乌孙贵穷毡配二毛

新恩偕伉俪旧宠易累囚饮恨辞金屋含凄下玉楼鳩巢元鹄憩鱼服暂龙游不见平阳婿次且择卫侯

巫山高

阳台出天半高压大江湄暮雨连三峡朝云合九疑猿啼青嶂急鸟度翠屏迟莫作峰头梦魂迷十二时

芳树

年年旧桃李烂漫帝城阴结实当前殿开花满上林香飞金谷早影坠玉池深一曲
山香罢芳菲何处寻

蜀国弦

春风杜宇国千载寄哀音水激巫娥佩山鸣卓女琴铜梁朝日艳玉垒暮云深浣花
溪上宅词人可重寻

邯郸行

狭斜连锦里垂柳夹香堤绿绮千条润青丝万树齐玉鞭骑过马金距斗回鸡朝日
红妆坐流莺拂户啼

艳曲十首

青楼开大道翠馆接平阳柳拂葳蕤锁花明玳瑁梁合欢年少客新镂郁金床

画阁青门外朱帘碧水浥绣衾描比翼罗带结同心夜夜求凰意无劳听玉琴
北陆歌钟起东郊骑吹旋花香长乐外草色未央前十万章台柳玲珑拂翠钿
春光平乐近胜事曲江留帝子联镳语王孙挟弹游共邀金犊至藉草大堤头
金羈连绮陌玉佩照晴沙北极元僚第南阳贵主家楼台七十二日暮乱飞花
神女云为色妖姬雪作歌三千回粉面二八拥青蛾咸阳游冶客赵李日经过
粉黛征歌伎腰肢斗舞人绿珠金谷艳碧玉玳筵春珊瑚十万树一一破瓜辰
明眸骄绮绣皓齿粲琼瑰挟瑟燕姬肆吹箫凤女台巫山何处是指点片云来
宝帐连金屋琼筵弄玉箫娇娆花作髻静宛柳为腰当歌小垂手烂漫雪花飘
绿水荡涟漪江南日暮时吴姬木兰棹越女竹枝词恼杀横塘下纷纷轻薄儿
又六首

金埒贮骅骝银妆络马头相逢狭斜道并倚大长秋何用知名姓联翩入画楼
博山银缕细沈水玉壶香后院通韦曲前除接建章名姝三百辈月底诵灵光
玛瑙妆为砌珊瑚聚作林万钱编马埒一禽试牛心向夕香风动连车爇水沈
乳燕穿朱屋流莺啄画檐雾消云母帐风动水晶帘遮莫嫦娥下千花拂彩蟾
朝朝呈翠黛夜夜斗纤腰枕上偷金合屏前弄玉箫罗衣三十院无处觅红绡
绮楼藏盼盼罗幙贮盈盈雾袂空中举霓裳月下行相看时一笑若个不倾城
少室山房集卷七

●钦定四库全书

少室山房集卷八

（明）胡应麟 撰

○乐府六十一首

企喻歌四首

双鞬铁裯谁家大健儿蛇矛丈八盘上马捷若飞
腰间大羽箭竖指百夫力突如飞天鹞万鸟戢羽翼

落日平原西射鵬控飞骑九种黑山戎各各相引避
天生健男子何须多结伴独身取月支降卒三十万
巨鹿公主歌

油壁香车向何许玉勒花骢汗红雨
呵殿纵横灞陵渚夹岸行人目相语
新封大国巨鹿主巨鹿为谁大家女

七夕夜女儿歌四首

侬家白榆树一年一开花郎如牵牛星一年一来家
不恨欢意薄但愿欢情长牵牛与织女一年一成双
一年但一会一夜一年周犹胜侬儿郎十载客巴州
都将一年意一夜申缱绻桥畔乌鹊声天河渐清浅
碧玉歌二首

莫嫌小家女青春正十六新嫁琅琊王娇爱比碧玉
恨无倾城色不敢邀王怜相欢那在貌动体生春妍
桃叶歌二首

可怜王家郎不解事桃叶清晨渡江去日暮忘迎接
桃花作罗袖桃叶为罗裙何似阿兄駮终日怜此君
懊悷歌二首

翩团黄犊车载欢出城东看看白日堕那能不懊悷
谁家娇女儿三三复五五结伴邀欢行今夜大辛苦
白团扇二首

白团扇含情待郎来不使路傍见

白团扇懊悷负情依手持不令见

华山畿

华山畿不愿生同栖但愿死同止上有双比翼下有双连理

安东平

严冬凛烈北风雨霜河大水冰断絶车航
客子远游复复秦越囊无货粮带断裘结
我有终袍以遗故人物薄意厚贵称君身
微物在机是侬手织千缕一丈三丈一裘
东平刘生远持遗郎愿得邀郎早还故乡
女儿子

木兰歌声起两岸江陵一夜肠欲断

估客年年下黄牛巫山十二猿鸣愁

子夜四时歌

大堤三月中垂杨千万树郎骑白马来堤上遥相遇
右春

期欢大堤口迟我采莲回向暮南风急兰橈不敢开
右夏

人言秋日短侬爱秋月光邀郎解衣坐肌肤如雪霜
右秋

围炉然兽炭为郎理瑶瑟不知重檐外雪花厚三尺
右冬

子夜变歌

期欢半夜来忽复月光晓九月芙蓉花颜色诘长好
青骢白马

青骢白马娇成羣往来蹀躞如浮云
系马高楼石城下三百青铜莫论价
七香炯炯并马行卢家少妇车相迎
郁金堂前双紫燕白马青骢暮相见
寿阳乐

妆楼百余尺寿阳开白马从东来

石城乐四首

欢居石城西侬住石城东何愁不相见一夜秦淮风
秦淮便风起布帆疾如矢恨杀巴陵秋洞庭八百里
洞庭八百里一夜南风回送郎到长干泊舟凤凰台
携手登高台台荒半野草殷勤传语郎莫忘石城好
莫愁乐二首

莫愁在何处石城西南弄手携卢家郎吹箫跨双凤
昔为石城乡今作莫愁里开门见所欢容色艳桃李
襄阳曲

襄阳轻薄儿挟弹出大堤嬉游向日暮高唱白铜鞮
大堤女

大堤羣女郎各各自言好愁杀襄阳儿白日情颠倒
长干行二首

爷娘错嫁女嫁与长干商今年发滟潏明年发浔阳
爷娘错嫁女嫁与江陵贾八月下潇湘九月下扬子
估客乐二首

乐哉估客乐黄金作铜使大艚乘长风
乐哉估客乐鱼虾贱如泥愁杀闺中妇
玉筩镇长啼
新估客乐二首

不从估客游不知估客乐
百万扬州鹢持筹胜骑鹤
不乘估客舟不知估客乐
十万荆州娘红妆照罗幙
大道曲

翠袖紫罗襦胡床坐明玉
相逢谢镇西邀作大道曲
前溪歌

春蚕挂门口抱丝向床前
镜昏不见面施朱红可怜
自君之出矣

自君之出矣鸾镜黯无光
不嫌红粉污持底试新妆
娇女诗

莫愁年少女十五嫁卢家
雕梁双紫燕白日坐飞花
江陵女

女郎大堤游顾影各言好
相逢平乐儿班荆坐芳草
黄鹄歌二首

黄鹄参天飞高高上寥廓
游戏青云中那能顾燕雀
黄鹄参天飞九万忽如驰
当时戢羽翼燕雀那得知
石城曲二首

踏青无限好江头二三月
恨杀浔阳风吹郎下三峡
迎欢不下堂送欢不出户
生憎扬子潮随郎过瓜步
清溪小姑

小姑青溪曲大姑赤山矾
独处谁相依
白石郎

依居清溪郎居白石途中
相遇宛若旧识
采莲曲四首

采莲复采莲摇荡木兰船
日暮湖头雨罗裙色倍鲜
依棹湖心舟郎来湖北岸
笑指双鸳鸯戏掷黄金弹
荷叶如依衣荷花似依面
舳舻向中流欢来倩谁辨
昨夜芙蓉花绿堤一时发
清波照玉腕下有双罗袜
出塞曲五首

大猎渔阳罢椎牛上谷营
酒阑飞骑去夜夺受降城
日暮寒风起长城雪夜飞
一军齐逐北二鼓过金微
拔剑追强敌黄尘际碧天
固原风雨黑前队缚呼延

汉壁风烟静霜天帐幕低双鷗何处落大碛五原西
画角霜天下辕门彻夜开梅花飞不尽月色满轮台
少室山房集卷八

●钦定四库全书

少室山房集卷九

（明）胡应麟 撰

○乐府八十首

读曲歌四首

窓前安石榴花开正见汝百舌枝上啼含情不得语
园中樱桃熟朝暮倩人守昨宵摘遗欢累累不盈簋
懊恼枇杷实核多而肉少不疗腹中饥那禁眼中饱
郎遗佛手柑馨香动弥月报郎红豇子相思永无歇
秋闺曲二首

八月秋风起揄关正雪花何因吹妾梦万里到龙沙
日把金钱卜征人尚未还龙城五千里目断望夫山
子夜歌四首

开门得欢书有鱼长尺一不知溪头鲤认作潭中鲫
子度饶芳香子都好容鬢触目俱可怜身今阿谁近
懊恨负情依薄于下秋叶持刀截乱丝肝肠中半裂
灯前骤相见含情不敢道乍可要郎眠那能就郎抱
丁都护

徙倚木兰花流光莫虚度人命无百年听唱丁都护
明下童

谁家少儿郎绿丝作单袴白马紫游缰蹀躞长干路
欢闻变歌二首

青梅绕树头若个不作酸君行有两意莫恋故所欢
十月芙蓉花九月杨柳树那得男儿心长若初相遇
杨叛儿

可怜白门柳依依二三月一曲杨叛儿飞花乱如雪
江南乐

举头见欢来回绕蔽莲叶不知湖心娘湿透双罗袜
幽州马行客歌

恼杀燕台騶发足千里远只解馱郎行不解送郎转
阿子歌

阿子住东邻自矜好颜色春风动罗帷半夜邀欢入
湖就姑

大姑住湖口便风渡浔阳小姑住湖心月明就彭郎
上声歌

春蚕空有丝不解双双眠垂杨空有丝不绾别离船
折杨柳

恨杀城南柳丝丝管离别殷勤折赠君记取艳阳月
越城曲

矾头日浣纱春波泻明玉指点苧罗村依家在山麓
春江行

一夜春江涨江头浪拍天中流便风起持底挽郎船
双行缠

绣作双行缠步步娇春阳那知罗袜中两足如秋霜
陇头歌五首

尘起玉门关凋弓马上弯身随汉飞将乘月夺天山
番人吹笛■〈竹馨〉汉女拨琵琶征人三十万若个不思家

绝塞少人行萧萧过雁鸣征衣犹未寄大雪满龙城
欲寄征人信难禁玉筋啼惟应纸上泪点滴到辽西

空闺一枕梦杳杳边头去双弯不出门也到黄花戍
从军五更转五首

一更边月上流影照长城营门击刁斗万队寂无声
二更边月高战士揽征袍何时封定远霜露湿弓刀

三更边月斜戍客夜思家瓜期殊未及肠断听悲笳
四更边月隐征人梦初醒恨杀城南妇流光伴孤枕

五更边月落晨起清油幕飞骑夺天山王庭空大漠
长安四时辞四首

携手七香车春风向狭斜燕姬年二八烂醉碧桃花
太液池边路轻舟荡绿荷三千汉宫女齐唱采莲歌

寂寂霜天下寒砧捣月明长安十万户一夜尽秋声
红袖炙瑶笙夜醉平原馆拂曙共鸣珂天街雪花满

燕京曲

绰约两青娥一笑遥相遇何处问侬家玉河双柳树
古意

玉帐结流苏金鞭照春色二八艳名姝尊前乍相识

侠少行二首

白马跃金环扬鞭大道间五陵春草色日暮臂鹰还
呼卢夜来家醉眠不知曙忽忆灞陵游拔刀冲雪去（夜来用周皓事）

夜渡娘

翩翩桃叶舟昏黑向江夏那怕狂风吹佳期在梁下

江陵曲

恼欢青丝竿凌晨只欲开狂风趁心起四面石尤来（石尤非打头风余有辨见丹
铅新録）

映江曲

夹岸千桃花红晕双蛾绿恼杀冶游儿丝鞭映江曲

青阳度

金犊游东郊玉骢返西路相逢无一言脉脉青阳度

长乐佳

深宫斗百草嬉游共春日蝴蝶双飞来故上搔头立

白符鸠

以我双碧桃系欢双紫骝相逢那得去听唱白符鸠

同生曲

妾貌娇如花郎颜粲于玉妾年方二八郎年正十六

来罗

池上双鸳鸯钗头孤凤凰双飞太无赖孤宿斗谁强

拔蒲

拔蒲复拔蒲六月湖水中纖纖十春笋不肯露青葱

孟珠

夸他孟珠富却笑陶朱贫西施老归越空作苧罗颦

黄淡思

今生作女郎万恨攒眉头来生作儿郎饥饿亦自由

白头吟四首

巴江九曲流不似儿郎心蜀魄千年啼是侬白头吟

大车乘驷马扬扬汉天使不记当垆日辛苦临邛肆

箱中犊鼻裯碎破不堪着回身掷向郎将心自摸索

当日临邛妻今朝茂陵妾金茎半勺露那能救消渴

长史变二首

懊恼爷娘痴贪他门户热措大作官人儿命薄于叶

宁作中人妇莫作上官妻风波起平地山岳移东西

捉搦歌四首

爷娘养女儿但教学针线许嫁前溪郎十五不相见
采桑南陌头田间日来往傍人指笑侬夫婿渐成长
阿母教女儿殷勤候姑眠女儿问阿母若为得欢怜
十四嫁官人抱衾作小妻终朝大妇骂眼泪洗面啼

采桑渡二首

不采陌上桑蚕在筐中饥欲采陌上桑使君道傍嬉
采桑作罗绮总为他人忙不见长干娼一曲衣盈箱
雀劳利二首

禾傍雀啄啄日暮不得饱人生无百年别家太草草
丈夫各有志不作笼中鸡朝歌猛虎吟暮从野雀栖
白铜鞮

郭郎巾折角孟嘉帽频落底似山翁醉接■〈𠂔离〉 翻转着

乌夜啼二首

期欢中夜来月光满庭柱展转天欲明乌啼石城树
匆匆金犊车上路正天晓不恨欢来迟但恨欢去早

赵瑟曲

轻盈窈窕邯郸姬挟琴鸣弦声乍希梁尘拂空霜霰飞霜霰飞云雾集月西沈日东

出

秦笙曲

呼卢一掷百万强妖姬如花出咸阳箏声嘹唳夜何长夜何长管弦列遏流云弄华

月

江南弄

秋江日暮天无云兰舟桂楫何纷纷美人如花簇罗裙簇罗裙斗玉腕歌采菱归去

晚

龙笛曲

楚山修竹云团栾伶伦截管飞青鸾美人一曲凭雕阑凭雕阑弄纤手落梅花折杨

柳

鳳笙曲

红炉炽炭玉筩骄谁其吹者王子乔羽衣玉童行逍遥行逍遥听仙乐万桃花两玄

鹤

乌栖曲五首

步障华灯光照屋质如轻云色如玉白马金环游狭斜杨柳啼乌来妾家
郁金香为堂玳瑁梁床上流苏百合香同心寶带合欢结携手邀郎拜明月

锦幔银屏张五采华堂宿雾笼香霭此时心意两相怜含娇顾影不自前
叠股钗横金凤凰连环交结双鸳鸯啼鸟哑哑楚天曙荏苒容华逐郎去
玳筵张烛三星低罗襟绣褥怯分携郎骑白马去关西凤凰台前乌夜啼
少室山房集卷九

●钦定四库全书

少室山房集卷十

（明）胡应麟 撰

○乐府七十四首

塞上曲八首

白草连天大漠秋千家铙吹古梁州飞霜为洗燕然石上客新从定远侯
紫电花骢白玉鞭远从都护出居延清秋不辨龙城色一片黄云瀚海前
接天烽火照平卢午夜单于猎上都十万征人明月里一时齐挽绣螭弧
绝磧霜飞塞草空燕支晴色乱云中将军醉拥吴钩出万里霜天照白虹
冢上明妃草色青征人立马问龙庭西风片月秦城下愁绝胡笳几处听
平沙一望陇云开玉笛飞声夜转哀万里朔风吹不断梅花齐落李陵台
战马骄腾大漠间遥看敌骑薄阴山横戈不待嫖姚令静扫边尘入汉关
边烽不动边尘收刁斗无声夜色流醉杀歌姬油幕底霜天遥按小凉州
春宫曲四首

昨夜春风拂苑墙三千南内斗红妆朝来凤辇花前过报道君王入上阳
残雪初消太液前御沟晴日柳如烟披香殿上承恩早千缕黄金拂御筵
长门花满月华高云锁珠帘护碧桃夜静南宫歌吹发新声遥奏郁轮袍
玉阶草色上窗纱深锁葳蕤隔翠华添罢晚妆无一事白樱桃下试琵琶
秋宫词

梧桐飞叶下银床肠断秋声玉漏长三十六宫明月里夜听弦管出朝阳
少年行五首

匣底双龙斗色流长安道上紫骝燕姬二八弹筝坐千树垂杨拂酒楼
平康归路欲黄昏下马青蛾白玉尊一曲菱歌挥袂去月明装束候期门
五陵楼殿雪初消玉勒翩翩意气骄落日万家春草外呼鹰遥过灞陵桥
甲第新开上苑边满堂花色照婣娟醉携如意阶前舞七尺珊瑚碎画筵
调鞭徐傍夕阳亭绣箴雕弧架雁翎夹路万人齐指处碧天遥堕海东青
剑客行

双丸耳畔雪花明九陌长安任意行词组楼中无处觅夜飞龙蹻入青城
游仙词十首

玉检金泥柱下藏书成函谷壑徜徉流沙一望三千里遥跨青牛出大荒

玄圃明霞望不穷金银楼殿碧天中春风似识周王面午夜蟠桃万树红
百辟衣冠照鼎湖轩辕台殿夕阳孤云间独跨双龙背万顷天风堕鹿卢
七步文章焕斗牛遮须聊作御风游狂挥大笔天河畔题遍瑶京十二楼
羽盖如云下夕阳俱言浮海谒东皇麻姑夜擘红虬脯指爪偷看一尺长
采石船头月溅衣长鲸高擘絳霞飞安期一见如相识指点蓬莱万玉妃
洞里青霞照玉盘飞星羣洒石门寒桃花五报西池发可奈峰头局未残
缥缈飞梁驾赤城漫劳司马问初平金泥玉版长生籍同向丹台列姓名
少室峰高接绛河千秋词客斗嵯峨谁言不是灵仙骨遥夜天姝出大罗
海上朱明碧雾流五仙同跨五羊游何如野客金华洞卧领羣羊十万头
云龙引

芒砀秋空映赭袍龙光云气与天高五湖何处无明月斫竹南山坐钓鳌
后采莲曲二首

画舫青丝荡绿油罗裙玉腕坐中流生来菡萏元同蒂若个芙蓉不并头
湖心涛浪拍天流湖上王孙挟弹游一派莲歌何处起大堤齐控紫骝
明妃曲

目断长安汉使来五云何处是蓬莱龙沙月色三千里独抱琵琶上紫台
凉州词

静夜流云拂画檐微风不动水晶帘红牙拍按瑶台上古调初翻昔昔盐
伊州曲

碧天如水暮云收明月平铺翡翠楼楼上美人三十六夜弹瑶瑟唱伊州
横江词二首

结束腰肢赛水神沙棠舟楫往来频江风日暮连天起愁杀西陵破浪人
扬子江头风色狂白波如山五丈强自是吴姬惯迎客来来去去木兰航
从军行五首

大漠秋风吹铁衣长城明月满征旗捷书飞奏明光殿午夜前军获郅支
九月边头朔气残贺兰山北望长安殷勤去鴈传消息欲寄征衣趁早寒
寥天霜色暮凄凄无定河边落日低欲问轮台前去路黄云白草遍辽西
吹笛关山月半痕梅花无数落辕门不知何处旄头现一夜渔阳万骑屯
白马将军惯渡辽笑提金勒扫氛嚣五千剑客当前队尽歛名王入汉朝
北院词八首

紫燕双飞拂画梁雕甍百尺隐垂杨东华门外诸年少携手先过白玉堂
西第千门簇五侯御沟春水逐人流罽毼烂漫黄金色遥指梳妆近妾楼
金水桥边一百家家帘幙护桃花青衣日暮浓妆出指点萧郎白鼻騊
珠帘不动控银钩内苑春光入画楼深夜月明弦管沸露桃花下合梁州

双双罗袜斗凌波两两沙棠泛玉河日暮大堤流水急回桡齐唱采莲歌
别开金屋倚岩堯白玉河边第二桥夹岸紫骝三十骑花时齐过董娇娆
绮陌东头接上阳娉婷年少舞霓裳怪来香阁时常闭尽日浓妆对海棠
灵济宫前翠幙悬平康门巷百花连西园公子携宾过十六青娥舞玳筵
南院词八首

浮云楼观接蓬莱五岳三山大内开昨夜春风城外过千花齐发凤凰台
公子连翩挟弹游垂杨偏拂紫骝长干巷里三千队若个新妆是莫愁
紫燕衔泥度夕阳双飞南陌认雕梁高门不用寻王谢卢女新开白玉堂
欢作沈香依博山双烟一气紫霞间千门柳色啼鸦暮自唤情人月下攀
桃叶年方十五强春波摇荡木兰航不知何事归来晚狂杀王家白面郎
万户千门玉作台春风何地不徘徊乌衣巷口红妆亚一路歌声斗草回
垂杨千树拂红尘压酒吴姬动绛唇日暮狂风连袂起飞花愁杀渡江人
城下春江抱石头秣陵南下是瓜洲相邀女伴寻春去共掷金钱赛蒋侯
燕京四时词四首

帝阙皇居北斗间春风长绕玉门关东郊昨夜桃花发一树先开万岁山
沈李浮瓜燕玉台冰山雪谷倚蓬莱珠帘百尺重重下不放人间赤日来
千叶从风尽报秋长门团扇迥添愁玉河桥畔东流水几处题红出御沟
玉宇吹花度栢梁千门飞雪夜茫茫银笙暗炙红炉畔一曲阳春漏正长
长门怨四首

罗幌飞萤玉露溥珠帘不卷坐更阑昭阳月色浑无赖才到长门特地寒
锁闭葳蕤绝履綦宫花犹发万年枝沈香亭北无穷恨尽在阑干独倚时
凤吹喧传隔彩霞龙旗摇曳暮云斜预知行幸平阳宅不用庭前望翠华
金屋妆成尽日闲十年红粉误朱颜腰肢漫自夸纖细管领华清是玉环
青楼曲八首

十里秦楼近灞桥箫声何处起岩堯珠帘百尺东风里双凤联翩逐翠翘
粉面三千照玉台期门南去是蓬莱金鞭暮过张公子一骑潜呼万乘来
两浆频催过石城沙棠摇曳画船明莫愁湖上千株柳肠断王孙作队行
一树含桃锁曲房金笼鹦鹉唤斜阳霍家娘子新妆罢拥髻来迎李十郎
苏小妆楼隔画桥涌金门外半兰桡相携女伴巫山去昨夜钱塘正上潮
指点平康宿暮鸦妆台红粉簇明霞曲江筵上诸先辈跃马争寻阿润家
二八青衣彩袖悬相逢如梦画堂前无端锦瑟撩春思歷乱东风五十弦
银床梧叶堕高秋良夜吹箫忆旧游二十四桥天似水画船乘月下扬州
少室山房集卷十

●钦定四库全书

少室山房集卷十一

（明）胡应麟 撰

○五言古诗五十四首

拟古十九首（有序）

不佞垂髫谈艺即耽嗜东西二京忆操翰之初赋诗送人之白下起句云悲风号枯桑吹堕林上月客子将远行驱车中夜发一时名流骤加赏叹以厯块期之弱冠从家大人入长安社中酬倡大都五七言律亡暇古风比岁巘居始克以占毕余工稍稍从事尝拟作古十九首束装北上染指辄休乍过娄江请益王长公长公拳拳进余努力兹道适长夏闭关因检拾旧草点缀联络竟成此章并士衡所拟兰若生春阳为二十首古诗絶唱世以为白雪阳春不当拟议乃昔人每云取法乎上仅得其中则自三百篇而下当法孰先国朝仲默于鳞咸有斯作两家得失集中具见余之拟此聊为异时印证之自若曰优孟抵掌非余所能知矣

严霜结重阴岁序忽已暮念子当远游抗手即行路路行常苦远客归尝苦晚浮云蔽关塞白日不可挽昔为婚与姻今为越与秦落叶随飘风飞鸿辞故羣君心岂难保妾颜匪长好登高望平原四顾尽衰草相思无朝夕沈忧令人老愿为双车轮随君万里道

郁郁城东门盈盈桃与李抽条仲春月秾艳若罗绮轩车竞采掇日暮未言止如何秋风生摇落自兹始寄语青楼倡盛颜难久恃

清晨策弩马整辔南山隅遥望长安城飞观百尺余峩峩青云端甲第罗长衢华镳若流水轩盖何威纒各骋要路津盈盈道中趋人生若飞藿奄忽随丘墟盛衰各有极贵贱同斯须何如命我友斗酒鸣笙竽逍遥放情志卒岁聊自娱

令节懷嘉宾亲友四面会轩车若云屯高谈尽冠盖旨酒罗长筵新声动环佩秦筝响未毕楚袖盈庭内同心竞酬酢羽觞互更代各言行乐殊少壮不相待劳生徇荣华日月忽已迈千秋万世尽贤圣亦焉在

绮楼亘中天窈窕百余尺飞甍架复道藻井纵横出上有双蛾眉容华世无匹临风发皓齿当户理瑶瑟新声入云汉四座咸动色行人竞倾聽日暮不遑息但覩来者欢谁明居者臆盛年处空闺中夜起凄恻

采采丛兰花美人隔江沚褰裳涉其波舟楫谁为理回风动罗裳日暮聊徒倚安得双鸳鸯衔致篋中绮

客游异乡县终岁懷苦辛忧思起长夜展转不得晨举头望河汉怅彼参与辰畴昔同盟友金石偕交亲飞飞振六翮弃我若途人我欲东归洛日暮河无津徘徊入房中涕泪沾衣巾

彼美东邻子习礼明书诗十五登君堂新婚谐结褵愿为双飞鸿百岁不相离风波起中路忽去天一涯不惜去日远但恐欢爱移黄尘蔽关塞会合无前期愿君策高足努力趋明时生当聚华堂死当长别离

灼灼芳树枝敷荣一何早绿条被繁英初日何杲杲感此芳春时采掇寄远道馨香不终夕零落随百草盛年处空闺颜色为谁好

严霜瘁百草节序忽复易嗷嗷双飞雁云中各自适念我同衾人索处异南北披衣望天宇众星何历历牵牛隔河梁织女限东壁彷徨间一水欲往步难即同心复异地何异不相识

清晨出大梁遥瞻北邙道野火烧平田白杨半枯槁人生寄宇宙忽若原上草去日常苦多来日常苦少少者日以壮壮者日趋老幻躯无百年富贵何足保思为鲁中圣万世同寿考

高城跨东南大道夷且直青楼间绮疏瞳瞳照初日五陵侠少年结束事游昵白马饰银鞍连翩度阡陌美人遥目成相对理瑶瑟十千轻一笑百万当一掷为乐愿及晨为欢愿及夕红颜匪百岁何由保金石

回车灞原上白日忽将暮石门高崔嵬悲风起长路借问何人阡无乃前朝墓人生寄一世奄忽迅朝露荒哉秦汉主寻仙起遐慕弱水不可援三山竟焉度玉碗出人间徒为赤松误伤彼泉下人喟焉策蹇步吹竽宴华堂娱乐从所务飘飘极心志千载为旦暮

驱车越长道还归故里间少小客咸阳今来廿载余亲知半凋落冢墓留村墟松柏俨成行狐兔交路衢门巷寂无人谁为问邻居停车再叹息日暮长歔吁客行尽九州岛不如守敝庐

浮生若飞蓬寄迹宇宙间万物皆有尽胡为长苦颜旨酒列高台嘉宾共盘桓夜阑当秉烛日晏当沈酣人生无百年譬彼东逝川生者不暂欢死者宁复还

昭昭三五夕皎月流素光徘徊入高楼照我罗衣裳揽衣坐叹息起步仍彷徨良人怀远游九载客他乡空闺知岁暮独处知夜长嗷嗷云中雁随风忽南翔安能假羽翼万里来君傍

凛凛北风至霜雪零前除惜哉征人妇岁宴恒寡娱夙昔奉衾裯矢志誓不渝如何弃我去悠悠长路隅思君隔天末邈如秦与越欢爱宁复论铅华为君绝君怀如明月妾心如冰雪君怀有圆缺妾心徒皎洁

清晨启重关有客千里至手携尺一书言我故人寄长跪问故人客亦无所言开缄读素书宛若覩所欢上有金错刀下有白玉环明月三五满故人会当返

仲秋凉气肃唳唳雁南度北斗倚阑干气运凄以暮悲来抚长剑浩歌起庭户一为远方客永别亲与故频夜梦室家展转忽已寤念欲还故乡按辔遵广路悠悠大河水一苇安可渡

亭亭孤桐树托根峰山岑良工琢其枝为我匣中琴胶漆相交结珍重逾南金被以朱丝弦弹以白雪吟清音顺风扬四坐畴同心佳人隔天末日暮涕沾襟（王长公云十九首最难言离之则虞落节前辈俱所不免合之则虞捧心于麟亦微用为累足下加之矣唯在更刊锋巧露其本质而已）

又拟古八首

冉冉岁云暮念君遽别离浮云蔽原野四顾白日驰夙昔幸同衾欢爱誓不移如何百年好去我忽若遗严风起天末霜雪盈路歧晨起践关山薄暮长抱饥音徽日夜隔会合当何时恨无晨风翼并起东南飞

高楼有思妇被服姣且妍横琴理清曲绿水被幽兰一弹浮云暮再鼓流风旋哀音振林木聽者为忘餐借问何人妇感叹停朱弦征夫越万里一别岁载迁铅华坐销歇太息空婵娟

灼灼园中花盈盈道傍柳敷荣艳阳月攀折佳人手秋风一朝至容耀讵能久人生寄天地聚散何不有俛仰百岁间倏忽成老丑身名匪金石富贵欲谁守怡我平生亲独有盈尊酒

肃肃金风至大火时西流游子异乡县中夜懷百忧驱车驾言迈奄忽岁已秋登高望故里江汉何悠悠佳人在遠道欲济无轻舟同心日夜隔涕泪纵横流愿为南飞翼万里行相求

朝登北邙山徘徊望陵谷荒坟何累累狐兔自相触白杨夹修途黄泉蔽层曲伤彼潜寐人年命一何速生存宇宙间行乐苦不足驱车暮归来鸣箏燕华屋北里扬清音南邻荐新曲亲知从我游被御紈与穀相对各尽觞良夜更秉烛荣名耀百代转盼同初旭亮无乔松寿谁能伤局促

青鸟从南来翩翩随风翔口衔尺书至乃自大海傍美人三岁别沈忧热中肠织成机中锦拂拭烂生光下为连理枝上为双凤凰致之万里道聊以充君床愿言勸斯义旦夕毋相忘

回风吹转蓬倏忽行万里游子懷山川驱车暮不止荒郊四无人日入断行旅熊羆向我啼僮仆为我侶南望见故乡失路空徙倚眷彼平生亲气结不能语

东邻有美质杂佩何缤纷明眸辉朝日絕代少其伦结褵为君妇婉奕日偕亲风波起闺闼中道成荆榛君为东流水妾若西路尘东西各相背信誓何由闻红颜会当歇岂不懷苦辛愿君企高节贱妾宁复云

古离别二首

戚戚遠行子驾言还旧疆脂车望关塞愿逐晨风翔主人卜清夜置酒临高堂妙伎出闺闼纖腰移曲房当筵发皓齿四坐流芬芳回飙袭绮户飞霜飘长廊良宵一何促瑶瑟无辉光征夫念明发握手起彷徨仰视云中雁三五各成行胡为双飞龙羽翼多参商丈夫志万里会晤安可常勸哉就长路皓首期相望

驱车出郭门徘徊望都邑念我平生亲聚散何仓卒白露涂中逵清霜被原隰惊飙动地起黄叶无宁夕羈禽懷故林疲马倦行役羣雁西南翔哀音正嘹唳岂无盈尊酒执手歧路侧飞觞属华筵行子相向立别离在须臾沈忧万端集去去勿复论红颜中道擲

杂诗四首

明河没天宇白露晨为霜睽彼同心人忽去天一方仓皇挈尊酒送子河之梁登高望四野川陆浩纵横岂无瑶华音道远不得将揽衣入房户驰念忽如伤

曜灵薄崦嵫光景忽已夕圆魄犹未升明星烂然出寒蛩号我前蟋蟀鸣我侧凉风起庭户树木何萧瑟佳人期不来延伫空叹息宁知三岁心为子长恻恻

冉冉西驰日悠悠东逝川征夫怨长路志士惜盛年长路行当归盛年不再还寒暑互推移阴阳浩无端凄风起帘幙白露中夜溥美人坐高堂投袂起长叹

穷阴亘晦朔山谷多寒风悲哉客游子旋足如转蓬昔行届长夏今来值玄冬悠悠十年内车辙穷寰中人生贵适意遥役何憧憧逝将歌考盘岩穴安微躬

寓懷十二首

端居意不适策杖起行游仙人八公侶携我升蓬丘泠泠随风举衣袂若云浮放歌昆仑顶下视弱水流天都信寥廓绛节聊淹留黄金被高馆白玉开层楼乐哉瑶池上一饮为千秋

崇兰处深谷绿叶凌朝阳回风一披拂百里传芬芳惜哉丛林下无人知国香烨烨桃李树托根歧路傍飞花落闼弄影临华堂讵以盛衰故易此贞素常不见西山老食薇终首阳

飘飘穆天子八骏乘风驰日行三万里远道何不之西游见王母宴饮登蓬池千秋蟠桃实万仞扶桑枝寄言谢尘世百代同须斯

夷羿射九日共工触不周龙伯连巨鳌伯鯨湮洪流贪嗔起一念乃与造化仇力穷固难继身灭将谁尤巍巍轩辕帝问道崆峒丘唐虞守无为四灵毕来游

亭亭孤松树托根徂徕颠高枝翳白日曲干临回川女萝蔚蒙笼风雷岌相纏岂无明堂用物性贵自然一为匠石顾斤斧成灾患何如邓林下寂寞全天年

壶丘与天游列子乘风行飘飘漆园吏九万凌高冥胡为末世士多歧日屏营蹻蹻死财利夷齐徇空名宁知大道观不异蜗与螟华胥有逸民去去行相亲

弱龄负奇尚雅志诵坟史访岳懷尚生浮湘慕迁史杖策游中原邂逅二三子裘马何翩翩招要共生死经过渐离辈感激昭王士黄金空崔嵬所愿非尺组长揖辞诸侯归耕汶阳滨

彼美倾城子艳色明朝霞宝钗耀金雀充耳佩琼珈相如既西席宋玉仍东家春风起罗袂琴瑟相交加但知良时乐安覩白璧瑕托身一失所百岁徒咨嗟

昔有夸娥子猛气雄千兵褰裳逞逸足思欲追曜灵逡巡眇谷傍道渴不任行投身死岩穴骨肉盈林垆过浇篡夏室莽卓乘炎精人谋岂不殫天命俄已倾寄言雄图者割据徒营营

曰余负奇好夙尚在髫龄礼乐观百王诗书穷六经言乘休明会将致海宇平如何岁年迈依依卧柴荆亮乖四方志永希千载名文章亦大业富贵宁重轻勉哉事著述三代追遗英

丹霞蔽岩谷素雪霏林皋悠悠避世士岁晏守蓬蒿箕山既纒郁首阳何岩堯时偕
沮溺侶耦耕向南郊大厦匪安居千駟为祸招悲哉路傍子磬折方劳劳

有鸟从东来游戏青云中朝翔阆风馆夕息瑶池宫言欲览德辉来下双梧桐摇摇
荆棘枝鷗臬宅其丛所嗜惟腐鼠焉知彼所从竦身奋六合将返昆仑东

咏史八首

清时厌藜藿挟策干承明肃肃中天宇列宿悬神京衣冠萃闾阖谒帝罗羣英如何
攀龙客相弃若浮萍长啸出宛洛驱车返柴荆升高望八荒濯足临四溟商山岂不贵畏
垒岂不荣大哉鲁尼父著作垂千龄

鯤鱼产溟渤鬣鬣如山丘朝行发碣石暮宿昆仑陬竦身激巨浪喷沫飞洪流倏忽
化大鹏九万乘风游翼若垂天云众羽不敢侔一飞絶五岳再举凌十州翩翩鸞鷟侶榆
枋自相求翱翔但咫尺曷覩大化道

飘飘颍中客黄屋若浮云矫矫严陵叟垂竿卧江濱脱屣九州长长揖万乘君弃瓢
入深谷举足动星文英风振薄俗劲节凌高旻樊公信独往周生亦离羣一朝徇微禄遗
累流千春

世途日纒局达士随所遭侯生隱抱关朱亥匿鼓刀鼓刀实贱役抱关非崇寮煌煌
魏公子车骑来招要虚左大梁席执轡夷门郊堂中众宾客错愕起相嘲宁知救赵日叱
咤风云高窃符出中禁奋椎夺前矛伟哉却秦绩百代称雄豪

虞卿本说客著书自穷愁马迁下蚕室史笔垂千秋楚泽放灵均漆圆饿庄周伊人
一何否举足罹愆尤文章实大业宁与富贵谋峩峩金张第七叶开王侯一朝随物化荣
耀同蜉蝣

伯夷饿空谷务光沈清泠汤武首征诛白公徇其名嗟哉古贤达举足罹天刑茫茫
大造间遗迹若螭螟升高望宇宙摄衣御云駟追随广成子乘化入瑶京九州岛一坏土
何以劳我精五岳一拳石聊以栖吾形

荆卿卧燕邸屠狗相过从朝为太子客暮出辽城东酣歌和渐离壮士发尽冲前登
咸阳殿意气何其雄左操督亢图右搦秦王曾剑术岂云疎天运良已穷寥寥易水上万
古悲寒风

田巴辨稷下缓颊摧千人邹生馆碣石五德何缤纷夸夫乐惊世小人恒共羣谁明
白马喻徒擅雕龙勤岂若鲁连子笑谈却秦军成功不受赏万乘如浮云

少室山房集卷十一

●钦定四库全书

少室山房集卷十二

（明）胡应麟 撰

五言古诗四十七首

入新都访汪司马伯玉八首（有序）

余以癸未之秋识司马汪公于武林词组定交谊逾倾盖于时公即订余把臂黄山白岳间旋以病冗侵寻匍匐风尘滞淫汤药奄忽十裸竟爽成言客岁之春公至严陵复申前约期余仲秋入新安行有日矣会闻王长公病亟踉跚走弇山园一问之后取余杭陆道入歙而长公晨夕挽留余亦惓惓濒发复止卧公故所居来玉楼中再阅月长公竟尔倾逝余抵舍则岁行尽矣今春乡人至自函中传公将入吊弇山拉余同发爰特买舟西上谒公太函修社白榆之末因追随杖履偕过娄江念宇宙间递主文柄惟公二人而余皆滥叨国士存亡倏异感怆何言孤航逆流中夜不寐抚今追昔成赋八章稍次后先亡论工拙知公读之感怆有大于不佞也

芳时忽不乐怅然思美人美人天都上宫阙何嶙峋手把瑶华草遥寄越江濱念欲往从之弱水不可亲愧无晨风翼寤寐懷苦辛

轩车何皇皇东下武林驿冠盖罗长衢嘉宾四面集伊余实弩蹇喟焉伤伏枥一顾天闲空高座倾四席眷眷忘年交惓惓在兹夕

欢言奉尊酒既登君子堂不惜罗衣襦为君充下裳宁辞入宫妬亭亭理红妆常恐朝露晞欢爱不能长中宵起房室引领情内伤

峩峩弇山堂美人在其下脂车娄江涘聊用息余驾烨烨双飞龙连城诂论价咨嗟良宴会朋旧半凋谢三星烂河汉钧天在广厦

欢日苦不足愁日苦有余谈笑未及终执手河山如蒹葭阻长道渺邈天一隅殷忧见华发岁暮空踟蹰焉得抟风翻送我来粉榆

百年迅朝霜奄忽越与楚郁郁琅琊坟瞬息已千古河清邈难俟中夜频起舞歧路安足论睽离热肺腑明发戒沙棠维梢灏江浦

西上新安江危滩峻浮云太函何巍巍迥与上界邻苍龙守重关鸛鷁日为羣美人坐金堂一笑情内亲悲来话亲故气结不能陈

往事去莫追来欢尚可续金石诚匪坚富贵焉所欲平原十日饮岁月苦不足旨酒罗高堂新声动丝肉令名敝天壤何事伤局促

别司马汪公八首

有鸟巢天都自名为凤凰文章被六翻五色河辉煌饮啄梧桐枝矫翼临朝阳一鸣举世惊清音杂琳琅云是王者瑞千仞方高翔

高翔欲何为浮云渺天末言欲揽德辉翩翩下闾阖东海有鸛雏孤鸣蔽林樾羽翼苦未长天路迥难涉延颈望霄汉邈若秦与越

丈夫重意气焉论越与秦千里行相求冈陵若云屯轻舟涉广汉夹岸垂芳荪巨石何崔嵬日夜飞流奔天都在咫尺举头见龙门

龙门造中天片刺亦何有清风惠然来长揖把余手肝胆俨欲披丰庖出旨酒广乐罗前庭钧天在户牖一别已九春相顾惊老丑

老丑讵足嗟百年迅飞霞念彼弇山堂緬邈天一涯佳人逝安适相望徒蒹葭怅焉

念长别中肠结如麻今我不为乐日月忽已遐

行乐当及时百岁难为期铅华若流水日夜东南驰夜长日苦短秉烛游芳池明月
出西园众星何陆离顾视两天孙冉冉云中嬉

嬉游亦何常高谈蔚霞烂丝竹罗前庭新声一何艳娥娥红粉妆妖姬列如粲登彼
幔亭峰酣饮日方晏诘朝泛浮槎遥遥上河汉

河汉杳无极仙槎逝难留明发还旧疆何以写我愁依依丈人行倾盖为九州岛天
都望威风八翼凌空游誓将振弱羽岁岁行相求

东阳李茂才允达以古风六章杂诗一卷见投斗酒定交留连浹夕答赠四首

首夏维清和朱光何熠爝众木纷扶疎朝阳翳林薄鸟雀罗前庭飞鸣自相乐伊余
懷一丘索居卧层阁诵彼伐木章喟焉伤寂寞

寂寞不可居起坐弹鸣琴清风穆然至之子贻好音自言长东郭夙昔懷同衾丈夫
重意气焉论尺与寻飘然命余驾信宿来兰阴

兰阴屹岩崑双溪纡且郁蓬蒿蔽行径倒屣为君出中厨呼斗酒申盟指金石愿为
双飞龙霄汉长比翼良哉如澠燕生平在今夕

今夕复何夕燕婉难具陈三星烂东壁皎月悬高旻朱弦从风发四坐回阳春但言
戒明德努力希良辰千秋树大业皓首以为邻

寄李惟寅欧祯伯四首

迢迢牵牛星乃在河汉旁织女处其东脉脉徒相望鸳鸯失羽翼乌鹊难为梁采采
芙蓉花道遠不得将

遠道亦何思美人在京洛白日丽中天流云飘阿阁煌煌五侯宅冠带日相索宁知
瓮牖士终岁长寂寞

寂寞宁复陈嗟此明盛年矫矫黄鹄姿孤飞铄其翰山川郁以纡道路长苦难顾视
双游龙叹息浮云端

浮云不终朝岁月忽复易岂伊岩廊慕大业在金石緬懷同心侶沈思无终极安得
西飞鸿假我双羽翼

寄邦相四首

凉风倏以厉日短夜苦长大火西南流蟋蟀鸣我床徘徊起中夜揽衣不及裳念彼
同懷友投袂忽如伤

弱冠京华游衣冠九衢列鞍马如浮云与子独相狎灼灼桃李花光华自怡悦飞沈
一朝异忽若吴与越

与子别三载中懷日熬煎岂不念同心怅彼河与山赵璧有时合隋珠有时迁安得
晨风翼送我置子前

心悲亦何为各愿加餐饭子游青云途予守藜藿贱百代同音徽何论异乡县黄发
会有期兹盟庶当践

送朱水部可大入都四首

苍龙守阿阁赤骥鸣天闲彼美承家子被服都且妍
飞飞振六翮游戏青云端出入承明庐行者夹道观
朱弦顺风扬四坐靡不欢

矫矫孤飞鸿明时策高步亮节难为容
浮云起中路层阴蔽白日圆景忽将暮
转蓬随长风行行践霜露驱车大河涘
灑洛莽回互

王屋一何高嵌岑蔽层云登高望宛洛
车马如游尘万象列毫端抽思戾高旻
仙人王子乔转盼迹已陈三花满懷袖
寄我忽若新

百里讵足栖长途复当践帝优循良吏
召对明光殿羌子与我亲绋袍长恋恋
双鳧一朝去临风涕沾面努力崇千秋
慰此金石愿

别汪仲淹二首

仲淹病卧三载矣兹以余之抵新都也
为我一至桃溪再至岩市三至太函闻
余告归意殊恋恋别之古诗二章

噉噉云间雁飞鸣各有适翩翩水中鳧
中道乖羽翼我当还故栖子病卧蓬室
明发从此辞遥遥望乡国东顾临大江
波涛无终极

大江岂不遐一苇朝可航我友一为别
倏若逾三霜踟蹰念子病送我濠之梁
迟迟白日暮车马为彷徨人命匪金石
睽离热中肠长当保玉体百岁遥相望

娟娟苙萝女二首寄李生时秋试罢归

娟娟苙萝女艳色明朝霞珊瑚被玉体
璎珞相交加绮疏傍阿阁高居临狭斜
朝披越台锦夕浣吴门纱一为白雪言
清音浩无涯哀思激云汉行路咸咨嗟
宁知中肠怨愁结纷如麻芳春倏已尽
白露溥蒹葭

娟娟苙萝女婉婉矜弱步浣纱越溪上
西施屡回顾罗袜扬轻尘徘徊感行路
但持双明珰赠君比纨素灼灼桃李华
尝恐瘁霜露羞为倚门笑宁为入宫妬
亭亭处空闺冉冉白日暮

己卯仲秋复当计偕北上以家母病不赴与诸友言别四首

荏苒岁时迈蟋蟀鸣前庭大火倏西流
白露中夜零公交车有程期仆夫戒我行
州郡忝招邀闾里相送迎肃肃同袍侣
命驾来林垧各言休明世努力事遐征
夕当辞室家明当赴神京

神京岂不遥闾阖造中天金茎夹广陌
玉陛搜羣贤幸生唐虞代况逢强盛年
徘徊高堂病一卧垂十年既无稚子娱
亦寡羣从援椿庭渺何许万里越南滇
感此去住懷戚戚摧心颜

戚戚徒尔为兴文各踟蹰夙昔慕巢由
散发箕颍隅矧兹乌鸟情能不懷倚闾
令伯惟承欢王阳实回车亦知轩盖荣
方寸寡所愉愿言青云客矫翼升天衢
君子游岩廊小人安敝庐

敝庐亦何有有稼复有萱旭日丽遥岑
清风濯林园问寝趣庭帟进膳列芳鲜
虽无

黻冕贵彩服欢慈颜板輿历高台丝竹罗长筵踟蹰禽鸟声映荫林木繁俯仰中所欲百岁聊自全

寓懷三韵七首

泛泛海上鸥机忘意自适嗟嗟塞翁马何失亦何得七日混沌死哀哉倏与忽膏以明自煎香以熏自燔葆光茹其和乃可全天年巍巍广成公千岁空同颠西方大圣人国土名极乐万法同虚空一尘安所著嗟嗟蛮触民智勇困蜗角向长志五岳宗炳卧一丘济胜苟无具澄懷亦天游鸣琴一室内万象同蜉蝣飞蛾赴明烛徇利忘其身苍蝇集鼻端高峻为祸因石戶有遗民古今称达人齐王本好瑟东郭仍滥竽与世苦枘凿独处恒嗟吁九州岛不足居何况五亩庐世人竞巧知逐逐如飞蝇井蛙亦诧海夏虫曷语水俟彼千秋人陈迹异代论少室山房集卷十二

●钦定四库全书

少室山房集卷十三

（明）胡应麟 撰

○五言古诗二十七首

秋日偕诸同志游金华二首

屈子歌遠游尚平有遐慕顾谢青云人言寻赤松路历览穷幽深冥探愜情素礪壑扞嵌岑林峦陟回互崖倾黄叶积谷转垂萝护高峰散余霭峭壁屯寒雾娟娟初月升隱隱微阳暮长謡钦昔踪独往懷蹇步虑由忘物超道以遗荣悟迹契容成公神交子支父徘徊北山文惻怆淮南赋睠彼丘中人回鑣对岩戶

成羊闕昔踪化鹤神遗迹曰余蹇劣姿緬企灵仙窟时维仲秋暮春粮负瓢笠落叶纷前林淒霜被长隰蹶履行翠微扞萝上层壁岩峦莽回互云霞屡兴没苍苍猿鼯啼濯濯麀麀集乍闻帝鸿鼎今见初平石芝田翳宿莽玉灶埋金液羽驾何飘遥人寰信超忽胡为七尺躯甘此百年役去去从吾初城东有黄石

仲夏至自京师作

人生如飞蓬倏忽异乡县仆夫趣我游肃驾向畿甸朝登太行岭暮宿黄河岸荏苒踰修途迟回陟层巘中林絕烟火尘沙蔽颜面浮云翳荒垒咫尺行莫辨遥遥至幽并四顾见闾阎中天帝王宅飞薨翼楼殿空懷稷契志未遂夔龙愿辞非上林侈赋岂河东擅长啸起拂衣归来弄柔翰寄言达生者骄人有贫贱

秋日携尊城东大寺山作

步出东郭门骋望西山麓信足登其颠聊怡白云目川原何逶迤城邑自相属飞薨俨鳞次万户列平陆高峰下牛羊斜照散麋鹿苍苍灏川流靡靡兰皋綠列岫澄尘襟清涟媚遐瞩契深浩忘言虑澹信超俗载咏衡门诗轩盖非所欲

九日喻邦相邀司马汪公泊诸君登高天竺属余尚留檣李不及会以遍插茱萸少

一人插字为韵

霜露维深秋木叶殆尽脱纷披时菊繁憔悴兰芳歇上客懷登高羣公欣令节薄暮回轻桡凌晨戒车辙窈窕度城闌逶迤陟岩穴遐览穷八荒轻举渺六合三竺凌层霄双峰表天阙綠野名园开朱宫梵筵列白云冒冈峦丹霞冠林樾淅淅凉风生隱隱微阳灭修鳞竞容与平湖亦澄澈感此岁序更羽觞共怡悦妙管激清商流音回白雪解佩俱朝贤銜卮并时哲言念同袍子鸿飞渺天末醉把茱萸枝徘徊不能插

与众宾游城西园亭作二首

端居俟时命日暮寡所欢眷言写忧思散步游西园西园一何丽薜荔交崇垣飞甍带层阁曲榭临回轩丹霞吐岩岫白云冠林峦灼灼芙蓉披瀼瀼白露溥游鱼跃清波好鸟鸣树端感兹动植情悟彼节候迁百年亦瞬息金石畴能坚念当命我友肃驾开华筵悠然迟心赏寓目双飞翰

嘉宾既咸集徒御何辉煌逶迤度飞观置酒临回塘长渠激芳流曲岸披丛篁齐瑟列前楹秦筝鸣后堂燕姬发皓齿越女呈红妆清音振林木妙舞协宫商觥筹互交错四座咸慨慷夜阑更秉烛雕辇随风翔明月出云间列宿正纵横四序忽若驰行乐安可长申章纪良晤无为歌太康

卧游室午睡起题

东方谈十洲尚子懷五岳玄览岂不遐浮踪竟安泊伊余实蹇劣稟赋孱且弱迟回三十年强半客京洛风沙蔽颜面神明日凋落虽窃文苑声未覩寰中乐謁来卧一丘晨昏课耕凿卜居邻莽苍筑室事恬漠轩窗不盈丈周遭艺兰若游目惟图书怡神匪丹臚时援白雪琴三弄对猿鹤泠泠众山响一一度林薄五鼎非我荣万鍾亦奚乐达哉宗炳言先民有遗篋

将负瓢笠入金华从赤松三子游作（有序载别卷中）

三十六洞天金华亦奇絕古昔羣真栖云霞閭阖赤松乘紫烟皇氏憩丹穴緬邈懷仙灵栖迟表才杰奕奕孝标生漂流寄东越长生本经世不朽惟大业伊余后千载束发慕贤达逝将辞垢氛寻幽入林樾大药倘可逢雄词冀颀颀异日骑双龙携手轻六合

题陆信卿书屋二首

五岳岂不遐一丘良自适言从谷口居永憩隆中膝结构凌霄飞轩控奇石嵌岑带林峦窈窕罗原隰轻飏回座隅明霞护檐隙之子何逍遥鸣琴坐幽寂列岫披琅函遥峰映緜帙揽挈万古心俯仰千秋迹白马穷妙詮青牛探真籍神游羲禹庭冥栖素王室伊余麋鹿踪羨尔烟霞癖殷勤劳梦思惻怆务晨夕何当辞世纷相对扞萝薜散发翻金书长歌抱琼笈一笑尘氛空挥手凌八极

大鹏抔九万尺鷲翔榆枋遠近各有适逍遥固其常伊人励高躅卜筑邻山岗四壁罗琬琰五车插琳琅冥搜极浩渺幽探穷微芒栖心丈室间寄情八表傍丹霞入我牖白云为我裳馭风学郑圃弃瓢懷颍阳岂同渭川钓耻为吴市藏一区足吟啸万卷聊徜徉

乐哉帷中子岁年良可忘

仲秋十四夜同诸子携觞登一览亭玩月作

秋高桂华满夜静兰膏歇素影流长空寒光浸天阙孤城白露下万户凉飙发置酒临高台长歌对佳节忆别蓬莱宫回首三千劫蹉跎落风尘荏苒见华发举杯属嫦娥乞我长生诀乘云朝太清飞步还紫闼自按霓裳操重翻羽衣阙愧彼尘世人徘徊望圆缺十五夜对月独酌有怀燕中诸君

佳期三五临遥望挂圆璧皓魄扬清辉亭亭堕檐隙揽衣步前庭感此长叹息忆昔京华游文儒盛东壁中宵蓊门燕五夜甘泉集苍龙玉绳挂露掌金波溢惜哉道路分佳人遂南北寤寐安可凭瑶华讵能即欲从万里天持赠婵娟色愿言逐飞鸿随风起双翩登鹿田

日暮扞女萝亭亭出危磴万壑来松风飞云堕樵径行窥虎豹穴侧并猿猱进及登众山颠始觉天宇峻曾闻赤松子兹域开灵胜丹砂信有术尘虑了可竟伤哉缙山鹤不返瑶池骏惆怅仍独歌青霄落寒磬

家君北上半载不得问述懷

朝日照高台清风被华池椿庭万里外北望浮云飞岂不念行役相携赴皇畿眷言高堂病药石久告疲仰无令昆托俯靡弱弟依以兹谢形役息意掩荆扉朝掇南涧藻夕采西山薇緬懷弹冠客惻惻常抱饥天门九重辟王路正逶迤轩车满京洛鞍马如云驰穷年叫阊阖当道饶狐狸积薪谅难守岁暮空流离侧身起长望涕泪沾裳衣

寄懷司马汪公（公与余期是岁游金华台雁诸山）

天游表龙德水击知鹏抃矫矫司马公伟度周八埏先驱既左马缓步亦扬班伊余慕匠哲邂逅自临安千秋默相许片诺永不寒追随武林驿挥袂弇山园黯黯临别懷欲吐不得宣殷勤戒兹岁激水仍周旋天台访大药雁宕穷灵源春和届炎夏寤寐来华轩愿当脱羈鞅一杖携名山雄章辟混沌片碣三千年

闻大司空朱公讣志哀十二韵

匡庐摧大江天柱折南岳涕泪盈九原伊人岂重作桓桓大司空束发仕台阁小心厯四朝姬旦恒惕若维昔嘉隆岁河流泛大壑临轩万乘送飞驭百灵愕八荒就疆理四海安画诺晚遂莼鲈兴高蹈游广莫裴公系安危司马耽独乐方勤大廷诏忽跨辽东鹤衣裳蹶箕尾名姓悬海岳煌煌亿万载禹功在河洛

祝贞妇诗（有序）

贞妇邑茂才祝獬妻也二十夫丧矢志弗二抚其遗孤勸以成立迄今年七十矣厥孤大猷既东走长洲乞御史大夫陈公传复日夜叩余门顿首庭下曰光生幸惠一言则母氏永以不朽余悲其意援笔为赋兹篇

结发奉君子欢爱两不疑如何高堂上一旦生别离惊飙荡白日去我忽若遗重泉逝将会念此黄口儿皎皎匪石心柏舟以自持绩纒度晨昏卒岁恒抱饥總帷下重关荆

棘盈柴扉冬半多烈风僚栗中我肌顾瞻双鸳鸯比翼东南飞岂无贤雄匹再适匪所宜
亮为南山松安受雪霰欺愿当毕余命不媿死者知我闻再叹息三叹懷令仪抽毫赋黄
鹄万古钦蛾眉

二酉园为陈玉叔京兆题

不佞藏书室黎惟敬题曰二酉山房而玉叔京兆辟园亦曰二酉命余赋诗

吾家二酉斋斗室不盈掬何以称兹名架上书万轴公家二酉园大厦蔽陵谷何以
称兹名笔底珠万斛楼台瞰空起云雾傍檐宿雕甍挟天柱高栋擎岳麓轩窗洞庭叶户
牖云梦竹蜃鳄游长川虎兕啸平陆岸芷纷葳蕤汀兰互芳馥主人湖海豪潇洒尘俗
开襟跨寥廓解带谢拘束三闾问灵均九辩追宋玉名惊孟公座梦启傅岩卜誓扫六合
尘一榻非所欲蜚声京兆里张赵三鼎足至尊催赐金上相待横玉异日休林泉赐第镜
湖曲华堂坐昼锦饱看四野绿煌煌中令墅烨烨魏公筑宁当卧二酉卒岁事畊读好借
胡生居日履蠹鱼腹携手仑昆丘相将问周穆

大隱园为陈司理题

大隱园者陈司理立甫读书处也在沔阳城东名流题咏甚富书来以五言古属余
衡阳七十峰洞庭八百里翛然五亩宅结构傍江汜仄径穿藤萝层轩菽桃李白云
何英英丹霞亦靡靡空翠流重檐林岚润湘几主人金闺彦夙昔厌纨绮名家孟公后侠
气元龙侣高言和阳春清响激流征纵横彩毫落烨烨隼声起朝辞蓟门燕夕佐越台理
駉驥游天闲鸾凤出榛枳一丘宁独乐十载旷栖止緬懷东方生大隱帝乡迹聊用名吾
园归梦时徙倚伊余东海民蚤岁羣鹿豕孤惊托松桂幽梦结兰芷侧闻辋川胜佳兴浩
难已冉冉携芳尊悠悠负绿绮携我初平石适君仲长里青鞋与布袜行迈自兹始

心遠堂为陈立父题

心遠堂在大隱园之内堂前后有栩栩斋万绿轩等处堂则总会一园之胜者也

陶公住人境心遠地自偏陈侯服官政结庐诂同然吾闻鲁仲尼行止非一端寸心
若太虚龙蠖偕媿妍华堂构空起正对衡岳颠洞庭八百里日夜浮朱栏鲸鲵跋高浪蜃
鳄游惊湍祝融及天柱云密纷钩连回雁遏层霄石廩屯飞烟奇峰七十二一一罗堂前
彼美堂中客妙龄夙忘筌冰壶莹尘表玉笈开琅函携宾坐堂上四面罗苍斝鸣琴憩深
树看奕垂疎帘目送双飞鸿迢迢极云天心遠室从迹悠悠浩忘言兴文念朋好一订柴
桑绿殷勤沔阳约尺素驰江干吾将负瓢笠卜筑邻青山异时陈蕃榻倘为孺子悬

送李子赴试钱塘

大梁本任侠壁立逾千寻一遇昌谷生握手为断金申台振高步十载囊瑶琴中途
邁君采邈焉奏遐音声谐响必赴异代犹沈吟矧兹百里壤而不懷同心緬余起末学努
力塞词林遐思太古上时俗非所钦栖栖卧一壑委懷甘陆沈李生一何翫物色来兰阴
双溪入驰溯三洞回登临清言吐肝肺古色流衣襟吾宁负奇癖尔亦饶书淫扬亭共寂
寞原巷偕萧森子迹尚霄汉余踪久蹄涔他时树大业盟言倘在今

七夕

昔余游天门白榆正飘飘濯足银河水惊飞鸟鹊桥牵牛与织女欲渡愁无聊相将忤上帝谴谪离青霄骑鲸向东海龙伯频招邀举足届五山投竿连六鳌狂风鼓大壑吹向西南郊青鞋曳布袜濩落不得骄裼来三十载食粟同曹交珠玑一万斛散乱随尘坳猥■〈彳 俞〉难共居贪狼如猬毛苍蝇变白黑鼠璞矜琼瑶回首望闾阖双星正岿巍而我一何悲偃伏同鷓鹒逝将脱尘网天路长逍遥寄言夸毗子役役徒为劳

余既不上春官燕中遂有传余病不起者孟弢方就试辄于院中大恸王次公过灞水为余言之余闻剧喜命酒索笔赋此寄孟弢

漆园喻桑户郑圃称杨朱岂无王者乐孰与真人居大钧播羣象品彙盈寰区偶然值为人禀此七尺躯营营一生内十九婴忧虞欢爱苦不长劳悴乃有余冠裳槛沐猴钟鼎罗爰居三旬亮已多百年亦奚娱风霜遍项颌尘垢盈眉须齿发凉非坚金石犹可渝七十二圣君百千亿庸愚参差就黄土转盼随丘墟安期信茫昧松子难覬觐何如一宿觉大梦伸蘧庐陶公制哀挽王孙却衣襦伟哉哲人见我心获所如死生固有命寿夭讵足虞戚戚儿女仁毋乃曲士拘愿言勸明德今古流芳誉乐哉白云丘万代同斯须

夜梦裕卿惟寅觉赋此诗寄懷并呈邦相

康生秉侠烈李子弘风流尘埃困鸿鹄天廡储骅骝曰余抱微尚弱冠羈皇州洛中富冠盖一一俱琳球风尘片言合把臂为千秋夜谈促瑶席春燕开云楼飞蓬一朝散抗袂还林丘道路阻且长尺素安可求眼底孰同声论心惟喻侯喻侯与康李宿昔伸绸缪雄飞失天路雌伏来山邮伊余实倾盖契分逾白头笑谈乐新知感激懷故俦中宵梦二子宛若平生游殷懃十载别不为终夜留觉来但长叹坐失双吴钩乃知豪杰人聚散俱萍浮申章示同好咫尺毋悠悠

始入州谒宣尼庙二首

猗欤大圣人树建实高厚道苞羲农前业擅尧舜右茫茫沧海水涓滴靡不受俨若登岱宗絕顶小宇宙于戏七雄降生民失领袖九流竞纷纭百氏互驰骤虚无驾犹龙因果凿灵鷲寻天网缺畴补坤轴漏龙飞歛淮甸六合更造就车书焕一统谱系明授受寰区设黉校家掖仍尸诱诗书被华貉狐兔伏林岫遂令宣尼脉炳耀絕先后伟哉成周基八百衍潢胄

厥初水精帝肇迹维山东乡闾表鳧绎胤胄延龟龟胡为姑蔑墟亦有文宣宫时维赵宋末兵戈竞华戎渡南实孔裔大衍三衢宗精灵动世主锡命传丰隆沿流泊明代奕叶驰皇封创祠视曲阜勋恩逮无穷清华世世及岳降齐申崧两宗峙南北辉赫罗章缝至今太末里恍忽邹尼风我来谒遗像三叹钦遐踪皇皇六蓊轨万古侔穹窿

少室山房集卷十三

●钦定四库全书

少室山房集卷十四

（明）胡应麟 撰

○五言古诗二十首

始出西直门策蹇行堤上四十里暮抵碧云禅寺宿颺上人方丈中

尘氛翳京洛客子悲途穷芒鞋出西郊陡觉万虑空垂杨四十里长堤跨游龙蹇驴负破帽冷然若乘风平湖漾明镜匝岸纷芙蓉源穷见大陆平野罗千松环青障冥漠积翠摩穹窿嵯峨众山顶忽覩金银宫碧云际天出气势何其雄栏杆冒白日栋宇凌秋空飞泉绕重砌漱玉声玲珑浮云出深涧映树明遥峰山厨积古雪石梁卧长虹始知五浊界咫尺蓬莱通吾将结茅屋一杖时过从徘徊不成梦静夜闻微钟

早饭罢由碧云入香山山麓及颠俱有亭诸宫殿最古是胜国时遗构

仄径缘藤萝逶迤入深谷重阴夹磴道弥望皆古木长松数百年夭矫云际矗飞泉挂峰顶蜿蜒出平陆石门森隧道孤亭峙山足四天划然开空洞豁尘目千崖布黄金万仞嵌苍玉梵室缘危杉禅关荫修竹圣果森菩提昙花吐薝卜琳宫是何代相传至元筑兹山迹最古创始见身毒悠然念人代累劫如转烛夜分息尘嚣重展法华读何日归流沙吾家旧天竺

来青馆夜分独坐题

昏黑登上方遂抵兹轩宿遥峰过疎雨众山若新沐晚凉凭阑坐流萤出深竹明月东方生依微隐乔木泠泠发孤啸空响答岩谷山僧供伊蒲饱饭禅堂浴微钟歇清夜星斗烂可掬终南饶白云暂此憩幽独

山左侧小径扞萝入红光寺寺僧尽出独坐赞公房题十韵壁间

西山四百寺金银烂蓬岛红光据絶颠迴出千岫杪香山既穷望石磴上深杳奇峰刺天出势欲截飞鸟凭高豁双眸顿觉宇宙小危龕贮金粟（像也）亿万恣围绕禅堂閤无人黄叶净于扫昙花吐优钵香气达萝葛悠然悟尘世解脱何不早会当携瓢笠一息万缘了

将登西山絶顶昏黑法华寺废址小憩

扞萝上层颠石门嵌空立千崑吹烈风遗栋裊絶壁古佛颓苍藤禅关尚双辟我行穷登顿假此暂栖息残僧一二辈破榻置瓢笠山魑供夜谈木客伴朝汲岚光壤灶起磷火断垣出虚牖号寒蝉阴廊走伏翼梵天亦销歇尘世几更易愀然发长啸感此独凄惻桑田复沧海浩浩无终极踟蹰白日暮拂袖下昏黑

凌晨起梯鸟道抵玉岩寺望长安宫阙题

清晨饌伊蒲饱饭扞石壁天风拍两袖樵路尚昏黑微月耿崑际残星堕山脊明霞挂石梁渐起赤城色仰攀猿鸟巢俯瞰麋鹿窟山椒见台殿经岁断人迹危梯雾半隐古砌雪长积耸身上絶颠河汉仅咫尺震旦隘目睫宇宙转呼吸天门九重启栋宇烂金碧仙姝十万辈一一似相识胡为堕人世甘此下方谪劳生四十年营营若虬虱长謡归去来香案玉皇侧

西山絕顶纵目诵供奉呼吸通帝座及拾遗焉能辩皇州二语临风咽桑落十数觥
沈醉憩大盘石上昏黑乃下

燕山八万仞楼台夹层嶂緬懷穷絕颠揽此大千状时维九月暮决策浣尘况蹇驴
华严宿凌晨策孤杖扪萝翠微半亭午思挟纆石门排空入猿鸟捷下上两岸夹霜枫
若锦步障凭高宇宙隔陟险身世忘迭磴何岩堯遥峰渐超旷披襟豁云雾把袂狎星象
皇都但一气帝座屹相向九点分齐州一一罗眺望颓然步空虚嗒尔齐得丧吾将御风
游乘化入无量

翠岩寺在碧云左障蔽高崖层巘中最为幽絕余每过必留浹旬

碧云既巨丽香山亦宏敞翠岩蔽层巘车马或希往曰余负奇癖一一恣探赏羣峰
障谷口弥望悉林莽谿砦一线入仄径若指掌危梯屡攀蹶乔木时偃仰阴崖伏空洞阳
峤入宏敞俯窥地欲穷上陟天转朗楼台互回合金碧时恻恍虚檐织蛸蠖画壁森罔两
绳床败叶积禅堂壞苔长悠悠石火身兀兀挂世网向暮聊独唵徘徊发深想

维摩庵又翠岩最幽絕处科头独坐万籟澄寂殆不复知有人间世因与山灵约异
日者毕婚嫁愿携一钵安息此中

万峰人声絕萝磴恣攀陟楼台跨深崦尽纳众山色大地纷金银遥天挂丹碧禅关
面重壑窈窕开丈室科头挟书坐如面达摩壁五蘊穷真如六根断情识将因抱华严住
此阿閼国他年号居士说法嗣摩诘

山麓游卧佛寺寺极宏焕金银夺目画廊数百千尺图大雄氏显化颠末备详僧寮
花木弥靚幽支枕敲卧不觉日晏

琳宫万山麓势欲翔遥天金扉烨宏敞玉栋纷钩连飞萝映禅室古木藏玄关奇花
及灵果布列森祇园伟哉化人居杰构凌飞鸢金身丈六强证果示涅槃修廊耀丹碧粉
墨流云烟始疑张僧繇或诧吴道元穷源溯流派一一图真詮天魔亦俛伏外道纷纏绵
感此三叹息临风涕如潜猥以无涯智逐兹有尽年何当蜡双屐西入清凉山杳然絕人
累乘化归竺干

出山投华严寺夜宿晨起游吕公洞曩同惟敬题名老衲炊黄梁作供忆邯郸枕上
事恍然久之

夜宿华严堂晨探吕公洞悬梯喷飞雪流泉伏蟠螭星流坠幽壑俯视势若动僧房
云作关禅宇石为栋雷轰苍崖裂雾压翠峦重老衲炊黄梁停午具清供毋疑邯郸生至
人久无梦

望湖亭亭午小酌空水明媚四山金碧倒浸澄波中芙蓉菡萏流芳吐艳杳然身在
六桥孤屿间惜乏两沙棠艇子载吴娃十双耳

众山合长堤空水相映带平湖漾明镜秋色照眉黛中流赤栏起亭亭列车盖琉璃
十万顷倒浸画檐外凭虚望寥廓心赏剧堪快菡萏余汀洲芙蓉匝滩濼蛟龙伏空洞鸛
鹤摩遠塞鱼游迴自得鸥行豁无碍美人期不至岂乏沙棠载吾将返若耶夷光久相待

玄贞观高峙山颠孤峭突兀望之真中天积翠由飞梯左右数百级上有石坛宏敞可坐千人

四山抱若垣苍翠照林樾中天峙栋宇大地耸双阙穹阶百级上左右互森列石栏层空立瑶草纷可掇平台坐轩敞高栋表■〈山截〉業振策登翠微朝元叩丹诀玉洞翻灵篇人迹往来絕暗谷埋寒云阴崖坠古雪明河漾花际新月吐木末逝将遗世纷永谢俗士辙

三大士殿

普贤肇峨眉示迹惟西方文殊现五台台殿俱清凉猗与观世音普陀实吾乡胡为三大士鼎足偕兹堂吾闻维摩室方丈罗八荒须弥眇一芥诸佛同行藏况兹三如来功德侔三光秉心佐迦文并起悬津梁青狮负瓔珞白象衔珠玕千亿昭化身大悲浩难量区区南瞻洲勺水军持将杨枝洒甘露涓滴回枯肠我来重瞻拜感叹殊未央善才一童子百十叅慈航峩峩兜率天不改帝释疆胡为滞五浊尘土纷彷徨逝将去人世谢此浮名纒他时会解脱说法酬空王

大佛寺观释迦文佛金像题

峩峩蓊城西飞观耸百级金身五千丈照耀天北极画栋糜丹青雕甍烂朱碧琪花焯如散瑶草纷可拾耨水清六尘雪山炯四壁广座陈香灯长廊绘粉墨优钵梵筵启伊蒲僧供出俗染汰欲空净因了可觅香象来医王天龙护帝释茫然小宇宙一怵大雄力寺后磊土山为十洞曲屈邃幽余尝纳凉其中杳若别有天地者

西山实佳丽步步金银宫四百八十寺穷极土木功或云寡岩穴未若天南东异哉此丛林制作侔鬼工块然一培塿其下皆虚空十洞列左右恍惚蓬莱峰地肺凿委羽天窓移张公不假杖藜入无俟乘舟通猗与造化力播弄指掌中何因遘二女刘阮追遐踪千秋饵灵药绿发称仙翁桃花闭流水絕胜丸泥封

高凉桥晚憩望新月作

入山路不迷出岫兴弥遠平桥带流水乔木数家晚湖头雨初歇沙际尘尚软彩云笼大堤新月吐层巘金银耀梵刹珠翠竞雕辇馥馥红蕖开靡靡绿萍敛改席临菰蒲携壶就葭菼吴歌起难遏越调和仍缓把臂无求羊同懷有嵇阮厯落摧雄心凭陵豁醉眼朱颜稍沧谢白发且荏苒人生贵适志对景聊引满

湖上菡萏盛开游人如织抵暮皆入郭余独往坐堤畔命小溪拔阮为吴歌

仲秋出湖阴众芳亦未歇袅袅垂杨疎翳翳浮萍合红蕖递芳馥绿蒲可揽结游子饰金鞮美人竞罗袜笙歌夹岸起箫鼓临流发日入息羣器长謡待新月

归途过真觉寺五招提突兀云际与帝城诸宫阙参差相望寺中车马旁午盖渐近国门云

真觉依帝城参差仅十里削成五招提如薄太清起凭高尽胡越眺迥入箕尾七层际空遥千级去天咫青霞湿衣袂紫雾飘杖履羲和驭金轮拘翼凭玉几俯身视尘闾局

促类蝼蚁何当八翼成昏黑犹徙倚

谒观世音大士禅院院在高凉桥侧自汉唐下未尝称大士妇人盖宋元始讹谬王长公近作大士本纪辨析详至余复历据六朝及五代诸野史小说证验甚明后人当无词费矣

吾闻观世音显化肇天竺发心救魔难千亿现手目功德如丘山圣愿肯自足遍观阎浮界众生苦哉独嘘呵俨一气阳春布穷谷凡人发善愿一一遂所欲至仁形影彰明效桴鼓速遂令南瞻洲夫妇蕃孳育我来载瞻拜顶礼大悲足妙相呈十方天人丽冠服胡为晚近代姑妪谬称祝良哉弇州氏雄辩破流俗中年窘嗣息晚境冀多福愿言普慈施世世事身毒

少室山房集卷十四

●钦定四库全书

少室山房集卷十五

（明）胡应麟 撰

○五言古诗二十首

古意赠云间唐子四章

飘飘云中鸿口衔尺素书有美云间客宛在天一隅兰台振高躅青骢曳华裾初承百里命栽花烂长衢鸣琴讼堂上素幙垂清虚冷然念同调发篋贻双鱼赠我金错刀投我琅玕珠感子缱绻怀殷勤系罗襦岂无倾城色贵此无盐姝林风冉冉暮岁晏羌何如

哲人代沦谢大雅谅难作世路日凌夷词场巧柄凿眇眇郢都匠戾目陵阳璞何彼金闺彦高谊振顽薄尺书寄远道论交慰离索风霜粲华緜飒爽动林薄神剑贻雷张仙舟伫李郭寥寥九成奏孰振钧天乐千人失酬和词组谢雕琢泠泠金石声三叹起韶濩

神交岂在面片诺为生平缅彼古圣贤立谈盖自倾伊人瑚璉器光辉耀连城蹙然穷谷中晤言托同声朱弦久摧絕为子绕夜鸣伤哉白日暮俟彼黄河清金石有时泐浮华安足营所希大业崇努力追炎京百世犹比肩千载垂令名区区九州岛内胡惧不合并

大江际天流将子一苇航飞涛如雪山日夜奔钱塘同心苦离索泪目驰河梁岂无盈觞醪我友不共尝蒹葭被白露林叶何萎黄朱弦感人懷怨彼离别长翩翩两龙剑各逐晨风翔雄雌一朝合紫气腾岩廊许身贵许心片诺为肝肠寄谢久要客形骸良可忘

赠吴生充二首

季重方七才子华侈八面承家得苗裔甘守蓬蒿贱世途尚豪侈裘马互矜炫伊谁振大业往往雠笔研翛然韦布中嗒尔罢歌艳遁迹吴山阳索居严陵岸千秋岂不劳乐此琴书翫

一丘伴麋鹿抱膝良堪多何来念同好负笈攀藤萝先生久避世白眼横庭柯乾坤莽寥廓故交邈山河玄亭不盈丈愧汝常经过矫矫侯芭生抱饥习吟哦英词烂金石激

楚停阳阿黄鹄飞摩天壮龄日蹉跎岂无朱弦瑟为子回沈痾才人例百六坎壈终如何
赠黄氏二仲诗二首

括苍一抔土遂安万山腹大泽生龙虵连城孕双玉俱操七寸管并骛千里足邂逅
钱塘涘翻■〈衤迁〉紫阳麓折齿师仲淹和歌到穷谷眷言申末契悠然味伐木

孟阳诚哲昆季方亦难弟矫矫江夏黄联飞盛明世谈诗各起予琳琅遠公社双凤
鸣云中二龙语天际回首华阳宫故交日殒逝晚合盖自倾居然洞肝肺隋珠岂不耀愧
此荷裳系归与葺衡杜白首期勿替

清华馆为程生元鲁题

大鄣擅幽奇名园负东郭衡茅数十椽轩敞带长薄林木何翳然空庭散鸟雀清涟
媚藻荇绿波映衡若夹岸芙蓉披中流芰荷灼翩翻白羽下拨刺紫鳞跃之子吟逍遥饮
泌自斟酌沾沾御元礼饗饗献康乐问字开扬亭校书闭刘阁丈人习名理夙谙卧游乐
观鱼失濠梁骑马涉京索缁尘染衣袂行行悔入洛何当筑土室行坐此丘壑千秋三径
中求羊未寂寞

汪生惟德工奕而温然长者行持卷乞言为赋

汪生歙都彦家世本阀阅总角游巴邛邂逅四仙列龙肝窃余剩随风堕天末携书
客武林精心究图牒休仁迨仲甫遗谱恣翻阅藏机玉局中妙思鬼神协一廛据湖山所
当帜必拔九枰欲较王半道祇输滑纱帽挈隐囊翹然布衣侠高车长者聚短巷俗流絕
半轩风雨声广武战初合奇谋骋六出庙算穷七伐斜照委绿苔残星蔽黄叶逡巡斧柯
烂惨淡烛花灭谁云奕小道先生早■〈足必〉跋岁月羸二毛悠悠茂弘业当今号国
手方吕蔡颀颀一匡方擅齐（方寓清源）偏霸汪表越吕蔡季孟间吾评匪僭躡黄王
及朱范少俊互腾踏猗哉盛一时挽近谅难越就中孰恂恂生也最驯洽澄清叔度侣谨
畏伯高埒争先戒贪竞殿后泯骄伐遇我吴峰巔屡结丈人袂愿言丐只字千秋耀眉睫
年来谢笔研推敲废颊舌参差宿习萌把袂若中热为汝聊啜嚙毫端纵涂抹久矣忘成
亏谁云较优劣枯棋三百六廿载闭空篋冉冉负局翁骑云去闾阖

送林贞耀藩叅之岭南

晨餐帐不御飞龙在河梁驾言奉王命千骑巡东方材官负旌节组练纷路傍还州
震华鼓里閤烂生光伟哉图南鹏八翼顺风翔把袂即修途行行涉炎荒岂无临歧戚执
手互彷徨与子异形骸去住安得双丈夫志万里六合如帷房勉哉策高足铜柱流芬芳

大荒极东南山川莽回互四百罗浮峰参差矗云雾关河信纡郁人文亦横鹗闾闾
连城壁吹嘘竞相慕兴言适遠塞甘棠夹广路猗与振大雅始兴并风度落帆炎海陬舍
筏曹溪渡勾漏饶丹砂行歌白日暮絕域宁久淹金茎湛仙露万仞飞云巔帝閤会平步

读林氏三世集寄贞耀参知天迪员外

峩峩晋安里王谢惟高门三朝四八座玉立辉乾坤木天何寥廓金闺信沈沦云烟
烂东序河汉流西昆賡酬亦递唱文采如云屯突兀黄金台咫尺限帝閤川容卧辘水山

火歌陆浑花晨竞彩笔雪夜携芳尊欢言颂遗藻典刑俨生存良哉汗青业奕叶垂云孙
乙未秋邂逅梅生泰符把臂甚昵同观涛江上别去未几则闻生病且殆俄闻生竟
不起矣余再入武林检敝篋得生手书屡纸不胜山阳邻笛之怆爰赋二言投宛溪之上
以吊之

梅生宛陵秀负笈来钱塘啸咏湖山间咳唾驰琳琅一朝玉树亭覩我神飞扬十载
胡先生姓名狎词场慕子如渴饥戚戚萦中肠龙门屹造天怨彼一水长班荆倏成故愿
得升君堂嗟余蹇且拙厯落如桓郎将汝缱绻懷永夕连匡床观涛大江溟海若为彷徨
眷眷执手言晨风发河梁将无绮语累念子毛发黄愿言保玉体百岁遥相望

流光不相待倏忽三岁久郁郁上东门春风五杨柳端居感离索念子成老丑何图
羽翼乖丧我同心友玉树埋地中垂杨几生肘发函见君书洒泪湿蓬牖天运阻百六词
人厄阳九劲风扫飞藿弱质复何有伤哉大国赋默默如澠酒遗篇烂金石为汝藏二酉
千秋宛溪上不愧朗陵叟

玉楼篇题李能茂遗墨后（有序）

东阳李生能茂抱絶人之姿年未四旬而夭折中道且遗文漫轶有长吉锦囊之憾
焉大块于才胡亟裁之而亟覆之若是岂上清白玉楼重构非陇西氏子例不使操觚帝
傍耶余视生忝一日长生谬以匠石见推余亦以得生里闾快愉甚乃生竟落落死矣昔
长吉就征杜紫薇至为奴仆命骚之说生幸获长年即亡论驱驰屈宋其力追两都三唐
而不为王孙之诞漫可前箸■〈汜史〉也生于当世所尸祝弇州氏外意以信阳吴毫
三数公悉易与而颇时时挽轂厯下生此其持论稍与不佞左者自余上下千载大都若
合垠箴居常盛气欲见所论著垂一家言而疾病未逮今所存歌诗仅仅数卷则余业序
行诸世矣他传记杂文既散失而书牋数十百首独巍然余巾笥中暇日因为装潢成轴
时展阅之以舒愤懣秋清木落宴坐斋头一二友人过从谈艺偶取生遗墨纵观不觉哀
涕淫淫横集衣袖河山宇宙纔一俯仰便作陈人悲叹之懷庸可复喻辄走笔三十六韵
涂抹卷终生诚有知得无太息于穹壤也

香山兜率宫谯郡遮须国笙飞蛻子晋楼成召长吉造物诚小儿大块黯无色伤哉
一抔土瘞此连城壁矫矫东阳生雕龙擅畴昔雄心万古挫猛气千夫失踔厉无前修精
进寡俦匹双眸狭宇宙今古照瞬息弹丸婆娑界十指肯浪屈猥余一日长闾阎复咫尺
负笈来藤萝披襟坐蓬荜长啸金华颠大呼石羊窟操觚问真宰惨淡白虹泣晚叩琅琊
门中郎倒屣出通家孔融后下榻陈蕃侧如澠卜兴代生花赠彩笔频窥慈氏阁屡面初
祖壁善才拜未终慧可髓几得呜呼大雄逝金棺拉摩诘一真返桑扈三号吊秦失白日
愁西南浮云怅东北伯道无遗孩梁鸿有陋室弱女涕泗横孤嫠形影只蟋蟀集荒榛狐
兔入丛棘殡宫对棠梨织乌伴于邑何人奠麦饭有客叹陈迹高文汲冢殉丽句紫薇緝
粲烂流江河纵横走都邑只字回彭殤寸心炯得失荣华剧臭腐眼底复何惜嗟余少濩
落狂名世争诟青衫二十载穷愁仗汝释一朝断交臂畴与豁胸臆闻笛时悲酸横琴重

凄恻粲粲白玉京修文拜新职惟应大鹏辈八表独挥斥

寄苏君禹二首（有序）

与君禹别都门倏复二载是秋余寓武林忽闻君禹仍有燕中之役亟蹶屣钱塘握手则先以黎明出关外矣一水盈盈坐失良晤怅憾不可言

转蓬亦有根飘飘随长风游子岂无家卒岁歌途穷宛宛同心人咫尺钱塘东眷言赠芳草轩车若游龙朝驰武林驿夕止御儿宫八翼排金门双钩气如虹而我独何为一室长怵怵伤彼四愁咏目送寥天鸿

桂林实奇秀千峰矗云霄丈夫桑弧志驱马万里遥曲江浣尘壻愚溪涤烦嚣伐鼓震五岭舞干洽三苗昔人读书台突兀回霞标黄鹄一再举宇宙参游遨鸿篇勒琬琰姓字留荒要皇皇四门辟柱石昆清朝

幔亭篇答黄文学尧衢（有序）

莆中黄尧衢以干牍见投亶亶数百言陈义甚高而过情推挹鄙人几于昌歎之嗜比读其所为诸序传乐府杂诗奔诣两都六代间令人应接靡暇闻生年仅仅逾冠胡以一蹴至斯尧衢雅欲得予言为序适病中愤愤且茂漪始睹逸少笔踪神气顿尔疲繇爰赋五言古体二十韵稍致区区仆生平寤寐闽游三事拜瓯宁滕先生墓及握手武夷君饱啖侧生而返今且并黄生四矣他日扁舟东下振衣长啸于幔亭之颠尧衢得无踊跃和我也

黄生起南服摛藻自弱冠蝉噪薄隋梁龙跃躡秦汉大言或元封小咏亦贞观宛宛乐府词珠玑烨璀璨畸游闽海上独抱延平剑九曲浮清冷九漈吟泮涣飞扬大江楫踟躕广武战何哉九合勋桓文谬推赞前茅受旗鼓中权属坛坵穆穆清风颂寄我剧三叹呜呼哲人颓往事涕如霰琅琊玄草绝丰社白榆散阳春怅谁和长夜邈难旦灼灼倾城姝昭阳擅飞燕凌云羽翮就泽雾文采变大鹏遇希有八极眇一盼将无笑鸞鸞会有嘲斥鷃俗士迷前筹达人炳遐算奇峰三十六一一造天半为报武夷君广张幔亭燕

夜灯同永叔话旧仲子弼年十四于座中戏咏白石榴有霜寒秋色净明月挂枝头之句余嘉其风格朗朗赋此勗之

石梁驾丹壑赤城横紫霄天台八万丈的皪悬霞标司空毓灵秀龙跃随神尧华名走绝域茂实腾中朝郁郁庭阶树三珠粲同胞青钱捷唾手俯拾如承蜩高阳失才彦颖上惭时髦文章聚花萼薄海夸贤豪緬余识季公把臂成久要古心出坟索逸韵驰风骚矫矫八尺躯耻偕儿女曹曾吞梦泽水气折洪河涛雄飞邈广汉雌伏懷穷交皇皇潞河涘十口勤维梢空同倚长铗函谷遗终袍吹嘘及朽干揽挈当前茅狂歌复痛饮浩荡穷深宵呼卢堕明月角奕流神飙情投俨胶漆契合钧咸韶酒酣见仲子烨若英琼瑶翩翩慕周孔卓萃谭伊皋孤芳涤尘膩五字驱炎器灵光诧授简鸚鵡怜挥毫扬收劣加岁子安正垂髫伊余越四十兰玉殊凋萧对此重叹息中肠热如焦于门一何盛咄咄锤灵苗丹山詎凡翻渥水真奇毛勉哉事大业岁月如风飘无穷有令闻不朽宁金貂下帙第发

愤惜阴竞蓬茅六经鼓元气百氏罗秋毫余皇破巨浪繁弱联双鷗祖孙及子父奕叶驰
华镗回首天台色东南正寥寥惟应太原望世世争岩堯

少室山房集卷十五

●钦定四库全书

少室山房集卷十六

（明）胡应麟 撰

○五言古诗一十八首

戒装武林别施蔡二生

施生赤城彦蔡子黄岩英吞吐石梁霞各着词苑声相逢武林道握手盖自倾交孔
竞持刺识韩互班荆廿载龙门懷一旦希合并空山咏伐木求友何嚶嚶緬余朽且拙蚬
窃鸣春莺翩翩两国士立谈四座惊击筑邀渐离脱剑遗荆卿河桥骤脂辖立马言长行
行行去吴会望望投幽并屋梁梦颜色落月悬高旌念彼新知乐日夜肝肠撻

翠筠轩十六韵为姑蔑柴生起用题

仲蔚耽蓬蒿陶公艺松菊何如三径中翛然万竿绿掩映王猷居蔽亏张廌屋夹砌
澄清涟捎檐洒飞瀑琤琮风乍鸣葱蒨雨新沐秀色分渭川清阴散淇澳天寒白鹤下日
暮文鹤宿主人挟胡床闲把道书读曳杖时科头衔杯或坦腹裴李咸披襟嵇阮互游目
高秋横笛音五夜洞箫曲嗟余罹世网羨尔轶尘俗佳人隔翠袖千里梦空谷将因挈枕
簟晚岁共幽独

题蔡稚含适适轩二首

达人委元化哲士戒迷涂一枝遂鷓鷯九万匪所图乐志追仲长潜耀希王符轩窓
仅容膝结构临菰蒲座右横清琴相对酒一壶客来但留酌往往高阳徒俯仰宇宙中倏
若黄公垆秋色下前山我醉君但扶不见南郭生嗒然忘故吾

忆昔金马门执戟趋铜龙雄飞奋六翻夭矫随天风一朝事势异漂转如征蓬人生
贵适意大业宁三公开轩赤城畔丹霞照帘栊图书不盈丈有若蓬莱宫神游八极表目
送双飞鸿陋彼征西贵柴棘盈胸中太虚为我宅何事悲途穷

再送惟德使君挂冠还景陵

士有旷世志宏览隘八荒烨如岐山凤千仞常孤翔矫矫徐使君束发趋明光高台
骋骥足絶栈逾羊肠淮圻缚猖獗歛甸宁劬勩肤功勒琬琰大业悬旗常洪流割淮泗再
起纾懷襄玄圭帝三锡荐牍交岩廊皇皇神武门振步皆康庄凉飈倏以厉悲彼芰荷裳
一朝返初服挂冠出徐方父老涕泗横蹙蹙盈路傍勇退乘急流永谢浮名纒咄咄邯鄲
翁朝餐熟黄梁大千等梦幻绿鬓俄秋霜逝将息埃壙冲漠朝羲皇筑宫寄层巘结宇临
崇岗曳杖泰山颠挂瓢颍水阳五湖笑鸥夷六合追云将我友值明发送子临河梁眷眷
脱屣懷大觉回沧桑高风凜百代感叹徒彷徨伟哉扶摇翮宇宙呈圆方他时挟鸡犬拔
宅升微茫金茎烂云际甘露流天闾愿言洒病骨余沥沾枯肠

懷姑蔑柴生起用时生将谒余燕中

秦嘉滞府胥常建窘邑尉良哉达人言高才鲜贵位矫矫姑蔑墟柴生出其类青云走牛马白日偈蚊蚋案牍劳形神刀笔记功罪八议权亲疎五刑核情伪宁懷张杜刻敢冀萧曹会论交企兰荃投诚密萧艾丽句搜梁陈遐思闯晋魏白雪流轻扬丹霞献明媚沾沾太玄草捧诵若金匱嗟余素寡合念汝欲捐佩南山歌未阕北陆盟忍背（时生将北上谒余燕中）胜流实嵌崎名士本憔悴浮踪自昔然大业岂终累不见渔阳挝正平兴弥銳至今鸚鵡篇永拔词赋萃

挽宋西宁忠父

贤士悲龙蛇才人困百六嗟嗟宋子侯宛尔大夫玉夭矫珊瑚枝光辉夺鱼目冲虚本天性濡下甘自牧执轡道愈尊结袜躬岂辱门庭聚四海宾客互追逐飞觞不问主洗盞辄更仆悲秋坐五夜避暑卧三伏欢言讵知疲豪举动惊俗才高世争妬名成帝未録上谷无爰书中山有谤牍一眚遗干城寸朽弃良木长康笑黠痴桓伦叹■〈厠厯〉轆万鍾亦何加千秋会相属煌煌白玉楼忽赴上清策令威去辽阳莫邪闭丰狱虚堂妖鵬鸣荒冢孽狐伏河山怨离索宇宙恨幽独白杨翳泉台青藜熄天禄寥寥郢中赋凄怆不堪读

方母孀节诗为厥子伯苓题

烨烨新都媛修蛾粲明瑯十三字君室十五登君堂良辰一以醮中厨奉姑嫜眷言拂巾席皓首偕匡床风波起中路庭树飞秋霜青铜掷妆阁碎裂罗衣裳剖心慰夫壻截发藏筐箱空闺抚弱息血泪横枯肠松关白日暮永夜啼寒螿抱影三十年哀哀称未亡緬懷励高节泚笔题篇章他时继黄鹄万古明天常

宝剑篇（以下古意三首赠邓子遠游）

司空两龙剑紫气何煌煌雄雌闭石匣万古垂精光忆昔初铸时乃在越溪傍谁能为此技莫耶与干将百炼就鐔鏗千炼成锋芒风波起长路出处俄参商一飞九天外八翼游岩廊一沈九地中悲鸣和寒螿时命固大谬分违亦其常与子匪一身尔我安得双天马咏

天马汗血驹駮駮出湟中一鸣伯乐顾再鸣冀北空何来市骏者相值华阳宫黄金百万鎰玉勒驰青骢飞行歷九陌畴不怜追风悲哉照夜足踟躕太行东岂无烈士肠岁年倏成翁徒令厮养卒执策嗤龙钟

豫章行

亭亭孤生木厥惟豫章材苍龙蛰岩穴鳞甲缠莓苔一朝鲁班氏伐至秦王台中天悬高栋有若登蓬萊万间碍星月九级披云霾金银互文饰朽栝庸堪偕宁知大椿树广莫甘尘埋春秋八千计逍遥卧无懷

二难双美诗为大叅张公赋（有序载别卷中）

猗欤三百篇张仲顛孝友四姓雄金閭吴趋实材藪森森五丹桂扬芳赞皇囿惟时

疫疠侵高堂阨阳九饗殄滞床第汤药盈鬲卣诸昆竞扶侍昏旦递奔走叔也尤彷徨虬虱生带纽露祷临中逵恍惚心语口母算倘可延儿躬曷遑有昊天若倾聽冥冥肯其首沈疴遽霍然衰札起蒲柳一死全吾心庸恤近与久飞腾属少公万卷穷二酉大孝昭显扬龙章焕星斗元方操实奇季方遇宁偶峩峩二难列异代同不朽二难既表吴双美尤擅越緬懷神仙尉微官寄太末束带见督邮甘等绛灌列去思二十载高风柳下颀积庆流参知振代覩人杰诗礼闻家庭颂赋起岩穴读书直中秘五车恣渔猎升沈递扬厯显晦互更涉直声耸庙堂上考奏藩臬大旆翔三衢棠阴半姑蔑遗民泣往躅故老颂休烈厅事垂双松步武俨对越熙朝述盛事名宦祠世业至行通神明清芬播齿舌弟昆洎父子后先迥光絶令誉收一门千古垂闕阅

饭惟寅白雪山房话旧

错落双龙剑寒芒凌素秋紫气烛丰城射彼斗与牛一朝遇司空发函佩吴钩风霜划相妬坐拆苍精虬雄飞渺北极雌伏还南州山川莽寥廓哀鸣互相求霜华粲中夜索处声啁啾何意长安陌相逢重夷犹一见喜且惊倒屣罗珍馐高堂把桑落厯数平生游弹指三十年震旦若浮沤夙昔红颜子参差俱白头升沈间存没万感盈荒丘緬邈同心人中原聚名流琅琊失麟凤岭表埋黎欧突兀鲁灵光寥寥见君侯头风汝旋愈肺病余宁忧惟应委元化百龄暮优游安期下玉舄赤松驻瀛洲仙飙载羽翼八极朝宸旒

惟寅以书贶驰使潞河适媵人偶举一子走笔赋答

惊尘荡白日羸马驰郊墟怅彼同心人緬邈百里余举头云中翮有鸟衔尺书粲粲瑶华札开緘照衡庐慰我加餐饭问我何方居十口寄他乡晨餐食无鱼芒鞋役歎段谁为供高车感此长太息临风重踟蹰肮脏宇宙间畸游抱琴书朱门盛先达落落穷相如夙昔逢君侯青骢曳华裾情亲四十载胶漆垂桑榆缠绵国士念涸辙频吹嘘岂忘木桃报再拜惭庭除中闺夜得雄旅抱偶一舒眷言骨肉友卧起同徐于持此答芳讯聊用当璠琚頽然定一笑为我掀■〈毛瞿〉毬

题瞿令人册为茂才绍曾（有序）

令人瞿氏丁生绍曾母也笄岁有家夫遘痼疾矢心夙夜扶颠持危垂四十年终始惟一今绍曾长补邑弟子员矣念令人劬劳逆境迥絶他为人妇者持册介从叔父文统谒余武林曰惟先生宠施一言即华袞母氏亡异余既高令人之谊且愍绍曾之惓惓请也援笔慷慨为赋五言古二百余言

妇惟丁生母卓行超人寰笄岁适名门宛若蕙与兰结褵讵云久灾氛岌相缠良人遘奇疾百体纷摧残心神忽眩暝手足时颠连欢娱掷中道畴不虞红颜母也执高节涕泗如流泉呼天誓同穴肯析双飞翰一身委床第药物长周旋肝肠絶怨怼面目忘媿妍仰事头白姑俯鞠黄口男家徒四壁立辟纒夜灯前拮据度荒瑾永昼懷饥寒彼苍鉴明德绕膝森鸛鸾矫矫汗血驹励志游天闲劬劳念母氏赋咏搜名贤我闻载叹息踴跃操如椽偷生信为易蹈死亮非难厄哉斯人遇毕世罹忧患贞心既不毀淑问仍终完夫存

子亦树晚节聊蝉联宁知处困懷荼毒穷当年凛凛铁石肠兴彼懦与顽裁诗颂令哲史笔千秋传

谒关忠义庙作

中原邁百六汉鼎分三雄矫矫忠义侯挺身出蒲东草茅识先主仗剑扶真龙间关袁吕营百折明丹衷飞扬白马战锐气嘘长虹立取上将头万夫摧折冲解围谢曹氏絕婚诟吴依巨浪滄七军襄樊列艨艟禁俘德亦虏大江血流红威声赫华夏曠日悬晴空陆浑亘许洛壶浆若云从詎意肘腋间包藏剧羣凶蚩蚩众狐虺发奸维逊蒙轻舟袭南郡九仞隳成功麦城困孤旅临殂徽元戎詎云彼苍酷况乃炎精终昭昭玉泉宇膺蠻侔层穹河山峙壮节尸祝盈寰中姓名走妇孺位号歆儿童伊余肃遗像飒爽来英风嗟彼操与权死生细螟螣累累两国贼紫阳笔何公遐哉九朝祀元运偕无穷刚肠俨对越三叹钦前踪

观察林公尝感异梦于忠义以左辖赵公之辑侯志也索题其像爰继此篇

汉统邁桓灵县宇互分裂卓布首倾危操权晚猖獗矫矫中山胄风尘締材杰猛气雄万钧危途歷九折下邳阨羊肠官渡奋鼠穴生平为刘念俄顷报曹节大呼梟敌元干将路明灭全师镇荆楚威名愈腾掣孟起标卢前汉升耻灌列长驱出汉沔舟航泰山压禁俘若羊豕德磔等螻蛄先声震华夏壶箠道填咽高光四百基克复伊眉睫汉贼肝胆惊吴歆梦魂摄外交托姻■〈女连〉内忌迥秦越阴谋剧魍魎狙伺銳饕餮■〈舟鹿〉藏戈矛烽屯虏间谍侯也天日衷迄墮羣小策崢嶸两岩郡望风授凶孽遂令盖世功弹指恨（阙）

少室山房集卷十六

●钦定四库全书

少室山房集卷十七

（明）胡应麟 撰

○五言古诗二十八首

婺中三子诗（有序）

三子者刘参军峻沈仆射约骆侍御宾王也孝标以流寓休文以宦游宾王以起义出奔他郡迹三子始终无论隱侯即刘骆二君未可以婺槩者第吾邦文学三子实首倡之则婺虽一日之过犹其汤沐矧其生于斯仕于斯没于斯也夫休文达矣孝标宾王则穷乃其风节矫矫咸足重婺余既为白诸学使苏公则复隳括其槩并隱侯为三子之篇亦以余之穷有相类者匪曰气味之合已也

嵯峩婺女郡星斗垂寒芒寥寥旷千载气运开齐梁刘生实天启乳哺随高堂翩然自北来焯若孤凤凰读书紫薇岫一目逾十行山栖表遠志絕交廬中肠千言走珠贝七録披琳琅含毫策锦被倏忽惊岩廊遂令世主忌坎壤终词场龙蛇諒斯在鸿鹄詎可量矫矫七尺躯耻为万乘降胡然际悍室妖牝啼朝阳潜身叹孤犊跛足追亡羊太息敬通

论今古为彷徨（刘困于悍室轳轳终身常着论拟冯敬通见史余每太息云）

右刘参军孝标

仙李方二叶九庙摧妖狐剝剥尽生灵宇内无完肤岳岳临海公奋袂起菰芦义旗
举大泽百万当一呼虹霓切云汉雨泽滂泥涂操我七寸管问彼六尺孤片言吓淫牝一
战梟羣奴惜哉下阿战倒甲如摧枯奇功固罔立大义差足扶披緇入灵隱觅句酬跼跌
金锤隱博浪巨轴流江湖固知艺文杰詎曰器识疎一辞道王辟无忝令伯徒至今读遗
草激懦开顽夫（骆没后诗文散逸郗云卿搜錄余剩梓之余别辑骆氏忠孝传详载）

右骆侍御宾王

六代更废兴文士故不乏奋迹惊才贤乘时见髦杰猗欵沈隱侯文章何烨烨骋望
游中台违情守东越佩玉辞岩廊鸣金下闾阖沿泳双溪流迟徊三洞穴会圃临春风登
台望秋月（引沈原句）旌旆俄飞扬剑履倏腾踏一代懷龙门千秋仰驥秣四声启后
流八病表先达尽剖洪荒秘卓为艺林筏儒生互雌黄志士竞鈇钺寥寥数千载风流竟
谁越岂伊腐草流尘土共澌灭（八咏绮习本非絕尘然四声之传足俟百世）

右沈仆射休文

二懷诗（有序）

二懷者张进士子同姜禅师德隱也一遯于仙一遯于释固荐绅先生所不道然唐
婺中诗流自骆丞而下必次及焉即调或卑卑固时代使然矣夫志和浮家雪上而休公
驻锡川中盖二君亦非老于婺者岂贤者避地自昔共然将词人多穷迄今尚尔耶夫余
亦有遠游之思而未得其挫名之术也故于二君咸沾沾有遐慕焉

有唐迄元和畸流尚不之翩翩玄真子百代恣渔猎雅志游松乔奇踪轨庄列嗒尔
柱下言超然谢津筏富贵轻鸿毛轩冕等澌沫一辞世主聘浮家老苕霅

右玄真子张志和

唐末緇流空休公崛然起卑卑局晚调兀兀吐玄旨冥心师楚圆苦思叶齐已禅启
天竺詮画妙应真理片言忤大帅脱身钱塘汜一钵游岷峨逍遥入无始（緇流谈禅盛
极唐术然文采顿乏矣休公画理入妙应真今传）

右禅月大师贯休

婺七贤诗（有序）

七贤皆婺中先达宋元以来文学士也吕太史虽一代儒宗顾其实有不可尽泯者
屈就兹列焉

于越称上游婺实文献域唐末何式微宋南复中辟太史虽儒宗词华蔚天植惜哉
掩艺成端居圣门籍

右吕太史伯恭

同甫真人豪矫矫谢拘局宁为跃冶金肯作瓦全玉四上阜陵书十返紫阳牖至今
华川阳英气贯岳瀆

右陈状元同父

与正颇负奇翩翩孝皇代作吏弘风流经国纪乡遂世尊考亭疏迄掩干城锐细行
诚足矜大德岂终累

右唐刺史与正

侍讲起胜国举代推词场高踪峙虞揭遗躅开宋王遂令婺女颠光焰万丈长（韩
语）惜哉骆刘绪缅邈空梁唐（侍讲元倡宋王继之然风雅一途犹三舍也）

右黄侍讲晋卿

文肃兴闾阁挥毫走当代文事既淳泓儒宗亦映带毫濡灏川涘研涤浦阳濂一传
太史公粘天决千派

右柳文肃道传

金华本学藪渊颖弥锵锵潜心事大业奋志游羲皇一命讵足荣千秋在文章鸱鸢
亦奚事腐鼠矜鸾凰

右吴山长立夫

元季多奇人出语必惊众山川纵吞吐造物时簸弄魂梦游玉楼敲推入醋瓮嗟彼
龙豹姿甘为鬼才用

右陈隐居君

采邑三贤诗（有序）

余邑当宋元得贤者三人皆深于经术不可以文艺尽之乃其著述班班足考镜也
作三贤诗俾毋以质掩其文焉

濯濯香溪流汀洲杂兰芷之子懷清芬南渡勃然起大隱弘高风真修味玄旨遗文
讵必多一裔见嚆矢（邑有文集自茂明始今香溪旧刻尚传）

右范隱君茂明

吉父英雄姿夙负济时略不受帝王知遂工贤圣学著述逾三车卧游历五岳至今
尚典刑遗像俨丹臚

右金文安吉父

煌煌礼部公执戟隱金马怜才若饥渴片善必挥洒余日酬诗歌居然振大雅世无
扬子云谁为好玄者（正传着敬乡前后錄礼部诗话等编采掇故实勤至亡比）

右吴礼部正传

读国初四君遗集（有序）

文章国初越最盛越中婺最盛浦阳义乌金华三数君子者虽风调沿袭宋元而淳
龐敦大蔚然开一代先李献吉云金华数子真絕伦非溢语也诗歌稍左次当行亦往往
有足观者余读四君遗集慨然其人人四韵以识余臆

猗与太史公振代见才杰百氏勤瑇二典恣渔猎雄章发天造大手扬帝烈至今
艺士林冠世推闳阅

右宋学士景濂

忠文起草昧弱冠宣王猷雄才动宸宁大节扬蛮陬肝肠凜铁石毛发如悬疣巍巍
文士烈焯焯垂千秋

右王忠文子充

奕奕空同生名家出华右雕龙擅制作绣虎威百兽才启北地先裔属颍滨后遂令
赤松顶峨眉郁同秀（平仲颍滨九世孙亦号空同子在献吉前）

右苏内翰平仲

才贤萃吾婺仲子维吾宗双溪濯衡杜三洞扣芙蓉霜蹄紮百里天门恨九重寥寥
信安集一窗窥良工（仲申所传信安集甚寥寥读者不无遗恨云）

右胡教授仲申

宋王二隼篇（有序）

宋文献有子曰璲王忠父有子曰绅各以少颖知名璲书法为国朝第一惜夭折中
道而绅以孝行蔚然光绍先人皆匪可文艺一端尽者并识数语为二隼之篇

浦阳既龙跃华川亦鸞起有雏必九苞为驹日千里飞翰洒玉楼重茧历金齿太息
承家风寥寥坠兰芷（仲珩书絶少诗仅数篇王氏继志集亦罕传者）

右宋璲王绅

存没篇四首（有序）

粤黎梁欧三子洎吾乡子与方伯皆余忘年交也都门一别梁徐相继下世仅黎欧
存爰叙四子为存没之篇

黎公产岭表宛若荆山璞沉湎偕步兵滑稽类方朔一官寄长安十载卧玄阁悠然
太古民相对忘寥廓

右黎秘书惟敬

嘉隆振雅道徐君实天纵翱翔五子间焯如九霄凤维昔平原馆如渑为余颂倏为
岱岳游能无山阳恻

右徐方伯子与

焯焯欧楨伯人伦挺奇迈宦游三十年囊惟一毡在大隱留金门遐惊寄尘外把臂
惭后时论心乃前代

右欧博士楨伯

太息平生交梁鸿遂长夜忆昔长安游屡命千里驾遗冢邻要离修文佐卜夏罗浮
四百峰望尔涕交下

右梁内史思伯

寄吴门四子诗（有序）

王承父屡订余入访乌镇至则葭菼茫然无复问津处过金阊适周公瑕与客游天
池泊昆山觅王世周寓娄江觅曹子念皆出谒所知矣遂各为一章寄焉

公瑕布衣侠凤习游钟王珠玑耀千裔琬琰被八荒诗篇匪细事一一追三唐希声
岂谐俗太息云门章

右周文学公瑕

东吴菰芦中乃有如此人形骸若象罔富贵轻浮云含毫役万彙混迹游风尘笑我
何太拙白首攻玄文

右王山人承父

曹生滑稽雄自称子建后须髯河朔豪翰墨江左秀康伯惟令甥杨恽实贤舅为忆
两琅琊哀涕泫清昼

右曹山人子念

艺土工浮儂末俗寡淳质自与王郎游恍入华胥国锦里余角巾临邛有立壁一诵
次公言千秋白虹泣

右王茂才世周

少室山房集卷十七

●钦定四库全书

少室山房集卷十八

（明）胡应麟 撰

○五言古诗一十九首

六公篇（有序）

六公者高太史季迪李观察猷吉何观察仲默徐博士昌谷高参知子业李廉访于
鳞也其三洛下其二江左其一济南总之上距国初下迄弘靖诗家者流正宗巨擘尽矣
余束发寤寐诸君子读其遗集恨不获一当其人是秋舟过吴门欲入访季迪昌谷故居
而州民遂无识者盖颓没榛莽久矣嗟夫彼其盛名朗朗悬诸日月世代非远河山邈如
由后视今维今视昔俯仰宇宙能无怅然爰并李何四子为六公之篇后之同志或将有
感于斯咏云尔

四杰起江左太史何琅琅一鸣骇万鸟百中连双鹤朱弦奏上国白纻歌明堂遂令
十叶后率土归吴闾（谓嘉隆间也）

右高太史季迪

河洛鍾人龙图书倏辉映文起八代衰诗还四始盛坎壈虽当时灵光独晚境突兀
空同颠犹懷广成问（猷吉年视何徐辈独高一时并起薛郑熊高等皆无年云）

右李观察猷吉

嵩岳降英灵生申维仲默威风转紫霄祥云捧丹日得岁劣陈思齐年过王勃今古
三少成惜哉同六极（尝谓古今早慧而能大成者三君居最又不寿畧同）

右何观察仲默

斯人江左秀朗若披云岑清风振玉佩白雪鸣瑶琴应刘失前步陆谢无遗音太息

谈艺録良工诚苦心

右徐博士昌谷

李何峙中原顾盼失后辈高生稍晚出如澠倏兴代清庙列尊彝中天落空翠咄嗟
有尽年骤与飘风会

右高叅知子业

嘉隆建大业济南实前茅含毫有八极耸翼无九霄遐心自皇古傲骨宁中朝至今
蛾眉雪千仞留孤标

右李廉访于鳞

五君咏（有序）

丙戌岁王长公作重纪五子篇今复逝其二矣叅以余所知欧赵两公为五君咏两
公亦司寇旧称五子之二也

桓桓司马公文武实天授大笔摅云雷穹碑揭宇宙横飞北地前独步弇山后伟哉
词人场百代归领袖

右汪司马伯玉

明卿起南服束发嫫声诗一麾守岭海三黜行罗施飞书问供奉炼句追拾遗谁能
竭大海尽出珊瑚枝（吴官夜郎尝有诗懷李供奉）

右吴叅知明卿

张公江海客卅角游天朝霜蹄躡千里风翻转九霄彩毫建安席赤帜开元标遇我
华阳馆片诺成久要

右张中丞助父

岭南维欧君俨若饮醇酒拙宦三十年工诗五千首黑发游中原白头卧林藪惆怅
兰阴台落日共挥手

右欧水部楨伯

矫矫赵司成风槩自天植胸腹罗星辰肺肝秉铁石轮埋御史亭座首司寇席蔚为
文士光宁彼九鼎力

右赵太史汝师

八哀诗（有序）

八哀皆当世巨公名流也昔杜陵咏八哀以李北海苏司业之文学张相国严郑公
之政事李司空李大尉之勋劳李汝阳郑司户之才艺为次盖通举当代之烜赫者不必
受知也若国朝名臣辈出嘉隆之际倍蓰开元文学则有琅琊二王公政事则有若万安
朱公建宁滕公勋劳则有若铜梁张公定远戚公材艺则有若茂苑文公岭表黎公不必
曰通举一代揆厥攸造视少陵所称述无弗逮者或远过焉有之余生也贱且年地悬絶
诸公顾并当伯乐之盼即交有浅深受知一也爰效杜体为八哀之篇其文辞则瞠乎昔
人后矣

大司寇东吴王公世贞

洪荒忽中辟宇宙锤人豪间气五百年一旦开皇朝天挺琅琊公河汉骑斗杓题诗
恼玉帝谪籍游尘器肝肠错锦绣咳唾垂兰苕霄吞太湖水笔涌耶溪涛九岁咏凤凰十
龄题宝刀十三作文赋十九抟青霄高才聚东井散秩同西曹广心出皇古奋臂追前茅
呜呼蓟门事大纛摧鸣臬仓黄别上国惕息还蓬蒿归来卧穷巷削迹甘渔樵雄文凿混
沌大乐鸣英韶东瀛极沧海南纪逾铜标北冥亘沙漠西域穷荒要八埏走琬琰九域飞
琼瑶千金买只字百镒酬挥毫瑰辞匹坟典丽句骈风骚多闻失刘向捷给凌枚皋帝心
亦简在日夜驰干旄东山乍一出被发仍由巢竺干叩真詮漆园明逍遥香云拂几席甘
露流天瓢金棺下闾阖玉树埋山坳中华折天柱下界闻鸾箫双虬去广汉八骏升岷
玄丘见王母白云和长謡乾坤失盟主海岳颓高标安得跨大鹏万里随神飙

太常东吴王公世懋

清河维哲昆颖川实难弟太常何英英二十夸谒帝隼声走上国唾手拾巍第居然
棣花萼烨并芙蓉蒂翩翩擅绮藻韶莹絶尘泥皎月悬春空朝霞豁晴霁朗朗屋百间虚
舟了无系振佩游春曹诗篇骤名世标新见玄理汰俗起凡例纵横信阳筏磊落济南契
怜才贯金石握手忘茶芥伊余实庸弩公也口不啻挖扬亘古今寄托深衲褻太息身后
名孤愤千载计神游贯八极江海穷鼓枻飞泉漱三迭大泽浮九漈徘徊华峰莲厌饫闽
岭荔一纤太常绶清斋问真谛紫府翻丹经绛宫候飞履洪崖拍右肩金母拜左髻云輶
下五浊笙鹤遽迢递龙虵发丹灶鸡犬入霞际虚疑老成丧坐惜典刑逝三叹杜陵诗高
才日凌替

大司空江右朱公衡

猗与大司空突兀起江右烨如匡庐颠罗列千万岫弱冠登岩廊老宿推领袖功名
迄自致建树必高厚厯扬亘二纪盘错靡不就嘉皇四十禩八荒庆在宥河流倏奔突淮
泗若悬溜生灵困鱼鳖巢窟杂猿狖大庭推司空金曰惟夏后一麾出飞云百神互驰骤
铁锁缠支祈金书勒史籀大泽疏洪涛长堤障罅窦三时督工匠百里并延袤留城距济
谷一一置封堠白马沈宣房玄圭锡华胄平成在天地吐纳偕宇宙择言到刍蕘采纳及
芜陋垂髫诧国士煦燠若懷袖深知大海量涓滴务兼受緬懷西山芝愿纪南极寿胡为
跨鹤羽羣真毕相候褒荣亘泉壤雨泣遍耆旧尚忆驱龙蛇至今贡橘柚明明大禹德夙
夙絶前后

御史中丞闽中滕公伯轮

维三十六峰秀甲东南服笃生大中丞如海王百谷夙偕武夷君并主赤城篆沆瀣
餐七台明霞卧九曲一朝念黎元曳杖下云陆孩提见异质仪羽何郁郁虎头燕颌姿万
里飞食肉龙泉太阿锷见者讵敢触意气干层霄襟次苞岳渎皇王及帝霸一一悟正鹄
居邻紫阳宅先觉窃自淑刚严继子厚方雅表正叔三十登熙朝厯块征骥騄岭海行花
封罗浮翫朝旭含香入铨省造请絶直牒当门忌兰■〈苙 苙〉故里蓺松菊明主念旧

勋飞诏起林麓竭来柄文衡越士罄程督楼船泛沧海蓝笋历天目浩荡窥人文豪英
约束夜课三千徒朝荐十六族泰山纳寸壤渤澥收一掬伊余实弩蹇盐车困驰逐顾盼
超骊黄立贡千里足世轻园令金公拟卞和玉提携洞底里邂逅吐肝腹峩峩翠虚亭清
燕几回瞩礼数捐苛烦杯笋绝边幅潢池忽中扰帝命驰大纛强弩横钱塘朱旗镇三竺
威严控豪右字恤逮樵牧閭阎绝寇警仓廩发余粟遂令全越氓比户胤膏沐仰父仍俯
子左餐更右粥凿凿元戎疏宰司罄采录方酬大贤绩永显儒效速胡为跨青鸾倏尔讖
妖鵬剧知勋庸盛翻讶日月促譬彼南阳龙尽瘁事兴复一朝殒大星精爽尚肃肃缅怀
涧中藻已拱墓傍木吞声受恩士血泪尽痛哭先民失懿范遗统竟谁属惟应圣门业永
永耀斑竹

大司马西蜀张公佳胤

张公产岷峨夙抱文武畧伟哉沈深度宛若未雕璞通籍游皇都浩气贯碧落出宰
河阳县解褐遘盘错奸萌起肘腋万众互骇愕一顾摧凶渠势若反掌握及乎任西曹亟
闯五子幕大敌逢李王奋勇与之角遂登作者坛文誉不落莫功名浸鼎盛岁月旷著作
三关树高牙敌胆慑沙漠呜呼壬午事大手覩挥霍潢池舞鳅鱗白日走蜃鳄明廷廑南
顾大吏咸塞缩维公奋臂出长虹耀千莫首刷閭阎忧六街静鸣柝渊谋秘胸腹远智运
龙螭声色了不动从容卧帷幄一朝令辕门羣小悉面缚累累九青兕一一就脯臠人懷
顾复惠士有更生乐武功既荡平文事稍恢拓飞檄凌扶桑露布入平乐长裾曳曹丘敝
屣接东郭帝嘉定边勋飞诏下京洛本兵属运筹九塞遵东约胡为殒长城骤失北门钥
回思灏江涘单骑访岩壑迓我钱塘郊恍忽共濠濮诧我雍然音一代恣腾攫（张公手
书今存）手迹宛若新足音遽寂寞矫首铜梁里大树日萧索

少保山东戚公继光

嘉皇三十载薄海飞长鲸波涛蹴宇宙势欲东南倾定远起列校巍然任彭黥鸣皋
树大纛束马悬高旌转战日千里刁斗竟夜鸣天山破强敌白水殲骄兵三吴蹙徐海五
岭摧吴平初闻燧火息再覩潢池清七闽共尸祝俨若居神明武功固日揭文艺时潜精
姿江谒廷尉蜀国游中丞翩翩左司马金石偕同声飞扬将坛略跌宕词苑盟随车尽貔
虎入幕俱豪英强敌躡西鄙高牙驰北平双鞬绝大漠横槊歌长征天山十月雪一剑无
留行夺彼贺兰山筑我受降城勋高薄上赏业就遗浮荣飘然策羸驷投袂辞神京参差
武林驿遇我如生平恂恂见儒雅诂曰曼胡纓惜哉赤松远丹砂邈难成悲来诵双剑海
岳回光晶（余尝为二公赋双剑之篇谓汪戚也）

博士长洲文公彭江

左弘风流吴中盛才杰文章固挺出翰藻弥不乏长洲一散吏势乃倾六合画工启
南理书嗣京兆业余工及篆隶一一皆卓绝新诗亦韶润旧典多博涉萧然卧穷巷不减
原宪侠征求或匪人绢素划中裂愧余生后时未及覩先达京华遇伯子忘年共颯颯真
行嗣父风隶草变家阙双钩幻唐晋片楮贵燕粤尤工古印记珉玉浩森列龟螭两京后

科斗三代末澹宕杯酒间真致表疏越顾我何殷勤十指不停跋云霞焕楣栋星斗烂筐
篋龐年及上寿彭■〈日丹〉冀相埒倏尔乘化终飘然返六合遗迹俨若新天路渺难
越緬懷父子风老泪堕闾阖（前半叙征仲太史余未及晤此公故因寿承及焉）

秘书南海黎公民表

業業罗浮颠上有瑶石台秘书起岭表恍若登峩鬼古心亦古貌多艺仍多材悠然
葛天氏醇朴逾婴孩青衫困一第十上仍徘徊龙门实有策狗监嗟无媒匏瓜讵足系一
命沾蓬萊拙宦三十年羽毛日摧頹风骚炳一念壮志浩不回高歌掩陆谢丽赋酬邹枚
梁欧日倡和王李时沿洄余工入翰墨落纸皆琼瑰龙章剪薤叶鸟迹行莓苔八分走夷
貊四体摅云雷邕斯有絕詣锠无兼裁緬思穆皇世京华盛游陪杯孟洞肝腹土木余
形骸横当贺老盼谓我青莲才三留灑水棹十寄罗浮梅老成倏凋谢涕泗横蒿莱

少室山房集卷十八

●钦定四库全书

少室山房集卷十九

（明）胡应麟 撰

○五言古诗五首

四知篇（有序）

四知者歙汪司马汝张中丞濠李通侯闽苏参伯皆不佞生平知己之最也始余年
十六游长安邁万安朱公赏识则惟寅业已上座延之中国士两琅琊而伯玉司马助父
中丞咸以倾盖定千秋之契暮途却扫则君禹以督学踵建安滕公至却鹵簿踐蓬蒿卑
卑执问字之礼焉即余匪其人而四君子之知余允谓平生之最矣余既没林莽为一蠹
羣书间方凭借诸先辈宠灵以自见异代而十载以还二王滕朱相率殒逝越三载而四
君子又相率而继之盖不佞生平知己于是垂尽而老泪临风有不知其恻絕者卧病岩
居永昼如岁详述颠末为四知之篇于戏伯牙之弦自兹永絕而君苗笔研亡所用其焚
如已矣

粤惟汉元封司马两当轴宇宙皆文章千载被芬馥明德洪唐虞朝举十六族娄江
泊新都一网尽推轂弇州既龙奋太函亦虎伏白昼临高台狂歌击燕筑是时西曹彦年
少四五六诗篇甚张皇文事稍局促丈夫志万古不朽宁案牘经天纬地业九代丧空谷
英雄倏相遇羣起赴秦鹿上驷谁先登遗编在斑竹丘坟并典索乙夜朗披读列庄孟荀
韩檀左吕公谷先秦数作者鞭弭恣驰逐当其神理辘轳顾毫颖秃穹碑峙山陵巨碣控
河渚余事拈风骚不脛走遐隩烟涛涨渤澥英声振獯鬻腾身上将坛号令鬼神哭追奔
极穷岛蛟蜃碎屠戮华铭勒居胥京观自天筑八翼摩丹闥上谒九州岛牧帝命总六师
长城倏如轟大纛巡边疆军吏道匍匐安危系中外闽楚遍尸祝功成戒盛满洞霄乞微
禄戏彩娱高堂孙枝竞蹙鞠仙人凤与麟园居各洗沐居公季孟间岁寒订松菊制作频
賡酬緘裁递往复交亲剧杵臼调洽迥敌祝沾沾问兰阴笑我甘韞櫝相逢武林道倾盖

洞肝腹宛若平生欢坐久屡更仆床头出双剑光焰凛霜铍感公思缠绵囊底叩余蓄花生七百字草坠三十幅公时奋苍髯夸我才万斛眇论开醍醐清言佐饘粥乘兴过弇山诸峰插平陆仙翁絶顶下执手道寒燠黄池挟日饮代兴话濠濮巧匠无旁观良工有预卜三人坐丙夜相亲互以目曾参唯曷疑季路诺庸宿含凄别英风衣袂尽渗漉回瞻缥缈云广厦遽倾覆轻舟发严滩白榆讯孤独儿童若走卒竟指司马屋公也闻余来倾筐倒度麓将余入后堂明妆照罗縠椎牛擘黄熊輿僮厌梁肉吴生歌落梅谢生辨幽菽凭陵屋如椽东归记草木五噫序穷愁孤愤志幽鞠鸿章过十余晨夕骤登録眊眊嗽名子艺苑对颿蹙余也百八章呻吟亦成轴河梁迄挥手泪眼暮簌簌寥天仅一柱灵光镇大麓将偕石羊君吾里永辟谷胡然跨飞鲸倏尔残妖鵬空观疑地文神游恍天禄当年读书台阑干长苜蓿名已擅八荒声犹借四服良哉副墨子百代称郁郁惟公晚遇余盟契匪碌碌乾坤失遗老病骨祇盈掬举头拘翼宫钧天醉秦穆山香舞未竟飞花堕如蹴知公究净业不受转轮福追随无量寿永劫住西竺

右新都汪司马伯玉七十三韵

明维嘉隆世率土皆琳琅前茅奋厯郡大树标娄江东南并虎视河洛谁鹰扬张公起汝邓九尺须眉苍追风跃兹白掣电飞乘黄腰悬两龙剑絶代俱干将燕台际天起黄金矗华阳公年十八九掉臂排枫闾都人诧玉润夹道观河阳含香入建礼待漏趋光明时甫释褐吏部聊为郎青藜校中垒画戟持东方一官等泡幻千劫宁存亡维时西曹隼六七争腾骧分麾轶两汉授甲陵三唐张公奋臂入操翰如长江流星控繁弱贯月浮余皇金膏丽若木火齐明扶桑维扬怯旗鼓下雉靡旌■〈施，童代也〉高牙矗梁苑巨纛悬徐方眊眊绛灌目谤牒如螟蝗羣雄一网尽甯削盈遐方鹿冠挂玄武一笑骑天狼天风拂两袖被发还山冈淥波带瀍涧翠黛紫嵩邱苏门扣真帝王屋求仙方苍生半眼热荐辟交岩廊丹青遍畏垒无地潜庚桑驱车入函谷紫气流咸阳琅琊遇次美囊鞬划相当曹刘倡邺下苏李酬河梁英词错金石逸调劇风霜庚辰计羣吏捩趋亦明堂伊余黑貂敝青衫卧篷窻长安一倾盖大叫呼元长名流本第一国士元无双潦倒南皮社分携剧黄梁寥寥二十载复此聆篇章嘉隆数六子吾汝成高阳矫矫琅琊钵授衣命如螿平原十日饮异味穷膏粱燕姬及赵女寒螿庖嘉鲂雄谭走蛮触剧论惊蝸蟾山川堕秀色宇宙回精光帝心雅推轂大府开平凉飞书走北塞谕檄平西羌峨峨受降壁三城夹银潢殊勋勒铜柱万仞临要荒华名既海岱巨迹仍疆场宁知息壤誓不救中山创功成合身退鸟尽知弓藏人生贵适志岁月如沧桑筑宫近河渚丹青俨成行金钗七十二如花簇银缸赤松永辟谷大隗遥舂粮途逢广成子馈药盈筐箱时时发緘鲤询我骑羣羊庸知两擘竖作剧蟠膏肓寥天逝双舄玉楼路茫茫丹台易迁少要秩居文昌中原二三子振袂俱飞扬回眸盼尘世鼯鼠跑空仓神州逐麟凤阿阁驰鸾凰通都泊名岳百代留青緜浚冲复少达英风嗣王杨新声播琬琰旧业呈圭璋鸡羣覩野鹤意气时昂昂伫看汝南族奕奕传芬芳

右汝南张中丞助父六十八韵

于戏战国后永絕原尝风五侯洎七贵纨袴矜豪雄岐阳本懿戚带砺盟元功惟寅
奋甲冑巨笔如长虹英英楚游集弱冠推文通明霞传两颊皎日流双瞳亭亭古玉树百
尺悬苍空腾身起宿卫帝梦来飞熊晨趋景阳漏夕僦承明钟余晷辄赋诗高吟月朧朧
前鑣逐济上后乘驰江东丰姿寄朗润句格谐纖秣怜才实天性下士惟谦冲门庭盛交
际轩车沓云鸿倾心放崇伯握发模姬公八荒并九域踊跃归樊笼涓流赴溟渤尺土依
衡崧逡巡抱一艺畴不懷登龙尤欣礼寒素率土皆吾宗华名噪遠近帝眷弥优崇陪京
借管钥瓜步罗臃腫江流照横槊彻底莹青铜长驱白门道夹路停花骢车前八驂列一
笑卑王融夜登凤凰台谿浪青莲翁糟丘亘阡陌云车盍相从朱旗闪碣石七萃提兵锋
貔貅八十万操戈候元戎月支奉旧朔日本祈新封狼烟絕张掖猎犬回居庸胡床挟僚
幕羽扇摇清风当筵尽珠履金钗错帘栊时邀四方客大集华阳宫纖腰舞静婉艳曲歌
玲珑慈恩结永夏景福逃残冬西山四百寺寺寺悬诗筒贤劳动当宁宠渥流宸衷勋阶
埒师保晋接何从容三朝宪吉甫文武攀宗工登坛两突兀推轂双穹窿安危系中国絕
徼传精忠有如汾阳令华夏叨幘幘虵分匣宝剑鸟尽弋良弓参差薏苡谤一夕流丹彤
欣然释重负长啸还隆中青门种瓜地五色开蒙茸闭关却人累习静眠高舂食经减何
胤饮量增卢仝交游遍宇内若个娱幽惊维余二三子旦夕携孤筇伊余夙邂逅卬角游
新丰当涂一倾盖拍手呼终童名篇诵池草绣句翻江枫君能汰礼法余亦忘疎慵深盟
三十禩胶漆盘心胸河梁剧酬倡流水鸣丝桐将因毕婚嫁把袂寻韩终云胡玉棺下冉
冉移空同死生竟长诀去住殊匆匆河山負犹昨九原邈难逢虚堂翳图籍别牖扃笙镛
天池涸大泽日观颓孤峰千秋信陵谊百代临淮踪吞声遍韦布饮泣环章缝佳城磬白
石马鬣浮苍松灵虬逝天末泪目悬孤蓬隼声逮嗣服兰桂逾芊葱君看白雪调奕世标
芙蓉

右盱眙李大保惟寅六十八韵

七台高刺天九漈迥浮日真气蟠山川逢时异人出矫矫苏君禹天才实飞逸名宗
自峨眉源委继洵轼一目余十行填胸半绀帙弱冠升贤书闽士归第一讲业嗤京房穷
经诮王弼隼声洽■〈宀禹〉内光焰难具悉三呈大礼赋彤庭授清秩西曹擅文衡前
辈曾六七居然蹶其后功欲收蚌鹑督学来吾方神明朗无匹纷纭簿书藪推案风雨疾
吾乡万青衿手自标甲乙绛帷细雌黄百中副名实衰风遂一变彬彬有文质曰余抱沈
冥廿载废羸疾尘埃蔽行径塞马忘得失推诚却鹵簿径草踏萋苳逡巡越三顾瓮牖忍
长室衣裳剧颠倒面貌恍亲昵雄心贯今古风雅恣评隲扬马枚曹流一一研学术烛花
烂长筵丙夜互前膝千秋核本支八代综作述调合饶笙镛情投銳胶漆君诚左太冲余
愧皇甫谧河梁一倡和乾坤对萧瑟翩翩临海丞仗义讨凶泆邦人昧逆顺背叛拟佛肸
义激胡先生昌言郑庄驿维君企英风罔待齿牙毕移文下州郡意气迥逾溢祀典貽明
神幽光播泉窟遂令谈艺士赤帜树高密焯如开玄黄俨尔脱桔槔君行五岭遥余恋一

丘佚美人隔蒹葭志士掩蓬茷濠梁析庄惠畴为吐奇崛三秦豪杰徒强半坐扞虱去年
闻子归长斋事绣佛凿度推盈虚元苞洞凶吉晨兴得双鲤浑身欲翾举头望赤松羊
羣政堪叱言寻十六天幔亭访芝术轻红劈霞荔重翠剖霜橘瓠宁拜滕师龙门莽崢嶸
凄凉国士泪乱洒向沟洫古墓辞松楸新居问杭秫登君读书堂卧君玄草室淋漓金叵
罗灿烂银不律斫地偕飞扬谈天斗真率三千大千界微尘罔漏轶九十六圣君贤愚任
陟黜落落双干将星河翳蒙密舂粮十日期此会岂难必造物真小儿文章引媚嫉白云
乘帝乡一老竟畴恤恸哭西州路风雷鼓寒栗屠龙絶朱泚穷鸟困赵壹玉树摧庭阶神
理殊惨栗惟应咸池奏万古破蟋蟀

右温陵苏学使君禹六十二韵

孤愤篇挽王山人叔承八百字（有序）

始余读山人吴越诸游草异之顾其人未识面也庚辰秋息驾杜门忽阍者以曹生
书来称山人往携一刺入长安城亡所诣闭篋中廿载矣今特持以诣足下辛毋讶其湮
灭也余亟倒屣出迓山人十日斋头纵谈风雅本支流别殿最雌黄莫逆于心相视而笑
人皆以山人不言备四时之气余知其滑稽玩世大于东方也既与余订盟江上明年余
入舡泊舟垂虹问所谓十八桥者而太湖三万顷浩渺亡际范张鸡黍竟爽成言又明年
余复入舡适山人蹶草屨贸贸来乃长公病卒不起恸哭舡山之堂再信别去俄寄余手
札千言情致委笃而五言一律云千秋词苑剧万态笔锋新以余缀诗藪初成帙也后十
载闻问中絶迹遣役询诸吴门则山人墓木拱矣余不胜悼怛爰羸述尔时邂逅颠末仿
青莲送魏万体为五言古八百言而辍其三韵韵亡旁出者故也诗成致二子焚之几筵
以告山人山人灵爽奕奕且击节浩歌于大罗之上矣

千秋布衣才往往专一壑穷年觅五字培观海若唐维襄阳孟间代推制作嵬峨
洞庭句元气摄林薄五季宋及元余音噪乌鹊非无二三子天授惭磊落有明卢柟氏骚
些首恢拓途遵长卿辙步蹶左徒躅幽鞠及拟招圉盛删削诗歌遂非长风雅久寂寞
茫茫鹿门绪一线缀寥廓王生起菰芦名姓早飞跃弱冠游燕齐强龄走京索长懷济时
念雅抱经世畧无媒耻白玉草莽甘落魄禹穴翻图书尧天弄畊凿傲诞偕东方曼衍类
南郭敢为兰陵论偏究漆园学神来把觚翰六艺尽糟粕竦身出闾闾攘臂脱篱落四唐
入经营六代佐伸缩大篇竞飞扬短什互沉着星河昼璀璨雷雨夕喷薄混沌迷雕镂震
旦困笼络铿锵鸾鹤鸣突矫虎兕攫名姓聚倡楼老将镇戎幕张公两神物所向失盘错
太华三芙蓉秀色照广莫懷中但一刺尘冠翳竹箨时无孔文举竟尔徒入洛维时岁申
酉芒鞋试行脚访我兰阴陌孤航载停泊披襟发长啸搏帽吐清谑易水双湛沦夷门两
嘯咄结交讵同裴登仙俨偕郭平原十日余绿尊间翠杓微诚泄中夜万古对斟酌明时
遘何李天心寄鸣铎人豪琅琊公乾坤纵挥霍继起维奉常词林创新雍斯文幸未丧大
雅竟谁托吾意甘沈冥君才实磅礴无双国士韩常胜冠军霍鹿失余中原龙腾絶大漠
历下穷高华成都侈宏博勉哉曹溪钵毋令一士谩沈吟感子意踟蹰复前却明灯彻晓

漏撩乱烛花落仓皇嵇阮契竟爽范张约垂虹亭下浪浩淼阻越舶一别俄十霜邂逅弁
山阁尔衰背欲鲐余瘦膝乘鹤吞声话故旧丧逝捷飞藿起舞中自疑放歌久仍愕眷言
懷故栖荏苒理归橐河梁白日堕一苇迅鷗鹖伊余骨伶俜念汝神矍铄相期保玉体赤
松问灵药胡为两竖子膏肓恣燔灼虚传段璋句竟坐杜陵症生平褐衣贵不受帝王爵
大鸟来沧溟神虬去碧落百身定奚赎九原亮难作嗟彼志与蜎牖下饱狐貉维汝赋颂
声■〈山截〉嶮表衡霍居然布衣雄八面控繁弱修文亦地下玉楼富丘索遮须奉新
盟睦邃赴前诺緬余昔遇汝臭味恍荃药玄宗各讽咏妙理递酬酢濠上回周施江东析
昉约朱弦断流水阳春咽冥漠荒阡月三尺破冢云半椁参差迹已陈宛转梦如昨夜台
觅青莲携手共杯勺老柏鸣鸂鶒枯松照熠燿谈天恹邹衍掷地怆孙绰生刍愧晚暮永
闭石门钥白杨号悲风万迭斗萧索昆仑眇何处南面醉王乐

少室山房集卷十九

●钦定四库全书

少室山房集卷二十

（明）胡应麟 撰

○五言古诗四首

庚辰夏五月念之二日余三旬初度也碌碌尘土加以幽忧之疾靡克自树俯仰今
昔不胜感慨信笔抒懷六百字

浮生寄天地瞬息如风霆回首尘埃中倏已三十龄家人庆初度浆酒罗前庭宁知
志士懷百忧中坐并粤惟肃皇世婺女流星精休祲兆前梦抱送锡嘉名三冬学颇足抽
翰预时英才非正平敌赋夺文考声垂髫谒帝里弱冠栖神京散发昭王台万象愁凭凌
悲歌问屠狗击筑偕荆卿郭隗岂佳士乐生徒老兵登高望幽蓟长啸卢龙营风吹大漠
雪乱洒寥天青盛时方罢战絕塞无王庭徒令终童策默默不得鸣萧条对短褐激烈投
长纓飞书入词社授简罗簪纓羣公竞识面大匠遥寻盟清谈堕玉尘剧饮呼长鲸华阳
莽空阔碣石高峥嵘千言照白日只字悬青冥风尘一朝异聚散如流萍衣冠竞祖道却
出长安城含凄问歧路息驾还林垆袖中两龙剑错落埋寒星穷年卧深巷白眼横柴荆
时人不解识往往呼狂生咄嗟大运谬采药寻仙灵翛然负瓢笠独往事遐征絕壁耸天
姥飞梁横赤城千花镜湖綠万树钱塘明金华最咫尺兰阴穷絕径道逢牧羊子恍忽黄
初平将随赤松去永与尘世冥宁知浣纱地物色来娉婷飞扬眴前事占毕起浮名低头
拂残蠹眯目囊流萤虽勤伯乐顾岂投国士情匪乏鍾期知流水难为音迟回十年内强
半居敲倾雌黄逐儿辈粉黛随优伶南宫籍初上东山意弥醒横金亦何有拖王非吾诚
逡巡计偕岁屏迹留家庭为园寄莽苍凿沼浮清泠含菽奉高堂酿秫邀同盟芳春怆庭
树雪夜懷原鹄宁乖四方志实恐壮节零邁兹悬弧始涕泪摧生平恋旧迹已往感来念
逾嬰昔居少年坐今为强者形容颜渐凋落齿发非神明千秋竟何以百岁詎足营莹莹
六尺躯皇皇五鼎荣岂无箕山穴亦有谷口扁逝将守初服毕世穷遗经鸿裁列琬琰大

业垂丹青藏书遍五岳濯足凌沧溟却招两黄鹄万里还瑶京

忆在京洛遇鸣皋游契甚洽一别五载鸣皋既赴召玉京余亦轲家难偶祝生如华携所业印正门下诗以勸之

昔余寓京华红颜发垂腰翩然遇祝生里闾同游遨矫如长空鹤清唳闻九皋呻吟落珠贝咳唾飞璫瑶奇情两突兀衣被长飘飘青箱破万卷白眼持双螯调笑谪仙人骑鲸堕烟霄悲伤杜陵叟二顷荒衡茅马迁下蚕室相如困中消东方枉设难子云徒解嘲造物真小儿役我随尘器黄土抔下愚茫茫若螭虺南阳贵宾客什九横金貂盗跖堊东陵高坟郁嶢峣伯夷饿西山腐骨湮蓬蒿陶朱窃西子黄金压波涛屈原有何罪委身饲鱼蛟为善福安厝为恶刑安逃长当毕吾愿痛饮歌离骚狂思捧北斗醉欲呼天瓢玉女令鼓瑟仙童使舖糟穷年悴司命真宰为嗷嗷以兹诉上帝帝怒驰神飙雷公击天鼓屏翳嘘风潮青天拆龙剑易水寒萧萧吞声出京洛洒泣沾河桥一与此生别三年隔东郊煌煌白玉楼倏已升岵山阳怆邻笛玉洞闻鸾箫归来灞川上一室藏鷓鴣俗子遍闾闾可人费招邀尘埃闭穷巷草色盈疎寮科头诵四部赤脚翻细縹螭螟釜止足偃鼠明逍遥皇天未悔祸家门日煎熬慈亲悴霜露稚子埋山椒晨牝噪高堂孽狐瞰林巢戚戚类冯衍皇皇逾孝标人生亦何乐七尺徒烦劳逝将弃家室六合穷荒要翩然挟大鹏九万腾扶摇嗟咨念良友宿草迷荒坳阳春慨永绝白雪空长谣欢言遘之子兴文自垂髫飞扬慕古昔跌宕扳贤豪沾沾问奇字词组为神交斯文久沦谢玄阁长寥寥尔志亮金石遗风未全凋抽毫述往事赠汝为虔刀勸哉丈夫子努力追前茅

将入金华诸山述游五十韵

昔我游昆仑长啸望玄圃手拍浮丘肩濩落还下土帝阍不可扣频为世人侮苍茫五龙躡旦夕无所伍飘风从东来吹我向齐鲁徘徊岱宗侧万象划争吐遥空势崔嵬大块色消沮幽燕各罗列梁宋但仰俯龟蒙与鳧绎培塿不得数昏黑留天门海日正可覩白云封中出片片堕梁父晨窥金银阙玉佩遍廊庑警蹕懷祖龙銮輿忆汉武调笑七十君空名竟何补荒碑亦磨灭遗迹半尘土回首徂徕松亭亭尚堪抚恍惚秦时官苍然大夫五何来安期生相对形貌古携我登云车纵横擘麟脯掀髯但一笑东瀛复斥卤却下丈人峰行行至南楚鼓棹浔阳流吹箫洞庭浦三湘亘七泽茫茫散楼櫓放歌答鱼龙懷才吊鸚鵡初闻黄鹤游忽覩冯夷舞九疑何芊绵离立向平楚宛转双蛾眉恸哭摧肺腑万古苍梧云不散黄陵汧緬思向衡岳改辙望岩户里足扞嵌岑决策穷龃齟絶壁栖鸾凤层峦攫虬虎石留娲皇炼崖豁巨灵斧嵯峨大禹碣窈窕祝融府千峰既腾掷众壑亦旁午举头触支机侧身见河鼓海月明冠簪天星拂綦组謁来归东皋屏迹偕溷沮薜荔交岩房蓬蒿翳环堵灌园事于陵饭牛狎五羖短褐岁载阴长轍日卓午感激何时平形骸亦良苦咫尺金华山洞天列吾婺霞气连赤城霜华拂天姥石室函金书丹台秘鸿谱瑶草纷可殮青精剩堪咀壮哉神秀区逃矣灵仙坞翩然羽翼生白昼还紫府

李生归东阳益肆力千载手札寄余几数十返推挹过甚弥非所安报赠六百字

曰余抱遐尚念载卧玄阁逍遥榆枋下矢志游广莫一室罗青缙万卷恣栖托门无
问奇客与世久枘凿匡床起亭午发散仍赤脚空斋垂藤萝兀坐数花落苔痕闭重关何
自来剥啄有美东阳生意气本卓犖夙昔瑚璉姿弱龄自追琢上下三千年珠玑吐错落
雅志亲典谟玄惊揽坟索庄骚逮左马一一穷橐钥远甘杜陵豪迹向弇州博矫首金华
颠谁其嗣述作后起凌宋王先驱并刘骆片刺懷十年名姓渐凋落愿言申末契一过倾
伯乐维日大火流空檐噪鸟雀清风惠然来潇洒动林薄感汝缠绵意襁褓亦何恶倒屣
迎嘉宾衣裳不遑着呼童割菘韭班荆坐篱落涤釜燔枯鱼提壶劝清酌殷勤效明瑯缙
綵斟翠杓烏履何缤纷觥筹亦交错把臂游鸿蒙悬心契冥漠欢来不知疲软语间清
瀄淋漓契肝胆郑重吐然诺雄文诧鸚鵡丽句诵鳩鵲狂歌发清商中夜互踊跃嗷嗷曼
倩齿泯泯五鹿角典衣困鸛鷖掩袂叹龙蠖十载丰城剑漶漫斗文剥一朝遇张公紫气贯
碧落努力追前修遗编在先觉吾衰亦已久豪举徒岳岳头颅遽如许精爽渐销铄緬思
少年日挟策走京洛荆山并韶润姑射方绰约人惊士龙笔世许袁豹学昔苞鸾凤文今
愧犬羊鞞薜荔懷佳人菰芦忆高躅登门邁国士况乃同一壑万斛吞余皇千钧控繁弱
邂逅盖已倾纵横思仍拓望望琅琊云瑶池断笙鹤乾坤泣大老海岱遇韶箭典刑四部
存巍巍见遗篋中原失秦鹿上国谁宋鹊旧社纷摧頽新知乍忻乐照乘隋侯珠连城卞
和璞平生实怜才见汝难落落酌汝青玻瓈佩汝锦芍药贈汝五色翰如虹跨寥廓汝实
河宿精吾宁北海若小道未足观大方詎难作灑江一杯水彷彿共濠濮翩翩李公子毋
爽代兴约

少室山房集卷二十

●钦定四库全书

少室山房集卷二十一

(明) 胡应麟 撰

七言古八首

昔游篇钱塘舟中作贈董观察

秋风肃肃鸿雁鸣南斗参差北斗横孤客迢迢过越水旧游憔悴隔燕城燕城越水
三千里忆昔声华满人耳藉草曾留太液旁看花误入明光里明光太液连西苑徃徃游
人驻雕辇杨柳春风七贵门梧桐夜月诸王馆王家贵里不相亲联裾握手尽词人鳳凰
原上题诗处鳩鵲宫前草赋晨纷纷冠盖争驰逐载酒笼灯过鞶鞶缓轡同看白玉京扬
鞭醉入黄金屋秦箏赵管春不休歌声缭绕碧云愁香尘百里昌平道飞雪千门易水流
五夜论心传彩翰珠玑满把皆堪羨衣袂扬扬逼九霄劍锋耿耿流双电谁言潘陆是才
人肯与王杨作后尘格调迥追天寶上风期直与建安邻銓坡鳳閣多相值铁券金貂总
欢昵羣中忽覩三楚豪坐使琼瑶惊四席豸冠綉服光陆离词组如金山可移暮携奏草
归青琐晓对封章下赤墀赤墀青琐生风采手握芙蓉佩兰■〈苙〉茵元礼声华动阙
庭陈登意气倾湖海匆匆识面比南金惭愧论文契未深欲携短刺通华馆忽棹扁舟出

汉阴荷衣蕙带还乡国回首交游成太息落日长歌玉树词浮云远蔽金台色落日浮云
梦转长却乘烟水下钱塘徘徊殿阁迷仙署寂寞川原望帝乡帝乡仙署空辽绝何意輶
轩到吴越欲向西湖访画图鬻辞北斗离闾阖双峯缈缈插烟霄三竺苍苍引画桥清风
暗拂苏堤柳壮气平吞浙海潮謁来问讯蓬蒿士远思幽情何楚楚短褐长裾謁上官麻
鞋布袜从泥滓屈指并州几故人嗟咨往事转伤神虚传异日山阴棹无复当时洛水春
山阴洛水俱陈迹会见飞腾返京邑乍经薇省布阳和更上枫宸扶赤日几年骐驎阨盐
车矫首长鸣气不舒孙阳造父俱垂盼肯使奇才卧草庐

昆仑行送大司空朱公驰驿还豫章并呈唐太常万直指

君不见黄河之水来昆仑浊流万里经龙门环嵩绝华不少息吞吐日月排乾坤天
吴扬澜九河溢大泽龙蛇起原隰洪荒不解尧舜忧平成却藉司空力自从大禹作司空
百川四渎俱朝宗锁压支祈镇淮甸至今玉策垂神功国家定鼎幽燕北财赋实仰东南
域河渠一线厘帝衷维时首頼平江伯二百年来飞挽停肃皇之末何遭迍千艘莫进饷
道阻临朝南顾嗟羣臣我公崛起江之右列星显化神明胄匡庐彭蠡毓精华西山南浦
鍾奇秀早年通籍謁承明中岁翱翔汉两京一朝起任虞庭事九官四岳咸推能沛渠已
淤徐方塞巨浪滔天势难遏两岸洪波迥莫分百年故道谁能识神功实始南阳口夏村
既道留城走报国难将宠辱惊乘时大展经纶手栉风沐雨卧不宁追逐魍魎驱玄冥八
年胼胝勲绩就青天不动黄流平东连扬子息江涛北望天津散海潮车书万国看王会
玉帛羣方贺圣朝隆庆之中河再决帝谓元臣有遗烈一麾鬻驻淮泗清风雷寂静波涛
绝飞廉导车屏翳从冯夷海若应潜踪金书鸟篆迹灵秘异时彷彿岫嵒峰大禹功高古
来少姬旦才多心转小门下争看桃李荣车前肯使骅骝老纷纷制作悬丹霄驰驱阮陆
追风骚元和文誉斗山重天寶才名今古豪三朝出入方垂注投簪忽拥南归骑苍生常
恐谢公闲黄阁难留疏广去楼船箫鼓出皇州锦缆牙樯作胜游羣公祖帐灞陵晚万姓
环看渭水秋迢递关城望乡邑浮云渐送匡山色■〈舟羲〉兰舟水驿滨故老相逢
话胷臆酒阑倚劔心飞扬语及前朝俱感伤丈夫报国志犹在星辰错落双干将旌旗明
发川原阻着绣昼行谁与伍滕王阁上几留宾孺子亭前频吊古即今廊庙求贤急肯使
元勲卧黄石绿野堂开祇鬻留终须勉为苍生出五老东南势转尊三台佳气正氤氲鸾
笈倘逐蒲轮到极目燕台五色云（时公与太常唐公燕灞水舟中即席命余赋此凡六
百八十言）

送朱可大还万安

自从战国更王风屈原师弟俱称雄西京苏李复继作遗篇十九真宗工黄初七子
各有得勃兴杜李文章伯此道凌迟大厯还世代纷纷转荆棘千年大雅几茫然信阳北
地何翩翩力剪榛芜继唐汉恍揭日月悬高天眼中作者难尽数戛玉敲金事竒古相逢
海内俱贤豪奋迹前茅追步武看君意气何昂藏十九謁帝趋明光胷蟠万卷破幽眇手
炼五色回天章藉甚声华满京洛咫尺云霄见孤鹤司马仍传太史书拾遗颇负襄阳学

飘然遇我燕市中河梁邂逅双飞龙高歌击筑白虹断劔花欲堕青芙蓉莽苍风尘遽相别美人迢递音容绝五年空覩芳草生万里长看碧云合云泥自分随升沉岂料重逢灏水滨咄嗟往事如梦寐解衣共拂京华尘五夜论文思逾壮浊酒淋漓对惆怅天地迟回秉烛间星河磊落孤舟上眼看世变随江河恸时愤事忧弥多百川砥柱赖公等异时讵肯扬其波伯乐张华古难得时乖蹇敛图南翼燕雀宁争世上名蛟龙岂是池中物一朝变幻乘风霆磅礴六合摩昆仑卞和之王诘三刖季子金多安足论高天黄叶连乡国大艑乘风度秋色短歌送汝不成声握手临岐泪沾臆千秋杰阁倚清沙百尺珠帘挂晚霞兹行定拟滕王赋一寄兰州孺子家

幔亭云气歌为督学滕公作

君不见武夷之峯高插天幔亭玉女腾苍烟层峦列嶂三十六相传秦代巢真仙狂风怒号沧海立海水蹴日日欲没峯头云雾长晦冥青虬赤鲤当昼集蓬莱东望若可招贝阙珠宫浮巨鳌纷纷群帝持絳节扬雷激电朝丹霄兹山形势实奇绝紫气迢迢亘吴越扶桑万丈渤澥低齐州九点乾坤狭溪流屈曲环清沙绯桃夹岸蒸红霞鸾鹤翱翔度空谷猿猱寂历啼山家危岩绝磴倚石壁去天冉冉不盈尺仰视列星河汉垂下窥飞鸟松萝黑药炉经窟多遐踪苏门高步随韩终霞光半落锦绣座日色返射金银宫仙居缥缈隔人世环佩飘飘落云际半夜天鸡绝顶鸣清秋石马凌空系杂花幽草何芊绵松枝柏叶皆堪餐洞前三女不相待彷彿麻姑留翠鬢祝融梁父空郁律太乙终南自腾掷遍观岂若兹山奇寥沆清虚閤灵迹真人度世三千秋俯看人代如浮沤謁来欲济生民困拂衣长啸离丹丘金书玉检秘空麓鹤驭鸾骈罢驰逐一朝乘蹻来东南手挽江河障平陆眼中轩冕如埃尘葛洪王远时相闻清梦常随岩际月幽怀每逐洞中云即今宇宙须真宰拭目经纶横四海漫劳黄帝访空同蹇借庚桑居畏垒武夷山何苍苍真人下闾阖草木无辉光他时簪笏升岩廊致君尧舜追虞唐却驾白鹿还仙乡天齐地久长无疆

题铁干回春图山阴刘世儒工画梅以巨幅贻余乞诗为赋

吴绡七尺铺寒玉幻出名花照幽独微霜淡月春朦胧何处佳人卧空谷画梅自昔传华光擅奇更有王元章千秋绢素渐零落古色黯黯留虚堂迩来刘生最殊绝十载含毫走燕越一榻常栖剡水云双帆忽下桐庐月看君落墨如有神解衣盘礴随天真淋漓数笔生意动阴崖顷刻回阳春林危径仄飞鸟绝偃蹇虬龙锁深穴彷彿罗浮万丈峯孤根倒挂千年雪大枝诘屈粘莓苔小枝蜿蜒花乱开虢国蛾眉逞疎淡寿阳妆额矜徘徊风台月观遥相望园林更染孤山样绝艳惊从汉苑来冰肌更出唐昌上吁嗟刘生画己仙坐令铁干摩苍烟高屏巨障欲飞动素册单条绝可怜长安五侯招不得王家珍重走书乞何缘好博胡生诗乱洒琳琅向蓬华阴铿不作何逊亡人间佳句何茫茫暗香疎影亦长语后来谁复传篇章嗟余潦倒笔力弱细嚼琼朶搜枯肠刘生刘生勿凄蹙自古高流混凡俗即今且作潇湘游坐观瀑布匡山麓他时问讯子猷船倘寄鹅溪三百幅

舟次钱塘谒滕公值风雨夜作解所佩为寶劔歌

江潮十月如山丘北风撼江江倒流星河一片落寒铁暗中擎出蛟龙愁君不见丰城狱里百炼钢精灵埋没三千霜当时不遇雷与张至今神物终潜藏又不见曹沫手中三尺水却制桓侯轻管子一朝坛上行奇谋百代声华耀青史胡生寶剑人不识十千买自邯鄲邑謁来持贈归滕公绕座虹光流四壁忆昔干将初铸时睥睨欧冶麾风胡低回天地炼精气喷薄宇宙烹洪炉泰山为鐔渤海铗神锋指石石欲裂綠柄犹沾苔薛文赤花半墮芙蓉匣有时夜啸风雨声千夫辟易万马惊山中魑魍昼摧絕水底鲸螭寒不鸣湛卢飞景亦凡俗纯钩巨阙皆碌碌取次横裁丽水金纷纭碎割昆吾玉一挥四国如建瓴挽回日月轰雷霆朝携赤堇鬼神伏暮宿苍梧涛浪青荆轲孺子本无术匕首苍皇挑强敌片言枉杀樊将军易水悲风转乌邑项王智力何豪雄废书苦学仍无功垓下谁知万人敌时哉不利嗟重瞳岂若胡生磨此剑寸心耿耿横孤电十年坎坷意不平提与滕公肝胆见滕公豪气凌穹苍一朝覩此神飞扬愿持此物登朝堂时时拂拭生秋霜蚩尤遁迹魑魅藏周游八极还大荒

虔州歌送大中丞江公之南贛

东南海色何苍苍旌旗夹岸澄清光迢迢斧钺自天下帝遣中丞巡朔方铜符玉帙分千里画甲雕鞍围绣绮三军鼙鼓寂无声万灶风烟晴不起中丞自是河宿精乍窥人世辞蓬瀛流沙咫尺不可越怒鞭海若驱长鲸停车忽傍黄山麓笑揖浮丘跨■〈雨上只下〉鹿晓逐霞光度赤城暮餐云气离天目胸中远思凌沆■〈沆寥〉却来湖海称人豪单词只语露肝胆白日不动苍旻高猿猱豹畧多奇迹早握兵符穷战术八阵常翻鱼复图千言自献龙门策策名飞步登皇州纷纷簪笔皆儒流斗边夜啸■〈雨上只下〉龙剑天上春开五鳳楼贾生意气本英发终军才调何颖脱兵锋直欲款匈奴尺组恒思繫南粤华袞朱轩出未央竹马壶浆迓道傍已见褰裳临蓟野还看赐服下南阳再岁超迁左冯翊鳳凰神雀咸来集声名从此播寰区二省三台劳涉厯东南财赋日彷徨一麾承诏来余杭唐代征输属刘晏汉家平准羞弘羊政成绩奏多清燕越水吴山自游翫酌酒初登武穆祠飞书忽下明光殿匆匆督府推贤臣九重灿烂传丝纶陇西黎庶望充国河内军民嗟寇恂虔州形势本四塞渺渺川原开郡邑波涛半蹴闽海青瘴疴斜连惠潮黑汀漳诸府列犬牙纒縈四省藏千家穷乡絕峒鑱魑魅深岩大泽盘龙蛇庙堂抚髀思经济时来崛起风尘际三苗方畧从便宜九姓羌浑随节制轩车杂沓送离觞十月江城满路霜大将楼船横浙水元戎队伍出钱塘钱塘浙水俱秋色回首严陵瞻故国白岳峻嶒带雨寒苍岩兀突齐云立云岩白岳望不停番阳彭蠡江溟溟千年滕阁迷丹嶂万仞匡庐削翠屏厯厯关河度章浦缓轡停驂问风土送客应过孺子亭提兵却入中丞府中丞号令何雄哉指挥叱咤行风雷将军列戍秦城远壮士长歌汉壁开建牙吹角观游猎士气军声腾百粤铁马骄嘶海月寒瑠戈乍举岩云裂海月岩云壮品题登坛横槊思清凄慷慨宁论班定远风流不减庾征西缓带时时临絕域纶巾羽扇何闲寂骠骑空驰大漠烟词人枉勒燕然石崔巍铜柱镇封提縹緲珠崖接五溪分耕坐使阳春布讲武俄

看太白低讲武分耕严纪律泸夷永靖先零辑主恩时赐鹖袍兵气潜消狐兔窟津亭
黄叶转纷纷肠断骊驹不可闻晚思苍茫盈落日愁心凄切驻寒云男儿意态元磊落抗
手何须怨离索指日威名虎豹关他时事业麒麟阁雨露沾濡大海滨溪山随处净烟尘
更令文字流荒服行见衣冠入紫宸

题黄初平叱石图

古木苍藤挂风雨白石峨峨洞门倚黄家儿曹不解事叱作羣羊遍空起胡生较汝
差长年俯窥五岳石五拳他时一叱五羊起白云飞尽罗浮巔

少室山房集卷二十一

●钦定四库全书

少室山房集卷二十二

（明）胡应麟 撰

○七言古诗九首

题何仁仲甘露园（有序）

何氏之先繇开创勲世袭金紫至司寇公迁词章学术重宇内仁仲其仲子也幼受
业家君弱冠名家诗赋兹绘其所构林亭千里索和余弗获辞

园林旧说何将军应门稚子俱能文即今盛世宁好武登坛载覩鸿臚君别起楼台
眺三楚冠盖章华总非伍九疑七泽天茫茫千秋屈宋垂文章何日玄亭借高卧乘风会
鼓潇湘柁

梅窻歌寿何处士作

吾闻罗浮之山四万八千丈絶顶仙葩隔尘壤铁干斜撑大海滨霜梢乱插遥天上
江南十月寒信来雪花如席飞瑶台千枝万枝冻欲折凌风一树何竒哉清标雅质真絶
俗为谁移向孤山麓东阁曾闻杜陵句西湖更入林逋目道人自是姑射仙几年采药罗
浮巔参差老态看不足却窥春色来湖边满屋琳琅坐相对五夜虚窻月光碎夜永宁知
素影单酣歌絶胜红妆醉缟衣鹤氅何翩翩况有逸思凌开元有时兴到起濡墨阴铿何
逊皆陈言只今尚作梅花主甲子一周还二纪山房乍夜春意回彷彿枝头闻翠羽绣屏
朱户罗婵娟孙枝遶膝才且贤折花浸酒为翁寿清香习习来华筵王母安期世谁识玉
桃丹枣空陈迹岂若冰肌耐岁寒破臈含春映朝日梅窻叟且莫吟繁苞落羌笛国艳传
幽琴遥望罗浮隔南粤玉宇雕梁迥清絶耸身欲去重徘徊冉冉云駟下天末且挥白鹤
留人寰几番渤海成桑田更卧梅花三百年一筇长啸凌苍烟

褒忠祠祀礼成代直指萧公作

一夜并州赤龙起浩荡风尘播疆宇卷甲朝降十万师悬烽夕照三千里真主初还
建业东储君却下金陵宫羣臣骈首甘就戮至今正气吞长虹忆昔齐黄在帷幄首縶亲
王入京洛书生坐失应变机遂使貔貅暗沙漠同时抗节练与陈壮怀凛凛雄三军伟哉
正学十族死精贯日月开浮云全师仅见南阳铁独守危城破坚甲暴昭姚善两激昂视

死如归狗鈇钺皇皇周子百炼钢题诗自缢太学堂景清枉効渐离术势孤不得抽鱼肠
纷纷义士难悉数力挽颓波示今古投河直欲拒成汤扣马宁辞谏周武大厦难将一木
支江城白昼飞旌旗鄙南正位大统集剑阁巡行天命移沉吟往事空愤切耿耿英魂岂
终灭四海同悲东市刑旷代犹瞻首阳烈百年祀典何寥寥明良继起登熙朝首録忠诚
建祠宇天书五色垂丹青峨峨遗像表忠赤报礼殷勤慰凄恻西日含窻鸟自过北风吹
树声犹急阴虫夜促霜露零群公恍惚来精灵九原遗恨岂堪说天空月落秋冥冥我行
覩此重太息后世谁传董狐笔海滨义士何足论洛邑顽民真再出英英壮气摩乾坤流
光竹帛垂丹青千秋万代鉴徃辙君臣大义如日星于戏君臣大义如日星

河洛篇督学滕公夜邀斋中谈道命赋

茫茫太始谁开辟耿耿元精贯三极自从河洛生图书中华首肇文明迹羲皇手扶
天地心罗列八卦标乾坤轩农尧舜复继出垂衣万古开人文夏商体格多浑噩遗风未
散鸿蒙朴成周一代首尚文纬地经天传制作纷纷侯国隳王纲宣尼崛起称素王七十
二表擅灵异骏逐五帝驰三皇神游岱宗憩梁父下瞰日月相吞吐三千弟子咸扼趋从
此儒冠盛东鲁穷年赞易评羲周诗书礼乐勤删修至今大盗屏不发凛凛鈇钺严春秋
渊舆资稟实玄奥独冠诸生闻至道惟时游夏得精华散入南方布文教游梁崛起孟氏
贤乘车列鼎何翩翩公孙万章不足数岩岩气象谁其传荀卿议论本该博时乖废死兰
陵郭后来蜀国空草玄白首苍黄坠高阁河汾自是王佐才曳裾献策窥蓬莱昌黎夙负
斗山望路途二鸟重低徊千年至道转寥落重见周程起濂洛紫阳之巔异人出一扫蕪
芜继絶学我明设教崇成均十三学政分儒臣七经训诂行海宇彷彿云汉垂星辰关中
江右两督学景明献吉真间作才名气节天下传渺渺斯文未有托武夷之山何嶙峋丹
梯百尺连高旻我师笃生任斯道挽回一发伸千钧周情孔思实天纵玉质金相本梁栋
年少亲承明主知时来却为苍生用三吴才士集如云帝遣真儒下汉庭伏生晁错岂知
道丁寛孟喜空谈经一麾暂驻吴山麓已见清风走南服坐席江声走具区褰帷海色明
天目鲁国生徒遍品题当筵彩笔飘虹霓漫拟真人过函谷共看夫子在关西王良造父
本精识雷焕张华渺难及台上俄看万马空狱中解使双龙出麟符绣钺行高秋追步琬
琰披琳球纵横礼乐三千士缥缈弦歌十二州弦歌礼乐连薇省片善微长劳接引百川
齐赴沧海流抔土同登太行岭泗水尼山迹未湮升堂入室多奇珍西施尚作浣纱女和
氏犹为抱璞人马卿自昔工铅槩终军意气空凌乱照乘连城世所希夜光明月谁能辨
葱葱紫气绕三台遥见征书落上台更闻黄阁收桃李会看青衿出草莱

董生行赠中秘董体仁

远游昔登梁父巔天门突兀摩苍烟秦碑汉碣半寥落万家封禅俱茫然忆从苍颉
制文字六书灿烂星辰悬八百年来阳冰死邕斯体制谁其传董生今年政三十曳裾笑
指长安日论心遇我游侠场意气翩翩指金石自言家住沧海东曾入禹穴探竒踪门外
寒山挂苍玉青天削出■〈雨上只下〉芙蓉榻来挟瑟齐门老客子形容半枯槁黄金

台馆天茫茫系筑悲歌和穷鸟兴到长镌石鼓文快剑长戟秋森森突兀虬龙起幽壑翱
翔鸾鹤回高林金薤琳琅徧筐篋螺画虫书互惊絶白石烟销苔藓凝寒云海冻珊瑚裂
年来征仲数八分长沙小篆称通神生也雕虫不自惜徃徃制作追前人偏傍颇肖韩择
木风格时兼蔡有邻十载都门困旅食短衣匹马随风尘吁嗟董生何仆仆归去犹堪友
麋鹿携尊傍我吴山麓饱看秋潮落天目

霞林樵隐歌为梁太学赋

七闽孕奇秀秀出壶公山壶公悬壶住絶顶云霞万叠供朝飧玉宇琼楼架天末翠
葆丹旗互明灭高寒可望不可亲一片晴光堕林樾林中大隐梁伯鸾飞身直上凌巖岩
苍精之龙不肯佩却从杜甫歌长镵长镵朝持柄白木伐木丁丁向空谷竦身乍可亲猿
猱跂足时堪友麋鹿峰回岫转兴不穷壶公絶顶寻壶公高霞万迭餐不尽担头五色纷
葱茏荷担归来石床畔两腋风生体轻健金茎底事月底寻石髓无劳洞中翫君不见赤
城之下吾所庐霞标突兀千仞余兴公丽赋久埋没桃花流水空踟蹰又不见武夷之蹊
君咫尺霞幔为亭驻征蹕天孙懒织云锦裳邂逅梯仙竟谁识愿君大隐留人间长林筑
室三千年春来倘挟汝南费一筇历探壶中天（七闽之秀实惟壶公丹霞如楼迥出天
半梁太学维筑室其下将终身马屠长卿为题曰霞林樵隐而陈季相乞余长歌以纪之
余不获辞赋焉）

夜饮喻邦相署中酒酣邦相诸郎君出见咸朗朗玉立可念也因戏成短歌一章为
赠

自从管鲍交游不再见世人结交徒结面南昌喻侯青云客邂逅逢余偏恋恋丈夫
意气凌青冥契合宁论越与秦弟兄异姓古来有一呼尽出诸郎君大儿今年纔十二霜
毫日扫五千字差肩两郎亦其匹八法淋漓照湘帙抱中小者尤絶奇玉为肌骨云为鬣
毛诗三百不离口气槩似欲吞虹霓看君四子并英物朗朗寒空挂奎壁徐卿两儿那得
比王氏三珠总非敌人生有儿百不忧况复满眼俱骅骝乔当及卿髦詎减湛既难兄纪
更优君不见胡生今年政三十日夜明珠探骊窟大儿文举小德祖徒尔相亲不相识此
时尽阅君诸郎使我临风重凄恻谓生好饮勿复言且尽三百青铜钱生儿蚤晚会有命
何用蹙蹙愁心颜君不见喻侯膝下四男子行年三十初得此至今玉树森庭庑

锤室行题淮阴侯传后（有序）

淮阴侯不反明矣而史迁附会狱辞致千载之下徒惜其功大而不克终且归罪于
吕氏吕氏固汉祖所托而甘心者也汉于当时所畏惟籍与信籍灭而信继之时事必至
无可言者彼陈兵之构舍人之诉皆汉之为也信亡即庸庸如越犹以故智除之诛越以
速布之死而汉之谋无不效矣于是以戇如陵椎如勃者而以后事付之然且曰陈平智
有余难独任也呜呼汉之心可识矣

黄河倒流日东转地坼天摧锤室晚志士千秋空扼腕谁为淮阴明不反忆提利剑
追重瞳邂逅关前隆准公登坛词组定刘项岂须垓下知雌雄井陘战血飞长虹齐城七

十如飘风当时楚汉在掌握磊落千言辞蒯通固陵长驱三十万手挈神器归真龙泰山
为砺河为带欲齐伊吕称元功宁知隆准猜忌主畏信雄图如畏羽旌旗夜入定陶壁警
蹕朝行云梦渚朝行云梦夕出迎天日可照微臣情纵虎诚难缚虎易青冥咫尺飞雷霆
列侯朝请亦奚忌隐若大泽居长鲸陈豨相过理则有舍人上变谁当明遂令身首异都
市九族并命咸阳城嗟嗟吕姥岂办此固知汉主行叮咛即豨不反信亦族欲加以罪宁
无名呜呼季也实凉德万古愁云吊鍾室史臣徒赞寬大辞百代泉雄定谁匹君不见三
雄死三吕立厕中爱姬人作彘掌上佳儿血盈席天道好还如一日长信宫深辟阳入愧
杀长陵一抔土冢中强魄无颜色君不见亚父当年赐骸骨虞姬効死阴陵侧壮士至今
犹悼惜千秋为季宁为籍嗟乎千秋为季宁为籍

吴章两门士后先以新作至咸精进迥出余读之勗之以歌

吴充远示林屋诗读之使我兴飞越沾沾欲度骅骝前不减观潮诵枚发章生近投
诗百篇敏而好学吾所怜昌龄我师花蕊妇肯与王建论婣妍何哉世谓两生鲁中夜闻
鸡解起舞异日英雄起俦伍不用登临叹广武

少室山房集卷二十二

●钦定四库全书

少室山房集卷二十三

（明）胡应麟 撰

○七言古诗一十一首

嵩山歌（有序）

去余家五十里而近有山曰嵩穹窿萃嶽峭蒨幽邃视洛之嵩高不知孰为伯仲也
旁一峰千仞秀出■〈山截〉嶮云际若轩辕浮丘所尝居者余因以嵩之少室名之且
为作长歌以纪其胜异日者采三花携玉女归将结茅于兹老焉

君不见嵩高之山高高出天半万古扶輿结葱旧孤标突兀回日星秀出苍茫界河
汉恍疑帝遣夸娥负中岳掷向东南镇磅礴又疑巨灵一夜排风雷空中掣此青崔嵬仰
观宇宙豁俯瞰沧溟开天倾锦绣壁地涌金银台飞鸟不敢度猿猱为之摧层峦迭嶂何
奇哉倒影下坠扶桑隈会稽秦望相去但咫尺赤城天目左右罗列如浮埃絶壑迤迤飞
梁萦洄空青水碧划然蓬莱天仙跨鸾鹄时时下九垓遥峯插天更奇絶天柱峩峩象纬
列云是嵩高列峯三十六其一飞来堕吴越参差太华十丈莲重迭娥眉万年雪云中之
君纷纷拾瑶草散发长歌弄明月朝来忽见黄帝车方明前导昌■〈宀禹〉趋七圣尽
迷襄城辙却望天坛寻故庐顷刻笙歌起岩际白鹤凌空舞瑶砌乃是缙山王子乔金支
翠旗朝玉帝真人一去不复还玉书灵笈埋空山俗流徃徃轻飞仙不见此后三千年少
室山人结庐长啸卧其巅峰头一室但盈丈大易黄庭坐相傍紫芝空谷纷葳蕤真气关
门浩排荡朝飧玉池露夜濯金屑泉明霞翼我体白云怡我颜山灵候余户跂息不得眠
一行卧此三十载上元夫人时往还俯视城郭真器烦縞衣素氎何翩翩乘风几欲凌苍

烟胡为羽驾尚踟躅惆怅孤峯夕阳落仰天大咲寒风生徙倚青藜望名岳无乃未践三
花诺寄言广成子浮丘公吾将跨白鹿骑苍龙访尔三十六峯中横絶具茨凌空同归来
却卧此峯上千年一视轻鸿蒙

金华山三洞歌三洞曰朝真水壺双龙是黄初平升仙处

薄游金华山信足支短筇长啸黄初平蹴踏金芙蓉芙蓉峰头白云起天风习习两
腋举相传古来洞天三十六乃是赤松真人之所理千岩拔崔嵬万壑亘迤邐高欲凌空
同侧若摧鸟鼠括苍与台雁琐细不足拟帝鸿既长逝雨师邈难招回看昔日讲堂洞却
忆当时刘孝标九龙蜿蜒读书处穹岩怪石摩苍霄荒坟突兀葬彩笔至今词客何寥寥
讲堂信鬱纒朝真益弘敞天门划然开石洞豁榛莽恍然坐我金银台昆丘玄圃恣来往
青虬赤鲤尽罗列三仙七圣时俯仰幽怀转轳荡胜槩杳莫穷飞梁百尺下窈窕举足却
堕水壺中水壺跨山腹气势何其雄何年虎豹穴置此蛟龙宫水帘参差直下五千尺银
河宛转倒泻双白虹天孙云锦织璀璨蛟人珠箔垂玲珑飞流溅沫日夜不得息惊涛涌
雪六月迷长空耸身出水壺倚杖息余峭举头万松巅隐隐落斜照石羊纷纷望不穷突
见双龙挂寒峽恍惚初平兄弟骑蜕骨遗此青天貌俯窥曲涧仅容膝解衣燃烛渡深黑
行行不尽一线明万乳荧煌喷苍壁玉树罗青葱芝田烂金碧谁持巨灵斧凿此灵仙窟
真人渺何许瑶草纷可拾枰间数子势飞动细看尚记当年奕人言此穴穿四明天牕万
迭开蓬瀛摩挲仰视众仙篆隐见若有胡生名吁嗟我今胡为在下土青鞋布袜濩落如
流萍乃思昔日玉皇侧看花醉卧芙蓉城木公徘徊向我怒授简谪余离太清一落人间
五千载沧溟浩劫会已盈顾瞻灵境但咫尺奋身欲飞还不能倚杖还悲歌壮心浩难遏
却忆云门期瓢笠候明发回望金华山兹游信竒絶余霞映袍袖岚翠尚明灭何当蹑苍
虬长揖众仙列提携两赤松永与尘世别

寄三衢易使君惟效约秋深为烂柯之游并怀蔡景明苏以修

易侯意气天下无蚤年宦籍通皇都豸冠绣服天咫尺风裁落落长安途一朝使酒
忤权贵凭陵太白歌呜呜埋轮有疏不得上拂衣大笑游江湖潇湘云梦长在目却来东
海谈乘桴五花蹙辍御史马百里仍蹑仙郎舄江郎峨峨三片石屹立千仞东南孤题诗
洒墨登絶顶白眼瞋视天模糊桑田沧海倏变易九重特诏还金铺梅花遍咏水曹雪清
源皂盖停菰蒲忆昔扁舟驻东郭蓦然见我心神孚鹵簿江州却羣从胡床明月邀呼卢
苏别驾蔡大夫十日九日黄公垆夜击青萍唾壺碎昼拈绿玉楸枰枯清源明妆十万队
红裙翠袖骄相扶淹留卒岁不忍别春风拂面吹屠苏云萍忽尔摧浪迹平原河朔成虚
无踟蹰苏蔡各分手闽山蜀道难追呼君侯政绩何炜烨立驱千骑来东吴穷交念我宛
如乍飞书徃徃寻屠沽一丘独卧子真谷入门三径嗟荒芜雕虫小技何足论眼空六合
成狂夫青霞之君日候我斧柯欲烂三蓬壺玉局纵横众仙列云浆一吸三千觚使君倘
许岸帻过秋风八月来高舫

章生持所业游余门诗聶之

火云峥嵘照林薄赤日团空坐如灼高堂襍襍者谁子云是香溪少年章敏学少年十九能作诗沾沾欲问扬云奇先生四十发种种抗颜肯受庸人嗤新诗读女吾动色东野穷愁浪仙僻电光雷铗双芙蓉烂漫苔痕土花碧君不见神物不遇张司空万古丰城白虹泣

小园杏花烂漫与客携酒酌其下至醉

墙头昨夜春风颠醉着接■〈卍离〉花下眠东方欲曙忘晨殄应门何客来翩翩城东郭君履欲穿手持三百青铜钱要我为客开琼筵水晶之壶白玉盘银筝翠管张哀弦吴姬度曲越女弹相将载酒临西园西园万树红照天杏花朵朵含春烟随风故落苍苔前恍如红雪堆青钱摘花浸酒酬清酣主人劝客客不言人生岂得长朱颜眼前有酒不尽欢参差白发来相纏君不见相如卧病归文园笑杀长安羣少年又不见子云寂寞耽草玄日暮何人回酒船何如醉挟双婵娟玉山酩酊长花前

秋日泛舟钱塘观潮放歌

黑风夜簸沧溟水冯夷却走海若靡素车白马来何方璇室琼楼遍空起玉龙垂地五千丈银河驾天一百里三军巨鹿战始酣万甲长平溃难止胡生此时归适越醉挟扁舟离江渚鼓柁初疑月窟中旋身已入冰壶里雪山恍见释迦坐一苇聊将达摩拟波翻颺泣浪跋天吴语长鲸鼓鬣如峻山电掣云愁堕飞雨舟人渔子袖手不敢出篷底仓皇掩其耳是日胡生气无比轻桡在手疾于矢白眼茫茫向天际欲乘长风破万里回瞻圆峤若咫尺东望扶桑聊徙倚即如鲁连蹈岂得便逐灵均兴难已君不见越王宫吴王宇寂寞空厓半頽圯日夜寒涛浸荒址满眼豪华遽如许人生齷齪胡为尔乘槎八月差快意击楫中流竟何以天寒日暮风转疾彷彿鸱夷共相语朝来更泛若耶棹会挟西施从范蠡

钓台谒严祠作

高台倚空双突兀钓丝下坠桐江石客星惨淡呼不应片片飞云向人立忆昔真龙起新野百万昆阳碎如瓦朝端但访赤伏符泽中那问羊裘者逍遥建武垂裳初乃有物色来菰芦新銜乍可授谏议故态宁肯回狂奴长啸还归富春瀨采药桐君坐相待石上明霞照秋水峯头雪瀑飞寒籁箕山颍阳杳莫覩太息斯人遂千古方干谢翱两小子废宅荒坟强为伍胡生抗志五岳前中岁偶落风尘縁钓竿倘拂紫薇坐归来与尔共拄东南天

夜饮芙蓉馆大醉放歌寄黎惟敬康裕卿李惟寅朱汝修

初平骑羊去不返沈侯八咏空嶙峋刘生老死骆生窟谁令大壑回阳春君不见兰州胡元瑞九龄学仙已成癖欲乘长风游八极大鹏扶摇不肯骑几度鞭羊复成石十五更作咸阳游五花笑脱青貂裘酒阑大叫呼李白雪花飞堕长安楼是时真龙御皇极双阙嵯峨象纬辟作赋宁论狗监知曳裾自许龙门客人前白眼双飞扬谁其握手黎惟康李侯晓散禁庐直停车数过朱生堂相看意气谁肯下握尘含毫破深夜万象淋漓碣石

宫千人辟易华阳社五陵轩车春不开狂歌独上黄金台拔剑起舞长虹摧睥睨燕昭王
竖子非仙才荒碑零落翳榛莽其人白骨随尘埃剧辛郭隗岂壮士汝曹自为千金来当
时乃公用齐国临淄岂得同蒿莱前瞻涿鹿野左瞰卢龙隈浮云万迭飞不尽但见太行
山色青崔嵬入洛声名晚差着掉头忽出新丰市拂袖初辞上苑花持竿欲挂沧溟树吕
梁震泽天茫茫扁舟一叶飞钱塘镜湖剡溪咫尺不得渡十月寒涛如雪霜孤峯指点严
陵宅古木槎牙向人立羊裘客子双眼青分我桐庐半江碧高台祇合长垂纶谁知物色
来衡门天阁突兀帝星远十年五上空沉沦萝薜归来手还葺一笑文君壁空立生计犹
余二顷田谋身岂必千头橘五侯七贵俱浮云邺侯万卷堪横陈男儿大业在金石那令
七尺随风尘醉墨苍茫浩歌发紫气东来照吴越文章得失心自知肯向朱门傍先达唾
壶击碎歌转长美人天外空彷徨眼前齷齪谁相望大儿刘孝标小儿骆宾王后生不死
亦前辈九原可作同翱翔遥遥八咏楼楼空竟何有楼中之人今在否祇今谁是东阳守
会叱羣羊起太空卧看扶桑日西走

赋得赤松宫为东阳卢祠部

君不见赤松宫前赤松色夭矫轮囷际天碧霜皮不减三万株铁干宁论二千尺初
平骑羊去不回药炉丹灶空崔嵬山中白石乱无数何人叱咤飞风雷君不见东阳卢君
大奇绝前身曾受长生诀往来三洞蹑明霞啸傲双溪弄明月渴来欲作人间游苍生六
合攒睂头帝傍玉女不敢留飞行独下昆仑丘挟书却走明光殿跃马天街谁不羨柳色
阴浓彭泽车桃花锦簇河阳县一朝鸣佩趋南宫炉香画省追夔龙退食羞为素餐士愿
将直笔回宸聪五夜排云叩闾阖凛凛孤诚照丹阙丘埴宁增泰山峻微丝愿补袞衣缺
九关■〈穴上叫下〉窾环苍龙燕台白昼飞长虹曳裾止辇亦臣职拂衣神武来秋风
衡门却返东阳旧落落松阴浮远岫已见声名重斗山更欲栖迟终宇宙名山咫尺黄初
平石羊成阵来相迎天王明圣臣愿足富贵浮云何足论卢君卢君真丈夫直节祇今天
下无从我且酌黄公垆漫学三闾赋沅水肯令董相淹江都一朝当宁思良弼飞诏东山
起安石会教霖雨遍遐荒取次天门生八翼赤松之宫君暂居高吟抱膝聊吾庐三洞宁
为长往客九重行问治安书

题岳阳楼图

危楼倚空欲千尺阑干下瞰洞庭色狂风尽卷苍梧云万顷潇湘照空碧江花冥冥
日欲冷岸芷纷纷翠犹湿参差忽覩冯夷舞缥缈疑闻帝妃泣七泽纵横渺难数九疑如
黛尊前出舟人渔子棹空旷薄暮波涛归不得楼中骑鹤谁者流此事恍惚曾同游凭阑
试诵杜陵句日夜乾坤相对愁

岁杪送郑茂才北上

北风动地卷行色郑子辞家赴京邑蹇驴欲踏东蓐尘手挈空囊行不得亲知遍谒
乞斗水徃徃白眼谁相识男儿意气轻王侯有身七尺那用忧溪头握手拚一醉骖驎且
付黄公留君不见来岁长安百花发银鞍拥簇歌姬楼

少室山房集卷二十三

●钦定四库全书

少室山房集卷二十四

（明）胡应麟 撰

○七言古诗二十六首

闫蓬头歌（代滕中丞作）

闫先生羽客流发蓬蓬不裹头身骑两白鹿手掣■〈雨上只下〉青虬前生七圣相追游飞翔八极横九州岛朝升大罗顶暮宿昆仑丘木公授竇篆王母发清讴飞琼弄玉众仙女行厨上食罗珍馐桃花万树核如瓮东方小儿不敢求何来醉闯拘翼座脱巾露顶眠琼楼雷公轰轰上帝怒谪向下土称蓬头长身大腹状殊绝赤颧红颊惊庸流方瞳射空碧电炯紫髯拂地苍虹流终朝一食气逾王终夜不寝神长游严冬雪片大于席寒水十丈风飕飕先生此时赤双足单衣不御青貂裘道旁观者色沮丧真仙出世谁能俦和光颇类柱下史玩俗或比蒙莊周仰天大笑暮云碧茫茫下土皆蜉蝣蝼来偶过勾曲洞乘鸾跨鹤三峯头乖龙左耳割不得飘然一苇来南州众中遇我心莫逆片言立使千金投微辞奥旨发中夜变化恍惚难先筹时时诧我骨毛异青城僊伯行相求三生石上事非远努力缮性穷熏修愧我中年薄闻道尘埃碌碌随轩輶神明凋谢鬓髮改岂将七尺图封侯感君便欲逐君去乾坤万事同浮沤三公七贵竟何物五阴四大俱悬疣何如长啸出寥廓霍然尽豁平生愁闫先生且莫行为我留谪期未滿堪夷犹吾家别业武夷上铁船丹灶悬高丘幔亭之君日来下三山九曲随冥搜他年挟尔棹歌去坐看大海天咫尺巨鳌馘浮中流珠宫贝殿耀金碧清都絳阙喧琳球鷗鹏一卧九万里鸿鹄一举三千秋玉皇香案倘相忆羽翰白日飞神州

赋得灵隐寺飞来峰赠卢祠部

灵隐门前千岁松夹堤九里来青葱何年突兀金芙蓉削成四面摩苍穹恍疑夸父移空同一拳掷向沧溟东日月东西悬混蒙云霞上下披蒙茸周遭刻画非人功象王鹤驾行虚空投身直入蓬莱宫丹楼雪乳垂玲珑流泉百道声琤琮有如仙乐鸣笙镛金玉简潜竒踪■〈穴上叫下〉窈恍与银河通灵威丈人不得穷古来传是飞来峯万古壁立青霄中何人散发携孤筇扪萝直上乘天风金华有客真豪雄孤高大节将无同少年挟策游新丰五花蹀躞长安骢出宰百里花为封鸣珂入候甘泉钟握兰典礼称儒宗素飧耻学凡夫容织成云锦蟠心胸要将琬琰垂勳庸直排闾阖陈孤忠曳裾折檻惊天聪轰轰天鼓鸣雷公覆盆不照微臣惊精诚贯日飞长虹挂冠神武何匆匆回头却望丹宸枫血泪乱洒征衫红归帆正值钱塘风六桥三竺春溶溶不学留侯师赤松且邀白傅寻苏公振衣千仞聊从容朝飧沆瀣追冥鸿暮拾海月鞭虬龙六丁搗呵玉女从俯视六合俱螟螣蝼来遇我东阳东竹林把臂心神融仰天大笑横双瞳欲骑箕尾还长空卢君劝汝满醕黄金锤且为拂拭朱丝桐万事人间如转蓬古来直道多难容即今吾道宁终

穷丝纶竹帛行遭逢一朝前席明光宫谁其稳卧飞来峯

醉中放歌赠祝生并寄司马汪公

祝生家无担石储短衣掩肘不愿余生年三十走牛马世人攘臂争擲揄胷中壮气何磊落眼看俗子如蓬篚欲从翰墨树勲绩耻结黄绶悬金鱼自言太古重三立文章功德原无殊竭来叩我草玄宅殷勤片刺通前除先生崛起刘骆后华名岳岳天南隅泰山宁择土壤细沧海诘惜涓流潞兰台高揭并二酉龙门咫尺悬桑榆阶前尺地倘少假令我一啻尝天厨伊余谢客事焚扫闭关长日扶潘舆亲知宇内半凋落豁然见汝心神愉忆汝新都谒司马太函突兀开云衢无殊字汝岂无谓树勲努力操长笈汝兄汝侄并潇洒问竒徃往来吾庐古今词赋厄阳九先生身试不汝愚怪汝胡为蹈前辙甘心赵瑟忘齐竽腰纏万贯亦不恶三槐九棘垂駟駟沾沾五字作何状黄金不逐贫相如生乎大笑掩余口先生戏我犹羣儿天生七尺当不朽大千世界皆蘧庐倘来富贵宁足论电光石火同须臾一朝腐骨委草莽醉生梦死随沟渠秦宫汉阙走狐兔公卿未必赢樵渔男儿大业在金石要令天壤留迂儒先生两耳濯清渭十年不受凡人谗终朝隐几吾丧我一听汝言良起予雄谈五夜剑花落绿尊翠杓行茱萸高歌赠汝兔毫秃唾壶击碎青■〈毛瞿〉毳长风吹云入广座欲蹶象纬凌蟾蜍生乎生乎汝勿疑古今不朽真无殊好读离骚饮美酒便作名士追三闾莫将狂简讶年少仲尼大圣思归欤即今名姓已不朽先生笔底开璠玕他时藉手见司马为我捧腹当轩渠（祝生树勲游新安司马公字之曰无殊谓所立维三不朽一也石羊生胡元瑞闻而赓之而作是歌）

潇湘座为祝无殊题

我筑潇湘岛斗室悬竹中汝构潇湘座千竿舞秋风我岛舟可沿汝座车难通一朝乘兴来子猷直造竹所聊优游主人莫作辟疆态仰天大笑风飕飕

送郭汝冲游吴中

郭生有父鸿胪君自言东野之后身殄风卧月三十载至今词笔留长春生也学书仍学剑抱玉无媒羞自献延宾雅有郎罢风典尽鹮裘不咨怨时时问字来门墙先生为汝开玄堂五月南风稻苗熟扁舟一叶飞钱塘生平不识琅琊里特向娄江吊兰芷中原万里失麟鳳宇宙文章孰盟主江阴亦有朱鸿胪结交四海雄菰芦沙头把袂询父友孤帆八月来三吴

忆章云

去年送子城之北北风怒号天惨威浓霜密雪洒岐路若个终袍话相识今年忆子城之东落花烂漫飞春红人生好游游亦得五见社燕迎归鸿岳阳楼头秋万顷醉杀杜陵呼不醒何时挟汝荆门涛狂歌痛饮赧离骚

哭祝鸣皋

鸣皋既避地齐东复客长安而死同里友人胡应麟闻而悲之作歌吊焉

吁嗟祝生谁谓而年仅止此尔胡以生胡以死文章独抱掩夜台寂寞寒山饿妻子

忆生束发负奇尚壮气凌云薄金紫绳枢瓮牖穷彻骨耻向豪门谒涓埃世人妬生狂欲杀白眼纵横半睡眦青衫一领不得消掷向齐东营耒耜胡为复作长安游瞰■〈足薛〉芒鞋污泥滓呜呼大块亦忘才玉折兰摧繁谁使昔余与生初结交邂逅尘埃双国士拂衣初上西山巅万岫回青八陵紫峥嵘高论骇俗流磊落雄心付良史生今已矣宁再得泪目淋漓傍桑梓酸风落日华阳宫素旒翩翩潞河涘孤坟三尺暮云白白马生刍者谁子我歌薤露生莫悲自昔贤豪并如此

寄张伯起

去年我病维扬邸日望琴高骑赤鲤一朝起色乘江潮朔风狂雪吹终袍吴门邂逅张伯起万卷纵横列湘几蓬蒿夹径春不开焚香永昼眠苍苔翩然为我倒屣出握手论心称莫逆烹熊炰鳖出丰膳绣虎雕龙指金石男儿七尺当自强巢由岂必攀虞唐千秋大业在竹素胡为燕雀讥鸾凰抽毫日纂文选注恍入梁台试精骑倘来富贵讵足论避世墙东有深意阳春堂上横朱弦子夜歌成兴杳然他时倘慕兰陵宅日候山阴访戴船

登大云山望灏水寄李允达

忆昨曾携李仲子酩酒遥登灏江渚美人一去秋水寒望望蒹葭隔烟浦朝真洞口饶白云尺书天际时相闻山栖倘续孝标志与尔同栖麋鹿羣

祝太学逊之五十始为诗戏作短歌赠之

君不见天寶词人高达夫行年五十执金吾一朝作诗遇杜老声华奕奕留吾徒君不见成均胄子视懋学五十无闻甘寂寞一朝坛上逢胡君奋臂词林问前獲沉吟二事迹颇奇千载何当复遇之汝为常侍理或有我说杜甫人争嗤丈夫有志未可轻古人讵必皆无成杜陵四十始献赋当时颇遭俗子凌脱身锦里拾橡栗长纒短褐徒悲鸣达夫青云本自致高牙大纛悬长城呜呼后世两寂寞惟有只字留其名我今四旬汝五十二子之年巧相值焉知异代无子云未信东山少安石男儿致身苦不蚤发短心长恨何及我歌杜陵念已灰汝效达夫志当立不见甯越师诸侯努力余年莫轻掷

琵琶行

李将军虬髯戟列横秋冥当关壁立万夫勇扫空大漠无王庭一朝谢事东海上皓首華颠气逾王醉归叱咤灞陵尉长揖嫖姚不相让欲将雄剑卖黄金却把琵琶弹素心凄清激烈风雨过高楼五月如山阴君不见贺怀智石槽铁拨云雷气唐家供奉推第一青史流传夸絶艺君不见康昆仑指下縱铮捷有神玉盘骊珠千百转春水拆裂河流浑将军岳岳起当代手挈二子成三人即今狼居尽歛塞九边铁骑闲黄云明妃奉帚长信殿娥睂不踏燕山尘山西老将亦无用金甲苔生土花重笳声寂静刁斗寒但把琵琶学三弄华堂秋空月满楹朱弦翠幙流明星觞行乐奏豪兴发快剑长戟纷争鸣为君慷慨弹入塞莫作琵琶亭下听寄

邨中王孙灌父时约余为嵩少之游

昔我年少思远游飞行八极寻浮丘梦寐三花映絶壁昆仑倒挂黄河流主人况有

淮南术要我峯头炼金液石林万仞扫空翠念载无人白云湿亭亭孤鹤来缙山王乔有约予当还今年曳杖定偕汝三十六峯秋月圆

岭南祁羨仲以诗见贻赋答并问惟敬秘书

南海祁生何卓犖题书远寄吴天鹤开缄恍对四百峯片片罗浮白云落年来岭表多词人黎欧以后谁其伦丈夫寸心在万古那能齷齪随风尘闻汝好吟兼好酒一釂千锺世希有黎生夙昔称酒狂对汝还能剧饮否高阳酒徒气若虹有兴倘过兰陵东不信今时酒殊絶试问琅琊王长公（长公近一书云酒味殊絶足洗数十年月旦）

余在娄江日孙齐之徐孟孺同日先后过访余以行迫不及报谢追忆二君輒成短歌

孙郎已老徐郎少一日娄江逢二妙赵家白壁总连城海上明珠双照耀孙郎发短垂六旬徐郎三别仍干秦余亦狂歌称隐沦虎溪相别成大笑满眼人间失意人

两得欧楨伯书及致西署秣陵二集走笔寄谢询其苍头李英

王生手持双鲤鱼剖之中有明月珠蛟人夜泣魑魅走珊瑚十万罗前除美人吏隐金陵畔金马铜龙谁不羨缓辔晨过莫愁里鸣珂夜入明光殿秦淮千里心悠哉灏水兰橈那得开君家摩勒有佳句祇今何似郗方回

题潇湘烟雨图

桂树丛生石崑侧万仞寒云挂苍壁穷阴大泽龙蛇走绿萝蒙茏楚天黑行吟泽畔者谁子日暮欲归归不得黄陵美人把瑶瑟杜宇啼烟鹧鸪泣

詹东图有茶癖即所居为醉茶轩自言一饮輒可数百杯书来索诗戏成短歌寄赠吾闻卢同有茶癖七碗清风生两腋吾闻陆羽称茶仙铜饼细酌中冷泉古来知味但如此咄咄新安詹仲子胸吞云梦蟠潇湘一饮百碗消枯肠虎丘之产茶仅斗尽采遗君不盈口蒙山石上青槎牙咀嚼那能烦齿牙斟酌建溪三百饼巨杓长瓢堪酩酊风炉竹几罗庭除大铛贮月来中厨松风才过鱼眼发玉乳盈缸喷香雪鲸吞鳌吸如有神淋漓醉墨驰风云一饮一挥三百首若个能诗复能酒胡生十载戒饮茶金茎日夜烹黄芽天瓢一滴欲冲举刺刺文君未相许羨君豪兴为汝歌歌成掷遯桐江波明年倘忆吾乡茗谷雨前朝赴龙井

夜集郭鸿胪馆偶闻邻室有使酒相虐者余为解纷竟戏作短歌示鸿胪

古人饮酒戒沉湎一石萧然神不乱今人饮酒如沐猴脱巾狂叫无时休双眼茫茫向天白知交侧目成愆尤清音软语有何意白波平地如山丘君不见张旭满引挥云烟李白一斗诗百篇遇汝那得开心颜又不见刘阮朝朝竹林醉当日高谈遇此辈大白流离玉缸碎

谢文度年八十而步履轻健如少新秋棹小舟千里过访且拉余往闽中曰武夷君迟子久矣余大壮其矍铄于行也赋短歌以订后期

谢君束发湖海狂飞腾若木窥扶桑只今九十健于虎白詹红颊双瞳方伯阳我师

吕公友玉笈云章佩星斗人间独好胡生诗千里拏舟灏江口自知名姓在瑶京尘世蜉蝣那得闻朝来共跨赤虬去玉笙吹向武夷君

夜同方吴两生集汪士能宅留宿作新都豪士歌

君不见新都侠客汪士能意气磊落形骸真须髯如戟鬣如猬泰山一掷轻千钧大腹便便亦何有半生但贮宜城酒日倒青莲三百杯家藏白堕五千斗暮春三月日颇长杏花半落梅子黄先生白眼空四海却来岩市登君堂堂上吴生宛如玉座右方生迥超俗博山炉中沉水香玳瑁玻璃照■〈酉灵〉醪相看一笑轻王侯长鲸跋浪风云愁主人尚醒客已醉荧荧华烛开朱楼绣縠纱茵迥奇丽一卧明窗不知曙感君意气为汝歌赠汝狂名在天地吁嗟乎世途局促难为容卖浆隐博甘途穷身后荣华竟谁是眼前尺蠖嘲蛟龙生家伯兄文且武骠骑才名驾千古二兄三兄咸楚楚生也第六之名詎减五（伯兄司马二兄仲淹三兄仲嘉士能行适第六故云）城东红妆十万家朱唇翠袖争朝霞相逢不饮漫成别参差笑杀千桃花君不见杜陵布衣老且拙典尽春衣兴逾发黄四娘家花满蹊大白携生醉明月

翌日全集方羽仲宅则王生为大力者负之而趋戏作短歌题汪氏壁并示汪吴二子

丰干里畔方干宅乔木森森向人立高堂净扫无纤尘片片明霞傍檐入主人古貌仍古心市隐蓬蒿甘陆沉片言遇我心欲醉鸛鸛立解千黄金春日春盘荐春韭白粲鲜鳞无不有乍可朝眠杜曲花那能夜欠新丰酒溪南两岸烟树深美人不见愁人心（用卢仝语）暮雨朝云杳何处明月香车返岩市

夏日同吴叔思东陂观莲

若耶之溪五十顷绿晕红酣画船暝吴王宫中十万妆明霞为佩风为裳箫鼓参差棹歌发隔岸清波照罗袜年少谁家双紫骝坐看玉腕明中流日暮香风四天起恼杀金陵谪仙子

题山房梅花帐

剡藤为簾湘为帘十幅吴绡更奇绝罗浮狂客刘世儒一扫赠我千峯雪主人清夜眠其中羽衣恍惚来相从参横斗落不知曙一枝醉抱春朦胧

送张英甫归永嘉因询康山人裕卿

两年不见张山人阮公眼白谁相亲草堂何来下孤鹤青山岁暮回嶙峋长揖辞余复行迈指点龙湫白云外语汝山中康裕卿万尺飞流好相待

题宣和帝御制楚江秋晚图

当年曾挂潇湘席历历云山似相识长忆江头红树村千林落照催行色隔岸人家草屋深凭阑浩啸舒尘襟长天茫茫鸟飞绝潮落汀洲龙夜吟隐见渔舟泊沙阜莎径寒烟莽回互羣仙可望不可招虚阁凌空挂烟雾两翁矍铄巢许俦崇冈之北茅堂幽登登回顾蹇驴客撩乱瀑花天际流何人笔底开层巘貌此江南秋一片瘦金书法了可验恍

惚似入宣和殿

严陵晚泊

严公昔未遇畊钓日沉冥一朝动人主始识少微星余亦任公子垂竿三十龄被发上高台浮云空翠屏双砚拳石那可坐却望三山游四溟袖里虹霓一千尺手掣鳌鱼归帝庭

少室山房集卷二十四

●钦定四库全书

少室山房集卷二十五

（明）胡应麟 撰

○七言古诗一十五首

白纈歌二首

葡萄之酒琥珀缸金罍玉笋春茫茫博山炉焚沉水香翠屏朱户罗笙簧援琴鼓瑟流清商洞箫遏云声飞扬珠帘不卷凝夜霜千花万花夹华堂明星烂烂出东方左挟安陵右龙阳美人翠袖娇红妆秦城卫女纷成行愿君一盼生辉光清歌盈盈绕画梁夜如何其夜未央黄金为堂白玉椽翠屏珠户罗婵娟流苏帐暖春茫然鸳鸯锦被裁合欢明眸皓齿娇相怜三星煌煌月在天灯长烛明兴未阑都梁甲煎焚华轩茱萸苏合纷纒绵非烟非雾非人间引宫刻羽鸣幽兰昆仑之觞斗十千美人垂手临风前回身杂佩何珊珊珊瑚火齐间木难腰围尺六芙蓉渠鲜惊鸿宛转飘琼筵双成弄玉俱神仙夜如何其夜漫漫

行路难六首感事作

君不见竿头鸢乘风浩荡游九天君不见栋头雀百尺凭虚俯寥廓君子雌伏安蓬荜小人雄飞势挥霍乞哀中夜如鸛鷖志意满极惊庸流时移事改恶声播遗臭墀间万夫唾君不见公孙张仪称丈夫至今行乞羞庸奴

君不见盘中蝇变幻黑白如丹青君不见市中虎利口纷纒捷桴鼓君子推诚洞腹肝小人柴棘横肺腑谗言交构四国哗贝锦百匹张云霞邦家覆败手足露絶臆刳肠示行路君不见江充举族无极殲有北陈诗盈简编

君不见帐前蚊侵肌啗肉无时停君不见襟前虱饮血■〈口替〉膏罔休息君子守道甘困穷小人聚敛恣胸臆溪壑之欲浩无涯狼贪蚕食肥私家祸盈孽满罹刑辟昆冈火延灰玉石君不见梁冀籍贯元载诛黄金满谷成丘墟

君不见波间蜃吞吐楼台倏千仞君不见岩间蛛四张罗网迷空虚君子行善苦不足小人济恶才有余沉机伏弩绊飞走变幻涛张何不有术穷数尽来天刑青冥白昼飞雷霆君不见林甫剖棺桧丑缪千秋永劫昭大戮

君不见墙畔蝎猛刺如山蚀金铁君不见泽畔蛇恶氛涌雾张狞牙君子乘时沛膏泽小人并日行凶邪一朝无处肆酖毒余愤凭陵螫草木噬人既尽阴祸延刀锯鼎镬快

意殄君不见阳由弃市俊臣族天道好还如转毂

君不见海中鳄利齿如山逞凶虐君不见穴中狼巨口如城当道傍君子好生戒苛
愿小人毒害盈刚肠积尸累累血成堑意气扬扬了不变神人共愤罪恶盈百骸分裂宇
宙腥君不见董卓然脐侯景灭万古元凶戒车辙

围棋歌赠黄生应魁

嘉隆奕者师鲍髯敌手燕台惟小颜琅琊门下角程李斧柯欲烂天东南四明岑干
出稍后自说髯龄遇神授一时诸子皆偏师何能突过颜鲍右迩来国手归维扬方生日
新最擅场天马行空絕蹊径喧啾百鸟鸣鸾凰会稽黄生名较晚负局携家傍天苑蹇驴
破帽春明门落落乾坤孰青眼当时奕道颇有声十年贾勇争时名一朝神理洞仙着骅
骝独步长安城落子潜思动移日梦入巴邛四仙窟有时大敌交中原徃徃一枰竟秋夕
兵锋所指无羣雄铮铮剑戟摩苍空虚堂棐几对剥啄晴天雨色交长虹猛若重瞳战巨
鹿竒如邓艾收西蜀槎山通道捷有神斩壁开关恣腾逐即当死地偏用竒背水援桴号
令驰俄看赤帜树高垒股弄强敌如婴儿倏忽长驱走雷电太白经天助鏖战全齐陡下
七十城雄赵一坑四十万长安五侯不乏材连云甲第朱门开高轩驷马竞延致争先结
袜黄金台黄叶盈庭仆夫卧风雨萧萧烛花堕斧柯几烂局未终不觉晨钟彻高座唐时
供奉夸积薪生岂豕嫡絜后身荒丘仙姬姑若妇九枰口诀留千春丈人耽奕自蚤岁飞
将词林絶无对茂弘五品输江郎偶尔那能不心醉嗟嗟黄生意气豪岂徒覆局兼含毫
上书无路谒明主狂吟易水风悲号世人沾沾事酒肉高盖峨冠耀流俗生徒工奕仍工
诗老向金华走碌碌黄生黄生歌莫哀三公九列俱尘埃不见东南八万仞寥天石室青
霞开奕罢两奩收白黑局上亏成总虚掷乘云且逐胡先生跨鹤鞭龙访太乙

后围棋歌再赠黄山人

隆万以来攻奕者歛有小吕闽小蔡黄生崛起禹穴中倏忽时名共当代丈人卬角
游长安国手何人不针芥鲍颜二李卢及岑次第携枰入东岱中原豪杰屈指空晚得方
生最称快方生巧思凌古今游戏神通了无碍永嘉方生并时出名姓俱同剧堪怪少年
复有六合王浸浸渑池欲兴代黄生善战尤自负夙昔疆场构吕蔡方生之下三子优叱
咤登坛勇莫逮有如孟德肩孙刘鼎足三分建旗盖碁虽小道实可观生也精进迴不懈
并吞割据弘霸图劫杀侵渔尽变态楸枰落子大势分先着纷纷布要害吾观此道与兵
合一一为子陈梗槩攻城略地创都邑背水依山列营砦发纵元勋首帷幄指画竒谋洞
著蔡援桴击鼓事征讨跃马横戈奋骄怠湘东一目宁久长大舜重瞳迄推戴三千牧野
行造基百万昆阳坐奔溃大军涿鹿平蚩尤孤卒鸿门闯樊哙混壹区夏秦有权表里河
山晋无害成皋坚壁控土宇函谷封泥距关隘含枚定陶袭项梁卷甲阴平走邓艾七纵
七擒启荒服八战八克定边塞岁时吴魏争长江日夜梁唐斗夹寨乘风帅众下井陘冒
雪潜师抵淮蔡晋阳三版浸难没即墨残都守无奈阖闾贪欲甚蛇豕勾践阴谋桀蜂虻
推锋白起劲若飞持重廉颇老能耐卢俊李密王世充鹬蚌高欢宇文泰东西并举骋全

力南北中分各两大气盈量满隳成功忿削贪亡示明戒入神入圣穷幽微为虏为王决成败棋与兵合种种然始作何人世沾溉相传放勳教丹朱上圣无缘发机械或言战国尚雄略余习纵横此流派丈人髻岁负棋癖铮铮铁中号亡頼一枰悬榻昼夜攻寝食俱忘减腰带回光返照念载余四大部洲任成坏胡来遇尔重作歌见猎浑忘喜心汰下车搏虎众欣悦拍手其如士林訾尚忆斐旻舞剑时道子挥毫摄千界崔家延伯每临阵亦藉僧超鼓豪迈雄才絶艺两间值怜汝求言日瞻拜虚堂洒墨元气流万壑寒风度天籁君不见休仁中正蚤已没待诏师言近谁再仲甫四篇差足存伯祥三路逝安在由来一局尘世空底事妻儿溺贪爱君不见巴邛仙橘大于斗商山四翁乐相待九枰输我愿未酬会擘龙肝了余债他时负局寻先生洞壑金华乱峯外（会稽黄生奕为过江第一流而诗亦佼佼一日邂逅黄金台上持卷乞余赠言嗣是亟见亟请今且逾十八载矣顾余卒卒亡寸晷之暇仲冬扁舟北归楸枰尘积不胜技痒因抽笔为长歌食顷便成余兴勃勃复摭拾古今与兵家合者数十百事订兹篇勉之黄生努力精进异日者荒郊仙姬可亡请益于九枰外矣）

武林大雪程太学仲凯邀同张总戎黄刺史徐司理钱文学吕山人泛棹湖中泊南岸放歌徒步入龙井汲泉瀹茗延赏至暮乃归

雪花夜半飞三竺万壑千岩恍如玉新都程生太好事曳杖清晨叩茆屋手持三百青铜钱要我湖头豁尘目茂先叔度钱及吕斗笠芒鞋恣追逐伟长诗思亦横发首御肩輿入穷谷觞行到手不暂停鸚鵡鸬鹚互相属人比竹林差有余客方莲社宁不足阶前奇石迭层巘洞底流泉吐深麓山僧瀹茗作清供色香味美迥可掬蒲团斐几媚优钵竹院明窻照蒼卜幽深若与尘世辞昏黑将求上方宿或言狞虎山下过吾意神龙井中伏诸君先发余少留为语平头免刺促四百八十金银台会策黎詹入天目

钱象先过访深雪中徃报不克短歌柬之

武林夜半北风疾雪片垂天大于翼孤山老梅僵欲死跨蹇呼舟漫寻觅东吴钱生住昭庆拥褐高眠送长日吟成字字敌琼瑶皎若天花堕禅席忆生三月来武林啸傲西泠事琴奕怜才总称陆士衡好士亦有徐元直穷愁骨相自古然典尽鹞裘壁徒立沾沾访我空巷中把赠明瑯示亲昵风尘勃窣倦奔走咫尺钱塘梦瓢笠朝来策杖拟寻汝泥泞阶除没双屐美人娟娟隔湖水一望云山思无极登坛大老俨欲尽艺苑今谁占名籍羨君咳唾饶珠玑下里千夫走辟易文通老朽叹才尽形秽那能不趋匿醉拈秃管书短章小刺聊当正平掷他年把臂姑苏台倘许忘年订金石

仙橘行赠吕生

吕生好奕良有年口如悬河决百川凭陵负气双眼白强项肯伏公卿前自言勅敌止方蔡三人海内季孟间楚中近有朱氏子黄王以下知无前揭来武林四阅月室中新尽晨无烟临安富儿不好事日夜空囊扞酒钱一朝遇我湖水曲脱巾大叫狂呼天先生名姓久岳立愿得词组垂人寰忆乍持刺远谒我蹇驴薄暮西长安尘埃碌碌不称意云

萍此地仍周旋试生伎俩果精絕疾风飞雨鸣华轩唐时待诏宋供奉齐梁中正俱流传
胡为终世仅布素江湖老大垂华颠吕生吕生勿复言才高自古多迍遘煌煌国匠扶天
巧造物小儿宁汝怜不见先生坐诗癖百忧万恨攒詹端荒丘夫妇两奇絕橘中四叟吾
忘年他时芒屨会挈汝一枰柯烂青霞天

汤阴王翁年百八十矣而肌肤绰约若处子且豪饮数斗不醒座间出诸名流赠章
邀余继作

王仙翁发如孤鹤颜如虹大腹便便贮河汉鲸吞鳌吸三千锺龟纹蹙起隐胸后玉
璜炯炯横双瞳詹毫耳毫灿霜雪时人不识呼社公步轻履坦疾于箭周行五岳携孤筇
自言今年百八十九朝旧事盘心胸高谈弘正俨目睫信阳北地俱儿童大还曾受柱下
老素书亦从河上公王母瑶池燕周穆仙源几度桃花红昆仑阆风不肯住脱身混迹游
寰中謁来瓢笠武林道湖光山色聊从容飘然遇我云水窟谪仙大叫呼人龙初平骑羊
去不返子岂有意仍前踪金盆玉壶亦咫尺翩翩奇骨宁凡庸感君意气为君歌参差两
腋乘长风却忆玉皇香案侧丹台恍惚曾相逢尘埃墮落经几劫欲骑鲸背飞寒空大鹏
希有俨相值遨游八极追鸿蒙他时再赴易迁约仰天大笑扶桑东

少室山房集卷二十五

●钦定四库全书

少室山房集卷二十六

（明）胡应麟 撰

○七言古诗一十七首

李大将军惟寅得唐吴生观自在菩萨真迹长裾跣足天男相一洗世人称之为谬
且莊严妙好六法具备非五代宋元诸名家所办因手勒心经其上而属余长歌识之

画师崛起开元日万象毫端鬼神泣前无顾陆曹卫张二李阎韩总非敌胸中六法
参羣灵解衣盘礴流风霆斯须宇宙落指掌茫茫大块愁凭陵曾画玄元皇帝庙隐见人
工夺天造杜陵老子笔扛鼎恣寫篇章豁怀抱金茎碧瓦扶雕梁旌旗冕黻争飘扬词锋
绘事两突兀恍揭日月悬宫墙裴旻将军号大侠力悬丹青荐冥业干将起舞烂白虹倒
掷寒空日星裂尔时逸气横须詹狂墨乱洒秋淋漓辟支罗刹俨飞动旁观辟易惊神奇
吴生一去八百载后起何人划真宰徒闻寫照推扬光未信登坛属王霭脱壁庸庸孙梦
卿五朝人物传虚名宋元能事着山水开元遗迹如晨星此帧大士最殊絕妙好莊严种
种列珠玑瓔珞被四体咫尺天人共颀颀高堂十仞云娑娑仿佛朱阑临普陀俯窥渤澥
仅涓滴青莲一瓣扬洪波劫风万古吹不动金身丈六天嵯峨大悲显化遍五浊宰官帝
释随呼呵有时幻相示闰合世人眯目谈娉娥即今看画岂待说幅巾长带垂山阿谁其
摹勒事琬琰侯也功德真江河忆侯夙世住灵鷲金粟如来自身阎浮一念偶下移暂
寄貂蝉曳华绶将坛文苑双张皇八荒九域传琳琅鸡林百金买只字往往逸调追河梁
生平寶此若垂棘树下杨枝宛曾识焚香手篆般若经照耀丛林炯双璧謁来示我令作

歌欲嘘甘露回沉疴才枯思竭腕力弱仰天白眼空摩娑惟余与侯深肺腑意气铿铿迈
今古侯能射虎过裴旻余非雕龙愧杜甫吴生千载若有缘三生裴杜重周旋安得再起
斯人貌君虎头燕颌相堂堂九尺玉立麒麟前他年云台烟阁第一书姓氏为君大挥十
丈之如椽

易水垆头放歌怀庆卿

君不见高渐离举杯击筑天淋漓君不见鲁句践叱咤干将起雷电十载荆卿游酒
人褐衣短后随风尘一朝匕首刺秦国白虹千丈垂嶙峋貔貅万亿夹广陞闾阖眈眈虎
狼睨羸躯五尺掉臂入勇慑孟贲走庆忌世儒刺促计成败胡不身履斯人地君不见十
三杀人秦舞阳死灰踟躅秦宫傍当时孺子果怯死捧图胡以来咸阳乃知鼎镬良可蹈
一时感激轻毫芒豆羹箪食色陡变况持白刃游朝堂天门峩峩九重辟六师七萃纷张
皇从容步履若无事俯视政也如蝮螭图穷督亢刃乃见至今神貌犹扬扬伟哉大勇旷
百世共工项籍争雄强八创嬉笑总余事沾沾俗士徒称扬君不见聂政大呼本仓卒專
诸进食元潜藏豫生毁形伏桥厕谁哉十目交嵩廊三人视卿孰难易一死虽同蹈死异
吁嗟太史传刺客百代何人奋高义我来易水吟悲风萧萧匹马随征鸿当时壮士岂复
得黄金台馆徒穹窿为卿作歌酌卿酒恍忽精灵下携手田光鞠溲渺何处独往城南问
屠狗（太史传诸刺客其事惟荆卿至难子长摹寫亦极感发余累有辨折详笔丛史叢
等书）

醉中放歌五章

君不见北斗精天瓢湛露浮金茎君不见酒泉域甘醴灑灑地中出三浆沆瀣盈帝
壶觞泛昆仑尽红液从知大造亦耽酒不乐人间复何有笑杀移封唐汝阳两缶能令风
伯狂西园公子号无忌一醉曹腾小天地

君不见放勳尧千鍾一饮常逍遥君不见重华舜百觚一举受天命衿衣鼓琴二女
果多寿多男祝神圣谁云至禹衰帝德旨酒千秋肇仪狄鄙哉巢父及许由一瓢不保箕
山头何似携将贮■〈酉灵〉醪荡荡巍巍九州岛牧

君不见秦祖龙布衣十日咸阳宫君不见汉高帝击筑登台望天际驱山鞭石魑魅
走素媪云中夜流涕威加四海卷六合匍匐平城命如叶不因大风沛上歌千秋胡颜较
仲多博浪沙中副车碎底似平原浹旬醉

君不见鲁仲尼圣德巍巍穹壤齐君不见姬公旦赤舄忠勤古今擅有孚濡首系易
终惟汝无量不及乱鸣呼周孔两大圣欢伯时时见亲幸胡为屈子游江潭独醒反被蛟
龙餐谅为名士传不朽但读离骚饮美酒

君不见东王公金茎琼醴延青童君不见西王姥高宴瑶池万妆舞白云在天丘陵
出青雀翻飞报汉武列仙羣圣三百六笑揖天姝美如玉东方小儿下界游蟠桃三熟仍
三偷鬢解貂裘换云液我欲乘风上八极

后醉中放歌五章

君不见陈孟公席间壮气嘘长虹君不见孔文举座上宾朋剧风雨金罍玉尊酒满堂跋扈飞扬恣豪举才疏志大差足惜投辖榷关政堪语人生倏忽同蜉蝣夜长昼短秉烛游千秋饮者传异代汉魏王侯竟谁在

君不见阮嗣宗竹林白眼天朦胧君不见陶元亮破帽东篱漉家酿五斗何如归去来长啸垆头兴逾王谢公双屐嵇公琴明哲胡为异霄壤步兵臧否吾所师柴桑三径嗟无资当时一官不自保百代声华擅文藻

君不见张季鹰放浪江东称步兵君不见晋吏部醉倒瓮头笑行路衣冠龌龊徒槛猿富贵斯须草头露奸雄窃国中华乱日月何如醉中度鲈乡亭下风飏飏高标想象垂千秋不因酣卧遭束缚后世何缘有毕卓

君不见太白翁鲸吞鳌吸三千锺君不见少陵叟蝉腹肠三百首狂歌痛饮差快意典尽春衣漫回首身后河山千载名生前宇宙一壶酒人生有钱付酒家十日五日倾流霞今辰何辰夕何夕试问耒阳与采石

君不见王长公彩毫万古称人龙君不见汪伯玉一醉颓唐倒千斛太常斋日不禁酒岁岁如泥三百六金华邂逅赤松子潦倒乾坤洞肝腹弇园澹园及太函悲风宿草俱茫然当时把臂谁上坐老泪河山夕阳堕（平原道中无侣卧卜舟独为十日饮饮醉日为一短歌前后各五章荒唐谬悠间以诙滑礼法之士咸谓弗根典午林下诸贤顾跃然羣起和我聊复掇而存之）

长安僧舍邂逅莊山人静父余初未之识也静父独以意契邀余啜茗禅榻中翛然竟日垂别问姓名乃相顾大笑赠以此歌

黄金台下莊静父啸弄云烟天尺五烹葵拉我远公社错落芙蓉剑花吐经年作客咸阳东浩歌击筑飞长虹貂裘敝尽归不得五见黄叶号西风何日相将武夷去桃花九曲流春红丹青楼殿四百八醉谒上帝金银宫

晋陵夜泊寄怀张总戎黄刺史

君不见黄叔度胷次汪汪千顷波君不见张茂先襟怀朗朗百间屋萍踪邂逅天东南把臂论心洞肝腹张公儗舍宗阳宫生平侠气摩苍穹高牙大纛屏一壑十年钓艇横西风黄君卜筑紫阳岫四壁图书坐清昼雌雄二剑巧相值错落寒光映袍袖一朝遇我肺肝亲青天散发成三人把杯白眼望晴昊寒冬大壑回阳春围炉暖阁坐深夜弹碁覆局流星文形骸不将尔汝隔徃徃一诺悬千钧邀我湖头结新社春花秋月长为邻何意风波起仓卒转盼交游异南北脂车秣马发中路把袂河梁壮夫泣青衫潦倒困一经俯首王门弄齐瑟平津相君差快意吐哺延宾近东壁客星帝座宁久眠梦入桐江钓鳌窟吕梁震泽天茫茫极目飞云横太行遥看亲舍宅其下霜鬢雪鬢垂高堂功名富贵果何物经时乞米留长杨扁舟便作五湖客重孥十口歌沧浪黄河浊浪浩无际支祁魑魍争豪强大鲸如山奋鬣鬣参差一叶浮沙棠穷途历尽抵淮甸南下维扬疾于箭却忆张黄两故人宿昔河梁涕沾面男儿有身百不忧千秋大业宁公侯三孤九列亦余事荣华倏

忽同蜉蝣君不见张公英雄盖一世烟阁云台了无系忘却麒麟第一人独往寒山问真
帝君不见黄君意气横青霄一麾海上游逍遥垂天大翼六月息中林往往嗤鷓鴣我今
胡为尚泥滓布袜青鞋共吾子四百八十金银台割据湖山誓从此

闻清源王孝廉得第将归戏为短歌寄讯

王郎再谒甘泉殿一日声名满畿甸中天百尺黄金台走马看花亦堪羨清源柳色
紫啼鸦红妆十万娇明霞若个新知莫愁女独倚高楼望宋家

燕中日闻文仲使君手书寄余不达而返短歌讯之

忆昔仙鳧下东国种露栽云遍城邑至尊召见明光宫上考吴公书第一含香郎署
五载余大府却拥专城居黄堂赫赫五马贵翻令尺素来樵渔宛转双鱼灏江畔为复浮
沉付殷羨美人如花若耶岸迟我同开越王殿

蟠桃歌为大学士赵公赋

君不见大罗之天天尽头峨峨五城十二楼金银台殿四百八瑶池阿母乘苍虬上
有蟠桃枝下拂昆仑丘托根层城顶倒影弱水流一花三千春一实三千秋一花一实递
开落沧桑亿万增牙筹成周穆满慕长世飞黄馱驥凭空游西华设燕坐树下欲噉此果
不敢求元封武帝候青鸟行厨玉女罗天球贪心欲植上林苑詎知人代同蜉蝣东方本
是谪仙子三熟三偷混尘滓巨灵一见呼儿曹函谷于今气长紫池头又阅三千年几看
渤澥成桑田玉桃偷得不自饱却来东阁登华筵玳瑁筵开近平乐南斗为樽北斗杓中
使传觞太液亭大官行饌甘泉幙五陵冠盖何緗緡八荒一气旋洪钧三年三月十三日
河清海宴飞祥云老人星见紫微侧百辟趋锵酬相君相君世胄本清猷琴鹤风流谁不
羨焚香告天天下听炯炯灵台絶欺谩龙头晚达升长杨要将只手扶纲常触喉时宰甘
播弃一麾南海趋衡阳采药罗浮巔折梅庾岭旁朱门凿■〈穴上叫下〉窾勾漏扞丹
方拂衣却返严子瀨六洞三山迥相待背城十里金台尖买断寒崖碧霄外嵯峨絶壑悬
飞龙白云紫霞涌雪同流泉百尺清见底喷珠漱玉声玲珑灼然灵境果奇絶彷彿藏书
神禹穴初平骑羊当昼过大士双林话禅悦东山一壑宁久扃应图处处悬丹青南阳抱
膝卧岂得玄纁东帛来缙鞶干纲再振寰宇辟左列夔龙右垂益一朝百揆司盐梅万姓
欢呼荷天力和衷协德居承明正笏垂绅临大廷帝心默感九重上划然天地回清宁维
时西夏变仓卒奋臂凶渠一呼集包藏祸心结狂狡当宁皇皇食为戾东方岛夷弥陆梁
篡窃故主图开疆玉京一鼓平壤破搥胸车辙矜螳螂中原旱魃播灾祸十家九家望门
饿三方大难丛一时奸豪所在盘蛟螭谁其帷幄运奇策太阿白日飞丹墀天威咫尺强
敌下汛扫妖氛出宁夏两宫赈给十郡全民忘旱魃为丰年总戎经畧度鸭绿敌骑仓皇
军尽覆朝鲜故主仍复都稽颡西飞乞臣伏区区鹿蠡左右王纠集万众窥辽阳王师一
出尽瓦解橐驼千队俱奔藏南北东西尽安辑伟哉相业不世出驱除咸谓参等劳发纵
伊谁匪相国宫府一体忘喧嚣皇储出阁安勤劳一人元良万邦肃功百房杜追夔陶俯
仰天心念良弼五福煌煌厥躬集越裳翡翠日夜输肃慎波臣到重译即今寿域开明堂

桑弧蓬矢罗圭璋十方翘首望霄汉含哺鼓腹歌陶唐天子传宣下丹阙尚方亲赐浑羊
设金钱粲烂内府储品饌珍羞路填咽维时春暮百卉荣梅李杏柰俱生成牡丹今岁尤
蚤发烨如云锦披仙城独有蟠桃隔瀛海玄圃蓬丘断樵采乍宵东走过吉云偷得持觞
献真宰真宰年才七十强丰颐广颡形貌康四聪四目明且达俨如威鳳游岩廊孙枝遶
膝百千指兰玉盈庭照罗绮面前罗拜但点头乐事世间谁更比愿公酌我酒听我蟠桃
歌不为万间厦奈彼寒士何听我蟠桃歌愿公酌我酒大庇寒士颜还须栋梁手蟠桃歌
莫浪嗟愿公岁岁倾流霞姜公八十造王室卫公九十勤王家阿衡百岁佐商运云台烟
阁传无涯

少室山房集卷二十六

●钦定四库全书

少室山房集卷二十七

（明）胡应麟 撰

○七言古诗一十一首

金坛邓孺孝以易论见寄赋答时舟过京口

垂髫梦入华阳洞耳割乖龙兴飞动茅家兄弟骑赤虬握手胡生唤珍重金坛坛上
邓伯羔谪籍何年离大茅三山长啸俯六合濯足瀛海霜空高点易研朱闭蓬户尘世浮
荣瞥朝露韦编几绝不肯休恍惚羲文案头晤成书寄我十万言言言尽抉参同论丹霄
择日待冲举何物黄金称大还还山高拄九节杖一见初成讶神王传语山中白衣相屈
指相逢大罗上

洛阳春色图题陈道复水墨牡丹（乃黎惟敬出都日持赠者）

二百年来画花卉吴中沈周称第一颀颀并数陈生淳不事丹青祇水墨天机一派
掌上流尽扫铅华露风骨家鸡曩昔厌余子迩岁声名陡籍籍吾家此卷尤绝奇不向长
安市中得南海黎君夙遗我把袂河梁示亲昵牙籤锦轴题八分四字犹存故人迹忆生
袒裸盘礴时颐指羣工若役中山大管操如椽半醉掀髯见真率桑皮丈八横高堂元气
茫茫堕儿席姚黄魏紫信手拈瞥眼千花万花出须臾四座回春风媚李秣桃总辟易青
油翠幙张层阶十二雕阑护倾国天然富贵压尘土底事珊瑚斗玉石盘行玛瑙夜色殷
屏敞琉璃曙光湿琼楼特起明朱霞玉佩低垂映红日女英妨泖偕娥皇飞燕昭阳倚合
德廊开响屐西子游亭俯沉香阿环立霏烟绡雾态不禁握雨携云状难悉枯枝断干若
草草嫩蕊繁英转奕奕芳菲恍度洛水头烂漫如栖上林侧咄嗟陈生何太奇十指参差
幻帝力含毫肯避造物嗔落楮翻令化工泣经时顾凯笔欲飞旷代徐熙品推逸赵昌形
似真儿曹黄监精工詎伦匹为拈老句题册终跋扈飞扬迥相敌连城十五差足偿美锦
三千复何惜卧观旬月仍卷还笑杀明诚録金石（丹图以直重卷还赵明诚得徐熙牡
丹）

于生歌赠鳳鸣

齐东于生太奇絕草就征西纔十八万言落笔风雨惊白眼青天对明灭忆生年少
歌远游兴到扁舟夜中发娇妻稚女了不顾一苇苍茫泛吴越会稽秦望攀嵯峒回首山
阴正飞雪四百八十金银宫湖上烟波若涂抹移舟却向姑苏台扬子涛声暮填咽石城
城南访莫愁画栋雕甍管弦列平康巷陌人如花散尽黄金等尘屑万金散尽归故乡斑
烂菽水娱高堂三冬文史业颇富骅骝騄駼争腾骧一经耻逐蠹鱼老摩挲石鼓临锺王
解衣盘礴得画理朱栏瀕洞浮潇湘禽鱼小景各生动飞鸣宿食交林塘明窗净几拂缣
素虎丘细酌焚清香名流满座挥大白百觚一饮雄高阳酣来如意舞精铁双龙错落回
精光一朝遇我莊岳底飘然挟刺来茅堂念年魂梦走灏水龙门渺邈如天阍先生牙颊
肯终惠螭蛸努力追飞黄嗟余濩落拙且蹇江淮一旅徒披猖中原屈指故老尽卽今二
仲谁求羊邂逅逢生竹林下有如阮籍偕嵇康淋漓曲蘖岂无意仰天大笑神飞扬男儿
事业在十指述功纪德皆文章高冠大盖等澌沫电光石火徒张皇生今二十甫逾八声
华烨烨悬乡邦歌处呻吟总金石赋成咳唾俱琳琅山东英妙孰卿比长纓直欲搜穷荒
他时掉臂走双阙天人三策摭岩廊名成弹指竟大业肯将肉食移青绶春风午夜变杨
柳娟娟别思盈河梁念子殷勤若胶漆纷披大雪携壶浆男儿抗手詎足论新秋计日来
余皇芒鞋布袜吾共尔翩翩结束穷齐方云霞万仞躡梁父七十二帝驂翱翔磨崖絕顶
勒名姓卧看海日生扶桑

读汉寿亭侯庙志歌（有序）

关忠义侯庙祀遍海内独履歷自陈寿本传外槩亡足征寿书体存简质赖裴注瞻
缚差足证明而是传参伍殊寡迨胜国明初杂剧传奇与市井之演义出而忠义生平事
迹混淆极矣左辖蒲州赵公产侯同里因据元人所修汉寿亭侯志详加订核扩为兹编
余讽诵兴怀辄綴长歌卷末百世而下得亡以为知言也

芒碭天开九州岛牧白水中兴符赤伏炎精四百运数终海■〈宀禹〉瓜分魏吴
蜀巍巍忠义起解良精忠大义扶三光南权北操两巨猾侯也睥睨如蝮蟥忆破袁军访
昭烈十万貔貅俱胆裂飞身立取上将头掷向曹瞞血犹热荆州坐镇推元戎恢图汉室
除奸雄举襄围樊势破竹七军电扫如秋蓬禁俘德梟两雉兔大泽■〈舟冲〉莽回
互天崩地坼华夏惊六合几完汉时故自许以南遥受盟壶浆箪食僉汤征笑杀曹瞞挟
汉帝中原无穴逃长鲸苦恨东吴众蠹贼割据河山骋诈力阴谋秘计日夜萌举国昏昏
效鬼蜮贼蒙诡避逊嗣兴甘言密饵藏戈兵侯也胸怀豁云梦那知故穴潛分崩樊围不
没仅三版赤手荆州竟徒返麦城困守临沮悲今古英雄递扼腕侯亡逾月蒙亦亡流芳
遗臭垂青绶汉统兴衰实侯系蒙身百斩宁堪偿权本狼贪逊狐媚凶德于时偶参会皇
天有意灰炎精詎曰羣奸志能遂玉泉之山紫气屯侯今世世为明神童孩走卒竟瞻拜
万年庙食昭君臣皇皇左伯亦蒲产异代同心帝猷展执鞭想象回英风欲起侯躬诉凄
惋九原不作空踟蹰拮据往事垂璠琦青绶触目覩颜面侯也恍惚来前除云旗飘空互
明灭铁马金戈俨腾踏纷纷成败论后人蒙瞽何由覩双睫东阳腐儒史笔流褒诛只字

严阳秋为侯作歌侯俯读掀髯一笑诸吴牛

逍遥篇为袁履善八秩赋（有序）

袁丈履善行年政八十矣而色若孺子且步履矫轻筋骨强悍神明之用老而逾王至玄谭眇论伊叩巨钟河悬海翻壘壘不竭饮酒奕棋赋诗染翰浹辰倾宵即丈夫未易追也是秋闻余匏系湖上挈舟千里属赋长歌为寿昔卢照邻抱疾幽忧一旦遇孙思邈慨然作赋以自况乃余年垂半百齿发变衰而袁丈方霞举轩轩冷然天际今之所遇得亡犹昔乎夫上古有大椿者八千岁以为春秋而袁丈年甫八十夫莊生之旨此特其兆端耳因稍次其履历为逍遥之篇

国初词人袁海叟白燕篇章脍人口风流文藻二百年载靚当今沔阳守沔阳刺史真人豪弱冠雄心蟠巨鳌射策曾同弇州榜三山彩笔飞寒涛白氎青衫走燕市杜曲东风馆游骑黄金台馆千尺强击筑狂歌五侯避长杨执戟甘沉冥一麾出守辞神京朱旛皂盖列先后峨峨（山可）大舳浮江城江城八月天茫茫九疑七泽连高唐岳阳楼头唤杜甫乾坤万古留诗狂吏事纷纭苦拘束回首家林梦松菊拜迎官长折腰领鞭撻黔黎碎肝腹文人拙宦自古然丈夫讵乞儿曹怜区区五斗若毛发肯将一饱酬如椽步兵江东兴飞越两屐秋光路明灭为园半割三柳云筑室全邀九峯月九峯三柳长逍遥飘然越海来轻桡金银梵宇四百八烟霞石屋攀岧峣畴昔逢余大堤上拂拭楸枰互神王持杯恍缔竹林友醉眼朦胧豁霄壤四腮鲈熟归兴浓河梁对拆双飞龙重来握手瓦棺寺烛花夜半流残红闻道今年政八十步履康莊捷蚊翼家家拂席延林宗处处携觞候安石嗟余落魄雅好游夙生药物攒眉头看君耄耋若孺子香山洛社同优游玳瑁筵开虎丘畔矍铄廉颇老能饭芝兰玉树森庭阶舞彩含饴剧堪羨何来初度地藏符孟秋晦日悬桑弧今年七月月小尽安期一夜来蓬壶太白浮公为公寿尘世浮华孰先后灵光一柱海岱间屈指君王问耆旧冥灵琐琐未足夸瑶池几见飞桃花春秋载阅大椿历青牛相逐还流沙

布帆行寄徐使君（有序）

先是惟得使君以青雀见假自淮达燕至是晤余彭城复辍所御艖（舟冲）载我十口两入帝都行人亡恙秋毫使君力也爰赋长歌属之榜柁凡八百八十言

吾家大罗上絶顶增城楼醒逐东方生窃桃瀛海头罡风起八极吹堕苍精虬支机隔银汉织女忘牵牛男儿意气凌千秋如椽十丈轻王侯兰陵美酒三万斛百觚一饮眠糟丘吴娃越童两绰约妆成累月弹箜篌参差狂态发中座不告妻子乘扁舟山阴夜半六花绽雪片纷纷堕高岸戴家慵夫唤不应载得西施若耶畔五湖泛宅天茫茫九疑合沓连高唐巫娥握手呼宋玉朝云暮雨啼英皇北望宸居建章起西笑长安兴难已大江东下飞寒涛南顾洪河疾流矢乱山芒砀寻真龙咄咄新丰亭长公甘言鼎镬给父老弯弧反射如逢蒙穀城酹留侯缅怀游赤松胡颜教隆准背约追重瞳侵寻楚事去垓下贪天功时无轩辕帝豎子皆英雄乃知畴昔广武叹步兵衡鉴悬秋空丈夫白眼甘恸哭忍

将酒辙行途穷彭城困阨古来有踟躅徐卿望余久尊前片诺肝胆倾苦忆忘年竹林友
楼船一借张孝廉勃窣犹堪事奔走齐滕鲁卫遵遗墟极目黄河蓊门柳蹇驴蹙蹙窥蓬
莱华阳碣石俱尘霾道傍叱咤鲁句践白虹怒吼昭王台左掣雕龙右屠狗乾坤嘒喏双
青鞋俗流惊怪颇欲杀先生玩弄如庸孩故园松菊渺何处拂衣长啸吟归来亲舍夷犹
太行麓抱膝躬耕事樵牧长饒谷口时逍遥点缀鱼虾伴麋鹿石羊成队闲金华丹崖翠
壁流胡麻支机却访鹊桥畔寻源直驾昆仑槎长洲宫阙闭荒苑潮打空城秣陵晚垆头
谁问太白星六代残碑吊苍藓夕阳竚桃叶双桨沿前溪莫愁卢家妇邀我长干西临春
结绮蔓狐兔白门禾黍空高低笑杀当时景阳井三人贯索如连鸡瓜步旌旗迥回合灯
火■〈干阝〉沟互明灭珠帘十里歌吹浓一派箫声广陵月青楼宿紫薇绣幕围罗衣
征夫念长路明发临淮圻使君弹指诧歴岁大纛高牙坐相慰布帆不厌长康痴安稳行
人出徐沛嗟余畏路频远游羨汝急流真勇退挂冠神武殊匆匆黯淡乡心入鲈鲙斫鲙
鲙匀秋霜张锦席浮沧浪大姑迓客来南康小姑送客过浔阳武昌黄鹤为君下阑干百
尺摩青苍买得秦人避秦地夹堤红树回渔郎拂衣偃息武陵洞白云如絮紫轩窗人生
俯仰贵适意筑宫冲漠朝羲皇危亭四顾象纬列九玄琼笈罗缥緜噫吁使君卧岂得绿
野平泉漫营室苍生四海唇嗷嗷翘首经纶帝三锡司空治水魑魅愁太尉登坛鬼神泣
降生名世诘偶然突兀麒麟候颜色庙堂计日諏雄图扫除日本平海隅天吴窜迹海若
徙鸡林重译来长途勲庸奕奕树彝鼎飘然一苇还菰芦三千行圆八百就刀圭入口升
蓬壶此际胡生满谪籍香案仍居玉皇侧大鹏希有行相逢浩荡扶摇骋八翼营营下土
同蜉蝣天上宁知总旧识蟠桃尽摘玄圃霞烂漫瑶池醉千日

寄俞声父广文俞君六十而意气壮甚投余万言之书愧无以报报以短歌

俞翁六十形貌苍胷中壮气何昂藏唾壶击碎铁如意独夜悲歌神慷慨素书双鲤
乍遗我剖之字字皆琳琅丰城双剑久埋狱谁从石匣提干将载读名山两游记雄词直
上追班扬琴声四壁响空翠云霞万迭流青绡兴来便欲远寻汝青鞋布袜双翱翔丛霄
絶顶跨鹏背侧身南斗呼琼浆晨风不假子安便滕王高阁天苍茫珠帘画栋永寂寞何
人百代垂文章参差念汝袖中刺片帆计日来浔阳琵琶亭下遇商妇荻花枫叶吟秋江
洞天携手三十六醉鞭乱石成羣羊王门鼓瑟让儿辈沾沾白雪弹清霜谁云烛武非少
日即今圣主开明堂魏尚云中阨羣吏楼船十丈横扶桑一朝谈笑生羽翼至尊投袂呼
冯唐君不见公孙片言合武帝千秋爵位高明光（余君寄余杂文甚伙）

度辽行再送万中丞

山西万侯真丈夫豪名七世闻匈奴虎头燕颌鐵作肤弱龄猛气吞于菟担簦挟策
游天都赤手欲把苍生扶九重含笑留操觚一麾重镇分铜符念年大白挥醪酥雄心日
夜驰伊吾渔阳鞞鼓动地呼至尊辍饭思良谟仓皇颇牧勤朝晡玺书十道飞平卢紫貂
三锡来屠苏清酒黄封传玉壶酒酣耳热声呜呜掷杯慷慨登长途貔貅十万听援枹鵝
鹤三千随渡泸八百家丁操仆姑甲光耀日天模糊朝鲜箠食歌来苏王京一扫空萑苻

楼船鸭绿江平铺长驱海若縻侏儒釜山对马风摧枯西飞清政魂先祖六十六岛追逃
通行长骨碎行头颅生擒关白如蝼蛄金人夹道陈休屠至尊前殿临赐舖子孙奕奕封
金吾河山带砺名公孤一编黄石垂孙吴山西万侯真丈夫

昌世孝廉有子记诵絶人十二游洋倾动侪辈为作阿咸行

阿咸七岁工临池眼如点漆肤凝脂九龄大书扫秋叶墨花徃徃堆涟漪十二青衫
走黉校十五胸腹蟠珠玑千言一挥河汉溢万卷一目风云驰矫若金茎擢云际亭亭百
尺无傍枝君不见杨收十三擅文藻乞言尽日窥籀籀男儿堕地山岳动岂与氓庶同蚩
蚩又不见子安十四序滕阁落霞秋水标神奇低昂造化在掌握寸管立泄玄元机区区
富贵果何物百代声华迥难匹古今名士多少成大业终须汝曹立况复而翁字彦国载
世文光炯奎壁他时税驾讵可量汗漫扶摇待风翼嗟余潦倒病且愁倏忽流年近高适
王家玉树空寤寐一子呱呱尚衽席苍茫覩汝思欲飞那得宁馨在蓬荜后生可畏亦可
虞电火人身讵金石少时我亦王杨徒此际何由发重黑含毫为汝聊作歌努力韶光莫
虚掷

繁弱行王世叔通侯圃中观射作

王侯腰悬鐵裯裆雕弧手挽五石强竦身注目捷风电左射右射迥莫当大旆高牙
轟云际戈鋌甲冑纷飘扬观者如山尽辟易九兕却走千夫僵岩呼谷应地汹涌砂奔砾
舞天苍茫羲和惨沮白日匿飞星十道流扶桑一发旄头落再发连双鸽三发定天山筑
城连受降连珠四五六七八纷相将九发九日坠百发百穿杨巧若甘蝇教飞卫勇如养
叔携潘阆雀儿只目讵足拟牛心片馘差堪誉丈夫夙昔四方志桑弧蓬矢悬高堂登坛
仗钺挂金印英风八面驰戎羌棱棱霜气凄羽箭秋空俊鹞争翱翔吁嗟君侯絶技有如此
历数古来名将畴能双忆昔文成挽宗社元勲茂烈标旗常河山带砺国同永丹书奕
叶传貂珣侯也登朝在髫髻朱颜绿发骄琳琅昼摄衣冠扈銮辂夜鸣刁斗驱龙骧临淮
座上倏相值轩轩霞举明朝阳骅骝駉駉讵凡骨声华藉甚蜚天阊帝谓河漕实司命九
重特诏来淮阳滕■〈舟冲〉巨舰载刍粟旌旄络绎浮长江黄流徐沛忽中断一麾立
度千余皇干城独坐镇寰宇巍峩天堑雄金汤八年贡篚输上国天子设燕开明堂安危
华夏赖公等张公神物真干将寶弓玉櫛帝三锡雅称大白呈中黄太平无事罢征战绿
芜生戟苔沉枪酒酣耳热壮心发唾壶击碎敲胡床矢锋贯虱总浮诞弓弦落鸟徒夸张
纵观侯射果殊絶饮羽穿札谁低昂吁嗟侯技讵止此弱龄海内传篇章词锋笔阵两挥
霍将坛文苑俱辉煌即今侯年但强仕威棱烨烨传遐荒他时累叶事明圣二十四考追
汾阳麒麟第一镌姓氏万年繁弱流芬芳

南都留赠穀元厚之并寄别文明玉吕静父长方至卿燕孺七子

君不见燕昭王高车大帛招贤良黄金台馆轟天际乐生掉臂来华阳又不见渐离
子白眼酣歌竞睚眦囊无担石那复论手拉荆卿誓生死豪华极目俱荒丘萧萧易水长
东流何人筑宫馆材杰何人击筑追名流先生濩落沧海上蒙茸七尺披羊裘虹霓为竿

月为饵六鳌夜掣珊瑚钩殄霞懒逐赤松卧驭风屡学青莲游长鲸鳞鬣差快意挥斥八极同浮沔狂来拍手惊帝座失足偶堕天南头天南台殿四百八金银观阙连神州一游一月不知返胜槩欲尽仍淹留浮槎遡溟渤泊宅凌沧洲名娃拥骏骑调笑轻王侯遥遥去扬越望望来燕幽长安富儿不解事如山酒肉供俳优长裾不曳朝贵第却来易水聊优游翩翩二仲巧相值片言顿觉平生投雄心总向剧孟吐侠节肯使朱家羞名园爽垲背北郭粲烂珠帘护油幕轩窗屈曲紫莓苔户牖周遭艺兰若炉烟澹宕逐挥洒茗椀清泠恣斟酌绿尊翠杓春茫茫指点明星月西落青丝挈盒游南郊王蔡追随恣欢谑紫髯静父雅好文风雅场中主画诺蹇驴夜入长安城一粲徐卿手重握徐卿意气天下无蚤排闾阖嬉皇都铁冠豸绣等长物玩世翫逐金门徒陈生元方美冠玉雕虫刻鵩酬操觚仓皇七贵招不得为我日写秋山图钱塘散僧尚留发孤山旧社追林逋涑州黄生年最少担簦共入黄公垆一时衣袂把羣彦仰天被发歌呜呜起舞那知夕阳落飞谈直遏行云徂呼卢覆局兴逾锐淋漓身世随屠沽更长漏永列红烛十千醪醴穷清壶人事纷纭百忧集哀乐相乘岂终极别离忽动阳关愁柳色青青遍畿邑丈夫耻学儿女颜万里比邻叶金石吁嗟两生良好仇为我分携泪沾臆君不见昭王台馆屹天际衰草寒烟幕荒墟岂若胡生五亩宫邺苑梁台邁明世又不见渐离击筑徒悲号匣中一掷空铅刀岂若菘生把柔翰崢嶸碣石攀吾曹即今尘霾暗四野吾曹岂是蝇营者卧龙管乐畴贤愚屠狗荆高并潇洒大河冰澌竹箭流燕姬送客临高楼骊驹唱彻渭城畔悲风万壑晨飏飏人生会晤邈河汉功名何物真蜉蝣作歌郑重别二子为我历讯诸同游（时两生送余舟中申旦解维乃别）

少室山房集卷二十七

●钦定四库全书

少室山房集卷二十八

（明）胡应麟 撰

○七言古诗十五首

宋榻兰亭赵文敏临本真迹歌

永和九年岁癸丑典午衣冠尽南走临池崛起王右军万古乾坤落书藪江东胜槩标兰亭轩窗乱迭羣山清流觞曲水修禊事一樽随意酣沉冥道服逍遥坐亭子认是当年会稽史寻山玩水不解愁屡向人前夸乐死含毫是日如有神飞天历历来仙真崢嶸只字启八法快剑长戟剷星辰诸贤词翰尽压倒兴公虺足徒夭矫垂头大令甘罚觥奕叶琅琊传至寶云初智永歷辨才屋梁伏檻丛蒿莱文王百计命萧翼逡巡玉匣沉泉台余子纷纷竞摹勒掌指烟煤半狼藉率更隸几抚硬黄来世争传定武石胜朝妙迹仍浮屠北禅老僧秘若无吴兴转乞独孤本十三跋语题长途穷年两腕追步伐牝牡骊黄较丝发双雕比翼翔太空势极扶摇贯闾阖此■〈弱，左半〉旧榻真宋前五字未损湍流天奚潘墨渾俨如漆澄心素札铺纯绵榻来燕市裹敝篋瞥见寰中眼双热倾囊购得

置案头不减西方贝多叶龙盘凤翥何纷披三百余字字字飞乾坤万古但一帖含毫落笔皆天机吴兴临本推豕嫡中郎虎贲貌如壹谁哉帖尾联王羊展卷狂呼胜和璧古今二絕偕遭逢茆斋气色干长虹将无一夕雷电入六丁下索还鸿蒙沉吟却忆永和世举代清谈误真际虚闻一统俚汉唐大业三途骤凌替犹余八法悬高旻墨池滉漾雄千春汉文唐律遂鼎峙至今免消秦无人腐儒徃徃嗤小技贤劫畴令重晋氏欧虞薛褚匪上乘吴兴入室世无异一觴一咏乐奈何醉来故帖重摩挲恍入山阴坐修竹拍浮流水观群鹅

王元琳伯远帖真迹歌

自从兵入宣和殿晋人真迹世罕见二王之外尤无闻胡乃此帖传王珣四十二字斗奇絕字字精芒射天阙萧疎逸宕转姿态牝牡骀黄半明灭当年宣武称黑头谁其大笔东亭侯至今江左仅兹帖如椽恍忽存风流铮铮伯远隶书谱妙迹宣和旷今古右军大令俱尘埃灵光一柱犹蒿莱九百余年秘云笈暗中神鬼互呵斥何论寶玉与大弓茅斋白日飞长虹

颜鲁公祭侄草歌（有序）

吴兴跋禊帖谓右军书兰亭是已退笔因其势而用之无不如志兹其所以神也今兰亭不可见矣鲁公祭季明文其笔锋退尽者披揽真迹吴兴数语宛然若为兹帖传神惜当时困学斋中何以不令一覩也

渔阳播乱飞黄尘旄头月黑纏妖氛常清血战弃全陝二十四郡虚无人平原鲁公眦双裂一麾猛气雄三军疾呼河北倡忠义普天率土知君臣帝心未灭安史祸杲卿碎舌投天津巢倾卵覆季明死举宗三百遭坑焚乌鸢饱食蝼蚁妬毒痛四海同酸辛鲁公惋愤掩骼骼哭兄哭侄嘘愁云生平正气塞宇宙淋漓一帖犹千春干元元年岁戊戌昊苍有意开斯文摘章吮笔笔欲舞墨池一派流天真肝肠寸寸委波磔纵横■〈足必〉跋超羣伦长风巨浪鼓溟澎泰山乔岳盘嶙峋夭矫虬龙赴幽壑缤纷鸾鹄翔高旻十行遒婉尚含怒五行滄鬱逾生嗔卒章沉痛彻心髓恍疑汲冢窥三坟如椽一扫二百六一言一字皆千钧即令涂抹迥姿态西施倾国加双顰当时鲁公岂匠意精诚烈烈悬风斤相传一草歷元宋太空磊落垂星辰二陈跋语差可玩文家待诏弥津津鲜于困学传累世即今妙迹来江濱凌晨揽诵竖毛发斋头什袭藏家珍君臣大义贯星日矧兹八法尤通神作歌郑重寄仰止墨林万古扬清芬

米南宫误恩帖歌

张颠老死米颠出好手中原斗狂逸南唐寶石作研山三十六峰舞寒碧低头拜石石不语袍笏■〈足曼〉跚笑儿女一朝把换薛公鹤泣向蟾蜍泪如雨兴来刷笔扫孤愤十万材官破坚阵青城侠客挥剑锋夜义飞天云雾中宣尼常笑由也嗔颠也淋漓逞豪健此帖数字亦怒张儿驹泛驾不可当五百年来米颠子絕倒当年颠长史锤王节制安事此（宋人送南宫有名满天下之称或疑米不足当者曰二十年来何处不省有米

颠子耶)

题李龙眠二十七祖图歌

丹青国手吴道玄眼空万古当开元沿流晚季六法尽中兴十指传龙眠何人携此
■〈弱，左半〉佛祖遍罗列马鸣众大士歴歴具颠末袈裟挂膝右肩袒妙相人天俨
对越二十七祖仅九帧十八应真徒耳闻云是吴依利厚值輿图剖析成三分朱门贵戚
万与柳募置斋头数各九兰阴措大■〈才弃〉鼎足尽典商彝鬻汉卣瓦棺寺壁画久
亡僧繇卫陆俱渺茫荆关递得山水趣谁持大笔描空王参差绢素裂强半鱼口横纹欲
糜烂人言画理出唐世远即楞伽近霭瓘即今宋代寧庸工龙眠绘事真人龙诸天帝释
尤冠絶青狮白象行虚空阿难陀下九尊宿一一披图认睂目或眠树底修四禅或坐林
中断五欲或拈圣果庵没罗或把灵花给孤独或看涧壑浮清涟或听岩峦坠飞瀑或从
长爪证縁觉或遇狞牙验调伏或开甘露广法门了了根源绘身毒忆昔李侯盘礴时胸
中壮气横须弥大千世界摄毫翰狂墨乱洒天迷离逡巡群祖真相出虎头金粟争神奇
惜哉贾竖巧垄断吉光片羽犹分持复忆龙眠好画马笔力曹韩较多寡骊黄注想马胎
入足堕泥犁若飘瓦以兹懺悔写佛门丹青焯焯留乾坤香灯高阁互供养天龙八部如
云屯乃知古德真善诲只语单词系成毁祇今名迹六百秋夜夜光芒护神鬼二十七宗
瞥眼过东土祖师来达摩面壁形模竟何以寰中试见龙眠李

题赵千里真逸图歌

吴郎示我真逸图生绡半幅云雾裂高堂挂之夏六月飒飒寒风堕林叶纵横乱瀑
坠高崦千峰万峰路明灭峰回路转天欲尽似有孤亭架木末其下巨石盘长松枫丹栗
黄秋事浓松间讲易三两翁秦时四皓须睂同一翁击阮一坐啸其一恍似东园公斟酌
兹图定谁笔神品铮铮世无匹细看树石用勾法人道王维字摩诘或言近出赵千里往
往抽毫弄金碧呜呼王赵不可作纵复天工繄谁识须臾暝色来朱栏耳边滴滴来飞泉
吾将追逐黄与绮坐占孤亭号角里

题李唐雪山游骑图歌

阴崕冻雪霾乱石谁其画者李唐笔万仞寒山挂翠嶂恍见当时大斧劈何人布裘
裹竹笠欵段婆娑入高壁后有苍头挈双屐太华路南望咫尺欲陟其巔叩拘翼帝座罽
罽俨呼吸十二琼楼众仙集鹤氅缤纷互长揖白昼乘风绕八极我欲从之路昏黑未
满丹台谪来籍策蹇言归故井邑灞陵桥头句堪觅

题赵承旨野岸呼舟图歌

高堂飞瀑十丈寒青山四面浮朱栏绕砌霜枫坠红叶恍忽城居在林樾吴兴画手
真杰特人巧天工擅开辟细看此水与此石非画五日即十日紫衣抱膝坐渡头苍头弛
担遥呼舟清溪万顷隔孤棹隔崦人家落斜照山深树黑径险崎石床天畔云迷离归樵
谷口冉冉入似有柴门挂苍壁标题轴尾了可寻集贤学士孟俯临今古令人叹三絶惜
哉二字遭鼠啮（承旨名为鼠嚙几半）

题黄公望西泠烟霭图歌

大痴老人黄子久涂抹丹青号名手名呼大痴画不痴此图气韵尤淋漓危峯突起
轟霄汉迤迤横冈折层巘其下澄湖八万顷金碧楼台挂天半芙蓉及菡萏艷色何纷披
恍如若耶溪并浴千西施飞鸥明灭傍沙际挟雌抱子羣翔飞第六桥南入灵隐此去南
屏尚多景岳王墓倚金沙滩竺色三天浮髻鬢隔崦人家夕阳落破帽骑驴出东郭寻诗
何处携丝桐美人迟我飞来峰

题黄监柳塘禽鸟图歌

五朝画笔推黄荃徐熙之后昌友前禽鱼花鸟落掌指即今绘事仍流传十亩方塘
浸寒碧高柳繁阴弄斜日夹堤荷叶青连钱翠盖亭亭万妆出蒹葭藻荇翻缟带隐映清
波漾盘石沙头浴鹭拳八九石上双鸥俨相识鱼虾泼刺明镜中迫视浑疑手可拾黄鹂
紫燕语深树点缀精神着颜色临池谁唤王右军池头一白俱鹅羣大鹅仰吭鸣向人小
鹅数十何纷纷天时淑风清气媚野鹭家鸡各求配一雄前引众雌后宿食飞鸣宛成队
嗟嗟荃也得妙理意匠经营入无始挥毫众羽倏生动造化真机在十指尔时徐熙亦化
工两贤相阨悲途穷祇今无论黄监手杂埽赵（阙）

少室山房集卷二十八

●钦定四库全书

少室山房集卷二十九

（明）胡应麟 撰

○七言古诗五首

双剑篇（有序）

少保定远戚公得精铁百炼为二剑一赠少司马汪公一以自佩每相遇则专设一
榻陈之示延津之合焉是秋应麟谒汪公于武林适戚公自燕来会于是二剑复合司马
公出示坐中精彩射人毛发洞鉴真神物也公命作歌辄成一章以纪其事

君不见新都司马公手提三尺驱羣雄文章落笔掩左马出将入相称人龙又不见
山东戚少保结发从军事征讨高牙大纛海岱间南北王庭净如扫两公文武真奇才中
原相遇神徘徊片言握手肝胆合白日莽苍青冥开帝遣将军获精铁铸作纯钩两奇绝
一携自佩一赠公绕夜虹光对明灭相逢则合离则分雄飞雌逐流风霆合如双龙挂宇
宙离如独鹞横秋冥何来胡生客武林蹶两芒屨登龙门长揖将军拜司马瞿然覩此惊
神魂蜃饰蛟装迥奇丽土花半蚀芙蓉膩三秋太白横亘天万丈银河寒压地飞霜喷雪
魑魅愁掣电扬飙神鬼避武林八月天茫茫白波两岸飞钱塘天目东西八万仞势压大
海摩青苍此时双剑坐中合神锋咫尺相低昂纵横壮气摄五岳浩荡精魄回三光将军
百战挺奇节司马百代留余芳丈夫树立固当尔那令异物长潜藏君不见蒙莊周平生
说剑干诸侯穷来斗水不自觅咄嗟文士真蝼螻又不见淮阴侯仗剑从戎追沐猴武士
知几古来少未央落日风飏飏岂若公遭明盛世文武雄才更相济壮烈同标天地间淳

风直挽周秦际东海胡生不自量蚤年侠气飘鱼肠长纓欲系玉门敌寸管拟轶开元章
只今三十尚碌碌尔髮胡短心胡长呜呼两巨公絶代真罕有干将与莫邪世世长共守
灵物由来异人得青萍詎落凡夫手笑杀狂生一蒯緌歌罢无鱼厌奔走谓生且饮勿复
言天生七尺宁徒然剧孟曾倾亚父坐侯芭亦受扬雄玄名山石室岂辽絶会令大业流
青编胡不为公一扫五千字珠光照耀双龙泉渴病年来废书久茂苑西风重搔首寂寞
公孙剑器行一代雄才我何有覩公神物心飞扬醉墨淋漓忘妍丑篇成一笑还自歌错
落寒空堕牛斗倘勒丰城双玉函万古雷张同不朽

蚤春苦雨邦相明府见过留饮斋中竟夕走笔放歌为今雨行并怀燕社诸子（曩
嘗与惟敬惟寅子大裕卿文父汝修集思伯馆有中秋雨集卷）

白龙夜挂钱塘渚两岸嵯峨雪山起狂风忽卷大海流散作东南万家雨兰阴一雨
俄经旬茅斋独卧愁晨昏剥啄何人驻高盖传呼喻侯来扣门喻侯意气天下无结交平
生尽酒徒五载空淹茂陵秩一官再问长安途忆乍停车灞江涘邂逅逢余誓生死词组
平将白雪投雄心真向青冥吐汝自分符出建章余亦携书上帝乡掉头不入金华殿却
忆山中寻石羊风尘道路巧相值宛转兰阴旧相识把臂宁论白璧双酬知顿掷黄金百
人间彩笔何纷纭相看吾汝真忘形乍可经年对叔度那能一饮无公荣蚤春人日差可
赏尘尾玄言豁尘块轻云忽妬上元节穷阴骤入花朝想衡门独掩空莓苔白眼四望青
天摧飞鳧忽报故人至拂衣大笑愁颜开曲径回轩迥幽寂面面雕阑护竒石珠帘十二
清昼垂一尘不到胡生宅博山炉中沉水香兰陵之酒双玉缸蒲团对酌春茫茫居然一
息破万古那知雨色来虚堂漆园无人左迁没屈宋曹刘俱寂寂千言欲起杜陵歌四部
重翻弇州集人生瞬息同埃尘碌碌谁怜身后名日月空悬古今照宇宙不补东南倾何
如雄饮呼大白百川一吸飞长鲸匕首纵横雪花乱唾壶错落浮云惊酒间起舞真态出
元气淋漓袖双湿轻薄何由嗔衿衡磊块政须浇阮籍高山流水尽知己授简含毫仍促
席沉冥不辞真宰怒跌荡犹堪鬼神泣紫气丰城暝不流寒芒婺女纷相射回首华阳夙
昔交十年侠气摩苍霄黎子归耕大庾侧梁生草没罗浮坳刘侯李侯差振翻朱生但乞
夷门食康胡咫尺招不得眼底何人寄肝膈吁嗟吾汝自一时越吟楚调俱称竒飞扬总
让少年贵嘯喏从教行路疑邨侯满架差足乐长孺淮阳岂云薄种秫聊耕彭泽田草玄
絶胜扬雄阁喻明府歌莫悲汝是豫章一男子余亦岂俛首低眉世间士浮荣一代安所
希大业千秋竟谁埃丈夫会合自有神肯将鸾翻随鸡羣孙阳造父一朝值駉駉骅骝双
絶尘歌莫悲喻明府我欲乘云归太清汝但为霖佐真主异日中原共鞭弭肝肠一寸久
相许漏尽银虬雨声歇萧飒如闻二龙语为君作歌聊尔女无论笔落惊风雨折檻行

送沈纯父北上（有序）

余以孟冬过樵李访纯父适纯父将应召北上谓余赋一长歌为赠援笔慷慨得六
百字为折檻行纯父谪戍四载直声动天下故自千秋丈夫而余与纯父谊托久要志存
大业即世俗期望非所宜道故歌辞莽莽直吐胸臆知纯父不鄙余言兼柬同时赵呉艾

邹四君子

北风动地卷霜雪沈子严装候明发白马银鞍走燕市天子召见黄金阙忆昔丁丑年中事呜呼已往难陈说纲常万古忽如线沈子旁观眦双裂三年忍蔑父母爱七尺自与妻儿诀飞书一夜上明主百辟苍皇胆俱怯宫闱动色问忠悃乞得残躯傍南粤茫茫大海天欲尽野魅山魑共生活铜柱频更伏波戍铁衣乱洒羁臣血桃榔叶底托余荫荳蔻枝前赋鷓鴣鬓毛五载凋欲尽意气千钧莽难折离骚熟读引斗酒怒击青萍唾壶缺云雾朝披博罗顶星斗夜摸空同峡归来笑拥绿衣女卢橘杨梅照红颊朝云已去学士还瘴雨蛮烟护荒碣精忠大节岂重覩文藻风流颇顽聩干纲一振壬午岁地辟天开走狐孽征书九道发燕邸尽起龙干布朝列是时沈郎奉明诏长啸扁舟返西浙逡巡故国拜丘垄问寝高堂痛离阔县官日夜戒行李驿使交驰讯车辙男儿肯作里中老直臣更树台端节同时吴赵艾与邹駉駉飞黄并腾踏沈郎讵得终岩穴天上仙查邈河汉腰下刀环耀明月扬鞭再过五陵豪击筑重招蓟门侠蓟门楼殿花三千尚记公交车抱长铗对策明光亦草草敝履短衣行■〈足敝〉■〈足薛〉中原邂逅吾共尔白眼红颜寸衷合诵余连璧心已醉示我郊居思横发苍茫大雪华阳街拂袖徐生馆中别风尘倾盖古则有宇宙论心近谁洽即今汝燕余复越抗手胡能不悲咽沈伯子酌汝蒲萄之美酒系汝珊瑚之寶玦一言贈汝中自知此去中外望掀揭儿童走卒尽道汝凛凛刚肠石与铁腰金拖玉宁汝事义胆忠肝岂虚设三公九列贵易保万姓千秋口难辍重华尚纳大禹戒仲甫亦补周王阙朝多善政禄可殫事有当言檻仍折风云况遇大行日努力群龙树勲业竹帛旗常两光絶一旦抽身蚤林樾丈夫出处须伟烈呜呼丈夫出处须伟烈异日儒生秉鈇钺

长歌行送方翁恬游武夷（有序）

方生翁恬祖太古以隐操著称为诗歌不规规绳墨而天趣自得吴歙间名士多与之游生少即世其家业时时挟策及余门所为寄贈推挹者甚至今秋得余白榆集读之狂叫击楫立为跋数千言余弥愧其獎饰顾自生昌芟之嗜发之余未尝请也爰报以诗

方生尧治太古孙丘壑流风今尚存敝衣掣衿动见肘负气不肯干豪门自言知交遍海宇输肝伏胆惟三人新都汪伯玉兴国吴明卿里中胡元瑞三子者令我寤寐劳心魂丈夫壮志在不朽要今竹帛垂乾坤升堂入室即先达眼底穷通安足论忆汝前年走兴国云梦潇湘眼双碧吴郎跳梁空一世贈汝篇章朗奎璧忆汝去年入新都司马文名天下无如椽立草处士传坐令气色高菰蒲两公声誉冠天下汝得璠玦重增价先生齷齪类楚囚汝何所见何所求方生大笑笑余懒惟我与公交不浅柴门相去十里强溪上时时达鸡犬自君总角才已闻我向何人不道君大苏小陆长在口王后卢前讵足云曹刘李杜亦男子见君敢谓秦无人君或未知我我实深知君君也歌诗遍林樾恍揭大吕悬云门珠玦万斛落警欵世人畴不攀青云胡为靳我无一字如挟九鼎持千钧即今便欲武夷去寸心耿耿当谁陈秋风布袍寒彻骨愿得词组回阳春我闻生言亦大笑过诚

在我不在君不见杜陵赠端复文章有道交有神家鸡野鹜种种好大鹏斥鷃何疎亲醉中狂笔歌赠汝朱弦白日飞梁尘忆生年少气横发世世纶竿受家业学书学剑三十年学得新诗动吴越青鞵半踏天竺雨白纒全骄武林月我谓汝诗胜汝祖汝得余言欲起舞先生片诺岂偶然立榜余名在今古高堂飒沓来寒风绕夜芙蓉电光吐干将莫邪自有灵谁其拂拭华阴土呜呼穷鬼实伺人五亩经营生计阻连年旱魃满山谷赤日横天跨平陆十家九家鬻婴孺生也宁免妻儿哭昼扞甑釜多游尘晓摸瓶罌絕余粟床头魍魎时挪揄屋上鸱鹞多刺促任使喉端喙三尺不博车前薪一束以兹欲作闽中游幔亭峨峨天尽头云璈玉佩纷上界铁船丹灶悬中流一遇灵仙蜕凡骨脱弃妻子如蜉蝣先生较汝穷更甚蹉跎四十谈封侯老亲稚子倏抛掷一身宇宙如悬疣浮名鸡肋果何用百年强半居穷愁作歌赠汝慰汝意仰天长啸风飏飏三山九曲会寻汝竹枝桂棹行夷犹武夷君兮倘相值挟汝烂醉金银楼（病余絕不作长歌生两以书来尧治垂橐而游闽惟藉子大篇以重即子有辞于尧治其曷辞于武夷君噫余懒慢自废若青霞赤城两地主步武间不闻问久矣况武夷君庸暇以苛礼责余惟是生十载之勤缺焉久未报也故歌以慰之并寄询武夷君焉）

二酉山房歌（有序）

弇州王公既为余记二酉山房矣新都汪公复为余作山房书目叙敬赋长歌奉酬凡千字

君不见昆仑高高阆风出其上下视扶桑弱水相去几千丈傍开四百四十门日月东西互相望传闻大酉小酉双名山乃在昆仑阆风二岳之中间帝遣藏书号羣玉金庭石室森钩连白虹璀璨映绡帙朱霞错落垂琅函自从轩辕来宵絕殊人寰灵威丈人过缩足不敢前成周穆满驱八骏蹶电乘风到灵境岚深谷峭黯莫留却携王母升蓬丘祖龙炎威扫六合秦人留书闭空峡至今玉洞开桃花仙源可望不可涉坑灰未冷汉社兴大儿中垒小子云藜然天禄下真宰烂漫七略罗天人阮家居士重搜録蠹简纵横委胸腹湘东再火一不留七万瑶华烬荒籟聚书崛起开皇朝缥囊璠笈摩丹青累累三十七万卷嘉则之殿高岿巍诸儒讎校汰冗杂正本亦止三万饶开元八万最奇絕往往玄珠出岩穴宋时羣主竞好文一日三诏何缤纷后来马郑诸子出摩娑论列亦已勤好武遍中华马上为生涯诗书匪故习文具徒矜夸鸿荒重剖大明域九曜含辉聚东壁天开地辟恢雄风雾涌潢流映朝日吾乡文宪达最先高文大册挥如椽青萝读书四十载钻研法藏窥重玄云间子渊嗜缀辑断简残萤映墙壁成都用修雅好奇索摸科斗成嗔痴南阳陈卿负综博一生惟折五鹿角北海冯君推殫精歌谣委屑烦经营突兀琅琊起文苑力挽頽风究坟典尔雅楼中四万轴金石斋头五千卷须弥磅礴宛委深吐纳宇宙横古今张王陆沉驱左席何因物色来兰阴兰阴胡生负书癖早逐刘郎卧岩石髻年已絕轩冕好壮岁偏耽穷鬼力北走燕台东走吴金陵闽越穷江湖僦居寄庀録余烬负薪织履偿追捕陆则惠施水米芾昏黑忘眠昼忘食乍可休粮饿途路詎肯空囊返乡国二十四

度罗山房二千四万堆琳琅黔娄妻子困欲死君山篋笥富可量上距羲农下昭代触手
牙籤宛相待圣神贤哲穷吁谟帝伯皇王罄元会一榻一几横疎寮一琴一研祛烦器焚
香独拥四部坐南面王乐宁堪骄黎生八分称好手夜宿山斋笑如斗纵观丘索盈前除
大叫狂呼题二酉琅琊作记当代传姓名已覩琬琰悬触目伤心故交尽却寻司马来新
安司马心胸旷千古夙昔图书探天府三坟二雅勤雕镂一笈五车劳缀补太函峨峨云
际开恍入东观窥兰台众中夸我好玄者撑肠拄腹谈天才寂寞萤窗守残雪揽镜苍茫
见华发声华岂必专穷愁著述总知成灭裂侧身六合中自疑异代乾坤未堪说感公国
士知肝肠为公竭幔亭十日饮驱车复成别回看二酉山峻嶒渺天末昆仑阊风定何处
弱水扶桑杳难越底似从公居太函副墨煌煌恣翻阅君不见太函五城十二楼金银城
阙天尽头陶公八翼不得上梯仙岂合凡人留孤帆且返越江滨俛仰竹素聊优游异时
四部读已尽玄关或许停苍虬君不见兰阴下漱水流轮囷古木枝相缪瓮牖绳枢闭荒
径葺门蓬巷悬清秋夜夜红光烛星斗兀兀陈编柳生肘短铗长檠竟何有酰鸡瓮里真
自笑蠹鱼架上安足友竺干本来一物无柱下青牛亦西走函中领取五千言赤脚流沙
寻二酉

少室山房集卷二十九

●钦定四库全书

少室山房集卷三十

（明）胡应麟 撰

○七言古诗四首

白榆歌别司马汪公归婺中（有序）

余入新都再阅月一蒯緌置旅店中而时时幙被从诸酒人游于白岳为日五之一
于丰干为日三之一余日则皆寓太函司马公泊羣从倾倒流连穷极胜赏即平原河朔
讵能什一于兹余濒发复止数四咸以司马公固要期修禊后同过弇园申絮酒之酌既
司马以仲淹故改订暮秋余始前发公轻舫饯送百里执手惓惓且撰记送余东归緌悉
如画固知百世而下有闻风跃然者媿亡以报称大雅爰历叙从公燕游始末为长歌千
五百言先是公有诗招余入白榆社余未及答篇首之兴遂起白榆古歌行贍缚极于骆
氏诸篇今之曼衍殆且倍之要以具载当时词之冗劣弗暇计也

天上何所有历历种白榆光辉烂绛阙照灼青云衢白榆花开银汉傍千枝万叶垂
琳琅干拥西池翳若木根盘东旭凌扶桑何来太乙精骑龙游八荒折花戏闾阖竦身朝
紫皇帝命携青童下界聊徜徉时维乙酉岁元会呈嘉祥长虹百道飞紫阳胃娄奎壁交
寒芒巍然名世降空谷九州岛四海垂文章文园消渴太史腐宇宙何人策高步千秋再
起司马公鼎足中原共驰骛司马当年年甫髫食牛吞虎心雄豪试宰乌伤动当宁立驱
五马行春郊蕞尔倭酋躡中国流血膏原鬻横隰九重拊髀思长城大开幕府罗羣英余
皇乱蹴沧海上只手尽补天南倾伟哉司马文且武左挈夔龙右方虎琅琊兄弟中颀颀

一字凭陵斗今古如椽大笔流风霆落落迥与元化并差肩檀孟走公穀扬班十辈无留
行余事为诗歌格力尤矫絕宵驰厯下军神交大梁侠棱嶒健骨摩苍霄焯如威鳳升岩
堯有时掉臂浣花宅杜陵野夫不得骄岳岳龙门并真宰却向溪头问兰茝怜才意气贯
金石下士声名亘湖海胡生双刺怀十年姓名磨灭甘尘烟参差一泛洞庭棹极目练水
心茫然山阴午夜雪三丈立呼舴艫来新安新安山水何竒哉巨石林立高厓摧奔流溅
沫望不极恍若吕梁悬水三十仞庐山之瀑灑灑之流砰訇触怒争喧厯长年捩舵不遑
息转入危滩势逾急穷幽厯阻到梁下翘首天都倚絕壁天都去天不盈尺云门隐隐云
气入两袖乘天风苍茫踏云中举头见太函疑是轩辕宫轩辕不肯谒却谒司马公公也
倒屣出一笑心神融中厨短丰膳餽鳖羞黄熊玄谈叩无始高论探鸿蒙醉中吐豪气四
坐惊元龙不知天河落盞底但见蓬莱旭日荏苒悬城东城东陌上春风来十里五里桃
花开飘然蓝輦扞崔嵬红霞纷纷落綠苔明眸皓齿临高台恍如瓢笠行天台吴生曼声
振林木谢生悬河笥充腹美人临邛得王四豪士扶风见汪六曲江观涛病色扬龙山落
帽饶清狂山公倒着接■〈屮离〉坐相看一一俱高阳定甕博山焚妙香蒲萄之酿琥
珀光大叫酣眠竹林下下视六合天茫茫大白频挥不知数斗酒宁论百篇富文章乍可
穹壤齐富贵真如草头露拂衣东望生离愁我欲东归公苦留为君且解青貂裘山灵入
梦幽思发单车竟作齐云游齐云■〈山截〉嶻天尽头何年赤县开神州蹊回谷转划
然一窍透混沌香炉紫烟缭绕五城十二昆仑丘憇公无量阁宿公文昌楼羽人跨白鹿
道士骑青牛五老岩岩立霞际环佩高翔隔尘世三姑亭亭若可招蕙裳罗带长飘摇回
瞻巨碣峙寥廓科斗虫鱼籀文剥云是元封封禅碑帝遣神书镇名岳朝辞白岳下暮宿
岩市溪如花六七辈秉烛相招携华灯荧荧夹明月笳鼓煌煌众星列忽看紫气屯关门
走卒儿童竞欢悦曳杖扶天孙徘徊登幔亭周遭列岩岫彩绘飞银屏观者盈道傍叹息
难具陈有如武夷君挥手辞世人幔亭登乍毕还寻上池室浮筏泝空明扬帆弄春碧沙
棠为楫绣幕悬金罍玉瓶置我前百壶荡漾如流泉翠睂蝉鬓纷婣娟觞行乐奏雷电作
回桡转向濠梁泊清沙锦石俨可数细雨斜风亦不恶李姬拂袖拥高浪赵女褰裙映林
薄漫忆岑郎吟溇陂欲效陈思赋河洛昏黑归来兴逾逸玳瑁芙蓉众宾集红牙按拍催
鸾笙紫笋攒箫和龙笛痛饮淋漓将至石主人留髡向西席吁嗟乎今晨何晨夕何夕人
生快意差已极乐极悲来将奈何登山临水哀情多倚风老泪双滂沱公为我楚舞我为
公越歌丰城两神物会合长蹉跎眼前岁月东逝波青青柳色明关河明发牵衣强余住
咫尺芳洲断春树欲行不行行且留未忍匆匆别公去公不见琅琊布衣十日饮琅琊之
人渺何处当时太白配残月此日中流仅孤柱何如片鷁飞严陵生刍洞酌浇吴城白玉
之楼缥缈孤悬大罗上弇州之山五彩之鸟八翼四足仰天矫首而长鸣定知精爽为公
下輜駟杂沓来秋冥旁观客有骑羊者彷彿生平共杯斝如澠之酒迹已陈此臂寧堪少
年把俯仰乾坤但公在磊落肝肠为公寫已从孔祢申末契底事桓文论兴谢愿作灵光
千万年白首同公白榆社

题赵相国斋头中天一柱图

老干凌空舞秋色大泽龙蛇耸千尺何年夸父移昆仑撑拄东南半天碧画师名姓
闻国初郭熙远裔留荆吴平生画松三百本此图卓犖传皇都丈八桑皮白云翥落墨含
毫势生动恍忽秦时大夫五其一飞来挂高栋峻峻皱鬣横崔嵬霜皮何止四十围絶壁
孤悬蔽岩岫太空直上挈云雷松下为谁独箕踞白眼科头坐深树迴疑叔夜挥五弦目
送飞鸿暮来去毕宏韦偃纷难侔生枝秃栝惊凡流笑杀杜陵褐衣破拮据绢素摹青虬
黄扉元老真柱石落落岩廊为时出朝端祇服公旦勤海内浑忘帝尧力念年怀山归梦
长一朝覩此神扬扬纵横丽句洒胸臆如椽巨笔垂琳琅回望兰阴旧松径几欲乘风赴
清荫畴当大厦庇寒饥孰向明堂佐神圣踟蹰且阅三万秋蟠桃岁岁红丹丘八蛮顿颡
九土服剡溪却泛鸱夷舟■〈山截〉嶮芙蓉乱峰紫涌雪餐霞伴周史无劳辟穀追前
人自是重来赤松子

赵侯汝申以学术兴起一方怜才下善闾邑推其长者兹以七贤图属余赋之倘亦有王阮忘年之意乎敬题短歌

赵侯歎我城南屋堂上高悬画一幅是时六月凉飏生万个琅玕照新筑衣冠不类
河朔豪船舫曾非剡溪曲细看乃是晋诸贤醉倚长林弄修竹疎枝的皪横潇湘密叶珑
葱卷淇澳珠帘粉阁坐相对尽日明窗看不足彷彿当时六七公持螯白眼横霜空脱巾
露顶挂石壁仰天大笑来清风匆匆典午事难说烟尘瀕洞盈寰中此时不醉欲何事眼
看浮世真虚空步兵睨树啸声发浚仲清言宛如屑子期鼓鞞仍著书伶也携壶更荷锄
阮生拨阮嵇生弦目送飞鸿游太玄就中山公最长者百觚在手情頽然南阳赵侯世希
有满腹珠玑贯牛斗偷桃偶堕方朔縁谪向人间卧岩藪生平饮酒但数巡座中宾客长
千人何人把赠周昉画跃然对我融心神胡生晚得酒中趣跋扈飞扬有深意一朝覩此
形貌亲恍若诸贤把余臂为君作歌还赠君生绡落笔飞玄云何时买断箕筓谷共作林
中避世人

偃卧俞公临榻上戏题

俞郎一榻长安市破衲蒙茸裹布被狂来坦腹呼元龙蹴蹋星辰动天地华胥国小
安足游君家赤舄双琳球大鹏希有俨相值飞行八极眠琼楼

少室山房集卷三十

●钦定四库全书

少室山房集卷三十一

（明）胡应麟 撰

○五言律诗八十一首

西山十咏同陈沈二太史黎秘书杨祠部丘计部李环卫朱光禄安茂才童康邓朱
四山人作

晚至碧云寺

梵刹金银布花香绕碧栏断崖交松柏飞瀑洒琅玕霞起天台暮云生岳麓寒钟声似迎客时出远林端

香山寺饭初上人禅院

梵阁千寻起瑠坛一径斜僧归迷翠巘客至扫青霞竹里分香积松间转法华遥看层砌上缥缈堕天花

玉泉

飞流望不极缥缈挂长川天际银河落峰头玉井莲波光迴太液云气引甘泉更上遗宫顶千林起夕烟

功德寺望景陵

宣皇游幸日千骑转晴沙殿绕骊山树窻开绣岭花星辰留御辇云雾锁仙槎北望龙蟠气飘飘想翠华

登碧霞宫阁

槛立孤峰上窻开万岭西霞光流紫极日影抱丹梯绮树三春长金芝五色齐蓬莱宫殿里笙鹤旧曾携

玄贞观

万山苍翠合流水晚潇潇雾里瑶台出云中絳节朝桃花开绝涧松影落层霄时听羣仙度天风引玉箫

秋日同诸子登望湖亭

殿隐芙蓉外亭开薜荔中山光寒带雨湖色净连空作赋携词客行歌伴钓翁夕阳沙浦远北雁起秋风

小憩圆通寺题

说法闻初地题名到上方砌幽松子落林远叶声长夜雪飘山磬秋云洒石床坐来千嶂里岚翠满衣裳

洪光寺听真上人诵经作

地入空王宇山藏释子筵白云流五岳青壁俯诸天象外烟花丽空中色界悬为将忘世念一诵法华篇

宿翠岩寺

晨风遥策杖夕露几沾衣礼佛青山塔逢僧白石扉悬萝山鸟集亚竹水萤飞为爱西窻宿泉声出翠微

仲秋同祝鸣皋诸文学再游西山得诗四首天

寿山谒诸陵

紫殿衣冠肃玄宫剑玺遥天回羣后集地迴百灵朝文字垂羲画声歌咽帝韶万年沾洒处寒雨动青霄

湖上

积水湖天合泠泠帝阙西逶迤云色净掩映日华低凤吹临高岸龙舟出大堤桃花源咫尺洞口夕闻鸡

游玄真观

积翠三天迥飞梁百尺横星河浮玉砌云雾揽金茎羽客青泥饭仙人赤石英何年生羽翼尘外访蓬瀛

携尊翠微阁晚坐

振锡千林暮移尊片月秋不辞青嶂远聊共白云游洗钵花台静悬灯竹径幽朝来挈小朗乞食向牛头

答李惟寅病中见寄

岂是趋朝懒风尘损壮颜闭门芳草合高枕白云闲柳色溪南棹莺声郭外山遥怜作赋客魂梦屡跻扳

题朱山人汝修卷

石磴烟云起仙源费独寻碧山玄晏宅沧海尚平心岁月留斑管阳春抱玉琴几年嵩洛思倏尔一开襟

丘谦之招游崇善寺分得云字

竹院名香起花台积翠分双松寒挂雪一榻晚生云画想沧洲迹经传白马文平生许玄度何事恋人羣

康裕卿山人移居

燃桂生涯尽飞蓬旅迹多地偏余水石乡远隔闕河夜帐悲猿鹤春山怨薜萝萧条剡溪宅风雪近谁过

送人还秣陵

献书辞北阙仗剑出西京落日沧江远孤帆万里征烟霞淮口寺风雨石头城别后相思处闕山候雁鸣

春日送人之剑南二首

大泽冰初解长途雪正晴孤帆送尔去千里独含情竹翳湘妃馆花明蜀帝城当垆人好在不浅旧逢迎

蜀道难犹乍湘潭去若何青天浮灩灩白雪涌岷峨宅问扬雄隐堂携杜甫过锦官城外路翠柏几婆娑

送吴广文之岭南

寂寞青毡地何当事远游问人还剑浦寻雪上罗浮海岸飞花尽蛮天落木愁粤台时眺览万里见高秋

渡江望金陵宫阙四首

望望吴天迢迢越客来万山京口立孤舶海门开蜃喻风雷起龙吟日月回凤城回首处佳气满蓬莱

上国堪萍梗长江动旅愁天浮扬子树日照广陵舟
浪鼃鼃语飞空蜃鳄游五云看咫尺台殿拥神州

绀宇三山近皇畿万堞遥云藏佳丽国地拱圣明朝
玉辇扶双凤金瓯奠六鳌秦淮今夜月愁倚木兰桡

摇落江天上秋风度李膺来槎真汗漫击楫岂飞腾
紫气扶天阙明霞拱孝陵钟山旧游地梦绕白云层

金山

兀立江心寺芙蓉万古看孤峰留杖锡絶峽锁阑干
碧涌高天浪青浮大海澜妙高台上客日暮转盘桓

焦山

何年云雾里卧此少微星地拥幽人宅天藏处士灵
一峰齐北固双井象中泠向暮风涛起谁寻瘞鹤铭

夜同裕卿话旧

万里相逢日那能不黯然移家当暮雪行乞傍寒烟
赋岂三都后心犹五岳前向来溪水曲频系子猷船

答文父见懷之作

不见江西客相望鬢欲丝十年沧海梦千里碧云思
寥廓南华论飞扬左尉辞但令龙剑合那复问雄雌

红云坞

几夜瑶台上移来十亩春笼烟千树密照水万花新
环佩堪留阮衣冠不避秦扁舟如可再长此谢迷津

病中文父过访兼携近作见示二首

岂谓伊人至能令倦客狂千秋谁陆谢一径且求羊
夜色青藜短秋声白苾长朝来还奏赋不拟步长杨

遥遥风雪里对语欲忘眠尔擅游梁赋余惭入洛年
天浮鵙鹊影城绕鳳凰烟何限金茎色相期汉苑前

闻大参滕公擢任岭南有寄二首

鼓角炎荒外旌旗大海傍九霄悬宠渥万里倚翱翔
郡古罗浮雪天空粤峽霜祇因将雨露沾洒尽扶桑

五岭看乘传千峯引佩刀春随南极迴云拥太微高
雾鳄先移瘴溟鲸已息涛独怜呉越士泪满别时袍

送刘從事之成都

翩翩游客旆去指蜀门斜夜宿巫山雨朝行剑阁霞
古碑丞相庙蔓草拾遗家驛路留题满频将寄海涯

寄沈山人嘉则二首

异代看黄绮明时更许巢乾坤长作客湖海半论交卧忆鲲鹏起吟従蝮蜒嘲玄亭
竒字遍吾梦亦衡茅

四海闻高适中林得阮咸岳云依短屐山雪洒长镵梦断真千里书空漫百函何当
明月夜一试剡溪帆（向计偕闻嘉则以诗寄余未获）

寄李本宁督学二首

自失华阳社长懷渭水濱传闻秦博士犹借汉词臣弦诵千花色檐帷万柳尘若过
中垒宅藜火定谁亲

闻道三秦使烟花夹道看天高扞太华日近倚长安散吏趋经幄诸生侍讲坛上林
应有赋时寄五云端

寄汪仲淹伯仲

二仲何为者翩翩邺下流白云裁楚服明月揽吴钩并握扬雄草长陪谢傅游碧山
空咫尺魂梦使人愁

寄汪献于

自返金陵客何方定卜居七哀应着咏孤愤蚤成书卧榻芙蓉在衡门薜荔余碧云
懷望久一帐剡溪鱼

过吴门不及访弇州王公寄懷十首

屈指中原业谁登大将台千秋王粲起一代子长来日遠龙楼梦天留兔苑才吴闾
云雾里相望首重回

逸驾开元上雄风正始邻云霄谁北斗天地此阳春作赋三都客传诗四海人未应
双剑老雷电起延津

谕蜀传司马还吴忆士龙万峯吟薜荔一径把芙蓉月落干将倚云飘太乙従异时
成握手白眼坐高春

渺邈违芝宇风流忆草堂蓝田聊卜筑绿埜暂浮觞日避长庚色天回大酉藏十年
翹首地葭莩倍苍苍

虎观才俱屈鸡林望转高千言无彩笔片诺有绋袍梦隔蓬丘树吟残阆苑桃何年
携手遂相对咏离骚

曳杖辞三岛投簪傍五湖九丘穷倚相词组失潜夫鹤唳天门遠鹏抔海色孤近来
秋兴剧散发卧菰芦

日月回真想乾坤入梦游晓风吴苑屐寒雨石湖舟匣底双龙卧毫端万象愁亦知
三径好咫尺负羊求

贝锦看如昨牛衣卧转深洞庭寒濯足林屋遠论心落日天边气浮云海上吟吴王
台北望作者自如林

此日云门笠平生汉殿冠一时谁把袂万古独登坛岳色崢峒晓河流砥柱寒尚思

燕北社风雨动长安

帝惜悬车蚤人看杖钺雄青山郟子国白雪楚王宫杜甫名差着灵均曲未工岷台遗迹在千古擅流风

寄张茂才

闻道安仁鬓秋风半欲华青囊犹隐市白帽屡移家竺色三天雨湖光万岫霞绝怜挥袂日相对武林花

赠颛上人

几岁游天姥经秋住越台万山灵隐锡斜日海门杯出定逢花雨传灯悟劫灰何因偕尔去结宇卧飞来

送周少叅督饷还楚

万舸通淮泗双旌傍海涯筹边王相国经世贾长沙雾拥春皋佩云停野庙花遥看下车日题咏遍章华

哭童山人子鸣二首

海岳谁高蹈丘园有独醒下帷头自白避俗眼长青日惨延州碣风寒郑圃灵夜台人近远徙倚少微星

石户真高隐云卿此后先一家犹紫阁万恨已黄泉禅岳无遗草葳山有太玄向来携手地凄绝子期弦

寄戚总戎

闻道嫖姚将提兵大漠间旌旗行汉壁鼓吹出秦关白日双鹞下黄云万骑闲时同投笔吏乘胜过天山

怀欧桢伯博士

藉甚中原誉浮沈异代踪青衿聊宦辙绛帐自儒宗冷日华阳筑高天汉殿钟祇园春草外犹记昔相逢

送王山人游秦中

斗酒山城暮东风怅别离天青游华日地紫入关时博望千年苑昆明万古池平生飞动兴合遣杖藜知

送张茂才北上

烨烨张公子乘轺意气新万言看谒帝千里独宁亲柳折长安暮花吟太液春寄言关外吏能识弃繻人

夏日同诸子宴郭鸿胪池亭分韵得凉字

背日山堂午含风石径凉闲来松桂下各把芰荷觞地称南州隐天容北海狂坐深渔唱发白眼对沧浪

寄徐大叅

西署初迴辙南天复拥符飞刍传九塞转饷出三吴海色摇冠佩江云照舳舻不堪

携手梦明月洞庭孤

秋日送陈山人还江右赋得庐山瀑布水

万丈庐山瀑经行照客衣昼看银海立晴望玉虹飞激浪回丹壑分流出翠微凭谁
唤匡续一酌共忘机

寄方山人

忆尔辞家久秋高客况增帆当鄱水挂屐遍楚山登夜宿随沙鸟朝吟伴岳僧九疑
风雪外何处吊黄陵

送艾都阃督饷淮上

九边乌挽急飞将岂辞劳独坐黄龙舸长驱白鹭涛江花明绣箴海日拥征袍横槊
风流在遥天伫彩毫

赠弘上人

昔事崔罗什今逢帛道猷存思驯象下漱齿毒龙愁衲绽三天雪杯悬万里流吴中
四百寺烟雨遍曾游

送天台二僧还西域

挂锡同霞峤归帆并海涯云侵秦碛远路转蜀台斜翠竹空中相青莲定里花谁知
双大士持钵渡流沙

奉寄王江州六首

绝胜匡庐郡分曹颺岁年高牙三楚外巨舳九江前日抱香炉上天齐瀑布悬东林
秋咫尺一问远公禅

桒戟开雄镇旌旗列上游猿声千嶂色雁影万峰秋散佚聊公事褰帷即胜游祇应
明月夜长啸庾公楼

岂为干城驻能将一壑专郡僚携白傅地主借青莲岳色含杯堕江流卧榻悬转看
牛斗近双照莫耶前

极目登高处淹留汉大夫万家南斗近千里北辰孤虎豹分流徙鱼龙夹岸呼可容
王勃赋今古擅洪都

但觉官曹胜宁知吏牒饶白云匡岭树红日海门潮酒送陶公醉诗酬谢客招那能
望乡日不过虎溪桥

飞动征西节分违蓟北盟词人空碣石才子颺江城彩笔千秋价绋袍一代情向来
挥手地忍忆去帆平

寄华亭吴少府

伊昔回车日囊空但一钱乞身三泖地垂泪五湖天养鹤重开径烹鲈独扣舷茂陵
余亦病忆尔思茫然

题松

离离摇碧涧落落俯苍郊拔地虬龙偃中天鹤鹤巢涛声寒月上野色乱云交寂寞

徂徠顶秦封只浪嘲

徐方伯子与将之江右过访有赠二首

岂谓看山地能令结驷来人非中散卧客是伟长才把袂淹萝薜行觞藉草莱夜中占紫气云拥豫章台

弭节过严濑褰帷问楚皋北风千骑发南斗片鸿高抚字声先着登临思独豪万年滕阁赋行矣待抽毫

送寿山人

飘然沧海客曾事紫阳君袖里黄庭字囊中赤伏文放舲三泖月携杖九峯云后夜华亭梦应同鹤唳闻

寄李季宣二首

葢忆曾倾地榼移远别年千花淮浦浪独树海门烟白苧吴郎曲青娥楚客筵广陵桥上月相望几婵娟

最忆真州夜临岐解鹈鹕江风停去鷁海月伴离装柳谢君平曲花饶杜牧狂吴姬三百辈若个擅平康

少室山房集卷三十一

●钦定四库全书

少室山房集卷三十二

（明）胡应麟 撰

五言律诗七十七首

○徐铨部过访不值二首

何因藜桂下驷马值仙郎日驻金珂影星流玉剑光登龙余顾盼题凤愧行藏仁聪东山起含香入建章

传呼鸾掖吏来访鹿门樵曲径俄双屐空山祇一瓢白云寒自倚紫气暮谁招好去蓬莱殿千花待汉轺

游横山庵

白马何年到名山敞梵筵坛空诸佛下洞古一僧禅钵与龙俱卧灯将虎并传真如祇自得谁为问青莲

寄陆太史敬承二首

濩落吾能返飞腾尔故频自为三馆客谁共五陵春白日流金掌红云护玉宸故园芳草外曾否念垂纶

尔作承明客吾归已判年花香鸾掖底柳色凤池前醉任眠中秘闲仍草太玄燕姬无限好犹记琵琶弦

哭唐太常二首

乍辍金华讲长投海岸簪中涓谁冀北太史竟周南禊道黄泉启闕门紫气含平生

携手客泪尽百花潭

祇谓焚鱼卧真成跨鹤游千秋谁挂剑万事已藏舟夜壑星辰远重泉日月愁独将
知己泪恸哭洒西州

送王大行使岭外

迢递双旌色朝行大海东天垂鹏翼尽日照蜃楼空玉节诸番卫金函万国同归来
铜柱畔题赋尉陀宫

荅汪茂才

尺素天俱远芳尊日蹙同自懷和氏璧谁问楚王弓昼卧苍龙偃宵谈白马雄青云
太史在宁复念途穷

夏日同诸子登望衢亭作呈赵明府

剧兴真飞动层台半斗牛天空疑不夏地迴欲生秋峡色双龙抱山形万马留异时
懷赋客吾岂仲宣俦

李生西游久不得问因寄

西游去何日念尔独离羣履绽秦山雪筇飞蜀岭云乡心寒狄落客思夜鸿闻记取
岷中事南归报右军

送赵太史之岭南五首

一麾辞禁阙万里赴长沙地入蛮王垒天浮汉使槎乱山梅岭树絕徼夜郎花永夜
罗浮顶谁同眺日华

贾傅章纔上王褒命已传飞霜随剑舄大海傍楼船客梦梅花里乡谣桂酒前坐看
公府暇白雪满南天

献纳纒青琐驱驰恋紫宸珠厓百蛮路铜柱九夷春郡邑横天起旌旗截海陈祇应
宣室夜万里召孤臣

豸服层霄下麟符夹道光万峯行瘴色独马度炎荒暮雪秦關拥春城粤海长转将
金掌露移洒向扶桑

蹇辍兰台讲言乘桂水桡牙旌驰絕域绣斧出中朝瘴压高凉晚山通大宛遥莫嫌
文字癖干羽徧三苗

送何山人游边

悠然尊酒别秣马问渔阳汉碛连天紫边沙拥日黄列营随骠骑分险驻龙骧会挟
金城策长纓请建章

送人还桐庐

不遶桐江路归帆候月牵赤霞晨际海青壁午连天鸟道從人问猿声傍客悬钓台
千尺倚谁伴子陵眠

送人入蜀

客畏蚕蒙路君仍驷马过白波三峡满青嶂九疑多絕栈移旌节层台梦绮罗海棠

花眼烂漫倚高歌

秋晚灵隐寺小憩

咫尺东林寺栏干不厌凭万山回卓锡一水护传灯梵室偕龙树经坛接惠能上方
钟磬发晚傍白云登

送李逸人西游

一骑西游远双鸿北望饶雪深眠太白云起问中条汉磧名偏古秦碑字半销已无
婚嫁累何地不渔樵

方伯滕公由岭南过访不值二首

翩翩岩穴畔千骑远徙东剑履周方伯轩轳汉上公花看薇省近竹讶草堂空万古
夷门道谁论意气雄

小队行春日华镳问俗时孤亭留卓盖万户拥朱旗气色函关绕星辰汉殿移未应
题凤字曾受子云奇

壬午秋以家君命北上舟过严光先生祠戏作

不向长安去何人奏客星物情违偃蹇吾道寄飘零大泽寒收钓高天暮放舲羊裘
谒明主归卧万峯青

舟次樵李寄王承父山人

痴绝王摩诘何时出辋川迷花孤洞里采药乱峰前剧饮留真态长斋断俗缘虎头
新使者曾乞卖文钱

再游焦山

尺地开龙象遥江浸画图排云千寺立涌雾一亭孤叠岭藏钟磬中峰过舳舻凭谁
买山色把钓作潜夫

夜宿金山作

叠浪天浮玉中流地布金寺围孤岛面亭插万波心日候晨钟出潮将夜梵沈妙高
寒独上风雨过龙吟

金陵杂诗二十首

宛洛飞龙地岐丰下凤年河山西控蜀象纬北朝燕玉殿凌霄出金城截海悬嵯峨
帝京色万古镇江天

宝鼎成周奠灵符大夏开日当濠水上云傍孝陵来百辟瞻黄屋千灵扈绛台时看
青琐客鸣玉凤池回

虎豹天都近鱼龙地轴闲穿壕瓜步水锁岸秣陵山上苑明冠盖新亭集佩环徘徊
承露掌百尺暮云间

帝阙三秋到人烟四望平城闾盘海气市井杂江声翠管吴讴发牙樯越舶行未央
宫万户恍忽见蓬瀛

禁苑花如织离宫树作行虹桥悬太液凤管集昭阳日丽雕甍动云穿碧槛藏翠华

双掩映犹记六龙翔

画戟三千队瑠戈十二营貔貅严左翼熊虎列前旌草木环滁动蒹葭到海平越裳
重译至何事问长缨

树色东华远钟声大内开红云长乐观紫雾柏梁台帝座罍罍拥僊城睥睨回蒋山
青不断百里挂崔嵬

画槛排空立飞甍逐望低观危鹄鹄度台古凤凰栖海日千门上江云万堞齐大堤
杨柳色仿佛旧乌啼

巷陌连松桂园亭翳薜萝人家王谢旧佛寺晋梁多北固晨钟断西陵夜舶过紫骝
浑欲住无奈客愁何

大道开平乐名姝傍狭斜黄鹂交坐柳白马竞穿花翠箔通云气珠帘上月华画梁
双燕子遥认莫愁家

玄武湖边路西风载酒行中流葳蕤灏灏叠岛象昆明落日喧沙雁回风动石鲸楼船
三十万犹记汉皇营

胜绝南朝地淹留北上程石城看虎踞萧寺听鸡鸣岫锁吴云暗江飞蜀雪明诘朝
关外路真作弃繻行

寂寞空三殿豪华记六朝齐梁频禅代支许竞招要只字神飞动千言思沆寥昔人
吾倘遇玉尘向谁骄

杰阁凭虚上回瞻帝阙西城开千巷陌刹涌万招提灵谷青松合钟山碧树齐朝来
渡江去击楫为闻鸡

落日长干道青丝照玉壶碧桃双系马绿柳半藏乌濩落堪词客飞扬问酒徒縱邀
金谷侣长夜斗擗蒲

袞袞牛头路青山极望同天开吴楚地寺锁晋隋宫宿雾萦窻白朝霞出户红异时
飞锡到阐化大江东

句曲山中树华阳洞口云玉楼千地涌金铎四天闻老鹤传丹诀乖龙护赤文五芝
容客采长揖大茅君

结绮夸前代临春忆大家清歌传寶瑟丽藻掷瑶华殿倚千门月楼飘万井霞即今
商女恨凄绝后庭花

屈指前朝事悲凉旧迹存金甌长日月玉殿自朝昏野雀栖朱桁啼乌过白门柳花
香满店愁绝送王孙

献赋趋鸾掖题诗寄凤台自呼狂客饮谁问谪仙才步忆金莲下歌听玉树回三山
吾欲去万仞卧蓬莱

欧水部招同张太学刘大理顾司勳夜集徐园迟李临淮不至同用心字二首

华馆夜沉沉追随愜素心佩环三署合灯火万家深白苧翻吴曲青萍动越吟征西
期不至愁绝露华侵

名园仍北郭小径入东林地忆先皇赐天回上客吟当尊荷芰色满座薜萝心冉冉
长安月飞光下翠岑

区用孺以端研见贻索余一诗为报

邂逅罗浮客论心卫水傍红丝劳把赠青玉烂生光偃月窥芸案涵星动草堂输他
阿环丽捧立在昭阳

哭黎惟敬秘书四首

此日朱明洞谁同对浊醪宦途穷执戟人代绝抽毫鸡犬闻天路鱼龙泣海涛传家
大令在忍覩凤凰毛

骤得天涯讷真成地下游罗浮残月堕碣石断虹留惨淡青黎阁嵯峨白玉楼梅花
一万树何处挂吴钩

石室瑶华閤泉台玉树遥神游今八极宦迹旧三朝客竞传中论人谁赋大招那堪
潞河望风色暮萧萧

邂逅为玄日踟蹰射策年飞觥桃叶下授简竹林前调已中华绝名应大海传乱山
铜柱外若个是新阡

寄观察金公

按部双旌远行边一剑雄图书观鲁殿谣颂采齐风泰岱浮空紫蓬莱上日红登临
时极目作赋许谁同

秋日湖莊八首

幽栖只数椽野水十家连静室长生白闲亭独草玄蒹葭湖北路禾黍郭西田理就
沧浪曲吴歌日扣舷

湖阔疑青草原荒近赤松微名藏一壑大业寄千峰户牖岚光满阶除露气浓楼高
纔十尺莫拟卧元龙

素发垂垂近青阳去去多霜檐飘橡栗雨壁上藤萝越女红莲棹吴侬白苧歌悠然
车马绝曳杖步山阿

野色看逾近秋光澹欲无凄风回大壑骤雨入平湖碧树通樵径丹枫系钓舫江东
步兵后潇洒见吾徒

六尺鸱夷舫萧然系短篙乱山明隔垞积雨暗空陂身世鸱鸪老行藏雁鹭知五湖
秋万斛点缀着西施

大野黄云熟平湖白露凉菰芦环笠泽薜荔翳柴桑落雁啼沙汭流萤度石房寒花
缀篱落作意近重阳

穷巷回车辙柴门尽日幽杜陵歌大厦玄德卧高楼地许鳧鹭占天容鹿豕游虞卿
懒成癖点笔为春秋

此日游仙梦当时结客情玉绳鸚鵡观金钥凤凰城白眼长安卧红颜上国行十年
湖海气踈阔傍柴荆

送萧司空之南都四首

剑履新南国旌旗旧朔方一麾移细柳万舸静扶桑虎豹军容肃麒麟帝眷长异时
书太史宁复论平阳

灿烂熊车度逶迤鳳阙来戈鋌千埃列鹵簿百城开日近司空座星移上将台大廷
推相国谁并鄴侯才

组练过呉会衣冠入汉宫日光摇画戟霞色射彤弓渤海三秋静潢池四望空未应
劳梦卜天意属非熊

鼓吹出江皋前驱意气豪射潮収万弩横海列千舸日月瞻黄屋云霞护锦袍秣陵
花似绮烂漫待抽毫

赠赵茂才

言开绿萝径却访赤松游枕簟依山僻琴书入洞幽姓名文苑客身世醉乡侯莫羨
侯芭业玄亭易白头

李逸人西游寄讯

一壑容高卧频年赋远游卜居秦望顶长啸越台秋海日低龙屨山风绽鹿裘钱塘
潮渐长午夜放扁舟

秋日题唐惟良山房二首

郭外千峯色翛然墮草堂挂冠三径蚤高枕一丘长夕露团幽砌朝霞宿画廊门添
五杨柳何异在柴桑

结宇双松下为园万竹中壮年歌老骥长日送飞鸿露浥琴丝润星摇剑色雄看余
五游毕絶顶卧空同

寄灌父

怅望西亭客沈吟北海筵玉笙王屋顶珠履邨台前桂树先秋发藜灯入夜悬异时
双鹤语归问大罗天

懷邓孺孝兼讯周山人

忆汝龙门过苍茫鹤驭分暮归句曲洞晨谒大茆君把钓呉江雪传书越海云草堂
人独卧谁勒稚圭文

呉叔通以四诗见贻赋答

寂寞乾坤事归来一敝裘云山成独卧海岱见名流璧已三年抱珠仍万里投白苹
洲上路曾试木兰舟

何处懷同调飞书问独醒乍回双眼白犹阻万峰青惨淡垂纶石栖迟载酒亭异时
新论就能赏太玄经

病肺荒园外潜身大海傍青阳驰翰墨白雪照行藏一水兰苕近千岩薜荔长夜来
星斗色明灭傍干将

梦寐延陵客风流故不羣千秋曾和雪词组欲凌云柳隔青丝笮花生白练裙浮家

何日事来往雪溪云

少室山房集卷三十二

●钦定四库全书

少室山房集卷三十三

（明）胡应麟 撰

○五言律诗七十八首

句曲道中奉懷王司马先生寄讯八首

帝梦思良弼天书问老臣彤弓分雨露赤舄上星辰虎豹千营合熊罴百卫陈何妨
文武畧第一画麒麟

夙世元戎业明时上将材大开貔虎幕长啸凤凰台记室班扬聚胡床陆谢陪昨宵
江上笛飞尽帝城梅

鳳德元千仞熊飞自一时河山分玉帐日月绕牙旗错落霜毫动荧煌露布驰共知
莘野出宁畏草堂移

鬪辞三教主聊作万夫雄横槊长江上挥毫大海东阴徐非赋侣鲍庾岂文工晋宋
齐梁业何人不下风

谭天曾帝问缩地旧仙才未论青牛出真成彩鳳来毫端穷宇宙匣底閤风雷戏作
梁陈句犹堪长玉台

寂寞千秋事踟蹰六代间新亭新日月旧馆旧河山柳色停车骑花香杂佩环吴姬
年尚少劝客亦酡颜

豪华非昔日罗绮尚前朝侠少黄金勒名姝赤玉箫花明新院髻柳学故宫腰今夜
扬州月平分十二桥

石头城外路光色度青骢说法寻支遁叅禅叩懒融塔花晴日映潭影暮天空拟逐
三车去西方问大雄

渡江有懷秣陵旧游八首再寄王长公

六代风流地豪吟兴未涯层台花宿鳳故堞柳藏鸦海日笼丹雾江天照绮霞春光
何太蚤先到莫愁家

投闲沧海上阅胜大江濱老树齐梁雪飞蓬楚蜀云帝城双鳳下官路八驂分怅望
前朝事含杯几夕曛

金波怜旧句玉树待新题夜宿寻高座春游出大堤残僧留晋宋古佛辨隋齐明日
楼船上谁同教水犀

由来佳丽地本是帝王州綠浪邀卢女青山抱蒋侯桃花双阙路柳色万家楼摠道
官如屣那知宦是游

幕府三千客辕门十万兵登龙环海岱候骑半江城画甲飘云气珠帘上月明夜来
清啸发双鹤下瑶京

玉洞留仙棹金陵问帝都野花朱桁雀霜树白门乌晏寝团牙戟宵吟击唾壶能教
竒伟客白首卧菰芦

青鞋曾碧落彩仗乍丹霞大雅追三代雄风扫六朝帆檣扬子驿鹵簿秣陵桥但作
文章客宁知武畧饶

柱下书堪着壶中术已传三花留埜寺一苇渡江天浪息沧溟外尘消大漠前何须
片石上辛苦勒燕然

病卧原口长公以诗见存遂有起色赋谢四章

骨立乾坤外呻吟岁月过片言回大造孤榻起沈疴骤觉头风愈宁论肺病多观涛
定何日飞棹广陵波

病卧空搔首文成剧赏心乍回燕客梦初理越人吟白雪流空馆青阳动絶琴片言
千古在底事论飞沈

一札长千里悠然病目开詎知垂烬烛犹作复然灰赵璧初还邸燕金任筑台朝来
沧海上咫尺见蓬莱

无媒宁逐鹿有路任亡羊朗诵陈琳檄高悬杜甫章神明开混沌鬼魅失膏肓溘落
余生在犹堪王夜郎

渡淮

拂曙淮堤上垂杨渐可攀雾浓孤客舫云浅八公山不作投珠去真成抱玉还十年
牛马走端合鬢毛斑

自严滩至新安途中纪兴十首呈司马汪公

四百滩头路峯峦面面青路疑行絶栈滩似泊空舫平地飞千瀑高天突万星不因
司马在吾岂别玄亭

一滩高一丈滩尽到天都叠嶂云飞动阴厓日有无辛夷残紫落踣躅乱红敷独少
行云庙分明入峡途

明发寒逾甚羊裘当锦袍争风帆力猛破雪槽声豪閤谷迷红树悬厓露碧桃居然
丘壑底不用武陵逃

悬水三千仞奔流落大川片帆危欲堕羣缆急争先石险时栖鹞峯高欲跼鸢兹游
信竒絶点笔漫成篇

树色透迤合山光次第来岸疑夸父坼厓似巨灵开蜀客迷三峡闽人话七台移舟
傍鸥鹭此夕漫惊猜

嵯峨探虎穴■〈穴上叫下〉窳入龙宫百丈飞湍下双篙巨石中地危真破冢天
近欲乘风恰称诗懷壮长歌万虑空

密缆纷如织高檣望若攢怒涛翻絶壑飞浪叠层峦不雨青天润无风白日寒苍松
植何代百尺架■〈山赞〉岏

片石俱飞动千山竞送迎地真游黯淡天似入蓬瀛缆东高厓度檣穿絶壁行谁呼

谪仙至白日跨长鲸

白岳新游快青溪旧迹存乱山冲虎过奇石象狮蹲贾舶环枫社渔梁护萁门飞鸿
渺天末消息信乾坤

十年懷命驾千里棹孤航大壑行严濑飞流涉吕梁猿猱晨作伴豺虎夜成行咫尺
龙门在无劳叹望洋

惊猿峡

不见啼猿树孤峰划翠屏峭逾扞太华危欲堕中泠鸟道悬空阔龙潭伏杳冥笑他
韩吏部勒石向山灵

伏虎岩

何年飞灏灏百尺挂崔嵬絕壁盘飞电高梁划迅雷樯危三老惧缆急万人摧日暮
雄心发狂歌兴未回

古意

鸣鞭白门道新柳正葳蕤七寶装繁弱千金散狭斜飞扬孟公座调笑季伦家夜夜
双龙气腰间挂赤霞

東汪仲淹时以足疾居肇林去太函三十里

方丈维摩室翛然物外踪花余天女散果剩法王供白日流禅榻青天落梵钟何当
问神足白眼对长松

贈片云片云者司马公所命王姬名也

窈窕尊前态娉婷画里颜客疑游洛水神似降巫山夜月辉眉黛朝霞动髻鬟不应
撩宋玉名字落人间

仲嘉携酌过箕台四首末篇懷汪献于

信步南冈上寒松一径斜浮杯当柳色促席坐桃花古殿明丹壑方塘漾彩霞红糍
晚成队拾翠傍晴沙

步步春原色寻芳意自闲石枰疎竹里金铎乱松间一壑停苍佩千峯峙翠鬢平生
双屐在天阔任跻攀

遠天横霁色箕踞坐莓苔竹露晨犹滴松风午渐来翠微悬絕壑苍靄覆平台十日
犹能客将无典綠醅

潦倒悲华发追随慙少年暖风抽麦日微雨拗花天游女矜环佩居民竞管弦维扬
好春色何地着丝鞭

士能斋头阻雨仲淹輿疾来会一律迟之

风雨催寒食残花闭小楼丁香空结恨红豆故生愁梦隔青绡被春迟綠绮裘观涛
今起色迟汝万峯头

同盛山人垆头话旧作

一骑吳關外悲歌脱畏途残生余海峤万死得江湖盆底冤谁烛垆头兴未徂十年

携手泪相对湿菰芦

春日司马公同携王姬入紫霞洞观桃花时少连太宁仲嘉仲淹并集司马以桃花源美人家为韵分得桃字

烂漫西郊外肩輿度碧桃春生武陵洞病起曲江涛（时仲淹輿疾来会）日彩摇纨扇天香袭锦袍絶崖仍独上谁似谢公豪

得花字（代王姬作）

十里春山色芳菲乱水涯瑶池迷故迹玉洞斗新葩野豁千林雾川明万树霞不知刘阮辈何事到仙家

题老蚌生珠图

几夜骊龙颌偷携径寸游芜城双月上合浦一星流影似悬蛟室光疑发蜃楼未须惭老蚌照乘诧诸侯

汪参军邀饮作

画拱摇丹日雕阑驻彩云榻延徐孺子吟接鲍参军午饌行山蕨春羹荐野芹醉归浑不解萝月渐纷纷

休宁道中四首

百里休宁道肩輿度夕阳川原明翠黛闾阖斗红糝玉佩时相亚金钗尽作行何方犍车至夹路烂生光

拂曙征人起苍云抱郭流落红依小径深绿涨平洲竹色偏蒙鞞松阴直过楼天然对图画底事唤营丘

白堕家家酿黄梁处处春飞泉悬薜荔远岫削芙蓉晚日前村旆春烟隔寺钟玄天看咫尺紫气欲成龙

望望山疑近行行路转遥依冈梅子熟夹路豆香飘翠幙紫朱户红糝簇画桥百钱犹挂杖烂醉在今宵

同汪士能入丰干路逢仲淹寄诗輿中口授用原韵

冷然遗俗累曳杖到仙家布帽扳名岳荷衣弄太霞吾宁驱白石君已饭丹砂縱有天台遇能如萼绿华

阿四既留溪南士能命更呼刘生佐酒亦以事羈赋此嘲

之咫尺玄英宅朱弦试一弹中原留上驷蓬岛隔飞鸾（刘生名鸾）酒压茶■（廿糜）瓮春迟苜蓿盘美人期不至惆怅月华残

宜男堂为汪氏题

阶前植瑶草芳色暮离离艳入三姬座香飞百子池水桃偕献实玉树并生枝旦夕佳男兆华堂事事宜

盘楼

何年硕人住结构傍蒹葭睨柱千山月推窗万壑霞青藜中垒阁绿绮少文家好着

元龙卧翛然世虑遐

赠高深甫二首

最忆高常侍生平乐事饶千金求騶駟十院贮红绡古迹留三代新声和六朝湖头明月满无夜不吹箫

自惬逍遥理谁同汗漫游异书中秘得名墨太清留夜月渔阳鼓春山燕子楼六桥杨柳色无处避骅骝

夜集刘将军即席作示孙徐两生

聊同珠履客共此岁华徂潦倒青丝盒淹留白玉壶寒风回击筑骤雨促呼卢不道嫖姚贵犹能事博徒

读季孝廉匡庐诗卷题

彭蠡扬帆近匡庐縱目长高峯悬紫翠乱瀑洒青苍竹隱文殊座莲空慧遠堂攢眉何处客不遠是柴桑

挽赵别驾汝申四首

神武门前路何人复挂冠华阳闲鹤驭灏水罢渔竿冷日黄金灶寥天白玉棺君看鸡犬去已到赤城端

频年嗟伏枥此日叹藏舟世阙传中垒乡闾问太丘朱弦俄入夜素翼正逢秋好在蓬池顶题诗遍十洲

玉局留丹界琳宫寄碧霞渐荒陶令菊难觅邵侯瓜雾里三天鳥云中八月槎椒浆聊一奠陇树乱栖鸦

遽然孤蝶寝忽到夜台傍别墅藁青桂空斋翳白杨星沈南极杳天入大罗长一尉何须恨修文正拜郎

萧含誉自楚中来访留集二首

下榻仍松桧移尊更薜萝星当雄剑聚云傍彩毫多客计留天目乡书问汨罗五游他日遂相逐老岩阿

狂歌青桂下醉舞綠筠前越絕书犹着湘累赋已传风葭云梦笛雪苇洞庭船归路甌甌近能无问太玄

访张伯起暖阁小集夜同过幼于园

伐木懷同调连枝愜共吟围炉冬阁暖秉烛夜堂深月倚孤城棹风交万户砧龙唇弦絕久拂拭为知音

幼于园中聽歌

一径蓬蒿入层台面綠波客携桑落酒人倚柘枝歌夕露更衣墮晨星幙被过五湖花照眼蚤晚着渔蓑

赠钱将军

属国儒风遠轻车将畧长侍童青玉案前队綠沈枪北府晨开席南楼夜据床邵陵

游猎处白马映丝缰

题吴肇成清波碧玉图

亭亭开素面袅袅出朱唇水畔疑西子波心似洛神浣纱犹倚石移袜乍生尘那得相携去馨香赠远人

闻王问伯领解南都喜而有作

此夕庭阶树真成奕叶光赋曾标五子名欲擅三王客礼龙门下神交雁塔傍百年兄弟好同日奏长杨

舟次樵李寄王承父山人

邂逅兰溪约秋风望未涯地违青雀舫天靳白鸥沙虎阜看茶近乌程问酒遐春来定寻汝酪酌万桃花（承父约余过溪上余道出樵李遂不及往寄此以订后期）

泊姑苏寄吴文仲

寂寞寒山寺钟声只自听高云随去舄夜雪到空舫竹色谁分座花香独扣扃太湖峯七十歷歷傍愁青

访曹子念戏赠

幽居仍薜荔雅兴旧菰芦一榻悬东海孤航领太湖须髯疑大侠骨相异潜夫何事吴阊底频年侣博徒

长干道中书事（时太学同人邀饮）

金波鵙鹊下玉管凤凰调晋帐延双隗吴糒出二乔柘枝频度曲桃叶旧传谣欲认相寻处城南十五桥

紫雾藏金屋丹霞间玉楼那能佳丽地不作狭斜游江女名无畏卢家字莫愁徐娘虽老去象管不停讴

过淮上读贞烈沈氏实编作沈为侍御吴公妾余丙子吴公所取士也

匪石心难转如山诺竟酬余生宁九地一死为千秋壮节长淮远贞魂大海留预看彤史笔灿烂照松楸

忆昔吴公赏真同贾傅看凄凉神武阙早挂惠文冠旧事悲桃李高风想蕙兰酬知万行泪愧汝大江干

渡黄河

九曲黄河水奔流下夕阳芦根渔网集树杪客帆张巨石撑淮浦高洪压吕梁黄姑频岁约击楫上扶桑

宿良乡

小市良乡驿征人蹙解鞍空林万木落孤馆一灯残旅色逢秋暮乡心入夜阑那知百里外明日是长安

少室山房集卷三十三

●钦定四库全书

少室山房集卷三十四

（明）胡应麟 撰

○五言律诗七十二首

家大人七秩恭贺四首

粲烂长生篆高悬灏水阳中元秋届节南极夜生光黄鹤吴天外青鸾越海旁惟应
双瑞曲永送万年觞

懿行三千就遐龄七十延竹宫观礼日兰署校文年六传巡滇骑双旌入楚船讴歌
犹咫尺拜舞大椿前

华堂开寿域瑞霭接瑶池十地来菩萨三天降辟支名犹喧隶卒化已洽边陲何限
朋游集千花照玉卮

慎默藏身宝圆明应物踪年高黄叔度世拟郭林宗日月迟玄草云霞恋赤松八千
春共祝宁羨渭滨封

寄居曲水园柬张氏伯仲二首

自爱新居僻宁论故业贫伯通能借庀仲蔚已为邻茂苑花淹客吴门药赠人苍茫
太湖底生事起垂纶

独有陶公径能停谢客舆陆浑虚旧宅阳羨觅深居水木孤轩外云萝四壁余何如
传舍客日月敞长裾

岭南陈孔信贻其诗来谒报赠二章

何物元龙少囊携绝妙词百篇难汝弟一字媿吾师剑击要离家壶倾泰伯祠钱塘
万家雪只棹慰相思

骤发扁舟兴佯狂到海涯诗成筒寄草梦断笔生花把赠罗浮雪回看茂苑霞鲈乡
亭下馆归路欲栖鸦

过张水部新居

负郭成三径郊原带草堂飞甍摇海气画槛纳江光花色吴门近棠阴越里长中朝
思大厦未许醉清商

过娄江载宿弇园时问伯逸季并以事留云间独房仲在下榻款留亡异长公存日
感赋此章

十日欢犹洽千秋态未忘开尊怜仲子下榻梦中郎旅色停孤棹歌声咽后堂屋梁
明月满惆怅夜何长

小祇园懷问伯逸季

寂寞双林下迟回一杖过盛名犹宇宙陈迹已山河落月连枝遼悲风大树多独将
知己泪烂漫洒青萝

澹圃访王闲仲及二弟渊季征叔留集作

夜久尊偏绿更阑烛尚红云霄三隼在海岱二难空旧业东陵异新欢北海同那将

季札剑两地挂悲风

陆楚生新居在弇园澹圃间邀余斋中啜茗即席赋

爱尔新居僻令余世事忘一瓢寒树里四壁浣花傍鸿渐余茶灶龟蒙但笔床坐闻
邻笛起涕泪满山阳

再过陆楚生

小筑娄江畔萧然四壁空断桥流水外茆屋乱云中有意交胡质长歌问陆通犹怜
傅舍客弹铗卧秋风

夜卧沈子书斋出素笺索题信笔赋

褥许分青锦厨仍卧碧纱浓香熏柏子清梦杂梅花未觉仙家好浑忘客路賒异时
懷仲举湖水渺云沙

伯隅童子冶卿持扇索题走笔一律赠之

偶遇张公子频年拥素琴貌堪酬白璧名已铸黄金肯作调鞭老时为捧剑吟红绡
遇何日倩汝入花阴

送吴刺史之桂林

莫作炎荒叹蹇腾识鳳麟棠阴流阜蓋桂实堕朱轮雨润遐陬俗风驰絕徼尘好将
南国化沐浴瘴乡人

陈方伯自闽中移蜀寄柬

奏事驰仙阙除书下圣朝杨舲江树合行部海棠娇云暗三峨寺天长万里桥浣花
溪上路词客可重招

蔡生移居城北招饮作（讳英南）

咫尺城东寓相寻路未遐懷人闽海荔留客武夷茶几席凝香雾杯盘散绮霞成行
儿女在祇合老天涯（蔡侨居余邑十年至长子孙）

过郭翌之故居有感

尚忆鸿胪第淹留白日斜新坟俄宿草旧圃更残花地迴悲邻笛天清咽暮笳异时
风雪满孤棹问谁家

赠张真人

何年赤松子羽节到皇家步履飞云履游乘贯月查珠宫浮紫贝绛阙炼黄芽应笑
唐供奉仙裙滞九华

寿郭隱君

苍茫翠微半突兀见孤亭大壑悬真气高天卧客星桐江标胜迹庐阜毓英灵不尽
名山色东南万古青

题孙生別墅

小筑寄林泉萧森十数椽苏门飞啸日郢国和歌年室静殫霞饱牕虚卧月便溪兰
一以擷为汝拂冰弦

题朱茂才孝行卷（有序）

朱茂才伊臣余丁丑同进士也古朴真至细行必矜事父母能竭其力尤重然诺为
闾閻所信从诸黉士美其潜德咸诗歌以咏叹之余引诸简首

千古朱家侠芳声异代留蒸梨知孝行瀹茗见清修乌鸟心长切羔羊愿未酬君看
彤史笔卓萃下螭头（朱生灌园以养二亲余尝食其梨茗皆手自培植者）

寄何穉孝

邂逅清源下差池易水漬心期元独许意气本无羣六翮排青汉孤踪傲白云春风
上林苑击节子虚文

少宰赵公还北寄送

饯别列鹓鸿悬腰剑色雄台垣三殿近豕宰二京同禁树连云紫庭花傍日红扫门
饶赋客宁复叹飘蓬

少宰赵公拜相寄贺八章

一夜求贤诏欢呼万国同谟谋咨大老启沃仗元功絕域车书会中天剑舄崇异时
评太史何羨帝臣风

翊运逢明主匡时倚上材尊荣逾四岳宠渥重三台灏水初调鼎华阳已筑台早知
霖雨泽六合净炎埃

玉铉调贤佐金瓯扈圣朝羣龙齐捧日双鳳各凌霄大业皋夔近荣名稷契遥蓬莱
云五色烨烨近人飘（时洪都张公同拜）

满目乾坤事關心社稷臣八荒悬密勿九域藉经纶暖阁调羹夜平台赐宴辰好将
司马业传播外番人

六馆推名德三司备羽仪麻宣鵷鹊殿草辍鳳凰池礼乐重兴日诗书再覩时太平
方有象宁訝庙堂迟

鳳诰辉纶綉龙光切冕旒坐调中极鼎永作大川舟八表清风被三朝壮节留长安
贵游满处处撤行驂

尚记临轩日龙头曳佩环帝心悬北斗人望切东山燮理阳春布论思乙夜闲万方
伊葛想翹首玉宸班

上相同心日真儒佐命年白麻初翊圣黄阁骤招贤吐握回三代吹嘘动八埏肯教
扬马辈头白卧林泉

长至后三日幼于斋头对菊同张使君陈文学周山人陆孝廉即席分赋得寒字

节已过长至花犹耐早寒似忻彭泽采偏称汨罗餐裊裊团霜砌亭亭立露盘何当
撷千朵烂醉赤栏干

过王氏小隱同陆山人周上舍合中小集

信步綠萝庄春波夹画墙壶中藏灑灑盆底着潇湘曲折花为径縱横竹绕廊乘风
时一到好是白云乡

夜过周懋修馆中月色盈庭皎如霜雪即席口占

咫尺周郎馆衡茅葑水傍披襟流素月把袂落繁霜逸调阳春远清歌乙夜长预愁
明发路枫叶乱金闾

西林泛舟即席作

谷口肩輿入悠然兴未穷尊前五湖尽檻外十洲通削壁笼丹雾飞梁挂彩虹坐闻
天籁发兀兀万縁空

赋得壮士乐长征

言従汉飞将结发隶行间列戟秋乘障扬旗夜出關双雕婆勒渡独马贺兰山宁忆
空闺下梅花树树攀

过沈材叔留卧斋中作

华亭疎雨过小阁乱云流榻为延徐下船因问戴留春光回枕簟寒色驻衾裯十日
犹能客従君笑薄游

赠钱将军

征马去飘飘将军旧度辽运筹推武库横槊羨英标转粟三呉尽飞刍六郡遥烦君
持大纛取次静氛妖

司马汪公以仲淹讎至寄挽二章

消渴真怜汝幽忧竟若何一尊犹水曲（暮春司马修禊仲淹輿疾别余于曲水亭
）万事已山阿旧业荒兰芷遗文照薜萝异时轩冕贵较仲定谁多

濩落词人长飞扬侠客俦生宁慚一诺死欲擅千秋失弟怜司马従师困伯牛天都
乱山色何处挂呉钩

寄丁元父

闻道丁元父筵倾邺下才政成初百里名动已三台岸帻寻芳草弹琴坐落梅尚思
风雪里并马立蓬莱

题章氏木假山

早谢樵人斧悠然野客家双峯寒宿雾列干迴撑霞埋没沟中断飘零海上查逢时
千载事为尔一长嗟

苏君禹留集翠虚亭共赋二首

一径双松里孤亭万竹旁高秋全障日盛暑欲凝霜箨自翻龙虎枝従宿鳳凰画帘
清絶处浑拟坐潇湘

百尺烟霄上千竿雾雨余緑阴浮枕簟苍靄浄庭除寂寞王猷驾萧森杜甫庐何如
偕筱簞取次贡乘輿（时君禹方校秋试文）

易惟效署中避暑同赋四首

逃暑仍河朔寻幽到习池青丝行共挈白帻坐频敲密竹团书舍疎花照奕棋黄鹂
似相识恰恰在高枝

落日孤亭上微风动碧梧净疑开雪槛凉似浴水壺茗灶供新瀹楸枰覆旧图吟余
爇沈水云起博山炉

竹树参差绿葵榴烂漫红径幽长蔽日林密尽含风白羽高谈洽青萍醉色雄大夫
饶酒德无拟笑山公

旧识燕台下新知越水濱乾坤双傲吏海岱独归人薄有骑羊骨能同跃马身万山
严子濼秋色未全贫

送友人游边

怜君随汉将策马度燕台六郡风沙合三边雨雪催邊笳秋色遠羌笛夜声哀来岁
看花节还聽草檄回

送李從事之南康

十载京华陌还为故国行岸花飞客舫江草问王程晓梦匡山月春烟白下城谁堪
万里外尊酒动离旌

壬申夏生日途中作（时余年三十一）

此日还初度葵榴照綺筵鯤鹏聊息翼犬马渐增年贾傅书难上终童策浪传平生
四方志览镜一茫然

寄题王中丞小祇园二首

欲问西天乐聊同北谷愚山围迦叶坐水淨法兰居藏室栖龙象经文蚀蠹鱼慈航
容并载吾亦慕真如

万古乾坤意居然见草堂淨心超大士弹指谒空王永悟三生劫时翻二西藏何如
浣花叟白首杜陵庄

金山寺

絕顶开楼殿中流见画图云霞千界合宇宙一山孤遠浪晴连蜀奔潮夜到吳向来
舟楫念寂寞对江湖

钱塘秋望

郡国三秋迴烟波四望开潮深吳相庙山绕越王台遠树天边没孤帆日下来安期
如可遇指点向蓬莱

寄朱汝修兼讯李惟寅

不见朱生久新篇近若何云山孤鹤在江海断鸿多筑室移青桂鸣琴掩绿萝李侯
诗句好骑马日相过

寄朱在明

独有金门客频年隱未回扳花游汉殿驻马上燕台梅福神仙吏相如赋颂才五云
空极目何处是蓬莱

送人游燕中

乱山霜色里行客迴添愁万里看黄鹄孤心寄白鸥高风沙塞晚明月海天秋莫以

刘义剑狂歌对五侯

暮行桐庐道中

纳纳驱行旆遥遥泛客槎万山藏鸟道一水护渔家束峡天形小奔崖地脉斜严陵
矶畔月蚤已着芦花

泊舟登钓台作

峡口抱云汀中流坐放舸亭高双逼汉台迥一窥星海气吞江白山光压濑青纶竿
千尺在吾计渐沈冥

寄蔡侍御

宪节初临蜀征轺旧出秦檐帷开气色斧钺静风尘峡口云迎客峨眉雪照人海棠
花万树夹路待西巡

送蒋祠部北上

岂意青云客飘然过草堂龙门留问字凤阁待含香万树长杨外千花太液傍何人
年弱冠议礼动明堂

闻裕卿移居山中寄询

移家仍绝峤秋色满垂藤磴袅云千尺峰回月半棱龙湫寒独卧雁宕晓频登我亦
耽奇客寻君愧未能

喻邦相迁守括苍寄贺二首（有序）

邦相以钱塘别驾擢守括苍舟过激水订余以是秋把臂仙都余以病未能赋此寄
忆

祗绿香阁吏领郡亦仙都重镇初移节名山独剖符儿童迎彩鹞父老认青鳧不奈
溪头别桃花覆酒垆

试县名方藉專城宠骤加符分苍岭月绶结赤城霞吏散朝行郭官闲午放衙何如
迁客泪九载湿长沙

朱在明初至长沙诗以问之

浩渺银河色孤槎起壮游乱山云梦泽斜月武昌楼解佩湘娥去鸣笳楚客愁尺书
能远寄回雁满高秋

闻蝉二首

白雁将秋至玄蝉入暮催清吟随落叶密响度高槐暑觉帘栊断凉俄枕簟回日长
堪听汝无拟抱琴来

客醉秋山底蝉吟白露时凄清流古木断续倚高枝静逐凉飈转低含夕照移枋榆
吾自适九万欲何之

秋日过王世周寓逢汪仲嘉潘景升赋赠

逍遥孤客邸邂逅二豪吟面貌夸联璧风期得断金琴书云阁迥杖屨雪房深后夜
芙蓉色湖头次第寻

少室山房集卷三十四

●钦定四库全书

少室山房集卷三十五

（明）胡应麟 撰

○五言律诗八十七首

题野鹤孤云卷赠闫道人（有序）

始为大中丞作歌赠闫尚未识面是冬北上过小祇园适闫自茆山至袒膊科头双
颧玉赤行步若飞信异人也而风度甚爽朗真率绝不为诡秘状自云与某道者订期莲
花峯下十年矣将以岁杪往践兹约特就长公乞言因出册子皆一时名士题赠余曩赋
长歌亦在焉长公援笔书四大字曰野鹤孤云而属余更缀一诗即席四十字并纪其人

科头无一事松下日盘桓骨相堪鹏背生年异鷖冠月轮天柱顶云色洞庭干薄暮
扬舲去相携问大丹

秋日溪南晚眺适赵生携酒共酌村店中

行行随杖履徙倚夕阳斜野寺明枫叶山篱着豆花飞鸥过浅濑浴鹭上浮查之子
期方到悠然问酒家

寄大司空朱公六首（有序）

公屡以手书见招属家慈病未能赴践宿约怀仰之暇集成六章聊代起居云耳
德望三朝旧勲名八座余庙堂周太保剑履汉尚书翼矫丹霄鳳鳞潜碧海鱼惟应
并南斗万古照匡庐

赐履优前代乘桴记昔年龙蛇驱大陆蛟鳄莫长川宦绩昆仑外神功碣石前试看
淮渚庙禹碣至今传

社稷忧仍在中华问转频帝能优大老史已传名臣紫气偏南极青云自北辰无论
汉宫远玉树正嶙峋

里闰知司马乾坤识卧龙为园名独乐抱膝寄孤惊瀑布檐前水香炉坐右峰大江
西望处愁绝暮云重

长日东林下看花自闭闼绿偏裴相野青占谢公山啸傲藜床静登临竹杖闲独余
忧国梦时到紫宸班（李诗宅近青山同谢眺）

尚忆风尘际能高物色情吹嘘惭国士吐握为儒生山水孤琴合虹霓一剑鸣含珠
十年梦无路报投琼（公常赏识余诗于童子时余故每有国士之感）

王孙贞吉以手镌印章寄惠走笔奉谢

遥遥双玉佩赠我意何勤石鼓周王篆金泥汉帝文蛟螭寒压雾科斗暗藏云万古
岫嶙碣何时一对君

雪夜邦相过斋中小集四首

寂寞幽人卧追寻茂宰贤飞觞临夜雪把袂坐高天剡曲三更棹梁台万古筵异时

吾党事兰水定谁传

不谓山斋雪能来侍従臣谈诗双郢客和曲几巴人玉笛生春早金尊促夜频晓来
飞舄处瑞气满枫宸

彩笔寒相对朱弦晚故留飞仙谁鹤氅野客自鹤裘拥坐城云立窥筵海月流预愁
新赋出人拟兔园游

此夜平原醉人间更有无乾坤悬玉阙日月坐冰壶磊落新词社萧条旧酒垆灞桥
回首处凄絶断云孤

与惟寅一别淹冉五载消息不复相闻春来忽得手书新刻见寄赋懷五首

賜履传周室分符卫汉京白虹悬结客紫电照论兵四百西山寺三千大内营几因
飞檄暇出郭遍题名

带砺中朝望诗书上将才佩刀初制阨横槊自登台万骑长城合孤鸿大漠回河梁
人渐老吟望独徘徊

长啸青油幕雄谈白氎巾射鵰新骠骑图象旧麒麟雪照梁园夜风高瀚海晨遥遥
双鲤下犹忆尚玄人

忆昔长安骑相逢狭路间乾坤双彩笔吾汝各红颜万感归来集千秋病后闲惟应
别时梦绕夜向燕關

一代华阳社平生碣石游坐携鸂鶒侣吟傍鳳凰楼梦寐犹青眼形容渐白头尺书
聊写寄涕泪尽南州

寄朱在明光祿

夙昔长安社朱家兴独豪深杯传竹叶艳曲度櫻桃宦拙従鸡肋身闲付蟹螯近来
偏忆汝愁望大江涛

寄丘谦之

底事丘灵鞠年来复罢官惊心吾道左落魄世途难月过衡峯近星离益部寒九歌
何日就洒泣傍南冠

寄朱汝修山人（有序）

汝修业医而余好谈长生乃京华日朱生最称善病余顷复婴疾弥年两病軀南北
相望良可笑也因诗讯之

掌露偏谁得秋风各未苏骨仍沧海立魂傍碧山孤白蛤名先后青囊术有无几时
携竹杖燕市问悬壶

再寄在明

在明家有声伎之奉近闻其方再纳宠因寄

见说休官后乡园乐更饶屏开张静婉坐列董娇娆紫电黄金勒红霞白玉箫兴来
应载酒时醉广陵桥

膝汝载先生卜筑武夷邀余过访余以家慈卧床褥尚孤此约感念今昔不胜怅惘

敬赋小诗奉寄凡八章

北极声华久东山气象新乍辞文苑秩初乞武夷身辟地连三岛看天卧七闽惟应
幔亭月时傍紫纶巾

九曲移家近三山入望遥楼台临碧汉户牖逼青霄坐叩梅仙诀行逢木客谣祇疑
尘世隔无路问渔樵

游神近何所三十六峯前鸟下谈经榻猿窥问字船飞萝悬白日古树拂苍烟仿佛
秦人住桃花隔涧泉

胜许龐公擅名应善卷逃挂瓢沧海阔倚杖碧山高万事留青鬓孤忠藉彩毫无嗟
塞翁意天地一鸿毛

柳色吳天梦梅花粤峽情吏才高汉代儒术重周京雾泽南山豹云寒北海鲸无言
帝閤隔咫尺是蓬瀛

黼黻真王佐丝纶颺钓徒中天仪鳳杳大海蛰龙孤入梦犹金钥翻歌白玉壶向来
门下士桃李遍三吳

作赋惭鸚鵡空羣辨鸛鶴千人摧稷下一士擅襄陽色借青雲迴心懸白日長惟應
夢中路惚忽到滄浪（滕公督學浙中于諸生中獨以異等見遇）

九折王陽道千秋大隱廬雲山容負笈宇宙碍驅車業豈門人盡名猶國士余凭將
一掬泪徧洒越山隅

得安仲子書却寄

嘆息延陵客清才獨後時三都全入賦五岳半題詩壯節摧青鬢雄心狎翠眉吳天
花欲盡好訂白雲期

懷祝鳴皋

南歸書札斷北望舊游孤一錄悲鸞翻三年問狗屠汝才寧巷陌吾道實江湖几夜
狂歌發寒雲碎玉壺

奉寄司成許公二首

一代崇周學諸生侍魯儒田何慚受易伏勝早傳書八座飛騰外三垣悵望余猶思
問竒日大雪滿庭除

載籍窮金馬論思坐玉堂洪鈞回稷契大典翊成康日近尚書履霞明學士裳生徒
愧原憲十載夢長楊

上元觀燈有懷京華舊游時集邦相署

山城逢令節燈火颺同游月映千花上星從萬樹流遺簪連紫陌委佩出朱樓不是
金吾地無妨徹夜留

遠憶長安道華燈正陸離雲霞千蜃結山嶂六螯移玉佩邀春早銅壺聽夜遲即今
天祿畔太乙傍誰嬉

周公瑕書來索余贈言為賦二首

作赋元惊坐临池更擅场真行王大令篆隶蔡中郎巨榜高天揭穷碑絕域藏太湖
花满目斟酌欠书航（景睽韦诞欧阳询事周素怖水故尾句云）

诗名人自老墨妙世谁如瘞鹤高风在笼鹅逸兴余藜然中垒坐花浣少陵居最忆
长安日垂髻问子虚

顾朗生山人以四诗见贻赋答

万感红颜尽孤踪白眼余何堪梁苑客遥寄茂陵书雪色晴偏照星芒昼不除太湖
蓑艇畔谁共觅鲈鱼

意气尘埃外心期梦寐间一尊违白社十口共青山桂树幽人赋莲花国士颜倘懷
天姥雪拂石候柴關

极目皋桥客长歌扣玉壶天藏林屋遠云压洞庭孤卜筑仍三径浮家任五湖试探
吴市女能识姓名无

不谓菰芦畔频年见伟人高天容荷锺大海傍垂纶一壑心长恋千秋业未贫异时
双剑合谁谓白头新

寄谢宗伯何公四首（时得寄惠燕中书并新刻大复全集）

十载瞻台座三春佐秩宗文章空左马礼乐擅夔龙邺下才偏盛河南誉日崇殷勤
大玄草犹记昔相從

灿烂遗编在峥嵘大雅留黄河龙马出紫阁鳳凰游李薛年谁少徐边誉岂俦不辞
扳逸驾世业在瀛洲

少日游金马平生近玉宸中天回雨露絕域望星辰咳唾千秋迴吹嘘万象春惭无
杜陵句池上贊丝纶

尚忆梅花下飞觞醉玉堂先春大庾月达曙广陵霜鬓惜年来短情偏别后长绋袍
今古泪寂寞洒沧浪（曩寓燕日何公招余饮梅花馆中聯句达旦者再）

寒食夜集邦相署中分韵得吟字

荏苒逢佳节招携见苦吟乾坤双剑色湖海一麾心柳密陶公署花闲宓子琴兰陵
今夜月百里为谁深

又得卮字

万古山城畔风流见此时署元方朔隱亭更子云竒片月窥帘下疎星抱席移祇应
双白眼兀坐把深卮

题大司空潘公芝林二首

烨烨鍾灵草青葱发润阿九光呈玉叶三秀挺瑶柯滴露滋苔蘚蒸云映薜萝蚤知
王佐出寢殿有兴歌

丹崖藏淑气白日涌灵葩百本俱擎露千林竞照霞瑶池仙母住勾曲羽人夸宁似
商山客成功翌汉家

闻裕卿卧病有懷

茆屋何年借柴扉尽日扃已无人和雪谁问客为星病骨留东海雄心付北溟暮云
回首处寂寂万山青

得何仁仲书

旧事燕台下看花汝亦狂双鸿俄越峤匹马竟潇湘赋就人千里书来泪八行向来
神女约早晚到高唐

题元旦早朝卷

玉殿春风起金门曙色通佩声千柳外旗影万花中鳳历颁羣后鹄行列上公阳春
纔一曲拟献大明宫

题大阅卷

剑佩中天出旌旗大漠开风传青海戍雾卷白登台列陈卢龙动翻营涿鹿回九边
销燧色横吹莫兴哀

秋夜诸子过集

岂是谈玄宅偏令问字过客当莲社满人比竹林多霁月流丹嶂飞星度绛河毋悲
秋夕永散发向藤萝

寄刘子大金吾

玉禁康侯宠金吾上将荣潜消三辅侠坐偃百蛮兵夜月雕弓满秋霄画戟明共夸
游猎暇时入建安盟

懷刘观察仲修

几夜懷高适当年赋上林高虹流击筑朗月堕鸣琴客散谁燕社人归自越吟西山
暮楼殿极目蓊云深

寄宫詹陈公二首

执戟元中秘鸣珂更上公云霞流紫殿日月扈青宫磊落燕台骏飘零越峤鸿台垣
何处切五夜望寒空

建礼扞趋近延英进读劳露溥金掌重云敛玉绳高苑树紫朱绂宫花落彩毫尚思
燕市夕浊酒坐持螯

哭康裕卿五首（有序）

始余年十六遊长安邂逅裕卿于友人席上裕卿得余诗读之即狂叫击节曰子珍
重必有闻于世自是定交无间者十数载乃今裕卿不可作矣闻讣哽咽情见于诗

摇落龙蛇岁天南坠客星寒灯孤月白遗塚万山青永闭高人宅谁题处士铭伤心
旧朋辈十载逦凋零

宿草孀妻奠遗编稚子留山阳愁聽笛剡曲恨回舟九死还初服三生记旧游踟蹰
季札剑日夜梦东瓯

忽跨辽东鹤谁瞻蓊北鸿云山藜杖在天地草堂空陇树经时碧原花着处红终令
石门谷千古号愚公

漂泊南游日峥嵘北上年狂名悬楚越侠气动幽燕大雪行歌外长虹击筑前向来
携手客老泪尽江天

垂髫游洛邑识面记燕城问赋惊文考投诗谒正平大鹏犹宿契老骥忽悲鸣地下
梁鸿在应酬碣石盟（裕卿与思伯契分殊厚今先后入岱矣）

秋日送人之彭城

柴门乔木下送汝一含杯大泽秋声早长河曙色开阴风韩信庙紫雾汉王台后夜
芒山气谁寻吊古才

为邦相题蕉石图图（出元人张伯雨贞吉所临）

寒蕉依怪石仙液贮铜饼日夜孤根老冬春片叶青风疑摇凤尾雨欲化龙形恍对
张勾曲星冠坐草亭

王长公寄惠集序赋谢四首

字字风霜色緘题向草庐百年双涕泪万古一吹嘘附骥名难尽屠龙业未虚异时
歌九辨宁敢忘三闾

湮灭书生刺迢遥国士恩片言犹海峤三赋已乾坤道岂中原丧交宁异代论尚拚
双鬓在垂白子云门

家学三王上时名二李前江河趋大壑日月并高天业已回长夜名犹借少年代兴
聊一钵默默少林传

刻鹄纷难辨鸣蛩独见知左迁元命世扬马快同时一字人堪老千秋客自迟会携
孤剑色东海傍要离

送金大参入滇

除目下枫宸飞旌动去尘共看金马客遥问碧鸡神草色穷南服花香梦北辰到时
薇省宴犹记六桥春

寄董太史二首

作赋俱青鬓携书共赤墀我懷三秀草君夺万年枝鸾鹤甘泉殿鱼龙太液池当年
六桥柳能记共含卮

世事甘余拙时才羨尔长读书同左史执戟异东方雾拥金门色天回玉陛香深惭
潞河鲤万里到沧浪

送人之黔中

匹马冲寒雾孤城问瘴烟花深罗鬼地箐密夜郎天野戍传诸葛藜祠赛谪仙五溪
相望处白日坠飞鸢

送人游边

严冬武林驿一骑问京华大野霜飘树长城雪作花囊鞬迎属国剑佩逐轻车早夺
天山地铭功入汉家

题东皋园亭卷

近卜东皋墅推窗面面山榻悬双树底亭锁万花间白鹤回孤啸苍龙问大还异时
藜桂发尊酒定同攀

送张山人楚游

岩穴凭谁问飘然赋远游风高云梦笛月满洞庭舟短刺携孤客长裾狎五侯蛾眉
亭下泊饱看荻花秋

南屏逢沈李二生谈道因约余游天台口号戏赠（）

越国奇男子吴中伟丈夫游心出蓬艾把臂入菰芦龙虎蟠金鼎鸳鸯语玉壶天台
八万丈指点向虚无

夜集李景颖出土瓜佐酒成赋二章（有序见文集）

云霞蒸上瑞冰雪荐华筵醒酒功侔石烹茶味胜泉梨非张氏谷瓜岂邵侯田好比
金茎液分携汉阙前

司理耽奇甚甘瓜荐味长飞霜匀玉质重露浥琼浆碧荔唐宫重丹桃汉殿祥何烦
方朔盗袍袖溢芬芳

赠孙国梁

谈玄吾不厌问字尔相寻兴逸飞流赋情高漱石吟春郊联玉勒夜阁拥瑶琴二仲
翩翩在何烦觅向禽（时金生数同过飞流漱石皆孙氏事也）

题性天真孝卷（有序）

惟孝使君族子某七岁而刲股救其亲奇节也闻者咸为诗歌以美之使君因彙集
成册云

焚香星月下一窗冀亲延诂意挥刀日纚同扇枕年孤诚回大造至性彻重泉莫以
昌黎论雌黄孺子贤

潘翁九秩诗为望之茂才作

玉醴泛蓬池琼枝焕陆离玄纁迟伏胜带索异荣期种橘盈千顷栽花但一篱不知
柯几烂犹阅洞中棋

题中丞滕公武夷精舍图（有序）

先生自癸未拂衣卜筑武夷之上日与二三同志讲业其中放舟曳履之暇时寓意
棋奕间此图盘石方广数丈上设楸枰坐而手谈者先生泊里社杨君李君皆生平莫逆
友也图于先生貌酷肖仲子万里北上出示索题瞻玩再三不胜国士之恊谨赋五言律
一章

精庐聊十尺坐啸建溪湄颺挂中丞笏闲挥太傅碁野花苍鹿献林果白猿持惆悵
流风逝徒瞻大树遗

送李内翰入都

一骑冲寒发梅花照客颜乱云扬子渡残雪皖公山旧直青绫被新恩白玉环夜来
前席梦光到紫宸班

寄李允达二首

底事翩翩客长懷落落愁驥心犹五夜鸡肋已三秋犊敝相如袴貂残季子裘长门
售何日少妇绕机愁

失意真怜汝沾衣向薜萝屠龙人未识买骏客频过投笔徒为尔焚舟竟若何千秋
吾道在异日较谁多

少室山房集卷三十五

●钦定四库全书

少室山房集卷三十六

（明）胡应麟 撰

○五言律诗六十八首

吳郡金公应照令吾邑凡后先六载清风卓操絕代无伦冀士慕其遗爰将举祀名
宦不佞恭窃门下敬赋二章

当年武城令故国近三吳睿识悬冰鉴清标莹玉壶琴遗何处鹤烏化异时鳧磊落
循良传千秋更有无

素丝传苦节彩笔擅瑶华彭泽门葳柳河阳县带花云霄余宦辙江汉逝僊查寂寂
谈玄者空悲隔绛纱

夜宿黄季主对奕决赌金伯韶为点筹酣饮达曙题壁间

念汝能悬榻令余忘忆家香凝燕邸雾烛袅汉宫霞仄径眠孤鹤虚檐集乱鸦今宵
橘中卧极乐在天涯

送僧还赤城

春游秦苑外夏返越台傍片石幽期遠千峯别梦长危杉饥鶻墮古柏病猿藏问讯
寒山子题诗遍佛堂

宿狄明叔园亭二首

闲来种瓜墅门巷半垂藤石室藏金匱星台控玉绳茶招阳羨客饭供雪山僧下榻
余将卧清宵话大乘

自是词人社虚疑上将坛清香浮画戟异味荐雕盘五色瓜紫砌千株橘绕阑黄梁
炊渐熟饱饭话邯鄲

再过狄明叔园

咫尺将军第重来日未衙径添何氏竹畦蔓邵侯瓜曲榭微生月层楼半纳霞一枰
堪度世何地更吾家

送徐廉访之虔州

为羨虔州路依然借寇行關西羣吏送岭北大僚迎日拥瑯戈艳霞飘画毂明五羊
天咫尺高眺粤王城

破山寺老衲夜谈作

一径入苍翠飞云袅袅屯危亭标木末古刹翳松根海月时窥牖山风日扫门凭呼
野衲至信宿共芳樽

过张伯起幼于园中二君各出小影索余题即席赋二首

乾坤长啸客林壑自由身蚤辟东山墅闲垂北海纶新声传子夜丽管握阳春我亦
思逃世貂裘再敝秦

右伯起

何年醉玉京谪籍下蓬瀛方外唐征士江东晋步兵鸚冠云气入龙剑雪花明异日
投竿去毋令帝座惊

右幼于

次瓜步张别驾留酌署中

栏杆明月下萝薜暮纷纷翠杓调甘露香厨供彩云含毫春半入剪烛夜平分更喜
朝来约三山跨鹤羣（拟次日游金焦余病甚遂不果往）

秋日游大慈岩作

薄暮肩輿到归樵处处逢万寻开峭壁千级上危峯树杪禅闍出萝阴梵刹重何当
專一壑絶顶卧长松

姬人有従行岩上者躡捷之甚戏赠此诗（岩名大慈）

偶逐天台客桃花照玉颜绣裙时绾雾罗袜惯登山岭月生眉黛峯云动髻鬟不因
刘阮至那得共追攀

题祝无殊栖云轩

小筑兰阴下幽居漱水瀆八牕全受月一榻祇栖云竹杖占龙气蒲团卧鹿羣何人
日携酒相对草玄文

挽吳封翁四章（文仲观察尊人行谊高卓潜耀弗彰为时楷则）

阙阅崇三世丝纶贲九重行高黄叔度名重郭林宗茂苑新枫落苏台宿草茸异时
双庑下谁问伯鸾春

高踪悬石戸古行郁泉台海月长鲸去天风大鸟来河南传治行邺下绍词才世泽
今何限无烦叹草莱

剑色丰城閤书香茂苑长题铭符季子树碣副中郎阁翳新玄草斋繁旧白杨明珠
遗集遠光照玉涵堂（封翁厥考纯叔先生以行名嘉靖间有明珠玉涵二集）

綠埜承先世苍生付象贤恩波填越海涕泪咽吳天薤露丹旌外松风素旒前祇应
门下客长废蓼莪篇

送僧游越东

穷年持戒律行脚遍蒿莱碧海浮杯度青山蹶屨来天台方广寺雪窦妙高台匣底
兰亭帖相传自辩才

刘广文擢北司马诗送之

汉殿移官入燕台谒帝行敦诗元郟穀议礼旧荀卿海国朝霞丽江城霁雪明题书
频寄忆翘首北鸿征

越岭瞻乔卷为易使君仲子题

公子旧翩翩宁亲羨汝贤瞻乔离楚服懷橘向吴天柯烂青霞斧帆飞赤壁船太行
他日望重赋白云篇

次日叶孝廉复邀集馆中赋

水亭门外望朱户万花间逸兴饶金谷丰肌倍玉环紫骝云杂沓黄鸟雪间關肯学
山阴棹空成兴尽还（妓有貌甚丰伟而歌舞殊佳）

寄李左辖

阜蓋江都旧朱衣汉殿新云霄回北望山岳动西巡薇省千花夕棠郊万树春何人
学徐穉今古接芳尘

剑泉

当年欧冶铸莲锷夜生花赤电飞延浦青虹照若耶风期弦上得意气筑傍賒会挈
楼兰首铭功瀚海涯

卫河阻风同张陈两生小饮作

何限萧条色相看一坐中乍収霞脚雨仍起石尤风逆浪冲飞鹭惊沙没断鸿移文
岩际满独此滞征蓬

登陆行齐鲁赵间二首

望望乡犹隔行行路转难村醪过曲阜野饭驻邯郸白堕谁争醉黄梁任饱殮凭招
吕翁至一问大还丹

乍骋思乡目聊舒逆旅魂牛羊遥隔岸鸡犬自成村陇麦侵齐甸山花照鲁门岱峯
云咫尺如迓丈人尊

余從陆至安平镇闻傅伯俊明府先一夕过此怅然有寄

一夜长洲令双鳧跨碧虚徒飞秦观梦未达鲁连书计吏黄金诏郎官白玉除鲈乡
亭下路归客倘踟蹰（伯俊别号秦观聊城人）

赠谢山人

一榻衡门下萧然共白头长林中散卧古木谢敷留石室藏孤愤金庭梦五游剡溪
前夜雪曾否下扁舟

项山人季輿过访赋赠二首

柴门朝雨霁鸟鹊噪檐牙车马何方客新来自永嘉去偕沧海月归指赤城霞迟汝
秋风夕同扳桂树华

总为寻诗过难将问字留万峯阳羨色双艇石湖秋雾拥王孙佩星随客子裘归来
定何日长倚碧云楼

系航阁为纪旭仁题

嵯峨扬子阁百尺大江边竹绕谈玄座花藏问字船
卷帘羣壑入敲枕万峯悬夜雪如相过那能兴尽还

中冷馆为楚宗侯仲和作

胜迹中冷畔名亭大海头石栏三楚色金锡九江流
谷有康王卧泉堪陆羽留春芽阳羨熟一钵许同游

集郭鸿胪听歌

赤栏桥子畔来过百花丛一径延新绿孤亭坐落红
歌声全度雪舞态半随风向夕瑶台望真疑凤下空

林山人逸民自闽中来访赋赠

野鹤闲云辈何因独扣关为寻天竺寺来话武夷山
客路松华熟禅房桂树闲那能待婚嫁五岳早跻扳

过林生啜茗作

七闽山水尽仍舫灏川航一室空林下长斋叶满床
画图传蛺蝶书札动鸾凰为客烹阳羨双松正夕阳

送黄廷评

东阳仙隐吏八咏万家传政就花连郭秋成秫满田
龙扳新绛阙鹤舞旧朱弦藉甚王廷尉君看结袜年

客有自金华诸洞返者穷幽歷险所覩甚异余伟其事而赋之以订再游

洞天三十六竒絶擅金华雪壁盘空上冰壶抱月斜
玉桃千岁实瑶草四时花瓢笠吾当去驱羊卧赤霞

燕台骧首为方元素题

赤骥画桃花长鸣逐暮笳霜蹄穿大漠电影涉流沙
伏枥心期壮登台意气遐秋风闲十二早晚向天家

毛文学招集命幼子庆郎出见座上赋

何处来英物娟然玉雪同春山睽寸黛秋水浸双瞳
异日征飞兔当年忆梦熊看君懷橘去谁不羨黄童

王孝廉邀集城西张氏馆即席作

结束问东家联翩到狭斜绿杨初拥絮红杏半飞花
绣榻笼轻雾珠帘罩落霞坐来庭树色冉冉欲栖鸦

赠谢少廉

旧闻知王谢竒情识鲁连世传如练句人诵捣衣篇
冠鹖余生事屠龙入暮年白门桃杏色次第理吟鞭

送王使君之滇中六首

楼船秋水平汝向碧鸡城绛殿分符别黄堂视篆行
万山藏贵竹孤岛辟昆明烂漫

东方骑遥知夹路迎

诏书来日下行色动江皋鹵簿专城贵旌旗列郡豪檄传巴俗遠诗到夜郎高何处
看铜柱飞扬勒彩毫

铜鱼分絕塞金马问长途地入三苗险天悬六诏孤中华传制作异域上輿图新釀
椰阴满何妨醉百觚

不堪垂老态仍对欲分襟杖拟携叩竹舩应载郁林夷歌传白璧汉诏锡黄金何似
长安吏穷年问陆沈

西南天欲尽剖竹问罗夷想象千村外驱驰九驿时山行忘蜀道水战息昆池卧阁
桄榔下能无咏别离

迢遥丹凤诏灿烂白狼篇弭蓋朝行燹飞槎夜入滇长途山作地大泽海为天絕域
阳春布无劳话瘴烟

闻司马张公萧公讞二首

廿载甘棠爱千秋大树名断虹燕北路斜日渭南营部曲清笳送官僚素旒迎东南
天半壁谁为筑长城

北里丹旌度西江素翼回千秋申甫业一代管鲍才象纬中台坼风云太华摧祇应
庐阜色名姓共崔嵬

哭大中丞滕公八首

间代鍾豪杰嵬然岳降神三朝传政绩万国待经纶赋就悲题鵬书成叹获麟何须
论夙夜尽瘁见王臣

絕学传邹鲁洪都陋汉唐君王悲大树父老泣甘棠百万清油底三千绛帐傍尚思
龙起日风雨动南阳

羽节吴山驻貂裘汉殿来诗书三代佐文武万邦才日惨中丞幙云寒上将台祇因
秦望石勲业并崔嵬

渐觉三台近俄惊八座空高牙悬落日大旆飒悲风部曲讴吟外宾僚怅望中佳城
犹郁郁谁为问滕公

甲冑重關静楼船大海闲勲名韩范后筹畧管萧间月拥丹旌度云拖素旒还异时
灵爽在长镇武夷山

七台初返旆九曲罢扬舲琬琰留中秘轡辘出大廷山川摧间气海宇泣英灵万古
真儒业重看配考亭

尚记抡才日鸡羣识凤毛尘埃援锦瑟雨雪赠绋袍德并生成大情兼怙恃劳百年
知己泪遍洒越门涛

念载门人籍千秋国士期长鑱惊老大短褐愧支离宿草孤帆近生刍一剑迟殊恩
何日报恸絕大江湄

挽马都阉二首

矍铄闻飞将苍茫失故侯金章新息在铜柱伏波留已逐沙场逝宁懷下泽游至今
灵爽在犹自偃壶头

韬畧知名旧封侯泣数穷前茆沈落日大树飒悲风马革当今羨鸱夷自古同云台
政图画忍没汉庭功

先宜人不幸弃背泣血苦次志哀四章

一夜西风色俄然到北堂千秋黄壤遠万感白云长寂寞幽兰思迟回寸草肠夜台
无日返何处报春阳

忍忆丸熊事空余戒猎言北风频撼木西日故摧萱玉匣埋孤隧珠襦閤九原闲居
曾一赋恻哭望高轩

刀尺遗中阃輜駟向大罗梦回衣线杳寒入總帷多夜月沈兰茝秋风瘁蓼莪流黄
叠空筐触目动悲歌

驟得西华信云駟去不疑星冠朝玉阙雾幄返瑶池白日兰陵暗清霜薤里迟惟余
嗣宗恨血泪洒残棋

贈管茂才坤

管子南州杰飄然此地逢风尘随燕雀云雾隱蛟龙堂上湘妃曲溪头越女容一尊
何日对相傍采芙蓉

贈赵长吉中舍

何来中秘客巨笔迴如椽鸟迹羲皇后螺书大禹前硬黄贞观帖飞白永和篇竒字
吾犹识能来话草玄

郭生烧一鹅食余甚香美诗以赏之

西园新燕集东郭旧鹅羣炙处逢刘毅燂时笑右军金盘疑噴雾玉盞竞倾云更有
浑羊设竒方欲贈君（宋人以蒸鹅为汤燂右军见笔谈）

少室山房集卷三十六

●钦定四库全书

少室山房集卷三十七

（明）胡应麟 撰

○五言律诗八十二首

寿郭金吾

闕闕汾阳盛簪绅代国留玄关驯独鹤赤县驻双虬覆局青霞烂鸣弦白雪流三珠
庭下树冉冉拂琼楼

早春自西掖过访宋忠父作

言寻中禁路来问列侯家玉座攀云色金城步日华池烟深锁树苑漏曲穿花莫笑
绋袍敝长裾半赤霞

醉卧赵文学榻上遽然甚适觉赋此章

颓然聊一榻酣卧碧纱长极乐知仙界温柔羨帝乡春疑回大庾赋已就高唐可怪
黄粱熟庄生兴未央

送锺天毓南还二首

送汝木兰桡高天正沆寥枫行扬子岸柳折灞陵桥丽赋三都擅狂名六馆饶东溟
聊一息奋翮上扶摇

寂寞中涓后何人问骏才藏书还禹穴抱赋出燕台大漠新霜下长河片月来异时
重入洛云色竚蓬莱

赠丁文通太学

邂逅咸阳市干将照白虹新诗传敬礼旧梦识文通业岂吹竽贱心犹击筑雄宁亲
暂升斗奋翮待天风

临淮史夫人挽章四首

令族姬姜并贤声孟卫流贵从周太保体敌汉诸侯宝匣飞鸾镜琼箫咽凤楼预知
陶氏冢新兆卜眠牛

云駟飞绛阙哀诏下明堂大树犹撑日芳兰骤仆霜泉台春寂寞石室夜苍凉冉冉
灵妃佩乘风度七襄

叹息兰闺底悲风一夜多星芒沉宝婺日彩断银河跨凤佳期阻丸熊旧事过钟情
潘岳甚其奈二毛何

宠数颁宸极恩光备寝筵珠襦藏大隧玉匣閤重泉懿德丝纶着芳声竹帛传谈诗
怜哲胤凄断蓼莪前

题何仁仲园亭二首

采采白苹洲三湘欲尽头危栏云梦夕飞阁洞庭秋渔父持竿过灵妃结佩游武昌
新水发迟我木兰舟

别馆寄清沙飞薨触望遐径移湘浦竹溪浣杜陵花万岫交明月千林逗彩霞墙东
处子丽莫是宋生家

甘露园二首

为园近茂陵甘露遍垂藤月底寒犹坠风前曙欲凝餐莲疑太华瀹茗胜中泠试作
相如赋谁云渴未能

冷然松竹径点缀自何年北固昭明寺中嵩慧可禅寒生金掌外清注玉壶前好傅
何郎颊朱衣拭更妍

同李惟寅何仁仲集朱汝修观梅花

一尊春兴剧花下共传筹艳质霜先避清香月并流诗怜羣玉句人倚仲言俦恍入
西湖道吾家万玉楼

送王伯固之临漳

承恩出尚方跃马向临漳身是王乔族官邻子晋乡芙蓉周阙紫松柏魏台苍预听

鸣琴日阳春满未央

送吴翁升还雪上

河梁樽酒暮一骑向飞沙旅服惊霜树归装冒雪花豪游新北阙艳赋旧东家好去
茗溪上羣姬辍浣纱

雪中过孟弼不值

濩落怀同调经过问索居雪花行刻曲云树隔匡庐大业元龙剑微名尚鹿车不知
玄草外奇字近何如

子玉以大计量移赋慰

三叹崔亭伯清风玉不如吏情甘惨淡公府绝吹嘘考署阳城拙名成谷口愚祇应
宣室夜前席治安书

闻王闲仲得隼燕中志喜二首

阙阅三朝旧弓裘四世新霜蹄金驥天种石麒麟桂擢燕山夜梅标碣石春平康
花似绮结束待车轮

金泥初帝阙玉树旧王家间气鍾三叶奇葩炫五花追风横大漠蹶景度流沙宁似
吴宫外穷年学浣纱

大学士赵公招饮小憩章行父馆中作

尺五瀛洲路频过户不扁漏长中极殿（时赵公尚视事阁中）春满太玄亭（行
父方馆谷大学士门下）舞鹤花间度飞鸾竹外停最怜调鼎暇吐握共忘形

是夕留饮至丙夜诘旦再呈此章

紫极方延伫黄扉乍卜欢上公能结袜羈客尽弹冠玉窗移中禁琼浆出大官夜阑
台斗色清切动长安

访苏君禹城南别墅时郎君新获隼计偕二首

韦杜城南曲经过路不遐重垣千树枣曲径四时花楚思融春雪燕歌促暮霞日斜
羸骑返睥睨半栖鸦

岂是东山墅频张北海筵帝城云色近仙掌日华悬旧燕纷窥幕新莺促和弦坐看
池上风矫翼向甘泉

云岭真松卷为崔母杨孺人题

朗月悬西极高风劲北堂云松千尺秀冰蘂万年芳跨凤春情杳丸熊夜漏长惠文
看哲胤飞诏下明光

一醮悲前事三迁训后贤即今衣绣日犹是断机年黄鹤瑶池下青鸾玉座传蚤知
骢马客风化遍淮瀍

题杨孝子卷为世叔孝廉

当年排帝阙万死白虹知楚泽长醒夜燕台困饿时有天号半菽无地献三芝藉甚
遗孤在干将对陆离

过苏生期歌者小谢不至戏作

寂寞看花兴彷徨伐木歌虚闻莺出谷未见鹊填河暮雨当窗断春星入户多明朝
携小谢池草梦如何

赠騷儿

騷儿才五岁意气欲凌霞骨已征千里书应诵五车神清珠在握体润玉无瑕莫作
鸡羣拟终当胜阿爷

送邬子逵还京口

倦索长安米言寻旧鹤羣传家中宪业负笈太玄文（邬生为中宪公孙中宪有诗
集）客路樱桃雨归帆杜若云卜居何日事携尔大江滨

赠胡孝廉昌世

旅食渭桥边青萍僦舍悬骊珠溟海握骏足蓟台捐谒帝留孤愤逢人话太玄凭收
嫁时泪会有惜婣娟

赠璠树为顾朗生

艳色真琼树丰肌倍玉环红妆停夜月翠黛压春山飞凤秦台下游龙洛浦还相思
几攀折遮莫鬓毛斑

临淮席上蔡生乞诗作时王山人在坐

龙阳君已贵一笑眼能青玉树标前砌金茎梦后庭声驰千里骥歌送五侯鯖莫以
安期旧椰榆蔡克灵

过王山人啜茗作

束书来蓟北题赋遍江南不慕千锺粟时分一味甘苍筠摇午梦黄叶坠清谈细酌
天池坐何殊绣佛龕

锺天毓过访索诗赋赠

沾沾越吟客穷巷又移居旧着叅军品新临太傅书花香萦短屐柳色傲长裾寂寞
黄金馆谁今问子虚

朱山人以非罪淹狱赋慰

泄柳门时闭邹阳狱未苏瓜田宁纳履药肆尚悬壶业就肱先折愁深目半枯青天
覆盆底见汝出穷途

过刘茂才百世读其玄珠诸稿作

似汝年犹少投予赋已工青藜三世后赤帜万人中朗润知潘似清扬忆卫同韶颜
吾尽掷一枪异时红

送人游塞上

晓发灞陵桥弯弓箭在腰黄沙随地阔紫塞极天遥玉乳蒲萄熟金羈苜蓿骄贺兰
千百仞飞骑上岩嶮

送章秀才从军

白草暮萧萧黄榆叶半飘四时风不断经岁雪难消大碛逢侦骑平沙见射雕兵锋
随所指百战静氛妖

赠杨文学

身世一袍青柴关尽日扃鹿门传旧业玄阁抱遗经玉树祥云拥金茎湛露零异时
飞紫诰何羨客为星

和赵相国懷山八咏

栖真居士

北极恩偏注东山兴未穷民犹歌畏垒帝已问空同绛阙星辰丽彤墀日月崇宁知
西竺想寤寐化人同

六虚主人

翠屏罗窈窕丹壑敞嶙峋独占三山色长栖六洞神云霞居士梦宇宙宰官身几夜
骑羊客传书到玉宸

二初牧侣

炼药闲金灶宣麻上玉除黄庭弘景篆碧洞稚川书鹤化翀霄后羊眠叱石余赤松
如待牧前席为谁虚

紫霞洞叟

巨磴山腰豁流霞洞口平阙疑屯紫气馆忆坐朱明草色金光绽桃脂玉乳莹为探
轻举候少俟大还成

灵溪渔父

泽畔吟初就溪头望未涯坐携青竹筱行趣碧桃花锦曳千林雾绡疑万树霞秦人
遗核在一种帝王家

白云樵客

古树白云含晴光上郁蓝为霖今塞北挟雾旧东南石上凝苍霭峰头杂翠岚万方
膏雨洽出岫讵空谈

涌雪寒翁

一涧蜿蜒出胡麻饭有无云淙穿石窦雪乳喷水壺峡峭凭舟探潭深藉杖扶隔凡
天咫尺归梦夕阳徂

玉露丹仙

石室清虚畔研朱坐沉■〈彡 寥〉空蒙流月窟点滴贮天瓢掌忆金仙近盆怜玉
女遥他年把周易骑鹤上岩龛

哭汪司马伯玉十首（太函司马斋名白榆社名）

北阙悬车蚤东林曳杖余神留中土卧帝命太函居五岳藏玄草三天坠白榆庭阶
双玉在雪涕茂陵书

青萍悬虎穴赤帜树龙门居后杨宁耻齐名杜转尊星枢摧軫翼天柱折昆仑白玉

楼前侣飞云限九阍（司马为弇州同年友又齿差长且文望相亚而极意推毂弇州感之甚数自言于余）

杖钺平邊塞麾戈逐战场风霆流武库河斗烛文昌玉帐三韩外铜标百粤傍祇今吉甫颂犹自播夷方（伯玉尝于白岳建文昌祠）

黄山初谒帝玄扈旧栖神华夏悲司马春秋痛获麟名犹标泰岱魄已化星辰寂寞东南事文章孰后尘

一榻中林畔如椽大海头丰碑腾六合巨榜揭千秋妓狎东山卧宾残北海游琅琊双墓在天意合吴钩

汉阁空刘向扬亭逝子云中原谁步武上界已修文马骨骊黄外蛟珠鸭绿渍异时传汲冢一代有三坟

浮生偕电露名理悟旛风浊酒谈中圣清斋问大雄净名居士榻忉利梵王宫此日三车去悬知二业同

黄粱殊未熟大梦竟难呼兜率天高下遮须界有无文成歆上帝草定属潜夫伏枥今谁辩长歌碎玉壶（公尝以全集属余校定）

龙宫开净业鹫岭学枯禅障息三天外神游万劫前空花函谷梦祇树肇林縁谁复偕苏晋长斋绣佛筵

邂逅平原饮飘然夜雪过寸心雄海岱只语废江河落日生乌遼悲风大树多如澠犹夙昔万恨掷蹉跎

香山寺流憩亭小酌逢张郑应季四文学邀宿华严洞余与诸子素昧平生酒酣兴发策蹇十里从之诘朝复抵碧云泉上

十里华严寺重游不厌频携尊三市客击筑五陵人野筱长封雪池莲不受尘故园沧海上飞梦绕垂纶

送倪明府之桐城

河梁尊酒别霜树半遥空骏市燕台上鳧飞汉殿中桐花城畔月桃叶渡头风最羨琴堂色青苍对皖公

送李少府

都亭尊酒别秋叶照离筵菊绽燕台下松哦越峤前孤航冲雨雪短剑拂星躔咫尺征贤诏黄金汉殿前

送赵进士使太原

秋水木兰桡双旌出渭桥飞云行上党积雪过中条谒帝朱衣近宁亲绣服遥向来龙剑影辉赫电光摇

过董中翰体仁余廿载前旧友也别后始授室燕中今一子已踰冠矣感念今昔为之恍然

廿年燕市客尔外更谁存逆旅推耆旧他乡见子孙花香分玉殿藜火直金门笑我

青衫敝西风曳帝阁

同王行父李叔操徐象先诸子十日饮作

懒习干时技聊同玩世人华阳宁异代河朔动经旬旅兴先黄菊乡愁过白苹莫教
龙剑色容易射星辰

廿载前读王汝化诗已意其为古人迹晤李本建乃知此公仅百龄尚无恙也因赋
一律寄之

磊落王宫翰青编入梦频那知三楚客遍阅五朝人艺圃占灵药词林颂大椿前村
武陵洞相对几遗民

送汪象先伯仲还新安二首

叹息金兰逝参差玉树长多才秦别驾雅量陆平章马鬣封仍下龙门副永藏河桥
相送地拭泪滴干将

烨烨名家后翩翩上国来玄经司马业文赋士龙才玉闕丰干社金残碣石台喧传
茂陵诏汉使下蓬莱

送何仁仲之南都二首

去去何公子春风一骑寒含香辞上国傅粉入长干桃叶江帆穩梅花郡阁残芳洲
寻白鹭何似故园看

祖帐春明外桃花别路长暂弢题赋笔初绾纳言章观入新鵙台呼旧凤凰昼游
欢咫尺一水是潇湘

送崔子玉之逢州

春水潞河舟春风拂面柔飞驂临剑阁别驾问刀州懒卜严遵肆频登杜甫楼巫山
行雨暇入梦正高秋

送人还四明

怅望春风色河桥落照间酒人三市别狂客四明还再举看黄鹄孤飞羨白鷗新妆
苙萝下吾梦亦潺湲

送区学文还岭南

彩笔吾衰甚惊看白面郎家传周太史殿赋鲁灵光上国啼鹃尽东风结驷长罗浮
花事早月夜见明妆

集张仲立馆中同胡孟弢赋

世事真鸡肋吾侪日蠓螯撩人偏笋蕨作客又樱桃业岂穷来擅名应醉里逃相看
聊起色毋拟曲江涛

胡昌世张仲立过访小集

何限春风色长安醉碧桃双携蒯纛剑一话郁轮袍射虎心犹剧屠龙思并豪平康
花烂漫未肯负持螯

哭李能茂五首

命岂文章达才偏造物憎霜蹄残騷裹风翻坠鲲鹏大业愁中废雄图怅代兴兰陵
川上酒犹忆共如渑

肺病呻吟外魂摇弃擲年千秋迟白纛万恨剧青毡鸡鹜争谁得龙蛇命岂然玄亭
莽空阔愁絶异时传

世事狂歌外人才太息中篇章亡白贺翰墨逝水邕弱女啼荒径孤嫠咽殡宫棠梨
最无赖满树发东风（李生书学王履吉翩翩近之）

世谁怜薄禄天亦忌雄才落月长鲸去悲风大鸟来遗书残竹素旧宅翳蒿莱絶顶
芙蓉上曾同眺越台

青山曾不厌朱绂定谁强宇宙瑶华歇川原玉树藏无年嗟太傅有业恨中郎寂寞
安昌第堪谁到后堂

达父齿仅四旬一女无子盖生平未尝废占毕业垂就而年阨之造物之于材岂其
真有所忌耶

送沈明府之竹溪二首

一骑芦沟畔西风落叶号那知花县客犹是竹林豪雾拥双飞鳥霞蒸八咏毫黄金
悬汉殿侧席待贤劳

暂握铜章去花封未寂寥囊琴辞上国岸帻望中朝赋就湘潭竹书传霁水苔吴娃
妆合畔计日候兰桡

少室山房集卷三十七

●钦定四库全书

少室山房集卷三十八

（明）胡应麟 撰

○五言律诗八十三首

永叔方舟豪饮即事十首时行次齐鲁卫间

彩服荣新命绋袍恋旧知河梁晨舣棹水国夜衔卮渡远携桃叶滩长和竹枝疎灯
解娱客花艳朴谈诗

锦席时先后清尊日过从荒城严夜柝遠寺咽昏钟意气红颜盛心期白首浓即今
元礼棹谁复共林宗

鼓吹中流发图书四壁陈高谈回丙夜大雅和阳春水驿驰关吏津亭候榜人雄飞
吾党事一快倦游身

海月维仙缆天风度客檣赋题新赤壁吟和旧沧浪泛泛俱西子依依但北堂江鱼
如玉雪满载大家尝

云霄惭比翼湖海豁遐心一驻青丝窄同携白玉琴清吟霞色烂剧语露华侵快意
篷窗下天池酌水沈

大有乘桴兴能无泛宅游垂天双翼左缩地寸心投卤簿黄河岸帆檣碧海流支机

懷袖滿昨夜到牽牛

携来双彩华寒夜互生花雪拥山阴棹星偕博望槎鴈声流古塞萤火乱平沙几忆
春明外长灯对棣华（恒叔问卿南改）

河朔当年事平原异代盟登仙班景倩为客孟云卿捩柁晨霜滑维梢宿雨晴如澗
政堪賦篷底百壺傾

击楫神俱王垂竿兴未徂飞谈凌海若长啸挟天吴玉佩仍三殿金尊暂五湖宁知
奇伟客唱和在菰芦

泛鷁垂冬半呼卢过夜分烛花深对酒囊草细论文湖欲名高士滩应号使君千秋
吾道遠未遣世人聞

舟中即景十首再呈永叔并寄李惟寅宋忠父二君

渐喜云天豁犹怜道路长大河风烈烈平野日荒荒迭浪芦根黑飞沙木末黄翻思
載圖籍片楫漾瀟湘

寒芦沙淅沥遠樹岸濛濛挂席天疑近揚舲地欲回登仙偕李郭望氣合張雷咫尺
扶搖思無嗟六翮摧

晓色南风正狂歌岸接■〈𠂔离〉鱼龙浮大泽鴈鷺掠荒陂贯月槎飞动冲星剑
陆离深知五湖客不为载西施

静夜衔杯坐天风袭锦袍推篷霜半入鼓柁月全高宇宙捐鸡肋河山划蟹螯何惭
古名士痛饮读离骚

天末归人兴临流赋式微长风箫鼓发细雨舳舻飞入馔黄鸡嫩倾箸绿蟹肥沙鸥
似相识檣底日忘机

剧饮嗤投辖长歌乐扣舷推敲残月下欸乃乱风前塹黑惊鸿坠沙明宿鹭拳将因
苕雪去老占孝廉船

土俗经行异风烟逐望遐猎人争雉兔罟客售鱼虾水栅平连市山城曲抱衙夜阑
浑不寐秉烛对栖鸦

此日逍遥兴平生汗漫游客星宁帝座卿月且仙舟巨镇临关出洪河抱驿流人烟
十万户问是古营丘

代北游真懒齐东俗未讹荒郊环枣柿古壁蔓藤萝宿雾冰生井微霜月度河塞舟
王子兴将奈越人何

一代交游盛豪华冠洛中有天皆碣石无地不新丰浮海怜孤客登坛忆上公并州
何处望老泪尽寒空

送李掾之南康

好去寻诗客聊同捧檄人云屏高岭外雪瀑大江濱水驿鱼成市山衙虎作邻琵琶
亭畔月一曲夜谁亲

南归仓卒宋忠父邀饯斋头不及赴寄别四章

飘零辞越日留滞客梁年忆过西宁宅频开北海筵观棋晴雪后秉烛曙霜前长夜
真堪乐谁令纵酒船

午夜携燕妓当年赋洛神草萦青玉案花亚白纶巾上国三千骑华堂十九人最怜
倾盖日局促侍车裯

横槊风流甚登坛意气饶上官留絶唱神女恋清标巫峡云来去昆明石动摇永懷
双玉树花下醉深宵（上官昭容评沈宋昆明诗见唐杂说）

赋颂元推楚才华夙擅唐九歌传正则十字叩宾王酿秫开霞馆烹茶构雪房东篱
携手别梦寐菊花黄

寄李惟寅兼懷王朱两生四首

咫尺怜分手徘徊各断肠离心摇海国泪目限河梁佩我双龙紫驱君独马黄廿年
弹指恨头白少年场

落魄长安市抽豪兴遏云醉呼严仆射狂揖卫将军玉馔遗鯖渥金羈簇马勤别来
知己梦愁絶乱丝纷

披褐宁高隱携书异昔游一身投蜀国十口寄并州幕借桓温府床移庾亮楼即今
离合事万感碧云秋

意气聯三俊声华轧四豪章徒腾薏苡贡已入蒲萄王粲从军乐（仲宣有从军乐
）朱家结客劳濠梁倏千里飞骑赠终袍

仲冬朔舟次南旺闰中暮夜得雄鐙下发书报家大人信笔志喜四律

庭树先春发阶兰入夜茸帝心怜敝族天意系衰宗璧社明孤蚌高阳兆一龙桑弧
挂篷牖差快浪游踪

图籍曾先世弓裘盼后人芝兰聊慰念梨栗漫生嗔谢氏庭阶茂陶公户牖贫尺书
连夜发先报白头亲

但说充闾庆都忘立壁愁百年今始慰五岳暮仍游入掌珠先媚看肌玉并柔荂户
三万轴累汝灏江头

作赋长安邸谈诗大海湄千秋吾自得再世尔何迟贵敢希龙种痴从笑虎儿蹉跎
罔极恨无计起萱墀

是夕寒灯结花甚艳蕾蓓若丛珠更赋二律

一夜寒灯色飞扬照客槎乍看丛绮树谁为撷瑶华绣幙笼丹雾纱窓晕紫霞支机
宁待卜天意茁兰芽

灯花寒更结喜色炫归槎金粟呈双穗瑶芝发九华光辉流素月彩艳烛明霞一慰
东山望庭阶玉树芽

夜半篝灯寒甚余推篷出则雪深尺余花艳若昼明晨两崕玉树璀璨成行永叔赋
诗以谢庭见况和龢二首

璨璨奇花发亭亭玉树陈吾宁湘水客尔亦剡溪人鹤展瑶台翅龙拖贝阙鳞故园

三畝在归思起垂纶

莽莽乾坤内悠悠一腐儒乍忻兰吐玉敢诧树呈珠八骏休黄竹双龙俨白榆（时新得家弟）含饴岁除日好慰谢庭趋

稚升席上再与永叔言别（永叔先还天台）

节序惊残漏睽携怅此晨平原曾十日河朔更三旬积雨留淮骑飞霞度海人书传二仙媛为扫石床尘

中叔衙斋小集

郡郭全披雾衙斋半住山狂吟修竹下沈饮落花间别梦将云到新诗问月删万峰京口胜历历待跻攀

暮登金山同永叔憩闵山人轩中

一龕聊避世絶顶见高秋舸舰维青雀轩窗借白鸥江风传磬远山月照幢幽瓢笠吾将去相携问十洲

郭叅知过访旅中赋赠

南粤文章吏东曹礼乐臣生花景纯笔折角介休巾鹿豕亲游屐鱼龙骇钓纶百年倾盖谊偏向白头亲

香雪斋为郭张虚茂才赋

茆斋余十尺香雪绽雕栏独树孤山老千花大庾寒高楼吹渐落古驿寄仍残欲唤娉婷语师雄梦未阑

送赵太学

尚宝传新命飞航怅别筵恩光龙阙下春色凤池前绿草燕山旆红蕖越水船相门经术在奕世重韦贤

次高唐旅邸戏题

旅迹真无定踟蹰旧驿堂朱榴晴缀火绿树午生凉冈势蟠堤曲河声嚙岸长将无梦神女地入古高唐

过王世叔舟中留饮同说仲君倩作时王世叔方出猎归二首

亦知金甲贵频许布衣游短剑携孤客长纓问五侯暮酣红日坠箭驶白虹流快意平原猎高天控紫骝

说剑楼船上霜华照辘轳将军长揖重处士少微孤日杳青油幕风酣白玉壶谁同霍骠骑横槊赋三都

是日世叔座中出八带鱼供馔余夙闻未覩即席复成此章

异族来东海鲜鳞出上都一身同水荇八足拟天吴玉筋餐偏美金盘荐未孤当年五侯客饱饫此君无

舟中观渔人举网再赋

宁知濠濮思咫尺在楼船水镜冰鳞跃霜刀玉鲙传鳌矾东海上鲈网太湖前后夜

披裘去寒星帝座悬

赠徐生皞民

岂是荆高辈沾沾易水浔屠龙先世业射虎壮年心斗室长悬剑匡床独贮琴长门
新赋就未肯博黄金

同厚之过灊元池上观鱼

翠幙清风远雕栏赤日微荧煌朱鬣动拨刺紫鳞飞南国鲈应美西山鳊渐肥长竿
一千尺归钓子陵矶

夜集王将军园亭留宿斋头二首

剧饮连朝暮狂歌动斗牛樽纔空北海榻已下南州绣褥明霞绽纱厨霁月流佳期
近三五重订庾公楼

邂逅青油幕观碁兴未徂为园当薜荔凿沼近菰蒲雨砌黄金甲风窗白玉壶不知
韦杜曲三过拾遗无

秋日同显卿灊元厚之过城南禅院小憩作

名香聊一炷山色满绳床初地谈真谛空门对坐忘维摩身是幻梵志爪偏长掷杖
吾将去西林下夕阳

同茅徐两生过灊元太学园中时秋海棠盛发剧饮畅歌遂至丙夜

曲榭延秋色名园傍午桥晨霜山果熟宿雾海棠娇绿水衔堤近青林抱郭遥参差
发狂兴醉墨满芭蕉

相国赵公以犀笋文绡见贻各赋一律为谢

制作商觚并珍奇汉笋留来从蛟室底颁自凤池头入水驱魑魅通天象斗牛何烦
百觥举一饮媿难酬

右笋

锦帐非金谷丝纶借玉堂青绫遥动色绿绮暗生光万缕含风细双絨衬雪凉寥寥
解衣事凝望碧天长

右绡

懷梅客生二首

授策纷纭际成功顾盼间虬髯铜柱塞燕颌玉门关选士迎黄石陈兵上黑山凌烟
三百仞图画定谁攀

油幕羣趋夜胡床独坐时浓霜花坠笛残月茗收碁兽锦中朝锡貂裘上谷驰呼韩
今絕塞忆共请缨时

徐象先订约同发而榜人留滞余待之不至殊怅然

望望幽并隔行行汴泗来城荒颓积棘殿古蚀莓苔尺水怜鱼服长途滞骏才夜看
双剑气能复射燕台

同吴叔嘉黄说仲憩开宝禅林浮屠雪山设伊蒲供并出纸索书即席赋得云字别

二山人

梵刹斜阳里孤舟系水濱竹林幽把袂兰若净论文古碣横苍霭疎钟出乱云宁知虎溪上一笑是离羣

雨过茅生赋赠二首（茅白云初成后）

一室长安市萧然静者踪途逢茅季伟夜饭郭林宗细雨花台奕寒飈竹院钟华阳何日返白眼卧千松

易水才容棹君垂百尺纶巨先原任侠方朔岂长贫坐有含毫客门多击筑人懷中双刺在肯逐五陵尘

夜泊彭城梦家君作二首

九月南徐路椿颜入梦频太行云唤客东海月迎人桃叶新歌扇芦花旧钓纶篋中莱子服先拂上阳尘

乍辍三更枕初回万里航眼青犹上国头白正高堂厯厯瞻鸿羽呱呱忆雁行应知海筹屋遐算八千长

甓社湖作

行行南服近望望北辰孤巨浸浮三峡惊涛入五湖蛟龙晴自斗鸛鹤夜相呼明日江东客相逢鮠玉鲈

界首晚泊

系缆依高树推窓坐短篷地偏秋积潦湖近夜生风鮠缕银条白粳炊玉粒红飘飘苾萝梦渐过越台东

惠山泉上小憩薄暮入僧房观王孟端竹垆

玉井甃银床山泉喷石梁江宁擅扬子谷岂后康王石鼎流云润铜瓶贮月凉竹垆煨茗茗彷彿孟端狂

卢使君追步隱侯作后八咏诗不佞次题倚和倚檻思民力

碧檻抱朱楼高凭动斗牛桑麻深遠墅禾黍匝平畴渤海仁风遠宣城惠績流踟躕念民力漫拟仲宣游

瞻斗望京华

静夜胡床坐遥瞻万里还清光流北极爽气动西山鹤羽思仙迹龙鳞忆圣颜异时香案吏翘首玉宸班

芳圃伤啼鸟

复道春风起黄鹂昼满林间关流叶底睨睨出花阴绮陌传金缕纱窓和玉琴愿偕韶濩响一奏未央深

名园惜落花

把酒高城望春光正暮天落红深小径新綠涨平田粉翅迷蝴蝶芳心泣杜鹃谁怜隱侯病憔悴百花前

署府闻秋笛

何处拈长笛飞声弄月明梅花千万树一夜落江城隔座桓伊思登楼越石情洞庭秋水阔嘹唳雁鸿鸣

江城暮听笛

幕府秋笳起随风度海瀆哀音摇落日逸响度寒云断续边鸿羽飞扬塞马羣万方烽燧熄无拟玉关闻

倦游懷畎亩

岂为东方戟沾沾旧草堂风流传蜀郡政绩重淮阳海岳闲情遠云天健翱翔故园聊寤寐前席待龚黄

高啸隱烟霞

逸兴黄堂上高情碧海涯勋庸留社稷寤寐落烟霞八邑声同着三朝望正遐阳春谁倚和万古诵瑶华

贈狄将军鼓琴双鬢（有序）

黄河遇狄明叔沙棠联下雄饮达旦凌晨策骑同登彭城子房山南望云龙放鹤诸阜狄生连醺巨觥余命小溪吹铁笛振袖絕颠超然遐想昏黑还舟明叔盛为具呼小鬢鼓琴侑觞余醉而复醒数四榜人告东方白久乃罢许为狄作长歌先赋此贈侍者

追欢连日夕小队出霓裳入指朱弦媚含情綠绮长新声传舞鹤旧曲和求凰何似歌桃叶盈盈在画堂

挽杨明府遇二首

夙昔俱童稚亲情四十年寻诗燕雪底作吏海云前草辟依山墓蓬侵负郭田丰城坠牛斗谁掘两龙泉

一病归何早空斋种白杨尚期中散出不谓太玄亡旧宅扁南院新阡树北邙乍宵邻笛过涕泪尽山阳

送郭广文之南康

射策时方弃明经路未穷衙斋飞瀑底驿路乱山中赤叶明枫树黄花绽菊丛琵琶亭上雨秋色正连空

送王中叔比部北上二首

乍拥三秋楫言乘八月涛日华仙掌近云色帝城高狱底占龙气池头忆凤毛羨他词赋客强半在西曹

大旆飞红叶闲门闭綠苔双蛾辞玉洞独马赴金台瓮挈中泠去藜招太乙来君王受厘夕刺刺叹雄才（中叔以润州倅迁）

送陈广文自上海迁池州

乍夺唐宫锦仍浮汉使槎岸枫霜染叶篱菊雨催花地坼行三柳天穷望九华异时窥绛帐问字几侯芭

寄王伯固明府刘百世茂才

尚忆南皮饮围炉夜唱酬仲宣才冠世公干气凌秋藜阁新编启兰亭巨轴留重逢
定何日冰雪倍离愁

少室山房集卷三十八

●钦定四库全书

少室山房集卷三十九

（明）胡应麟 撰

○五言律诗七十一首

吕梁阻风呈徐使君

彭城遥骋望突兀见黄楼骤雨悲泥滑狂风畏石尤千山攒地出一水抱天流
徐车骑干旄控上游

寄李景颖

一骑长干去千花簇佩环寻仙句曲洞作吏秣陵关风吹金门寂龙旗玉座闲
宁知斗棋夕梦入烂柯山

赠王生

不假茆为杖偏宜杏作林五龙扶蹻远一虎住庵深古洞探瑶笈名山弄玉琴
丹砂勾漏满计日化黄金

夜集王太仆听歌

列炬明妆出寒宵兴未涯翠翘偏束凤青鬓俨涂鸦艳艳珠摇月亭亭玉照霞
细听桃叶曲身在骑曹家

寄王山人

役役浮生老谁同战胜肥生涯南畝秫世事北山薇短笛吟苍霭长铗斲翠微
异时眠帝座星斗动龙旗

送黄生六治还滦州

翩翩江夏客才望世无羣旅兴残春雪归心促夏云吴歌新白纻楚黛旧红裙
惆怅平康陌芙蓉折剑文

佛日少傅赵公设供斋头兼抱新诞两郎君出拜纪以小诗

绮阁仙云曙黄扉佛日晴隋珠双照夜赵璧互连城学语翻多态回眸欲寄情
异时符抱送花萼照蓬瀛

胡静父邀集斋头赋

■〈才弃〉作扶筇过谁言病未能长吟飞绿醕剧语坠青灯射策空三殿
佣书遍五陵十年湖海梦行脚愧孤僧

野寺古槐奇绝亭亭如车盖四望皆同树身屹立丈许其颠折为五枝折处宽平可
四人箕踞坐余挈胡茅两生散发豪饮其中日暮乃下

古树空王宅重来一抱琴清阴浮广殿黛色挂遥岑薄暮凉风动先秋皓魄临南柯
尘梦断千劫护丛林

落落苍鳞皱亭亭翠幄悬百围全蔽日千尺竞参天老干巢孤鹤踈枝咽乱蝉漫夸
丞相宅瓔珞梵台前

过吴生夜饮作方徐茅王诸少同集

落日襄阳道闲来醉叵罗狂夫能剧饮稚子亦清歌卷幔当红药移灯就绿萝平生
双白眼花底暂婆娑

偶挟荆高伴过从趁晚凉飞觞临广陌秉烛坐虚堂万事消诗癖孤踪剧酒狂兴来
频散发宇宙入高阳

题黄隐君静轩册

青山鹿门宅大隐自何年密竹披三径长松翳四筵鲲鹏秋偃息鱼鸟暮留连曳杖
南邻客时时问太玄

夜集黄燮卿言别时余将暂入都门

紫陌居相亚玄亭路不遥携琴斜照落击筑断虹飘逸兴舒河朔离心怯灞桥■〈
才弃〉成千日醉徒御发深宵

寄李逸人

自得丘中乐闲居鬓欲皤青精邻叟共白堕野人过缓步依松竹长吟向薜萝漫愁
归路湿湖上有渔蓑

赠月仙为蔡茂才

问竹来朱户如花出玳筵飞觞霞外客鸣佩月中仙艳色蝉光堕佳期兔魄圆相携
广寒榭长夜奏钧天

赠陈生即席

咄咄陈生在相逢尚黑头风传中散弄月照广寒游织屨长楫户担簦不卧楼醉来
双眼白未慑武安侯

赠支山人

早挟长桑术青囊不记年悬壶居小市击筑问高天逸兴燕台上狂歌汉阙前将因
被裘客归钓洞庭鳊

赠杨生叔嘉

宛尔清扬客翩翩玉不如看花晴曳屣掷果暮回车意气红颜外声华绿鬓余即今
逢逸少白练为谁书

座中有名莲萼者持扇乞题即席赋

烂漫芙蓉色居然似六郎朝云团翠盖夜月舞红裳景夺前溪丽香飞太液长空令
李供奉极目紫骝傍

邓逵游以八章见赠推挹过当奉报二诗

有美青云客才华蔚邓林中原驰捷足上国缔同心磊落千言赋飞扬七步吟寥寥
燕市筑一击为知音

屈指词场彦翩翩意未降过江原第一华国定无双稍结名流袂终塞上将■〈施
，童代也〉生花宁梦寐五夜笔如杠

送胡将军之辽左

片雨都门霁飞花照别筵旧持横海节新隶伏波船鼓吹渔阳外旌旄鸭绿前归来
歌杖杜金印出甘泉

乍拂千金剑仍为万里行长纓纓北望大纛赋东征巨鹿云连塞卢龙雪照营春风
蓟城畔猎猎动飞旌

胡鸿胪五十举子诗以贺之

书来沧海上喜色耀门阑天阙珠呈树阶庭玉照兰纱厨回霁色绣褙怯春寒冉冉
凌云翻无忧暮景阑

题陈山人画松二首

半壁岚光润高堂露色浓宁同居士隐不受大夫封翠羽疑藏鹤苍鳞欲化龙何年
值韦偃洒墨傍孤峰

悬崖一千尺谁写碧綯缦直干遥撑雨疎枝乱拂云天台寒影落灵谷夜涛闻恍惚
萧郎管狂挥白练裙（萧子云书如孤松一枝）

王至卿乘輿见假赋谢并期试事入长安

烨烨青油幟平分片诺中乘輿劳郑相蓝輦狎陶公未拟驱金犊宁须跨玉骢燕台
百里近六翮趁天风

寄李长史

一为珠履客十载滞邯郸此夜丛台月应同易水寒壮心犹蹶屣华发渐盈冠几度
黄梁熟卢生梦未阑

王生母六秩乞诗

灿烂支机色华筵瑞霭笼星桥宁驾鹊雪案祇丸熊玉洞三芝紫瑶池万树红剧怜
双彩袖膝下舞黄童

送易山人

老作平津客囊金出塞多千花离紫陌一苇度黄河釜泣归时梦盆伤醉后歌东篱
秋咫尺扫榻向藤萝

题郭金吾册

金吾行乐地潇洒接蓬莱玉树双茎长琼花四座开晴光摇院落春色遍楼台一梦
羲皇杳池鸥莫浪猜

王至卿借骑入长安赋谢

未遘中涓访犹勤上驷来壮心悬伏枥逸足借登台■〈足必〉跋看龙种飞腾羨

骏才天闲云五色矫首见蓬莱

题韩节妇卷

蚤遂殒身愿都忘剔目愁结襦才六月悬帛已千秋大节冰霜擅贞心铁石留祇应
连理树一夕冢前抽

贺人得雌并慰之

春色画帘中衾裯瑞霭笼兰肌初浴雪蕙质乍含风梦岂熊罴异苞应鸞鷖同连翩
燕姑梦孔释下遥空

同王行父管建初汪公干谢彦云集区太史馆即景分赋余得盆中紫茄

宁知草莽质邂逅入金门湛露晨披叶仙霖夜沃根桃绯殊度索瓜紫羨昆仑却笑
于陵客携锄傍帝阍

何来天禄畔绕砌列嘉蔬玄圃删云种青门抱月锄含苞花烂漫缀实树扶踈一饱
堪晨夕那能赋众狙

送郭尉之河南即席赋

澹澹芙蓉幕君权一尉行官衙漳水岸帝苑洛阳城宝剑冲星发银箏抱月鸣黄花
蓟门市满掬照离情

挽陈太夫人孝廉仁夫母也

一夜青鸾札流黄罢锦文去逢瑶水使归伴玉华君楚佩俄捐月秦箫暗拂云那堪
北堂畔风木骤纷纷

挽胡太夫人为太学灏元赋

丸熊闻淑媛跨凤逐仙娥晚日凋兰蕙寒风废蓼莪佩环新玉阙机杼旧银河踟躅
春晖恨霓裳隔大罗

送赵参军

矫矫平津客林间识仲容传家留一鹤入幕佩双龙树色辽城近花香汉殿重尚期
明月下忆汝泛芙蓉

寄黄说仲

屡入参军幕频依上将幢华名今第五隼誉旧无双倚马才仍捷歌鱼意未降经旬
会偕汝千顷濯长江

寿赵隐君

茆庐仍负郭户外绿阴重几夜裁玄草频年事赤松双溪云坠笠四洞雪沾筇却笑
龙门史低眉传素封

寿毕中翰太夫人

澹澹西池酒笙歌拥百壶三珠呈海国片玉耀天都札付青鸾否箫迎彩凤无丹砂
满庭砌昨夜到麻姑

送沈广文之侯官

日暮河梁畔归帆趁北风一毡初就日双剑旧如虹驿路蒹葭外斋头苜蓿中飘飘
幔亭宴霞色近人红

送章博士之昆山

共作燕台客君归思欲狂双鸿驰海岸独马倦河梁故国兰苕近新斋苜蓿长昆冈
偕片玉献岁到明堂

送张生还四明

一樽残岁别挥手各凄然野冻层冰外山明积雪前貂裘秦苑敝鸟迹汉京传到日
寻安道应维入剡船

感事二首

五畝荒犹客彷徨素发侵年华趋老大诗思入沈深絕域舟车梦危途剑戟心飘飘
灞陵雪无赖入衣襟

滥逐齐门好真逢蜀道难百忧攒鬓底孤愤迭眉端布被翻霜薄绋袍绽雪寒苍筤
富春渚老尽钓鱼竿

题杨母册为其子舍人

纶綍飞青琐恩光下紫宸龙章双阙耀象服九原新宝篆传金母珠襦映玉人惟应
寸草念百结遶三春

期曹能始登岱二首

一尊高馆暮下榻意偏勤旅兴穷燕雪归装促岱云箫传双凤吹剑合二龙文何限
赓酬事无令洛下闻

夙订金兰社聊辞玉笋班片帆同挂海双屐互登山梅柳争春发松萝结夏攀天门
和梁甫声振白云间

送曹能始游盘山

胜欲穷三辅幽仍问五盘轻装凌曙色短褐耐春寒壑窟云全卧峯明雪半残帝京
楼殿近百里见朱栏

过杨不弃索其丹青适大雪盈尺即席题

怪底春城雪从君笔下飘飞花藏遠寺古树折平桥驴背吟方剧龙团兴未销倪迂
倘留客清閤日相邀

再赋

飘然逐朋好来过百花潭雪照蓝田画风生碣石谈落梅俄塞北飞絮讵江南极目
招提上同云遍郁蓝

题梦竹卷为吴孝父山人

亭午华胥国翛然万玉长吹箫疑嶰谷捩柁即潇湘雾色偏笼座风声半入廊何当
挈刘阮斗酒日相将

江村卷为吴太学题

新安江色近一曲抱村幽日暖靡芜岸风恬杜若洲亭台通鹤径篱落系渔舟四百滩头路将因到子猷

题张文仲母孀节卷

截发甘扃户同心怅结褵百年蒿里梦五夜柏舟诗熊胆含辛日鸳衾入梦时斑衣张仲在好为赋瑶池

过皦生斋中即席题

萧然一凭几兀坐万缘空旧茗犹含绿新梅半着红山疑摹北苑石拟赠南宫好觅金波句清尊后夜同

别章敏学

青丝绾朱榼追送潞河浔寂寞穷途泪支离故国心晨炊投古戍晚宿寄荒林何限浮云色双龙入梦深

同徐文明六客集竹里馆时余太学为主人

屈指春光半寻芳兴未穷竹溪偕六逸花墅挟双童剧饮妨归骑清歌落断鸿遥看燕市月冉冉入帘栊

入长安路逢徐文明苍头持新作见贻和答

轻寒策羸马■〈足敝〉■〈足薛〉向风尘筑问燕山社帆留潞水津浮沈金騶裹飞动石麒麟纵目春明外花朝万树新

过徐文明邸适陈长芳在坐作

欸段春风里频遊兴独狂抽毫寻孝穆卧榻对元方云似飞天姥霞疑挂石梁芙蓉双灿烂午夜梦干将

载过曹能始时能始入长安余暮留斋头翌日题诗壁上

夜扫陈蕃室春云绣褥温敢言龙卧榻无复凤题门西笑非吾事南迁亦主恩长门会题赋汉武欲消魂

胡静父携盒过大槐寺作

拂曙青丝榼提携潞水东为寻芳草色重到大槐宫老干排丹壑疎枝碍碧空黄梁炊渐熟千劫梦魂中

野寺别于凤鸣李惟朴两生

寻幽来古寺霁色傍禅栖剑岂双龙隔门难一凤题夕阳高枕外新月乱帆西共惜天涯别何妨醉似泥

赠汪生

暂卸东山屐言乘泛海航遗书观鲁甸古乐问齐方白鬻鼓高座红妆醉曲房踏歌潭水畔人识姓为汪

寿吴隱君希学七秩

君平曾寄蜀尹喜尚留秦杏植三千畝桃偷七十春壶中长宇宙履底半星辰白日

飞鸡犬无劳颂大椿

再游大慈岩三首（前卷遗去遂补入）

仄径攀萝薜明霞挂石梁危崖常堕虎怪石尽成羊绿筱千林合青松半壑藏云房
遗象古恍惚见齐梁

不倦探奇足名山到处寻笋舆回谷口萝殿出云心绝壁千松挂高空万籁沈不知
傅大士何代布黄金

径草重重绿岩花处处红猿声山寺合鸟道石房通峭峡行无际平畴望不穷世缘
吾欲断笋翻上天风

少室山房集卷三十九

●钦定四库全书

少室山房集卷四十

（明）胡应麟 撰

○五言律诗七十六首

侍御叶公初度赋柬四章（时中秋后五日）

白鹿梯仙境青牛柱史台东华晴旭现南极瑞云来玉蕊凌苍柏金茎映绿苔黄封
将湛露潏滟出蓬莱

豸绣辉瑶席鸾笙奏玉除红云三岛近白露九秋余祝颂填宫观讴歌沸里闾西泠
木兰棹花色拥芙蓉

曙色重关外湖山列寿觞桂圆犹八月菊吐渐重阳紫凤新辰极青鳧旧上方天风
何处落一曲度霓裳

绣斧清朝出光生大海涯梅盐征相国柏酒送仙家乌履排青汉衣裳逗紫霞钱塘
十万户箫鼓沸蒹葭（公时按鹺）

送吴山人吴时为桃花会

丰乐桥边路相逢鬓未皤形骸长土木梦寐半云萝洞口铭题鹤池头帖换鹅桃花
飞欲尽晓发奈愁何

题胡京孺三缄斋

玉尘挥仍置金人戒不忘谭宁空稷下辩已讫华阳塞兑遵玄圣冥心对上皇白圭
晨起诵三复意何长

林孝廉以黄尧衢书至并新诗投赠报以此章

席帽戴残阳翩翩白面郎登龙年尚少系马日偏长万卷窥藜阁双钩合草堂寄声
黄叔度夜雪待孤航

永叔坐中戏赠奕者郑童

十五侍王郎盈盈坐隐囊雄思驰虎穴险欲控羊肠玉洞青霞丽金庭白日长毋懷
陆郎橘高跨赤龙翔

寿陈翁

大隱聊城市青霞渥妙颜一壺悬海岱双屐占湖山绕砌兰芽茁当楼桂魄闲中宵
占紫气已到穆陵关

午日访吴文仲使君适湖上燕集寄柬二律

午日寻芳候千秋祝圣年楼船浮别岛箫鼓列长筵紫翠仙城出丹青梵刹悬金闾
折垂柳何似越门前

骑吹千山外招寻总胜游蒲觞飞别墅桂楫竞中流日涌江心镜霞增海上筹天颜
欣咫尺一望翠云裘（吴公以万寿入都唐人祝贺用镜水心镜以午日铸唐小说中）

次日集明府斋头长君文学侍坐

依然五杨柳丈室卧东皋海岱骄鸿翼林塘狎蟹螯飞觞春色浅秉烛夜谈高冉冉
凌云气池头着凤毛

狄叅戎邀集园亭观女剧即席赋

将军西第燕奏伎郁金堂樊素先登席秦青正绕梁巫云飞绣褥楚雪照罗裳不尽
淳于兴留髡夜正长

飘飘青鸟使晨迓白鸥羣艳舞偏倾国娇歌尽遏云江深桃叶度滩远竹枝闻不分
黄花色霜前扑画裙

罗生馆中阅伎作（是夕奏梁辰鱼吴越春秋）

逆旅愁无赖良宵兴若何纤腰呈楚舞稚齿发吴歌院落飘红雾楼台驻绛河扁舟
拉西子蚤晚若耶过

为探倾城色聊停上汉槎兴移金谷树春满玉台花益寿懷差壮安仁鬓未华异时
云水约珍重越溪纱

同方上舍集施山人二首（时立春前一日）

旅况新年接乡心故国同吟犹懷洛下语渐识齐东径草初回绿园桃欲放红朝携
双蜡屐南陌斗春风

柏叶孤城蚤梅花絕域迟暂将春雪兴同醉暮云时白练毫飞洒青灯剑陆离吴歌
夜阑发星斗墮敲棋

王将军邀集西园赋时大雪初霁

将军西第近曳履暮追游不夜开瑶圃先春宴玉楼月窥庭树上云逐剑花流片石
燕然顶嵯峨待紫骝

张博士过访赋赠二首

世业明经旧家声作赋隆四知传汉代三絕擅唐宫匣剑芙蓉丽盘飧苜蓿穷何人
问奇字旬月坐春风

萧然广文邸半榻拥青毡著述河汾后扞趋泰岱前虚堂时系马高座几悬鱣咫尺
侯芭在花时过酒船

送周新之

久事元戎幕新辞上客行雪深离瀚海潮落到钱塘射虎矜衣窄歌鱼笑铗长小乔
妆阁畔计日望周郎

送汪生归大鄣

客邸怅离羣连天木叶闻囊琴凄鹤调匣剑隐龙纹野冻黄河雪山昏白岳云严陵
吾旧宅一讯孔珪文

潞河遇陈子卿同饮胡澱元斋头即席赋梅花下

白社元同调清风忽故人荆高逢易水干莫照延津谒帝心期壮封侯骨相贫梅花
斋阁底沈醉异乡春

陈生出所藏半照及匕首乞诗为离合作五言律

惜别佳人意酬知列士肠妆台分凤影宝匣现龙光莲锏谁同铸菱花意对藏乐昌
何日返见汝合干将

送赵别驾

参军曾入幕别驾复移舟渌水莲花隔清溪杜若留莺声吴甸晓骑火粤山秋好作
师雄梦罗浮问旧游

春日胡茅两生访王至卿携妓东郊藉草畅饮迨暮泛舟从北郭归

拂曙蓊门东寻芳入乱红园梨娇堕雪堤柳净含风逸气双钩并清歌一棹同盈盈
美人意怅别夕阳中

赠唐山人二律

暂辍严陵钓悬壶向紫宸仙茎携沆瀣帝座问星辰白苎新燕客青囊旧越人昆明
泉万斛花里试垂纶

彩笔神飞动青囊术有无看松留泰岱采药望天都雾引车前鹿云迎舄下鳧异时
沧海色千古属潜夫

和吴茂先悼亡

王生驰梦日潘令悼亡年雨灭巫峰外云沈洛水前笑言孤枕共形影一灯悬好借
文成术纱厨望昼眠

于凤鸣携酒慧觉禅寺作

寻幽偕赋客古刹乱云傍优钵千花净菩提一树芳谈天游净乐扫地坐清凉欲共
寒山衲西归不二乡

赠真头陀

南州来赋客北苑问高僧佛土穷三界人天度七陵孤云晨拓钵大雪夜传灯便欲
逃禅去风旛证惠能

再赋同吴生

问法来方丈清斋供野蒲高禅逢普化古佛现毘卢大悟三乘彻真空一念无那能

将宝筏咫尺济归途

座中赠吴隐君

梵刹金银布人天下夕阳菩提千界净荷芰六时芳渺漫恒河筏蹉跎劫海航凭君
畏垒下一授卫生方

赠郑生

卜居仍海峤门巷一壶悬采药陶弘景迷花孟浩然星垂漳水钓月引卫河船纵目
金华顶羣羊正熟眠

吴生谈鲁连台在辽城东北未有题咏余素高其节侠即席赋此

■〈山截〉嶠高台畔犹传侠客名千秋余故垒片札下坚城晚日残花坠寒云蔓
草平谁言蹈东海风驭入蓬瀛

吴希学斋头鹦鹉学语慧甚戏赠此章

似汝聪明质谁将闭玉笼乡心驰陇右野语狎齐东倚竹身全翠餐桃颊倍红秦宫
三十六一一诉春风

赠耿中官

萍梗淮圻北桑弧碣石东心长悬魏阙疏屡入隋宫色相三途幻因縁四大空侯鯖
频日履拂袂近春风

送倪明府

烨烨兰阴里铜符羨昼游鸣琴聊寄傲岸帻正风流桂折罗浮顶梅探庾岭头黄金
台百尺独步伫骅骝

赠盛明元昆仲时余将卜居葛湖之傍以诸子翩翩雅尚有足依者焉

盛世坝簏合翩翩逸兴同六龙齐颖上三凤倍河东玉树聯花萼琼枝压桂丛沧浪
分一曲肯着杜陵翁（诸盛凡六人）

高门懷伯仲上座集贤豪对列三珠树同挥五色毫披襟怜尔辈结袜愧吾曹老大
才名尽惟应把浊醪

题湖上方舟四首（有序）

舟下联三小蜻蜓艇上覆方板衡径丈许纵倍之栏檻四列顶幕青油中二髯几可
坐十人寬平轩爽規制甚适盛明元氏昆仲所创以待宾友之泛湖者余既日以杯酒从
事遂赏以五言四章

桂楫漾沙棠朱栏十尺强三舟聯锦缆四柱簇牙檣障日青油丽凌风翠黛狂洞箫
明月底一曲和沧浪

平湖秋色净一舸系蒹葭懒构思光宅堪浮少伯家窥帘鸣鹤鹤掠檻度鱼虾竟夕
看明月无劳促曙鸦

薄暮方舟集芙蓉次第寻台惊浮水面亭似压波心雅称苕川钓偏宜笠泽吟浮休
定何日一壑畅幽襟

湖上暮云稠青丝荡碧油移舟过巨石浮筏向中流拟作张骞泛真同郭泰游余将
挈佳丽日醉大堤头

盛母孀节诗为思达思弘题

盛世高孀节光增婺女奇志坚初矢日年倍未亡时片玉懷中抱双珠膝下遗桃花
三月近戏彩傍瑶池

赠云涛祝生所狎美人也

翠袖拨箜篌居邻八咏楼云偷巫峡曙涛占曲江秋经卷王姬诵诗笺薛媛留何妨
祝融氏同赴烂柯游

思齐夜出杨瓜佐酒稍异常者讯之知杨姥得诸异人即席赋此

何代贻嘉实累累越水涯称名同邵圃问姓是杨家五色紫丹洞三浆烂紫霞异时
营子母萝蔓日交加

赠李广文

旧国天都近新斋婺女悬彩飞江令笔青挟郑公毡三洞云携屐双溪雪放船无夸
沈侯句苜蓿诵嘉篇

送柳使君之南雄

五马趋西风朱旛气槩中淮阳移长孺蜀郡待文翁梅发新邮使棠飞旧寓公罗浮
峰四百蹶屐遍秋空

送王廷尉还东阳

昼游兰渚上花色艳簪裾旧翥双鳧舄新驰驷马车红云燕日近绿水婺星虚藉藉
张廷尉高门葺故居

送沈明府之江右

五马昼飞扬双龙照夜光公庭高岳底官廨大湖傍旧燕虚平乐新恩出建章为知
良吏传藉藉赞龚黄

暮秋病肺梦中作时有鼓盆之变

微霜九月朔一病罢登台熟睡蝉声里柴门午不开茶烟萦翠筱药裹翳青苔兀兀
巢居子尘心且未猜

竟日焚香坐丹枫敞画屏参同原有契道德岂无经白露高涂屋青山远抱亭那能
世緣縛华发已星星

题赵鸿胪文镇西园并蒂黄花

并蒂秋难老同心暮更嘉金茎双濯露玉蘂对凌霞色映天随圃香飞靖节家翩翩
白衣过把酒兴无涯

花朝吴孝父邀集高深甫湖上园亭

名园总宜客春半大堤头渌水时扃户青山日满楼携壶新雨过挟瑟乱云流漫惜
花朝宴■〈足戚〉成列炬游

送吴文仲使君并懷参知睿父二首

鼓吹钱塘驿帆樯趁暮潮双龙初析羽驷马暂停鑣绣钺吴门近牙旌越岭遥异时
成握手列炬坐深宵

后乘遵吴苑前驱问蓟方瞻依犹大树蔽芾尽甘棠雾蹶三天紫云停六洞苍提携
更何日烂醉旧高阳

寄吴希学征士兼懷启元茂才

万事总长铗一身余短筇别三天子障吟五大夫松沧海有时涸丹砂何岁逢周顒
卜居近忆卧定林钟

过俞羨长小饮二首（有序）

羨长寄居吴山之麓四壁萧然仅图书盈篋笥余为欸语移日归写其风素成诗二
章

极目函关晓居然异气停姓名高逸传身世太玄经独鹤云踪杳双龙电色灵孤山
梅万树新着少微星

四壁图书满藤萝压座苍陆浑新邸僻阳羨旧田荒大业占毛颖雄心托杜康褐衣
吾自贵未拟谒金张

送汪山人归四明四首

两鬓懷人短双瞳作客方文渊神矍铄叔夜思昂藏薜荔裁衣古兰荃结佩芳戴颙
精舍近归卧白云长

相逢宁海岱对语即江湖肯抱临淄瑟聊携督亢图官衙吟苜蓿客馆寄菰芦异日
山阴兴能来白玉壶

玄亭吾久闭问字不辞劳妙诀青囊古雄谈白氎高东瀛朝濯髮北海夜持螯极目
河梁雨寒光隔佩刀

邂逅青山陌飘然思不羣乍归鄞海月长啸激溪云剑拥苍精气符悬赤伏文东山
逢谢傅好作片鸿闻

挽祝母

飘飘易迁驾凝望白云长桥迥分乌雀台高失凤凰东陵辞圣母南海谒空王何夕
双溪水重悬婺女芒

唁祝逊之

传闻倚庐客布帽碧山阿读礼依松柏传诗废蓼莪熊丸魂梦遠鸡骨泪痕多迢递
支机石无由问绛河

谒董江都祠二首

太息江都相遗风尚宛然帷疑曾下日园忆未窥年大业尼山后真源洛水前天人
三策在不废万年传

一径浮云入千崖落照明广川新庙貌繁露旧家声水綠平吞市山青半压城九原

人可作相对话西京

寄潘上林二首

南海潘上林少丞光禄伯子也尝共集黎秘书邸雄饮达旦别去廿载矣今春余卧疾武林忽远寄手书新刻盈篋烂然慰藉之余聊寄兹什

廿载长安陌君能忆酒狂片鸿来庾岭双鲤到钱塘赋草新藜阁诗篇旧柏梁春明退朝晚掷果遍奚囊

忆弱冠燕中惟敬少丞朝暮游往或浹旬不面则咸诧为疎乃今诸侪辈略亡存者即君华吏部丧逝继之河山之感触目飞动今覩上林君羽翩翩典刑如在重赋此章

落魄南皮社壶觞数往来夜眠光禄邸晨叩秘书台永絶抽毫彦犹余执戟才重看潘骑省题赋入蓬莱

寿王山人子英

初度逢元日华筵正七旬遗经藏甲乙秘篆授庚申庭树三株发阶萸一叶陈共欣兰水上比屋颂灵椿

宅寄吴山外筹添越海傍玉壶悬大药金匱谒长桑紫府青牛驻玄关白鹤翔东风门第在拂面杏花芳

送黄野人二首

倦作兰阴客花期一棹闲真形模五岳秘篆授三山电掣苍龙下云驱白鹤还越王台渐近先到若耶湾

自得茅山秘休粮卧翠屏铢衣朝绛阙玉简诵黄庭六甲时观象庚申夕炼形石床云雾满悬佩湿青萍

题黄上仲大有山房卷

吾怜黄叔度一榻抱云眠早赋中原雪长吟大有天瑶芝荣积石玉乳喷飞泉笑我金华洞羊羣正熟眠

少室山房集卷四十

少室山房集卷四十一

（明）胡应麟 撰

○五言律诗八十九首

破山寺偶题

高禅何处寻杖屨入祇林古寺无人到虚堂落叶深溪光经雨灭瀑响过云沈兀兀绳床客谁明定慧心

送王文学还武昌时以陈从训书至

问姓曾惊座藏名类接輿到偕京口雁归趣武昌鱼竹素千秋上芸编万帙余相逢不成醉天末意何如

灊溪别业二首

茅庐南郭外十畝带横塘曳杖青山遠飞槎渌水长花香浮雪壁竹影动云房五岳游堪卧悠然号上皇

卷帙桓谭富篇章杜甫贫乾坤容傲骨海岳遂闲身坐挟垂纶客行招荷锺人一痴殊未厌久已絶贪嗔

寿范茂才

当年闻五范阙阅首吴中咫尺金闾下仍看玉树藂青鸾翔海日白鹤舞天风漫逐东方去冰桃万核红

叶太孺人挽章六首

懿行标彤管芳声动紫宸庭前驄马客膝下豸袍人南岳金珰返西华玉佩陈惟应万家泪雨注婺州民

鸾章晨北极风管暮西池万室悲慈训三朝颂母仪修龄逾大耋上寿接耆颐咫尺潘輿在伤心白日驰

劬劳初罢诵圣善旧征歌母德传中垒仙踪赴大罗音容吴里隔涕泪越天多寂寂支机杳无由觅绛河

惨淡丸熊夕辉煌冠翟年宁知蒿里泪偏洒柏台前素翼含霜动丹旗抱月悬异时良史笔阃德照重泉

令誉中闺擅恩纶上国来青鸾朝玉阙紫凤集瑶台落日萱花逝飞霜蕙草摧朝看携萼绿聯袂上蓬莱

何来三鸟使相逐绛台傍夜月残西岛晨霜浸北堂丛兰芳独遠寸草恨空长尚忆飞云起停车望太行

湖头夕泛

十里平湖色芳菲夹大堤山回云梦泽水出武陵溪渚淨鳧鹭浴篱明鸟鹊栖沙塘何处泊隔港已闻鸡

送李太史使湘中

片帆春草外千里问衡阳剑履金闺色衣冠玉座香攀云游岳麓冒雨宿高唐蚤就湘娥赋鸣珂入建章

宿严滩作

扁舟富春渚回望灏溪瀆渌水晨生雾青山暮出云荒村猿啸侣废崦鹿成羣会着羊裘在毋令汉殿闻

望湖亭雨中作懷祝鸣皋

极目危栏外秋光乱夕春雨声千涧集云气两湖重翠压仙坛竹青舒佛院松美人烟水畔何处采芙蓉

一梦

一梦遥天末羈人万里心关河秋气早风雪夜来深拥褐闻征雁褰裳见宿禽谁哉

共尊酒烧烛自长吟

送刘内翰使岭西

拂曙下征轺鸣鞭出灞桥方與穷百粤土俗辩三苗树色桃榔古花香荳蔻饶金门
持戟暇魂梦忆琼瑶

彭城云龙山晚眺憩项王故台并酌亚父冢有懷题

返照长河急浮云大泽空遥凭孤阁上俯眺万家中地废悲王略天亡惜霸功荒坟
犹亚父涕泪尽城东

送李鸿胪之白下

白面紫薇郎承恩出建章啼鹃催别骑舞燕逐征航日抱金珂影星摇玉剑光秣陵
佳胜地蚤晚赋长杨

送闵孝廉之苕中二首

落日抱离旌萧萧白雁鸣夕阳孤剑别秋水一帆征粉署宁亲思彤扉谒帝情河东
新草就珥笔上瑶京

野色飘行旆江光照客船长林枫叶路孤馆菊花天狗监文初达龙门赋已传浮家
何日事问汝霅溪烟

九龙别业

何年遗别坞十畝乱云边五柳长垂碧双松对草玄断崖撑阁迥飞瀑挂亭偏满目
忘机客花时数放船

问李惟寅病

已似休文瘦还耽叔夜吟梦回芳草遠病起落花深雨泞黄金甲风疎白玉琴蚤知
朝谒懒药餌称闲心

寿吴淑人

春色重帘外笙歌昼未阑屏开回白鹤席上舞青鸾浥露金芝秀凌云玉树寒冰桃
漫留核方朔已偷残

吴山人持斋戏赠

笑汝清狂客持斋绣佛前周顛元护法何胤旧逃禅岭砌须弥石池疏阿耨泉翛然
携手去尘外息诸縁

白云世德诗为林孝廉赋

谁専巴穴富夙擅渭川封薛氏夸三鶩荀门羨八龙新居蟠翠柏旧壑夹苍松何限
孙枝在林林玉树茸

题林孝廉家庆图

棠棣偕芳日椿萱并茂时金茎悬五叶玉树绽双枝海鹤传书近山莺度曲迟今来
上元宴麟脯擘含卮

送陈季相还七闽

乍得溪头信俄欣海上逢云山偕独往湖海狎高踪坐啸双黄鹄归骑两赤龙相携
子騫侣十日幔亭峰

寄真如上人

行乞过三市随縁住五陵南徐先舍筏北地远传灯古洞云埋柏清池月挂藤门前
多宝塔出定几同登

挽邓太翁兼唁远游明府四首

此夕仙槎逝当年宦辙回松犹彭泽抚木已豫章颓献赋名空藉修文业未摧祇应
丰狱底剑色谢风雷

东华新剑佩南楚旧弓裘世系蕃高密乡评重太丘经犹传马队勅已下螭头藉藉
承家誉相望在斗牛

政尔生刍隔将无宿草茸孤亭徐孺子大厦郭林宗素旒霜华薄丹旌露色浓异时
铭太史不受汉亭封

化鹤还丹嶂骑鲸上碧虚一竿遗蠡泽双屐挂匡庐日朗新题碣云寒旧着书盐车
何足恨千里属駟騅

歙中谒徽国文公祠作

闽粤真人起高标自不羣丁年穷百氏乙夜揽三坟力障鹅湖水神游鹿洞云至今
灵爽在长对武夷君

清源寺中戏效晚唐人五言近体二十首（有序）

唐律元和后卑卑甚矣韩柳元白振代之才弗能挽颓波而力遡之古而贾簿姚监
辈实始以清新奇僻闡别派于五言咸通以降厯世相沿上自宋初下迨元末凡诗家者
流律有唐韵者率是物也舍是则又自为宋元本调乃初盛中三唐自沈宋孟王韦柳外
大都高阁束之明弘正诸先辈出有事扫除即李唐中叶剔去齿牙晚季奚有乃余絶长
絜短笃而论之气骨雄高声调鸿硕当特属之初盛诸家至抒情难言铸景难状形神涌
出诵者跃如则晚唐独造偏长亦间有足采者其格姑舍旃弗论可也余弱冠谈秬中原
匠心曩哲至于斯义久畜胸中严羽卿氏所谓作法于凉惧繇隗始己亥北上卧痾清源
禅寺放弃羣典偶目僧房中支枕数轴首尾湮灭皆晚唐诸人诗因戏步其遗韵为五言
律三十余章匪曰亡羊于多岐抑亦求马于全体云尔

寺忆支公住林余惠远踪浮杯来大壑振锡上孤峰径僻云埋树窓明雪照松踟蹰
贪佛日归趣暮天钟

大地悬香刹中天筑化城重檐飞岳色古壁撼河声法座琪花暗经坛贝叶明异时
斋绣佛帝释下瑶京

香积何年启天风蹶屣攀白云平讲座青霭覆禅关断碣横高陇疎钟出乱山一僧
头白坐兀兀定林间

云霞寻老衲尘土拂征衫鹿叩谈经石猿啼说法岵寒云封密筱冻雪堕危杉何限

宗雷句穹碑百尺瓊

杖策平堤外轻风拂面柔寒山成独往老衲话重游怖鸽萝龕下飞萤竹径流将因
谢尘鞅丈室住牛头

能仁元海峽伏毒旧江瀆隘地龙藏雨高天鹤跨云岚深秋径失瀑遠夜堂闻寂寂
孟兰想先题发愿文

户牖生虚白楼台上郁蓝谈经狮子吼护法象王叅桧老斜撑石松枯半压潭何因
挈天女絕顶卧茆庵

杖履初辞越庵堂半住吴腊深松树老禅久桂丛疎五岳云高下三峨雪有无异时
腾劫海片笠授潜夫

蚤净三生业真传二祖衣莲花丛佛座柏叶护禅扉石为悬灯动泉因卓锡飞居然
离捧喝默会洞仙机

为叩西方刹因停北上槎金身悬宝树玉髻涌瑶花梦已清圆觉心将悟法华恒河
归去路云雾绕三车

震旦聊乞食佛座涌金鳌骨瘦知吟苦眉长见腊高香灯岩洞月杖锡海门涛近失
潇湘谱瑶琴废不操

辞家来北岳结社向南屏夙擅降龙诀新传相鹤经推敲临野烧饮啄闭山亭夜夜
康王谷飞泉独坐聽

香炉峰外路云日昼凄凄飞瀑当楼满寒山入座低潭心龙女出塔杪雁王栖会逐
曇摩履翩翩大磧西

一褐闭禅关孤云尽日闲来从身毒国买断沃洲山白象鸣銮去青狮护驾还中天
弥勒阁未许善财攀

十里华严界重来雪未消鍾声寒殿出塔影夜池摇桂树紫阶发藤花拂座飘西来
乱峰外有路入中条

净乐传尊者真如卧法王池幽菱芡熟殿古芰荷香一钵擎秋雨三衣挂夕阳塔中
多宝佛夜吐白毫光

万峰天竺杪丈室寄禅心野鹤经秋卧山猿彻夜吟稻香云碓遠花影石坛深一衲
函高座相传自少林

为楼依北固舍宅望西江竹遠通金磬杉高并石幢龙归云压栋蜃起月沈窓孰是
髯居士前身合姓龐

双林曾授记百丈近安禅洞古频栖鹞峰高欲坠鸢秋灯云阁外晚磬雪房前午夜
维摩到天花遍佛筵

偶入清凉界同探大小乘北宗仍事秀南法已传能苔遠连深竹花疎坠古藤故山
瓢笠梦极目海云层

废寺十首（序意见前）

寺敞千峰入桥危一径通白牛遗汉像苍鼠窜唐宫劫火颓垣外阴磷壤灶中南朝
四百八成住尽虚空

阶基元晋代栋宇自梁年草阁萤潜住绳床鹿借眠荒碑沈乱石废沼咽寒泉拟唤
庐山衲开山种白莲

双林遗古佛六代几残僧画壁全封藓香厨半压藤池荒萤乱入塔壤蚁频登一杖
圭峰老犹谈大小乘

浮踪仍岳麓旧宅寄岷峨摩诘终年病文殊信宿过池幽霜坠栗洞古雪封萝一塔
危嵯上人传舍利多

落落蒲团好遥遥竹杖来寺寒千嶂入门净两湖开古砌风鸣叶阴廊露滴苔若为
论去住千劫总浮埃

松风随曳杖伏翼走危栏古寺何年废空门尽日寒流泉交井灶坠雪拥林峦欲叩
西来意寥寥竺法兰

翛然天姥外断绝世人知老桧穿崖长寒松抱石敲钵残呼鼠共床朽倩龟支一衲
都忘老云房自在披

迭岭飞丹鹫残碑记赤乌山风寒梵远水月夜禅孤瀑洒林长润岩倾树半枯闲阶
蔓苍藓恍惚旧金铺

禅堂余结构破衲挂林樊宿雾沈荒井秋河没断垣杉深时坠鹊果熟乍闻猿寂寂
拈花手应悲末法繁

寂寞空王座萧森佛子庐蛛丝萦石屋虎迹印山厨火灭天然后灯残慧可余悠然
念尘世昏黑重踟蹰

寿程隐君

瑞日华筵启明霞彩袖陈玄关悬大药漆圃现灵椿嶂挹三天子峰携五丈人（白
岳有五老峰君家其麓）朝来海筹屋紫气正嶙峋

寄包稚升二首

政绩飞三殿风流擅六朝歌喉桃叶细舞态柘枝娇厅事淮山月乡书越海潮玉皇
香案近八翼梦云霄

何由沧水使缩地对仙曹彩悞江淹笔绋惭范叔袍高牙濒海戍巨舰夹河涛不分
清江月盈盈入梦劳

题邬生逍遥游卷

久客金台雨浑忘铁瓮潮人从嗤汗漫帝许号逍遥五岳环孤枕三天挂一瓢秋风
大鹏背稳坐上扶摇

送王令自钱塘博士迁富春

祖帐西泠畔骊歌薄暮闻一毡犹挂雪双舄已乘云官舍新栽秫黄池旧荐芹知君
政成后弦颂绕江濱

是夕周元父携琴命所欢窈姬为猗兰之曲索余赠诗再赋得街字

中秋先此夕露色满天街桂折黄金蕊兰垂碧玉钗高山悬广座飞瀑绕空阶会挈平原侣经旬卧竹斋

寄赠廉访梅公

风裁百僚长绣斧曳朱衣姓氏书长乐光芒彻太微楼台三竺绕鹵簿六桥飞烨烨黄金下花骢近帝畿

矫矫羣龙集抡才作赋场楼船移采石斧钺驻钱塘宦业三台重乡书一水长蚤知门下彦腾踏半飞黄

友人分惠秋海棠一本烂漫檻中自綴小词命双鬟霓裳歌以送酒醉中赋赠并命玉素和之

小径移红药闲亭闭绿萝神飞天姥梦兴逐雪儿歌冶色矜眉黛流光惜鬓皤不须賸子夜风露帝城多

秋夜过沈纯父同王文学汪山人联句

己占青山色仍逢白社人时方校宾兴士（沈）仙槎分雨露祖帐出风尘（王）梦绕三江树心飞八月苑（汪）碧宵夸鸞鷲黄阁笑麒麟好去严陵畔星河拂钓缙
赠陈炼师二首

廿载云台观凭虚谒上皇弥明孤髻短弘景一瞳方划地蛟涎净摩天鹤羽翔秋来九华枕游历遍扶桑

羨汝玄都客神情半沈■（? 寥）黄梁炊处熟紫气望来飘玉检移新秩金■（施，童代也）问早朝西池桃万树几夜蹶神飙

友琴册为陆太学题并呈思清孝廉（乃翁尝任单父宰）

名香萝薜下一室素琴悬四壁青山响千秋白雪传广陵新按谱单父旧鸣弦欲起鍾期聽乾坤对惘然

题祝无殊小像

一壑堪谁置三毛颊畔长豪吟卑下里狂兴剧高阳绿水芙蓉社青山薜荔裳玄亭吾罢草媿尔及门墙

喻邦相束装入计中途忽有迁杭之命寄懷二首

烏已飞王令刀俄佩吕虔移官沧海上候吏大江前柳叶千家笛桃花十里船湖山真胜絕独少伯牙弦

岂谓双龙剑翻成独鹤操楼台三竺近省署万松高海色飘行盖湖光落画舸不堪灵隱月飞梦对持毫

鱼竹轩为玉叔大叅赋

別墅擅林塘开从顾辟疆龙鳞金照日凤尾玉凌霜翠袖寒犹倚宫袍堕欲翔谁同濠上客散发卧箕筓

忆王山人

沈瘦吾偏甚王痴奈汝何万峰林屋杖孤月洞庭蓑鹿豕亲狂态鱼龙避醉歌一丘
他日遂白眼对云萝

杨思悦邀集涵碧亭遇雨作

良辰饶胜集箕踞百花潭逸调飞金缕新词度玉簪雷声高栋入电影曲台含河朔
元吾党宁辞十日淹

湖上泛舟憩俞祠同赵生汝元听歌作

荡漾青丝竿淹留白接■〈屮离〉人歌朝雨后客醉暮云时隔竹觞频送穿花席
屡移他年怀李白应赋习家池

送方伯徐公入梁

夹岸桃花水春江照画船双旌辞岭日六传入梁年草色申侯里棠阴召伯田勿云
河内借剑履上甘泉

携郭生汝冲憩山寺偶题

信步空王宅谭心佛子筵灵花纷宝地忍草覆金田刹影禅关外钟声梵阁前一僧
头尽白趺坐不知年

闰九月九日集赵汝元

高斋犹菊色名胜竞过从月届三秋闰天令九日重云林眠独鹤星斗堕双龙怅望
桓车骑遥听远寺钟

送邬生还京口

何缘京口客偶逐片云来五岳邀游兴三都竞赋才新装淳化帖故里妙高台笑杀
茅平仲从军乐未回

寿渔塘余翁七秩

林塘称大隐渔钓旧生涯亭下三珠树檐前五色瓜金樽流紫气绮席送青霞日暮
斑斓袖翩翩舞百花

少室山房集卷四十一

●钦定四库全书

少室山房集卷四十二

（明）胡应麟 撰

○五言排律一十四首

汪仲淹病足三年未瘳余先有此疾半载始愈戏作十六韵嘲之并期起色焉

底事羈神足将因断俗缘悠然疑入定嗒尔类逃禅箕踞苍松下跣趺给树前但妨
义手立偏称曲肱眠筏舍清江上杯留碧海漉按图游五岳隐几问诸天步学邯郸客行
嘲鹿苑仙漫愁双屐折何忝一壶悬蹇拙存吾道驂驪记昔年盗骊元泛驾飞兔旧忘筌
玉笈看长往金针待大还吾将倩磨勒负汝出苍烟

赠董使君十六韵

紫气黄山外青云白岳傍五花元蹀躞千骑暂徜徉曙日悬官舍春风拂郡堂科徭闲巷陌狱讼卧桁杨异绩东方最遐心北海长琳宫游问政飞阁驻文昌鼓吹传清练讴謡接大鄣园桃红照郭陇麦翠登场地主新知洽天人旧策良片言逾琬琰只字并琳琅司马邦人重元龙座客狂朱旗晨赫奕华烛夜辉煌意气回飞动形骸释混茫征歌惭下里感事忆高阳漫拟扶风借行看渤海翔峩峩柏梁殿第一待明扬

寄陈玉叔十韵

尚忆燕台别长歌蜀道行元龙原侠气仲举最高名露冕千岩秀褰帷万岫明地邻巴妇穴天近夜郎城灌口花相待峨嵋树若迎海棠开四座杜宇逐双旌望阙依星象登楼试晚晴朱衣羣吏谒彩笔众僚惊赋属扬雄和诗从杜甫评支机有片石一为问君平

题柏萱图八韵

紫岫元君宅丹丘阿母家檐前交绮树庭际长瑶葩翠色凝霜秀孤芳伴日斜筠篁堪并古萧艾岂同嗟密叶低垂露疎枝上拂霞亭亭骄晚节冉冉驻春华餐实心长苦忘忧思转遐清水元独莹纯璞本无瑕片诺当年许三迁异代夸愿言仙圃外长御五云车

赋得十五卢家女

十五卢家女歌喉绕画梁西邻窥宋玉东壁住王昌画态真真似诗才盼盼长玲珑声窈窕静婉质轻扬月下红妆丽风前翠袖狂玉卮含国色金盒贮天浆解佩逢交甫更衣逐李郎终须募摩勒致汝郁金香

读何氏集三十韵

何太史以先公仲默集见贻展诵兴懷敬题三十韵末简

寥落黄初后词坛更几人齐梁纷藻绘元宋转荆榛盛世占龙马明时起凤麟黄河悬日月嵩岳降星辰屈宋休前代卢王祇后尘才高粱苑客赋拟洛川神意气横今古驰驱迈等伦垂髫游上国耸翻戾高旻天诏颁黄屋星槎下紫宸通滇穷越嶠谕蜀近峨岷吊古多停骑违时蚤乞身携尊漳水夜飞盖邳园春岁序堪藜杖莺花暂钓缙九重思丽藻双阙召词臣邂逅边徐合賡酬李薛频鸡林传制作凤沼降丝纶帝命轩輶出人看斧钺巡横经非寂莫执宪岂沈沦絳帐弦歌日青衿问字晨岳莲垂二华宫柳暗三秦仙掌金茎旧咸关紫气真夔龙方步武鵬鸟遽酸辛消渴相如伍修文子夏邻调高原寡和道丧孰知津彩笔精灵远瑶编絶艺陈千秋垂灿烂一代仰嶙峋鸾掖名长在龙门迹未湮凄凉玄阁草重覩玉堂宾貌识鄱阳烈诗传水部亲转教山斗望怅絶颍溪濱投

赠督学滕公三十八韵

云雾南溟外星辰北斗傍九霄回气色千里见飞翔大雅今谁属明公早擅场应图看騷袞絶代起鸾凰出入平津底超迁吏部郎攀花游太液视草厯明光佩染金茎露衣含玉座香直躬行殿陞蹋翼守遐荒瘴疠开盘水川原接夜郎停车蛮垒肃驻节海山苍名姓传闾阖丝纶下庙廊双旌辞汉苑匹马渡钱塘斧钺江城树楼船水国霜海隅兴礼

乐河宿敛文章时雨行连郭春风坐满堂真才呈琬琰异品得圭璋沂水琴堪奏丰城剑
有芒弦歌闻曲阜桃李遍河阳吾道乾坤辟斯文日月光六桥供舣棹三竺引飞觞黄阁
声华远青冥道路长鸾书飞建礼凤藻出长杨师范真辽絶生徒转激昂陆机曾入洛司
马旧游梁九岁题鹦武三冬解鹤霜上书思汉主作序拟滕王彩笔空凌厉丹梯尚渺茫
塞翁悲失马牧子叹亡羊寂莫松萝契萧条薜荔裳一区原宪宅万卷子云床避世嗟秦
士酣歌学楚狂烟岚寻白石云水狎沧浪厯块凭谁试连城祇自伤几年懷卞氏此日遇
孙阳轶里心犹在夷门念不忘惟余星斗色夜夜绕干将

奉赠督学乔公四十韵

大雅开元际高风正始前几人操白雪四海和朱弦磊落陈王调凄凉杜甫编余波
空绮丽哲匠几雕镌盛世称才子明公实妙年姓名悬宝篆文采烛奎躔已诧龙为种曾
闻凤集肩两朝司马学一代子云玄汉苑昆明外秦城太白颠看花韦曲雨携酒杜陵烟
赋以凌云贵才因命世传胜游飞彩笔丽藻掷青钱斗畔双龙气人间五色笺冲腾随八
表取次上钧天粉阁青绫被瑤楼赤玉鞭鸣珂趋建礼视草向甘泉鲲化风雷绕鹏飞宇
宙旋一麾辞殿陛万里问山川讲道嗤王弼穷经答郑玄绛帷朝入越清梦晚临燕代北
看名士关西仰大贤选才空万马罢讲得三鱣竺国烟霄里吴峰雾雨边校文多暇日登
眺俨神仙柳外林逋宅波心白傅船潮声吟际落寺影望中连只字霜飙动千章锦绣悬
宫商闲自绕金石巧相宣气压珊瑚树光生玳瑁筵赤城霞并起沧海月孤圆桃李三春
合台垣计日旋碧霄看紫绶白屋有寒毡上策懷终孺游齐忆马迁屠龙空故业落蠹守
残篇学岂三冬富词非子夜妍世途甘寂莫云路阻飞骞已辱盐车顾能忘国士怜鹓鸞
愁泛驾鱼兔有真筌万仞终南色千秋太华莲愿言开觉路潇洒出尘縁

寿大司空雷公四十韵

宇宙鍾名世山川诞哲人祥光回八极紫气动三辰晚节忧时念当年报主身飞腾
随白日指顾上青旻剑倚双龙合桥过驷马驯孤惊盟桧柏雅操励松筠环佩燕台上旌
旗越水濱文章传董贾名理陋庄荀桃杏千门色弦歌万户春驱驰违梓里简渥近枫宸
稷契堪谁伍夔繇早见亲九霄垂气象四海荷经纶琐闼传宣夜璇台草创辰忧勤回圣
主搏节为生民制作倾流辈恩荣迈等伦丹青图骏马名位掩麒麟前席长颁币临轩或
赐银明良时有待鱼水契无邻一夕金滕启千秋玉几陈乌号空洒泪龙驭永朝真遗命
乾坤辟讴歌海峤臻大廷看正笏清庙仰垂绅社稷关心久林泉入梦频留侯元辟谷张
翰几思莼勇退占贤达随时悟屈伸挂冠辞殿陛解组出风尘烏履闲无棣诗书问有莘
苍生徒想象黄阁已逡巡雪瀑延清赏星潭理钓缙匡庐晴对客滕阁晚携宾鹤引登山
屐猿窥漉酒巾虹霓流甲子河宿绕庚寅网祝新投鸽袍余旧挂麟玳筵罗窈窕华馆列
芳新缥渺三株树崔嵬五岳神金章垂素颌彩服照朱茵朗月燕山桂明霞漆圃椿方壶
聊寄迹南斗待持钧版筑征前事枢衡忆老臣遥看紫泥诏早晚下江津

集赵汝申望衢亭大雪分赋同郭翌之赵汝元

郢里征歌日梁台奏赋年飞霜流翠幙密雪拥华筵浩荡龙鳞布飘飘鹤驭旋春阴
浓四野瑞霭覆三躔海冻鲸鲵蛰林昏燕雀悬灞桥初策骑剡曲乍移船叶落千林瘦花
飞万象妍乱飘鸾掖外斜洒凤城前绰约翻多态轻盈自可怜佩疑湘女授瑯拟洛神传
素魄瑶池近寒光玉座连清音回白纈丽曲奏朱弦漫学瞿昙座谁参慧可禅输他袁仆
射拥被日高眠

不佞自燕中归后却扫闭关一时秋苑诸名公以吏事来越者虽闻问间通而逢迎
都絕乃君禹苏丈独下询刍蕘穷搜草莽停驂倾盖把臂忘形至贻赠诸篇金石铿匄风
霜错落揄扬蔑副愧汗弥深敬题排律五十韵奉酬大雅

宇宙开鸿运东南毓骏才华名悬八斗秀色动三台磊落贤豪契纵横哲匠来青袍
多士避赤帟万人摧内翰词谁匹中郎句独裁王维元擢隼杜牧载抡魁片玉咸阳市千
金碣石台称臣离草莽谒帝上蓬莱太液春风近长杨霁雪回朱衣兰署入绛帐棘闱开
并列中朝彦同搜大厦材门庭饶董贾廊庑半邹枚执宪皇情注传经众望推高空抟凤
羽大泽市龙媒伏夏墙逾峻毛韩席乍回连山翻彖象分野别台骀桃李参差发荪荃次
第培生徒纷负笈士伍竞衔枚藻鉴明逾郭包涵德过裴剪裁俱绣绮追琢尽琼瑰紫贝
穷蛟室明瑯擷蚌胎星辰谐奠丽河汉并昭回七十抠衣侍三千曳履陪风标崇泰华气
象薄岵岷彩笔扶桑畔朱弦若木隈书藏神禹穴赋就越王台携客观江涨逢僧话劫灰
岚光停竺寺霞色候天台指顾登槐棘从容问草莱干旄晴掩映鹵簿昼徘徊少日题孤
愤频时和七哀卜居邻木石隱迹混尘埃鸿鹄长矜志鲸鲵惯曝腮清湘晨葺茝孤屿岁
寻梅漫詫形如鹤真成背欲鲑红颜劳想象白眼任疑猜总道三鱣隔能堪驷马来逃荣
知石户守分识澹台把臂行红药论心坐綠苔金兰投管鲍胶漆誓陈雷厚义黄河溢深
衷赤日摧长鑱犹雨雪短铗骤风雷浮海懷偏壯藏山兴未颓枯株慚匠斧钝质快神锤
拒户非干木逃家异老莱兰阴花烂漫激水树滌洄且自探玄草何妨醉綠醅天长穷鸟
逝地旷大鹏回浩思凌三极元神摄九垓会令千古色闽越共崔嵬

贺易使君父母偕寿三十六韵

玄圃昆仑外蓬丘日月边殊方传胜迹人代几真仙藉甚文章客栖迟少壮年叔孙
元学礼扬子旧谈玄夜雪宫墙外春风壁水前杏园虚彩笔棘院堕青钱匡阜晨携屐浔
阳晚扣舷拂云穿菑峭临水弄漪涟勇退闻先哲雄蜚识后贤挟书游建礼视草向甘泉
太液池头树慈恩寺里筵莺花辞汉阙禾黍问吴田五袴讴歌起双鳧舄履旋戴星离禹
服瞻日上尧天冕拂金茎露香分玉座烟龙鳞看咫尺贝锦乍流传帝谓淮阳近民称颍
水便之官同白傅奉使属张騫拥节霜威静褰帷雨泽绵香炉吟际出瀑布望中连触目
亲闱阻驰情彩服偏西江移鼓吹南浦系楼船灿烂绯桃实荧煌赤锦笺中庭罗窈窕别
墅进芳鲜片玉辉蓝井双星耿婺躔苍虬临几席駉駉候輜駟跨凤来王母骑麟下偃佺
白云空入梦青琐待鸣鞭鼎鼐调元气舟航涉大川八荒偕忭跃四海荷陶甄瑞霭时时
发祥光夜夜悬万年觞咏地长奏碧霞篇

寿大学士赵公二十四韵

寿域黄扉启祥光绛阙悬讴歌来六合气色动三躔玉醴东华外金茎北极前八千逢景运五百降名贤灏水生申日南阳卧葛年（公郡望本南阳）诗书王佐业礼乐帝臣传锦向龙门夺藜当凤阁燃探花晨太液视草夕甘泉虚受心如谷违时道若弦一麾俄去国双屐乍归田白社便高枕清溪乐扣舷直声喧海岱正气郁闾廛密勿皇情注征求使命遄商岩图酷肖汉殿席频前挟日潜鳞起凌风大翼翮新恩移国学旧德重经筵燮理衷元赤登庸鬢尚玄穷边收羽檄絶岛静戈鋌宰割羣方正调和众味妍皋夔重步武稷契互周旋蓬矢春华邁椿龄暮节延安期分履烏王母驻輜輶社稷扶元老乾坤入大还愿为天一柱万古镇玃璇

送李山人入洛吊灌父王孙

夏五淹淮曲秋成问洛阳关河停别棹驿路促归装积雨连中岳飞云断太行芰荷孤旅尽萝薜故庐荒满目平原客何人吊白杨

少室山房集卷四十二

●钦定四库全书

少室山房集卷四十三

（明）胡应麟 撰

○五言排律一十七首

留别胡茅两生十八韵（有序）

僦居易水邂逅胡生灏元茅生厚之游处甚洽胡生家有台榭池馆余时时携书帙坐卧其中门庭萧然俗宾都絶茅生一室不盈斗而长者车辙纷纭道傍余屡入都门驻易水问黄金台遗迹仅仅荒丘蔓草以为击筑狗屠当不复覩今代何意两生者伉爽侠烈俨其遗风两生亦严事余朝平原而夕河朔或时挈粉白黛绿纵游西郊东郭间至精庐佛阁一二浮屠善名理者暇日相与煮淡面谈真空生平壮志赖以耗磨销释且将卜居其畔挟二仲为终老计焉亡何余以家大人微恙室人趣驾南归两生送余河梁之上诵贾长江却望并州及王中允阳关西出二咏泫然哀涕集于衣袂因稍次第一时过从陈迹为百八十言寄之异日者舴艋山阴道上访两生旧宅于剡溪风雪中即不见安道主人当毋訾子猷之兴尽也两生皆会稽人

相逢燕塞晚共指越山阴问姓知花萼忘年是竹林踟蹰谈异域舒豁快同心楼观飞青藜轩窗护碧岑关遥停紫气台迥贮黄金海上来三鸟池头戏五禽杂芳羣烂漫乔木半阴森大业堪霞举雄图尚陆沈含毫霜色坠秉烛露华侵日日平康燕时时笠泽吟荒郊云共远野寺月同深爱客呼珠勒寻僧抱玉琴茶当流水淪酒傍乱峯斟剑合延津畔帆催潞水浺凄凄临去袂恻恻乍分襟尔自耽玄寂吾宁叹滞淫骊歌南去路鴈迟北来音何处悬青梦空阶卧绿沈（胡尊人任北平叅戎而茅君父为之记室故结语云云）

四明沈孝廉士安甫弱冠词笔翩翩而丹青音律咸入妙解邂逅武林甚契赋赠此章

桂籍夸年少兰心托漫游霜蹄寒照夜风翻健凌秋意气狂昭畧腰围瘦隱侯笔摇鸚武座箫引凤凰楼白练书屏脚青缯画扇头应知鹊桥畔计日待牵牛

秋杪渡江望金陵有懷惟寅少保并寄讯小侯汝藩八十韵

乍喜风期洽那知道路长仓皇驰海国踟躕问河梁兴尽燕山下魂销碣石旁肝肠萦聚散涕泪逐行藏此日旋车地当年击筑场陆生元入洛枚叟旧游梁挟策逢王翰论交得孟尝金兰投管鲍胶漆重求羊俗詫相如慢公怜叔夜狂高歌神踊跃剧语兴飞扬尔汝频相唤形骸欲对忘联鑣游太液幙被卧长杨玉塵晨南陌珠帘夜北堂西园偕啸傲东郭并徜徉杰观扞鵙鵲层城蹶凤凰登山题翠巘临水和沧浪艺圃千秋擷词林一代翔希声传魏晋丽句薄隋梁屈宋交凌厉曹刘互颀颀光芒腾李杜藻绘饰岑王冶女青丝盒奚童赤锦囊金尊筵灿烂银烛座荧煌浩思凌先哲玄心揖上皇双钩联拱壁寸楮掷琳琅露砌行红药风檐坐綠篔霜华兰桂楫月影芰荷裳夏驿驰山荔春郊绽海棠池餐菱芡碧篱咽菊花黄痛饮夸司户清斋詈太常百觚豪未厌五斗剧难量潦倒投车辖淋漓拭剑铓行厨罗鼓吹步障夹笙簧宴乐前期盛升沈末路详碧霄看起凤丹壁笑骑羊志业乖鵬鷖头颅狎虎狼宾朋违杜曲党与析华阳故里嗟囊药修途问裹粮韶光同代谢土俗异炎凉楚越天迢递燕吴地渺茫丹青求傅说图画失王嫱岁月蓬蒿度朝晡橡栗尝登坛名岳岳饮泌乐洋洋僻巷开萝径深居构药房簞瓢悬絕壑蓑笠憩横塘愿落悲鸿渐翻飞觅鴈行攀龙时刺谬打虱事寻常雨雪红颜瘁风尘綠鬢戕乘輿留夜白伏枥梦飞黄邂逅逢高座参差集上阳披襟逾惨淡把臂各彷徨动色谈倾盖关心念对床山阳全丧逝邺下半存亡社冷余春雪台荒翳夕阳七哀盈大宅万感热中肠道直躬如发勋高背若芒孤诚疑博陆百战忌平阳息壤閻谁叩中山袂易攘辱曾虞醉尉名尚怖降王是处囚安国何人雪冶长少卿宁负汉太白詎逃唐璞会明和氏珠应合孟尝（前孟尝乃战国四君封号此孟尝人姓名合浦令也）余生饶舌在九折鬪身强铁骑闲沙漠金鸡放庙廊逡巡生马角指顾脱鱼肠燕颌封仍在鸱夷泛未遑言归衷戚戚惜别恨茫茫落景浮清渭飞云动太行上书回令伯陈启急宾王羽翼分岐路风标限屋梁瓜田情郁郁菽水思皇皇野岸冰澌结关城露色灑重来期阮肇再入待刘郎短策朝驰骤长謡暮激昂愁惟倾白堕梦几熟黄梁广汉懷捐佩清溪恋钓璜杏桃源上客桃叶渡头娘漫说幽期误终知胜会偿三山停鹵簿一水下帆樯养鹤新禅院啼乌旧女墙盈盈白门月万里共相望（惟寅所居地近杏花村在白下淮清溪北）

送沈纯甫司马还就李十八韵

祖帐燕城外仙查潞水濱挂冠辞日月投袂出风尘节槩虞翻亮心期贺监真五湖深买宅三辅剧埋轮磊落千言疏嵯峨万折身罗浮云唤客大庾雪迎人絕徼孤行成长途数问津鸿冥初返越鷺举更游秦剑气双钩跃炉香八座亲才高元海忌道直叹无邻

勇退占贤达遐思悟屈伸金台驰骏骨玉陛盼龙鳞黄菊浮村艳丹枫抱驿新暮岚藏岭树秋色露江菀北斗名逾重东山望未湮列营屯虎豹飞阁耀麒麟赤舄应无棣玄纁自有莘沉沉合宫夜前席候经纶

花烛诗十四韵（蜃脂仙音妖烛三事俱散见唐人小说中）

春色照房栊迎亲夜正中杯光才泛绿烛影骤摇红绛■〈虫葛〉传唐陞青烟出汉宫开花疑蒂并结蕊验心同滑膩频消雪轻盈半受风流辉呈瑞露吐焰发晴虹玉树前阶并金莲后院通纱厨萤灿烂绮阁蜃玲珑引凤来丹穴乘龙下碧空兰膏焚易彻桂烬落难穷巫峡云飘荡蓝桥雾郁葱昭阳明舞燕洛浦炫惊鸿妖魄藏逾媚仙音奏未终良宵恣欢洽朝旭渐瞳眈

龚使君合祀供奉拾遗于任城纪事三十韵（有序）

济上故有太白楼及杜陵南池云两拾遗常客其间岁久皆颓没荒草乙未之春晋陵龚观察子勤来莅兹土不逾月修葺缮治翼然更新仍别为祠合酹李杜其中余既幸两公以羈旅遭逢异代且快睹观察斯举有大造于词场也辄赋其事为五言三十韵以并致高山之仰云

齐东浮大泽济北汇飞泉亭古淹词客楼高卧谪仙声名偕宇宙藻绘划星躔奕叶流风谢沉冥厯数迁芳尘谁想象故迹重留连有美延陵季神交百代先韶颜舒彩翮绮岁夺青钱磊落王褒颂洸洋曼倩笈金羈游太液玉佩侍甘泉绛阙恩光动黄堂惠泽宣吴峯翔省署越水衬楼船谤牍初辞魏除书骤发燕虹蜺流卤簿雪霰耀戈鋌意气中原尽心期大厯偏行春懷胜躅吊古惜名贤嗟咄崇祠树荧煌巨碣镌丹青涂杰构俎豆饰长筵卫竹紫窻劲秦松夹座鲜绿萝垂菑峭红芰浴沧涟西陆回真气（太白自称陇西）南池荐旧篇延津龙剑合海岳凤毛联白鹤云亭上苍虬泰岱巔并懷和氏璧齐奏伯牙弦是处怜方驾何人快着鞭蹉跎投贾赋寂寞问扬玄未授楞严记空留道德编壮心斜日外愁色断云前惨淡论交臂苍茫失并肩沙棠停画鹳陇树咽寒蝉万古如澠思长歌酌碧天

斋头春草和相国赵公

径草积如裊萧疎断俗尘不随金谷艳长占玉堂春绕砌青疑滴当窻绿渐匀霏霏烟色丽烨烨露华新细雨留征旆斜阳逐画轮西堂偕梦弟南陌伴携宾静对谈玄客幽逢觅句人荣枯凭乐育生发荷陶甄太液皇仁布平津相泽沦为将庭卉意九域播洪钧寄景陵徐使君三十韵（有序）

徐初以宰邑异才最天下后数更盘错所至有非常称近又凿淮上新渠底绩云

七泽浮真气三湘兆异人虹霓流藻绘海岱入经纶洛下名先着河东赋蚤陈朱衣驰棘院赤舄上枫宸碧汉抟双翮潢池沸万鳞笑谈清■〈宀禹〉县顾盼出风尘楚璧腾辉旧燕金动色频花封移恺悌兰署赞清寅枚叔声华艳文翁治化循分符劳汉吏约法谕齐民皂盖明雕轂朱翻结画轮黄山游汗漫白岳驻逡巡里闾蒲鞭洽郊原竹马驯

孤懷吟岳麓遠思逐峨岷綬解防消渴簪投习隱沦春眠高陇树秋擷大江莘帝梦征良
弼朝思问鬼神荣光浮紫极厚币出青旻淮甸褰帷入徐方列戟巡滔天勤哲后敷土急
贤臣雨雪偏乘橈风涛日算縉决排羣议剂疏凿众材抡遠利超三策殊功羨十旬忘家
心匪石忧国鬢如银白马初沈日玄熊创觀晨休祜符鸞鷲异相卜麒麟南郭竽真濫东
方篋转贫穷愁嗟阮籍歷落谗桓伦鷓敞仍居魏貂残重入秦防身雄剑在夜夜拂星辰
题陆履素使君两朝八命册二十四韵

黼黻开金殿丝纶下玉除苍龙双御极紫凤八銜书睿藻飞岩穴天恩湛里閭虹蜺
悬巨轴驷马集高车五世环投雀三朝佩映鱼机云人望切逊抗吏才舒试县催鳧鳧專
城列隼旗朱弦鸣淅沥黄綬曳清虚盐铁初裁论縉钱乍榘儲桓寬文彩耀刘晏策筹摠
煮海心聊系看山兴自如登坛携大笔倒屣纳长裾雪夜船移戴风晨榻挂徐名流饶吐
握寒士极吹嘘西竺时参梵南屏或叩渔蛟宫鑱锦贝鸞岭簇璠璠河内贤劳剧淮阳岁
月除达人齐久近明主惜居诸云雾披丹阙奎躔焕石渠殊荣乔梓并遠思蓼莪舒棘寺
騫腾外槐堂盼望余千秋未央诏永永贲幽墟

大参维扬张公过访武林旅邸中赋赠十六韵

淮海生人杰翩翩第一流水壶寒照夜霜钺净含秋大树荣东国甘棠匝上游苕溪
频驻节兰水半维舟五马追风电双龙射斗牛新裁玄草社旧咏白苹洲器宇司空并声
华博望俦星芒朝帝阙日彩扈神州下士输青睫论交异黑头懷珠玄俗傲抱璧卞和羞
潦倒亲长铗殷勤拂敝裘湖光芒履尽江色布帆收肱在余三折肠回剧四愁孤诚悬海
岱片诺重山丘指顾排闥闥参差侍冕旒黄金未央诏行见出燕幽

题寄亭十四韵祝山人别号也

寂寞谈玄第何人重起予云霞双草屨宇宙一蘧庐供奉神游外蒙庄物化余踰垣
时学段悬榻间留徐綠綺孤琴奏青緗四壁儲那知金是谷宁羨石为渠白雪流湘濼清
飈扇舞雩双林来梵释六洞过樵渔芳草从滋蔓飞花断扫除寻丘紫薜荔尺水漾芙蕖
甲子初周白春秋正及蘧曲肱聊寤寐容膝暫踟躕大隱依泉石中行在里閭吾将戒行
辙蚤晚赋归欤

问欧楨伯讎八韵（有序）

楨伯以是岁大耋余方图寄一诗而讎至交游垂尽衰涕泫然

尚忆黄冠岁扁舟向若耶青牛埋紫气白鹤隱朱霞剑合延津畔（楨伯最善惟敬
今俱岱游）竿留渭水涯（年政八秩）翻飞神武阙寂寞广文衙逸驾开元逝鸿裁正
始遐高原腾雉兔大泽返龙蛇庾岭梅空折罗浮桂漫芽惟应蒿里月夜夜惨霜笳

柬相国赵公二十四韵（有序）

相国赵公乞休章十数上而圣眷愈殷凡其投梦林泉寄情涧壑者具悉懷山诸咏
中不佞既倚韵递酬迩复示我归兴十絕翩翩然神游八极想因窃取其意为长律二百
四十言

八极黄扉上三台绛阙前夔龙扶舜日稷契在尧天磊落熙朝佐飞腾命世贤经纶
侔董相学术迈彭宣虎观无双对龙墀第一传直声朝野震劲节庙廊蹇吏隱罗浮僻春
生大庾妍朱明留巨碣勾漏觅真詮六洞深回辙双溪独扣舷桃花人代隔柳色岁时迁
雷电惊千域风云动八埏敷文毗夏后奋武翊周宣絕岛凭陵日雄边覆没年谟谋羣策
聚筹略万夫先挾伐过平壤芟夷遍赫连吴绫貂帽渥蜀锦兽袍鲜賜屡驰中极心长系
太玄赤松遥入梦黄石驟忘筌浩荡皇情注优游圣泽绵谤宁伤薏苡名转重兰茝雅量
乾坤小孤忠社稷悬鸣岐仍鸞鷲钓渭正鷹鷂海晏知难俟河清詎偶然转将良弼梦移
告北山巔

题瀛海长春册（代）

大中丞河间刘公家门贵盛冠冕一代乃二亲偕登大耋尤近代希有者敬赋长律
二百八十言

南极呈辉夜西池设宴辰遐龄曾覩伏间气重生申大府俱三事高堂并八旬棠枝
聯窠桂萱萼竞庄椿淑问驰邦媛英材降岳神懷中金紫客掌上玉堂宾彩日鸣双凤丹
霄躡二麟机云惭末驾尾雅鬪前身学士羣工艳中丞百吏寅丝纶悬■〈宀禹〉内节
钺树江濱苦县藏书富华阳授策频蟾蜍流月窟乌鹊渡天津象服彤墀下龙章绛阙陈
岩廊交黼黻里閤集簪绅赋擷梁台彦讴腾越部民欢声罗甸服喜色动城闈黄鹄屏间
戏苍虬户外驯尊壘浮竹叶弦管沸花茵雾隱偷桃孺霞明种杏人围棋邀谢傅投辖驻
陈遵将相庭阶植师儒禁闥抡十州环抚御八表俟陶钧雨足耕莘耜云闲钓渭縉优游
黄发皓容与白头亲握算跻恒华添筹迈劫尘刘樊偕混俗孙马互全真解佩虚临汉吹
箫漫入秦绵绵瀛海上宝曆庆长春

寿何太史启图六秩二十韵时尊人亦以是岁八旬

间气生申日灵图出洛年春秋曾五百甲子又三千阅阅闻当代弓裘嗣昔贤凌云
懷旧賦却月和新篇弱冠游中秘清朝卧太玄帝遴金匱客人艳玉堂仙夜被吴绫薄春
袍蜀锦妍莲灯移大内藜火揭高天玉座星辰缀瑶台日月联参差朱绶下次第白麻宣
凤起垂双阙鸿冥驟八埏振衣王屋雾飞盖邳城烟墅卜蓝田下堂标綠野前琴樽芳草
静枕簟落花鲜兰桂阶庭合桑蓬户牖悬寰中呈上瑞象外得真詮黄鹤峰头驻青牛洞
口旋浮丘晴旭近函谷暮云偏突兀珊瑚树辉煌玳瑁筵西池流宝液东壁焕琅编白石
图空兆苍生颂久传车轮驰上国舟楫济长川姓字旗常耀勲庸竹帛绵还将大椿寿一
代庇凌烟

送王水部之钱塘

乍捧周王檄言乘汉使槎赋抡新竹箭吟恋旧梅花海曙占霞色江明逗日华楼台
笼紫气城郭护青沙故国吴都稻春山越井茶应知苕萝艳十载抱溪纱

诒朝雪不解再柬永叔黄门二十四韵并邀同赋

密霰三冬集玄云四望同迷漫屯巨壑浩荡布长空拂曙光交映连宵势倍雄廉纒

时杂雾淅沥暗随风漠漠缘堤厚霏霏入壑融重阴浮海岱积素晕河嵩拟絮情殊愜探
梅思未穷冻埋深浦竹寒折大江枫远渚拳饥鹭荒陂匿断鸿貂残秦塞上鷁返越溪东
沾湿全妨舵倾欹半压篷羣呼怜榜竖独钓羨渔翁爨拥孤烟白炉煨宿火红衾裯屏障
外几簞画图中翠管徐闻笛冰弦骤拂桐褰帘珠错落振佩玉笼葱石鼎龙涎泛甕瓿雀
舌镕锦袍狂太白彩笔粲文通飞动昭阳燕翩■〈衤迂〉洛水鸿轻盈团粉颊绰约膩
酥胸握麈神先王持螯兴愈洪登仙宁有道中圣自无功流征传词客清商奏乐童君看
白雪赋万古孝王宫

少室山房集卷四十三

●钦定四库全书

少室山房集卷四十四

（明）胡应麟 撰

○五言排律一十三首

题画赠陈生东父兼柬王伯宠将军十八韵

落落乾坤内清狂见汝曹孟公元世阀仲举旧人豪万事捐鸡肋孤心逐蟹螯浮生
闲处得浊世静中逃海岳骄藜杖江湖狎布袍营丘传洒墨洪谷授挥毫绣柱悬飞瀑雕
梁压怒涛冬亭河汉入夏槛雪风号五竺携灵鹫三神挈巨鳌洞庭回鴈鹜巫峡挂猿猱
佩玉明冠剑锵金肃羽旄楼台笼晓色城阙洞秋毫果欲尝丹荔花应坠碧桃幽人题桂
树上客醉葡萄盘礴回千虑经营费二毛穷年思训力竟日道玄劳北海盟投祢南山趣
逼陶惟应伴王绩西第日醺醺

赠马计部三十韵（马多畜彝鼎古玩甲于中州）

盛世征才彦明时毓俊髦青云驰洛下紫气蹶崧高蚤擢仙台桂重攀帝苑桃双旌
移海右六传驻江皋岳色东横岱河流北控漕城闾回万堞楼櫓夹千舫握算边储重持
筹国课劳纷纭留骏足盘错试牛刀会计名逾藉登临思并豪深期投翰墨雅韵撷诗骚
草阁亲藜杖芸窗狎布袍虹霓流竹素星斗烛兰膏秘玩呈荒隧奇珍出断壕遐观笼古
昔胜赏涤喧嚣夏鼎占神物商觚醉浊醪尊壘陈九兕篋篋啮双饕照乘全收魏连城尽
压洮沉沙钱背蚀入土印文韬籀迹披虫篆羲文辩鼠毫张吴时久近徐赵业卑高英水
罗羣石官哥列众陶蛇纹琴断腹龙锔剑遗弋鉴别衡先定媼妍镜莫逃吹嘘存薜荔吐
握下蓬蒿意气怜孤愤形容媿二毛心悬丹壑静首傍碧天搔未拟题孤凤犹懷钓巨鳌
寥寥白雪唱一为伯牙操

赠朱本立山人十二韵

大隱齐东市青囊不记年携将三泖宅并载五湖船鹤渚穿云僻渔汀钓雪便然藜
惊杖化卖药指壶悬海上携真诀区中得秘传玉机频揽义金匱几探玄挂壁双龙下应
门独虎眠餐苓游绛阙辟谷守丹田异证仓公习殊方葛令研轩岐存后裔俞华失先贤
祖德持三世神功奏十全沉疴吾已脱一笑紫霞前

寄丁元父

艳识千秋帅惊看万里侯风声雄海岱意气重山丘报国筹先运开疆笔暂投援桴
推后劲仗钺覩先忧雨雪霏行旆冰霜绽赐裘列营屯虎豹增灶宿貔貅谕檄流关外飞
书遍陇头渔阳尘骤息辽水淖全收月满刘琨塞天清庾亮楼胡床无限兴能似昔时不
夙昔登坛客于今出塞雄拥旄摧太白横槊贯长虹文武周卿亚诗书晋帅同辕门环甲
冑记室聚章缝斧钺军容盛楼船将令崇投鞭紫渤澥砺剑拂崆峒鸭净辽江绿狼销碣
石红天高鲸观峙塞绝雁门通券议新颁铁标模旧建铜平阳勋七十第一让元功

赠王将军贞伯二章

镇北威名著安东将畧长援枹肝胆赤仗钺鬓毛苍置阵分鹅鹳连镞控骠骊旌旗
萦析木檣櫓散扶桑草檄屯兵地分题结客场荀吴元破敌段颍旧平羌巨碣祁连外高
牙勅勒傍煌煌麟阁燕兽锦出明光

八阵新鱼复三关旧虎符横行金锁甲独挽绣螯弧紫塞云连碛黄沙月满途擒生
过涿鹿转战出飞狐朔雪飘笳吹寒星坠鹿卢胡床秋弄笛油幕夜投壶熊豹传韬畧麒
麟照画图受降城下战一举慑威弧

大中丞万公伯修以出塞百咏湟中经畧诸牋见贻卒業寄懷十六韵时万公复有
塞上之行

独坐中丞幕雄飞国土场双雕白羽箭万骑绿沉枪筹筴金城擅韬铃玉垒扬举天
依大树畧地到扶桑积甲阴山下投鞭瀚海傍受降来紫塞归附半青羌属国赆酬丽中
军叙致详邮筒驰百韵竿牋报千章吐握追公旦吹嘘接孟尝词流倾陆谢赋客聚班张
玉屑霏盈坐金钗俨作行南楼谈未彻北府宴频张箏策驱前部琵琶醉后堂珠帘宵坠
月画戟书凝霜相貌图高阁勋庸勒太常煌煌三锡命铁券下明光

赋得西海子

荫树分仙阙浮花出帝城微茫衔日动浩荡接天平雁鹜依沙下鱼龙触浪行石疑
藏滌灑池似凿昆明鼓角隋堤暮戈鋌汉殿晴凉秋泛槎去织女下机迎

寄赵相国一百韵

赤汉双扉近黄河一棹迟凭陵苍野外怅望碧云时酒肆游真倦盐车力渐疲书徒
勤马服策转误鸱夷绝域春如梦他乡岁若驰行藏嗟厯轡去住叹支离水欲浮三峡峰
犹碍九疑有登懷泰岱无路息峨眉此日文迷豹当年瑞应麒朱弦千古抱彩笔万言持
艺圃夸韶隽词场问宿耆元戎推授甲老将属褰旗一代尊玄晏三生遣子期升堂偕偃
夏对陛压郊祁灿烂甘泉烛荧煌太乙藜金波鵙鹊观玉漏凤凰池直道崇三黜危言和
四维埋轮摇地轴折檻树天彝率土声华震穷荒窜逐罹罗浮盟蜃鳄岭表摄蛟魑进退
占坤剥盈虚悟坎离三山行息足六洞坐支颐豸绣资腾蹕麟符藉保厘枫闾仍出入棘
殿重逶迤劳来初烦契寅清独任夷都俞尧宠渥吁咈舜颜怡温室舟航待明堂柱石毘
推诚扶社稷尽瘁鞠烝黎戟楯开边衅戈鋌虑世危烽烟纏上谷郡邑践高丽独坐裴中

令横行郭子仪运筹惟挾伐请剑必芟夷号令严貔驳威名捷虎貔追奔逾朔漠经畧到
嵎峡庙紮中行说街悬右谷蠡八荒回天札四表净疮痍浩荡皇仁布纷纶圣泽驰双螭
文郁郁五翟命纚纚祖德鸾章耀幽闺象服宜祲祥符宇宙盼蠻格灵祇御苑窥神雀天
闲狎盗骊深仁沦鸟兽殊锡兆熊罴（时公孳生二雄）好善真谐克推贤欲过皮肝肠
洪绛灌耳目洞黄骊吐握倾流辈游扬洽等夷尘埃鸣郁憺磻壑话栖迟龙性乖鳞鬣鸿
心豁羽仪沉珠劳罔象抱璞诧穷奇意气凌山岳风流溢路歧孤亭偿寂莫大府接温夷
东阁床容卧西园席并怡盘飧调芍药枕簟挹茶■〈廿縻〉黼黻参芒屨丝纶逗接
■〈𠂔离〉参差闻鼓吹酪酏沃卮匱傅鼎频颁鹿郇厨或馈鮓捎檐陈董杏匝座荫张
梨柳暗前除蝶花明后院鹂珠宫游紺碧贝刹步琉璃突兀中郎座留连太傅碁帝京红
旭迈亲舍白云移兴尽燕都稻神飞越浦莠归程携候雁旧隱逐文狸菽水输堂构糟糠
慰庖彥高斋焚甲煎别馆构辛夷上苑偏垂翼南冥数挂髻墨悲晨肮脏杨泣暮淋漓落
落松盘径盈盈菊亚篱鷁堪茗水泛蹇任灞陵骑屋倒牵萝叶冠颓制竹皮圆方违凿枘
甘苦狎糟醅梦已交猿鹤书频扣鹿麋担簦辞海甸振旆发淮漣嘯喟人情惯飞扬世事
疑鸣岐嘲鸞鷲出华怪肥遗骨相寒崔顛生辰軋赵岐头风那噪鹊腹痛詎烹螭落月枯
颜貌酸霜裂肺脾彭城虞困阨羸博痛睽离哑哑回歌啸皇皇挟涕洟金茎沉沆瀣土窟
压舖糜饮恨边城驿吞声故国陴高门忘鼓瑟下里忆吹篴正则占鸡鹜元长对蛤蜊称
诗慚孟浩献曲陋王维潦倒三千客颠狂十八姨坚冰凝絕壑重雾勒清漪目断苏司业
魂摧杜拾遗侧身从瓠落弹指失瓜期杜牧才元俊刘蕡策故奇风宁滕阁送雪已谢庭
遗赤帙方平赵青衫尚隔淇徘徊燕塞外踣躅潞河湄乍许攀槐棘能教困蒺藜朱陈新
阅阅秦晋旧襟褱紫极庸窥豹沧溟漫测蠡金犹悬骏骨玉岂赚峨眉雨露通鷓鸪星辰
列鷁■〈义鸟〉孤鸿怜太白二鸟惜昌黎拂拭存衣袂提携到履綦生平万言筴一为
奏彤墀

寄胡孟弢兼懷惟寅李子

乍别君山署仍飞帝苑航谈天来碣石赋雪罢潇湘阙已蓬莱近斋犹苜蓿长芝兰
蹇馥郁桃李树芬芳国子先生列成均博士行传经酬寂寞问字鬪趋踰安定才何屈昌
黎誉渐扬论兵肝胆赤谏猎鬣毛苍僚属频携糗生徒竞裹粮瑟寒朝煦日毡薄夜凝霜
五鹿新回座三鱣旧报堂九流穷竹素六馆校青绡赠酒逢司业持斋学太常烟霞萦绣
佛雷电激干将晓殿游鷓鸪春城宿凤凰长扬催拄笏太液待飞觞万寺西陵外双扉北
斗傍垂鞭时觅句缓带日成章永拆徐陈社谁登陆谢场应怜李都尉偃卧绿沉枪

觉生诗赠吴启元

役役浮生内先登大觉场恒河初舍筏苦海骤回航绿绮声谁和青衫债渐偿因緣
投翠柏梦寐熟黄梁宝座悬空阔珠林构渺茫玄心偕去住圣谛彻行藏杖锡凌风露袈
裟傲雨旻乾坤怡草屨岁月度绳床说法高峰外谈经巨石傍楞伽持处密般若诵来长
磊落机锋契逡巡棒喝忘散花摩诘幻筛粟惠能狂絕岛驱龙伯遥空蹑象王给孤禅苑

树香积梵厨粮慧日三天覆慈云十地翔愿携金色臂投袂入清凉

题松茂兰馨图二十韵（有序）

蔡景明先生家大人同榜也年七秩初度称觞者四集而适以是日举冢孙姻友咸传谄以为希遘爰绘松茂兰馨图而索余赋之

霁日明松桧光风毓蕙兰一弧悬海上双舄堕云端殿宇金茎矗庭阶玉树团丹膏凝琥珀翠萼绽琅玕五粒垂山径孤根翳石坛沅湘思楚客泰岱觅秦官劲节回春意幽芳袭岁寒亭亭标院落冉冉拂栏杆突兀朝霞映纷披夕露溥当风旗猎猎杂雨佩珊珊鸞鷲文犹贵熊罴梦未阑燕台新骥足渭渚旧渔竿象纬中天滴波涛弱水残含饴呈极乐设醴助清欢火枣频餐易冰桃乍得难后堂罗管钥中路集衣冠北极催纶诰南冥兆羽翰青云传上国紫气接长安奕叶清芬播茏葱瑞霭蟠云初八千禩绛阙下还丹

少室山房集卷四十四

●钦定四库全书

少室山房集卷四十五

（明）胡应麟 撰

○五言排律三十三首

参知张公睿父博极羣书侈于三篋而不佞猥以臭味国士龙门执手晤言兼旬款洽辄因扬挖写寄诗歌凡六十四韵

六洞神仙吏三天侍从臣宣猷元借召布德重生申卓萃倾流辈飞扬迈等伦宏才川浩荡伟度岳嶙峋令誉收南服英声动北辰丰标凝卫玠局量峙王珣调自中原合文从上国抡衣冠遊太液舄履步长春黼座瞻皇极纶扉谒帝宸金门劳执戟玉殿伺垂绅劲节先排汉昌言或借秦轮埋躬愈直檻折道弥伸李峤箴规切阳城献纳频幼安懷并席长孺慕睽茵贝锦初腾越牛刀试割闽苍茫辞蓟阙濩落度延津九鲤披云夕双龙蹶雾晨干旌停枳棘卤簿却荆榛吐握加寒贱吹嘘及隱沦襟期青眼洽意气白头真絕代夸殊色登坛属俊人含毫千藻发洒墨万花新宛委羣编列琅琊巨轴陈玄谈回夏棘广譬狭庄椿竹素隋宫缮菁华邛架论牙籤携丙乙甲帐坐庚申掩映阶前雪纷纭闕外尘昆池方朔秘曲水摯虞摈貳负归渔猎撑犁入嘯颯悬标搜异粟辍箸验劳薪肆兔优成式征狸劣鼎臣爰居恒独悟弗述詎同询地戒遥通貉天文上接鶉七车宁后裔三篋定前身秬圃宗师匠文园卧逸民颓垣庸筑傅废陇漫畊莘谷口霜沾笠滩头月挂纶违时肠拂郁避世足遭屯肮脏虞卿匹颠狂贺监邻佣书疑闕泽讲易类严遵孝绪行藏僻君山积贮贫编摩淫束皙训海潮刘臻拥被嗟扞虱抠衣笑获麟酸吟鼯鼠狎苦蚀蠹鱼嗔径菊荒仍咽皋兰裂故纫桂丛居索莫萝蔓屋艰辛璧乍完衰赵珠徒缀大秦踟蹰愁炫璞宛转惜藏珍下里容賡曲东施属效顰分庭延墨翟倒屣接庄辛混俗东方朔遊仙郭景纯神明交孔鮒宦业締崔駟厚谊偏敦薄冲怀剧饮醇敲碁俄潰敌投辖剩留宾河朔差酬岁平原渐隔旬苍虬聊海甸彩鷁复溪滨汗漫烟霄翼崢嶸渤澥鳞宫行开碣石邸

会葺平津敢窃丘樊赍贪随巷陌淳孤城留保障率土藉陶甄叱处羊难卧畊余鹿易驯
八诗犹并耀一志未全湮曳杖将投华担簦欲憩岷惟应挈四部絕顶对朝真

题關忠义侯像二十韵（代）

间气鍾材杰蒲东迹未尘千秋闻将帅一旅见君臣丧乱情偏洽间關力愈陈飞扬
辞操日突兀刺良晨大义伸三国雄风敌万人单刀回鲁肃巨舫困曹仁顾盼吴依匿追
奔魏卒沦七军全解甲九域渐同轮雀鼠张牙角蛟龙挫羽鳞章丘虞暴猾临沮厄器罟
缚禁差踰月诛蒙仅隔旬精灵蟠上国胎鬻彻高旻白髮心摧寇苍髯貌絕伦名犹悬宇
宙魄已化星辰妇孺瞻依切生儒叹息频珠旗来恍惚铁胄下逡巡紫雾排僊阙丹霄扈
帝宸玉泉遗像在今古颂明神

送吴允兆归雪川十韵

十年京邸客龙剑并悬腰鮓履诸侯馈羹分上相调红颜轻汉绶白首曳秦貂剧孟
声华壮朱家意气饶片言笼宇宙孤诺动云霄击筑闻三殿回船就六桥离亭残月坠祖
席断虹飘扬子行春树钱塘落暮潮川长归梦怯道迥客魂消珍重浮家约无嫌雪上遥
同允兆诸子夜集赵相国斋中得山字

间气鍾名岳頽龄覩盛颜青霞流碣石紫雾照函關贈枣安期狎偷桃曼倩闲调羹
当北极置酒傍南山后院罗丝竹中亭集佩环百僚趋馆阁九列候朝班省问皇情渥讴
歌相业嫻飞鸾驯竹下舞鹤啸花间赐履来中禁悬壶得大还煌煌海筹屋遐算邈难攀
少傅赵公遍出宋元及近时名画俱

少傅手题纵观移日如行道山阴应接不暇纪以排律百六十言

宿雾雕栏霁轻烟画榻流图书分太液翰墨寫瀛洲玉轴标云汉金函控斗牛阶篁
俄蔽夏檐树迥生秋迭障斜窥院飞泉曲抱楼虹霓悬佛刹日月拱皇州野老骑苍鹿天
人驾赤虬遥空盘野鹤别屿点沙鸥翠幄藏青杏朱房缀紫榴洞庭霜后熟阳羨雨前抽
五岳紆行步千峰夹卧游撩吟松径僻逐望草亭幽意态张吴幻风神顾卫遒名高黄秘
监秬絕李营丘妙迹三车聚清芬四座留谛观殊未厌花色墮帘钩

俞羨长留集斋中毕出新稿索观卒業赋贈

忆罢葵丘会谁操碣石盟中原无独步上国有同声草莽元仙籍山林即帝城玄亭
窥老宿白社领时英赋擷潘张誉诗参鲍谢评凌风吴咏擅和雪楚才惊饮石千钧銳披
沙百炼明虹霓流巨轴云雾拥高旌岁俭担簦出时违蹶屣行迷花居北院乞米傍西京
郭泰睽舟思陈登卧榻情天遥频伐木地僻祇班荆綠蚁穷途泛苍龙大泽鸣踟躕悲老
骥寂寞语流莺旧业惭玄晏新知狎正平皇皇鲁中蓋一为美人倾

代贈荥阳新郎君

闕阅荥阳郡簪绅碣石筵春波明太液彩日驻甘泉白屋书连栋彤庭笔似椽千言
横赤帙万选夺青钱旧策龙门避新诗雁塔传螭头携雨露豹尾握星躔玉佩縈仙仗金
钗簇画船花香韦曲度树色灞陵悬意气惭吴质襟期洽郑玄通家兄弟谊好忆下帷季

梦登彭城诸山骋望大河因懷景陵徐惟得使君（新渠迄工徐君劳绩最懋）

涉险愁逋客凭高快旅人谷深疑子午河决念庚辰城郭围千雉楼台簇万鳞飞龙
余霸垒戏马息征尘梦隔山陵使勲留社稷臣桃花武陵润春水正垂纶

寿沈夫人十二韵

锦石支机夜华堂设帔时婺辉流北极河影接西池赵璧邯鄲映隋珠合浦移玉麟
双抱送金马半驱驰内殿縑龙馘中闺濯鳳匣丸熊昭燕翼冠翟耀蛾眉举业依黄阁吹
箫近赤墀冰桃来曼倩神枣下安期院落花香细帘栊树影迟萱龄春冉冉桂实暮离离
灿烂温纶锡荧煌命服驰漫论沧海陆庭日正逶迤

贺章宗理拜纳言六韵

拜命银台重承恩玉陛长旧焚司諫草新綰纳言章左掖邻宫禁西清近苑墙鸣珂
趋建礼待漏入明光雨露沾尧历风云挹舜裳归来双袖底不断御垆香

夜窓急雨迅雷简章生行父六韵

入夜天威动羈人赋式微疾雷穿瓦落惊电掣垣飞鸛鹤抟空迅鱼虾掠岸肥凉生
青竹簟暑淨綠萝扉积潦盈川谷愁霖涨海圻将因湖水畔对濯芰荷衣

赠徐司空十七韵

何来星斗色永昼驻干将意气高元直声华擅伟长新宫营北极故郡忆南昌帝胄
滕王阁宗支孺子堂垂天夸矫厉絶地快腾骧冕露昆池外帷褰粤嶺傍赤墀传鳳吹丹
阙覲龙光万户停芝蓋千门跨柏梁缙钱搜海岱材木下荆襄樽节蘓黎献忧勤翼圣王
朱衣晨灿烂彩笔暮芬芳并探图书域先登翰墨场雄篇驰月露只字鬪风霜丽藻芙蓉
幕幽情薜荔裳疎狂容孟浩贫贱揖田方市骏帷宁敞歌鱼铗讵忘欣传赐履近无棣锡
封疆

相国赵公损饷酒脯及鲋鱼■〈食不〉饩各赋排律八韵

异饌金华出甘浆玉髓流黄封螭陛底彩翰凤池头东海无劳牧中山不待求清香
浮綠蚁丽色映红虬鼎鼐分朝食杯盘愜夜遊投醪情繾綣辍饋思绸缪剧饮邀名胜加
殮豁旅愁欣然聊一饱何羨醉乡侯耒耜莘郊畔纶竿渭水涯羹分元相座鮓合五侯家
入鼎犹生雾堆盘欲照霞刈云连陇阪钓月倚汀沙玉粒逾红稻金鳞错紫茄杜鑱知有
托冯铗岂重嗟綠埜悬情剧清溪入梦遐穷年劳稼穡未暇咏芑葭

诘旦用孺太史亦以赋茄古体至余读之清思道发更赋排律二章章十二韵茄为
物最贱吾两人盛为品题若此士固有遇不遇也

弱植慳词赋微名昧典坟岩廊新蔽芾陇畝旧耕耘灌溉人工洽栽培帝眷勤先春
芽甲拆首夏叶纷纭色借青綾被光欺白练裙甘浆笼紫电嘉实抱玄云下箸迷山蕨登
盘胜野芹蹲鴟宁比芋辟蠹漫同芸杏酪何季共梅盐异代闻石渠根畅茂金鼎味氤氳
■〈廿困〉蠢聊谐俗离披会出羣遥怜百子殿花照越罗纹

植处非金谷移来是玉堂玄亭潜借色紫闥烂生光密叶团芝蓋疎花发米囊鸡头

形仿佛马齿味参商万子绵瓜瓞三浆沃荔房随波萍实丽入火芋魁香树拟蒲卢速枝
惭苜蓿长朝兰偕饮露晚菊互披霜祭敢劳先圣斋惟狎太常断壘闻学士蒸瓠忆平章
傅鼎调和熟郇厨短钉良凭将遐贱质浣涤助嘉芳

挽侯中丞六韵

寂寞青萍化苍茫素旒昏才华新汉殿侠气旧夷门仗钺三军锐登坛百吏尊胡床
边月堕油幙阵云屯马革悲王事龙章荷帝恩异时瞻大树奕奕象贤存

秋日过用孺太史馆中看菊作

九日移庭砌三秋列苑墙吴绡纷浥露蜀锦碎匀霜幄借青绫被簪宜白苎裳林塘
寒鬪色篱落静生香戏蝶浑迷素游蜂欲让黄朝殄期笠泽夕采问柴桑汾水佳人兴成
都倦客肠龙山风日在归理旧壶觞

众木凋零后羣芳烂漫时移从新上苑采忆旧东篱玉琤交璀璨金钿鬪陆离色披
罗幔蚤香度绣屏迟缀席千霞艳浮觞片月宜含霜晨缥缈冒雨夕淋漓隱士岩边植骚
人泽畔持何如酌甘谷万寿献彤墀

咏黄叶同区孝廉纯玄太史用孺作

合浦飘仍遠长安落未终千林俄失翠一水间流红寂寞经秋雨彷徨后夜风迷蜂
当观阁伴蝶戏帘栊命薄侷隋苑身轻异汉宫骚人悲葺芟赋客叹飞蓬桃杏凋元蚤芙
蓉发渐空妬他篱下菊增艳向梧桐

弱质全凋露繁阴半坠霜纷纷飞玉砌冉冉覆银床色岂经秋澹声偏入夜长翠销
兰芷佩青浥芰荷裳蒲柳俄更绿芜葭尽变苍随风吟楚寺伴雨积山堂奉帚悲长信含
毫泣未央故园遥极目天阔洞庭傍

曾秘书招同区纯玄用孺汪公翰登显灵宫阁

帝時浮丘肃仙坛太乙崇飞薨凌广莫杰观峙窿穹百级悬苍雾双扉辟彩虹凭高
千地入望遠八天空目杳吴门骑毫披碣石鸿蓬壶迷上下泰华辨西东树色新丰近花
香太液同慈恩何代刹紫极异时宫絳节朝金相铉衣侍玉童长陵怀左纛太隗问遗弓
不死标灵药浮生剧转蓬升沈飞鸟外聚散隙驹中气色詹山秀才华粤峤雄踏歌鄣郡
客献赋杜陵翁藉草遊宁倦扞萝兴未穷吾将趁昏黑絕顶御罡风

寿茅母八韵

烂漫青霞色晨飞玳瑁筵庚寅初降日甲子乍周季凤翻秦楼下鸾书汉阙传芝停
句曲蓋芰拥若耶船酌醴春光媚含饴乐事绵双珠呈碣石片玉照蓝田跃鲤看纯孝烹
鸡识象贤瑶池八万里振佩白云前

载别静父灏元二宗人并懷徐陈茆王四子

吾宗神秀裔二仲最翩翩桂树燕山并棠花易水聯名园邻北郭別墅带南阡曙听
钩辮去昏驰叱拨旋妖童携箏篴冶女竞秋千遠寺投清磬长堤簇画船清风貽赋颂白
雪和诗篇徐干才名著陈遵翰墨传茆容肠郁结王粲思飞騫屡入华阳社俄空碣石筵

河梁愁绪促海国梦魂牵意气长虹拆襟期片月悬放懷丹壑近回首碧云偏灞岸重登
日阳关乍出季吴田初放鹤越岫正啼鹃日夜相思切瑶琴抱絕弦

侍御叶公资送楼船抵杭赋谢五百字

伏柱辞燕阙褰帷向虎林花驄千里道竹马万家心白笔含霜动朱旗曳雾临埋轮
神鬼避折檻帝王钦捧日声华着回天意气任斜封先罢勅直指载题箴鼓吹钱塘岸楼
船震泽浔浮江消疠疫煮海荡氛祲豸绣威祛蠹鱼盐弊剔蟬三吴豪右慑两淞吏氓愠
县柳标前植溪兰拂旧纒河阳霞粲烂秋浦月萧森紫雾催王舄丹青丽必琴名贤遗惠
爱茂宰播芳馨鹵簿江州却桥梁灑水寻儿童羣接袂父老竞披襟合浦光摇电函關气
属云澹台征往昔石户询当今仆射怜才切司空拜善谏衡茅搜野逸草莽荐崎■〈山
钦〉末契申卢骆孤踪托向禽公交车时序换客邸岁华侵絕域伤流寓荒涂惜滞淫一
身余杖屨十口互衣衾驟得鸾翔汉真怜鮒涸涔银缸寒乍照玉斝醉频斟董相虚陈策
庄生实废吟乘槎騫并适捧檄义同歆足刖宁愁卞头风欲愈琳誼高双白璧赐溢万黄
金敝篋离并塞轻装发蓟岑严城宵击柝古戍暮传砧野店黄茆簇山邮綠树沈沿淮程
冉冉入越路駉駉蕙圃欣逢鳩枫亭快食鯧孤帆移雪上敝宅认山阴猿狖迎空谷鷓鴣
集故林陈情慚李密养志愜曾参午憩甜仍黑晨炊突渐黔苏机聊下轴窵锦趣停针草
阁啮双燕椿庭戏五禽蓬蒿行处合苹藻荐来歆白凤腾书帙苍龙掣剑鐔衔恩肠易结
饮惠舌难喑八表瞻星象三韩待雨霖羹墙岂自刷翼卵定谁深洒墨紬丹匱濡毫綻綠
沈惟应感知什百代为知音

再送包观察稚升之闽中

已奏淮阳绩仍浮渭北船飞霜随宪节明月挂离筵郡邑崑函外城闐灞浚前重關
行紫气别业问蓝田六传排云日双旌拂汉季袖中龙剑色烨烨射星躔

赠别区太史用孺三十韵

屈指登坛业如公更几人英词摘晋宋大雅擷周秦粤海三珠耀昆冈片玉抡红颜
攀桂阙白面上枫宸棣萼燕山下梅花易水滨佩紆新鸞鷲袍夺旧麒麟秘阁然藜夜香
亭属草晨横身飞日月举足步星辰意气深流辈风期絕等伦湘台盟景屈邳郡缔徐陈
契为论文笃交緣作赋神舟聯吴苑雪笠共汉京尘马走提携渥牛驱顾盼频空林移阜
蓋委巷曳朱轮握麈酬玄度濡翰接景纯留连时达旦卧起或经旬岳立千秋废冥搜万
象陈高标凌泰岱厚誼薄峨岷剑妬芙蓉合衣便薜荔勿骏才宁易屈龙性故难驯濩落
商岩画栖迟渭渚緡扬雄玄寂寞宗炳卧逡巡别恨催红叶归期趣綠苹一丘容寄傲九
域藉经纶石户偏怀璧天墀忆赐银孤騫怜大翼独处笑穷鳞徙倚三垣切参差一德邻
乾坤留哲匠社稷待词臣努力时餐饭關心数饮醇金闺坠梁月投梦灑溪垠

夜集万中丞斋中二郎君出侍翩翩玉立且风致卓尔不羣追赋八韵寄怀并似中
丞以当尺一

识面双投刺舒怀一抱琴云中鸿雁翼原上鹤鷄心并宿桃花岸聯飞桂树林风华

乔梓茂意气棣棠深翰墨眉山下箕裘洛水浚蓝田夸合璧丽浦重兼金文武家声擅诗
书世业任西堂春色蚤烂漫忆披襟

谒關忠义祠十八韵（代）

凛烈贞元气时危属异人河山留壮节海岳降高真北陆扶皇胄南阳协帝臣从龙
嘘赤伏跃马践黄巾夏口单刀驻荆门万甲巡精忠余报效大义絕连姻画界狩权忌迁
都猾操鞞吴师魂半逝魏卒阵全湮斧钺威屠德臙■〈舟行〉势蹙仁风驰秦塞外电
扫洛川瀆域内俱徯后江东实震邻神明炎祚厄鬼蜮诈谋伸麦邑悲逢蚤章丘痛获麟
阴灵遗百代盼蠻亘千春隧道紆松栢宫墙饰藻莘断云回怅望斜日助酸辛古壁蛇虫
字空梁燕雀尘惟应玉泉刹永切镇长新李

本宁廉访以武侯庙八律见贻倚赋排律四首（有序）

世之善颂孔明者三代而下一人止矣乃余意犹以未尽往往发之杂论著间谓诗
篇束声偶欲效工部古栢行为长歌而未暇是春本宁使君自蜀至手书武侯祠庙八章
见贻余受读跃然因取陈志泊诸野记小说凡武侯嘉谟伟节韵为四章章每百字即琐
语逸事亦间附焉蓋区区仰止可概见已

陇上耕耘日隆中啸傲时分荆存霸迹入蜀定皇基建业元将命（先是当阳之败
孔明请奉命求救于江东）成都迄受遗交邻吴壤服讨贼魏廷知旧鼎三垂叶新图八
阵移七擒降孟获十倍胜曹丕大将嗤巾幗（魏平）追兵怯鼓旗（杨仪反旗鸣鼓懿
不敢逼）伏龙人羨艳如虎敌纷披絕棧巴山曲丛祠汉水湄炎精垂烬夕泪尽杜陵诗

时务真谁识崎岖见武侯勤劳同稷契正大协伊周鹿任奸雄逐龙占俊杰留相才
元独擅将略定谁优治世休从惠交邻或用柔南荒穷絕域少陆荡神州取善规忠益开
诚布遠猷（俱武侯语）仇家偕饮泣（李平廖立）敌国竞含羞纪法森鹅鸛（八阵
）机神运马牛（木牛流马）巍巍三代下王佐嗣先忧

抱膝南阳下乾坤入啸吟犁鉏莘野重畚插傅岩深大泽皇图创（孔明隆中之议
先主荆州）中原帝胄临万年扶汉谊五月渡泸心羽扇驱风电蒲轮挟雨霖遗书穹峡
外（川中有诸葛兵书峡）藏甲故岨阴（滇南有藏甲岨）部伍归宁辑酋豪入纵擒
南人慚数叛（孟获云南人不复反）北孽戒重侵（昭烈初卒爽懿来侵）六出先声
壮三言后虑谏（告李福语）锦官祠栢在黛色尚森森

吞吴情拂郁（杜诗）灭魏思飞騫管乐宁同座萧曹定隔藩南征弢剑戟北伐誓
旌旛万事三分策千秋二表言庸禅知尽瘁桀懿询加餐（即食少事烦语）日惨祁山
戍天昏渭水原（五丈原在渭北）金牛炎社促铁马夜台喧古栢笼祠砌（见杜诗
）枯桑抱屋垣（成都桑八百株）江空残月堕峡迥断云翻白帝留营阵伤心乱石繁

少室山房集卷四十五

●钦定四库全书

少室山房集卷四十六

（明）胡应麟 撰

○五言排律二十首

效阴铿安乐宫体十首（有序）

梁阴铿安乐宫新成诗云新宫实壮哉云里望蓬莱迢迢翔鸱仰联翩贺燕来重檐寒雾宿丹井夏莲开甃石披新锦雕梁画早梅欲知安乐盛歌管杂尘埃右五言律十句为篇者齐梁以还时有此体独是作格调精严音节圆鬯古今五言律鼻祖也前而鲍谢诸子律既未纯后而江徐以迄卢骆尚多四声八病之犯律家正始无出是篇暇日辄取汉魏六朝唐宋宫苑之瑰艳者仿安乐体成赋十章聊用自娱匪求多于曩哲也

甘泉宫（见汉武故事史汉等书）

绀殿明丹壑朱栏丽碧空金芝藂紫翠玉树翳青葱闾阖千门度罽毼万户通鱼龙吟太液鸡犬咽新丰后乘双飞燕踟蹰豹尾中（赵飞燕从幸甘泉引晋志语疑汉有两人也）

铜雀台（见魏志乐府等书）

千秋遗片瓦万仞忆崇台绣柱星河落雕栏日月开歌声回白苧舞影拂苍苔旧宠罗衣歇新妆总帐哀当时笑公瑾不载二乔来

清暑殿（见晋书本纪及通鉴纲目等书）

曲榭生风蚤层窓漏日迟冰山围■〈山截〉嶰雪嶰架透迤石甃长秋井泉疏太液池御舟三翼泛宫扇七轮驰莫漫酣吴酒轻言狎翠眉

景阳楼（见宋书及诗纪等书）

紫气重闕外飞楼上属云回梯盘月窟复道驾星文列圣金支现诸真玉佩闻炉香晨杂沓烛霭暮綰缦不分银床下他时狎翠裙

阅武堂（见齐书东昏纪南史等书）

万柳何年植枝枝净隔尘堂犹名阅武苑欲借宜春涤器非寒士当垆亦丽人金丸穿叶巧寶屣坠花新屈指西师入能舒翠黛颦

同泰寺（见梁书南史通鉴等书）

园林标帝阙水石丽神州入座慈云动登坛法雨流三乘归独诣二酉入穷搜彩笔词人聚绂缣学士留逡巡成要略寒贱失雕鍤

临春阁见（隋遗录及南史陈书）

琐阁披香砌风光照丽蕐腰紫前殿柳脸夺后庭花暗牖通秦蹕明窓泊汉查流蕙悬重锦步障夹轻纱正尔呼江令隋兵集似麻

朝霞院（见隋炀海山记南部烟花等录）

宿雾悬珠檻朝云动玉扉楼心窥帝座阁道隱僊机八水清相观三山翠欲飞万畝围锦帐百媚拥罗衣一曲菱歌罢芜城事已非

沈香亭（见唐人本事诗及纪事等书）

十二雕栏外名花照玉壶翰林方醉卧中使遍传呼行乐词先奏清平唱未徂春山云作黛秋水月为肤妬杀红丝畔纖纖入画图（红丝研出唐彦猷）

神运峰（见宋人艮岳记及宋史本纪）

飞来自何处突兀挂雕墙帝命征千邑神功运八荒摩霄孤鸞下驾海巨鳌藏五岳真形在三峨故域长惟愁絶颠眺燧火烛天狼

结夏西山诸佛刹效初盛体为排律十首

寶树云霞出珠林日月悬丰碑饒晋代巨榜揭梁年绣柱排双阙雕甍控八埏塔光摩宇宙■〈施，童代也〉影矗星躔海蹙浮杯浪江萦卓锡泉中峨羣岫列上竺乱峰连鹿苑全铺桂龙池尽植莲昙花青鸟驻忍草白牛眠兜率高天外昆仑大地前神功积运圣谛法轮传万劫空王座千灯释祖筵焚身销众业断臂伏诸緣入室闻师利登坛见普贤曹溪存一悟临济彻三玄有漏先除障无生欲问禅行行负瓢笠曳杖到金田

玉镜悬高座金轮压大荒国疑遊净乐山似踏清凉殿吐祥云色窓含慧日光虹霓行画壁牛女宿雕梁一钵携千界孤灯现十方袈裟晨灿烂■〈施，童代也〉盖暮飞扬夹户杉松丽捎檐桂柏香灵花芬别院苦竹翳回廊马为馱经白龙因听法苍足三禽是使牙六象称王那叱狞牙动修罗慧目张腰疑天女细爪忆梵流长几夜眠风穴经年事石霜昙摩聊示寂普化旧徃狂浩瀚游秦论圆通入洛章津梁如可涉拂袖上慈航

杖履遵山麓栏杆列磻阿飞梁攢泰岱画拱压岷峨实阁慈恩近瑤宫净饭多天台浮海峽岳麓控江沱振锡啼猿下登堂法雁过焚香驯怖鸽乞食叩灵鼙曲径穿黄叶回廊步綠莎崕亭交竹树石室挂藤萝万亿先明藏三千宰堵波双林开觉路八水渡恒河白足依龙树緇衣住鸟窠禅灯围帝释梵乐奏仙城雪窦偏宜颂云门不厌河大悲观自在上首阿难陀幻梦清圆觉真如会密多将幼居士服一榻伴维摩

半岭金银出中天杖锡留门庭炎汉辟栋宇大唐修一水浮精舍千峰插梵楼凭高双槛豁望遠七灯幽舍利神光跃兜罗佛臂柔阎浮穷上国贍部尽南州削壁云霞动飞檐象纬遊■〈施，童代也〉高寒月坠磬断夕阳收麓胜前飞鹤山深近伏牛象王迎法驾龙伯护灵湫芥吐须弥色莲垂阿耨流旃檀长照夜祇树不惊秋大士居岩际高僧坐石头机深频掣棒偈苦欲沈舟溪岸闻三乘云门见四愁谩论生老病千劫尽浮沤

殿起凌三竺台孤望四溟遥空呈紺碧絶顶挂丹青巘岨横香案峰峦列画屏刹高全碍日池迥半披星古砌流云积阴廊冻雪肩泉当秋径濯瀑向夜窓听影落吟边雁光飞定后萤钟疎闻鹤唳钵冷带龙腥薜荔苍凝壁藤萝翠压庭斋厨菱芡熟讲席芰荷馨切利旌旛合潮音杖锡停三车迎海峽一苇渡江汀觉路超千界玄關护百灵圆明童子偈定慧法王经梦幻清禅铎机锋彻梵铃鳌山欲成道会待叢公醒

荐福崇新构能仁拓旧基殿疑身毒割宫似竺干移法力金容耀毫光玉髻披恒沙登觉岸阿耨渡香池五蘊空罗刹三摩驾辟支千身菩萨现九劫梵王离幻化天魔伏灵通地藏知运开龙汉后季纪赤明时鹿女衔花献猿孙拾橡嬉犍關驯虎豹伏砌断蛟螭

古树撑岷出寒花抱石敲飞萝悬絶磴夹筱蔽清漪生老偏愁病贪嗔独恋痴道存无尽
藏劫满阿僧祇舍宅王珣癖过门杜甫饥芒鞋万峰雪岁晚入蛾眉

梵宇千灵集禅堂万法森瑠榭浮絶巘画槛卓遥岑枕簟霞光入竿■〈施，童代也〉
雾色侵悬岷冬雪坠背岭夕岚沈鹤去天飞锡龙来地布金持斋驯鸽下施食断猿
吟树老僧忘腊花空佛印心菩提清欲界檐卜净祇林经卷流泉侧香龕巨石阴普陀悬
海峽灵隠矗江浚教自磨砖彻禅因面壁深迷津航易度彼岸筏难寻四品中军好三乘
吏部钦王丞情汗漫许椽思沈淫大梦销尘劫高谈畅古今明朝瓦棺阁乘胜更登临

寺古传回向园空认给孤飞轩临广莫迭阁到虚无白玉中天甃黄金大地铺千僧
翻般若七佛证毘卢默坐超人境高凭豁帝都东西凌泰华南北控燕吴阿闍灵光现婆
娑圣教敷幽明穷六道神鬼彻三途岭欲腾丹鹫碑疑下赤乌香林狮子伏法驾象王扶
净业依兰桂空心会苾芻沈檀霏贝叶茗薜浥雕胡板屋双扉静绳床一袖枯玄谈披沆
瀣妙义发醍醐支遁神偏王周顒兴未孤无烦畏昏黑絶顶上浮图

杰构临丹地飞梁瞰碧峰台高苍堦尽殿古白云重峭峡虹斜度危岷雪半封佛疑
维卫至僧似落伽逢舞鹤参朝座饥乌集暮钟縁深频伏象定久忽闻蜚暗牖闲生竹虚
檐密种松持经迷菡萏说偈坠芙蓉异苑分泉瀹香粳激浪春蒲团藏閬寂木榻寄蒙茸
八识空尘累三禅别梵宗九州岛遥挂衲十岳遍扶筇瓔珞天人馈玻瓈释帝供文殊行
处脚迦叶笑时容东域摩腾化西江道一踪将辞泐潭去阐法号黄龙

佛日千岩静人天万壑遥珠宫浮碧落贝阙抱丹霄玉盃霞明灭金灯月动摇旌旛
朝雾结铃铎夜风飘袒膊眠山洞飞身渡海潮香看尘外续火辨劫前烧阿育诚心化登
伽幻术调波旬回愤恚戈利失矜骄塑壁环双树龕碑记六朝梵僧家姓竺梁帝寺名萧
北固凌虚旷东林跨沅■〈沅 寥〉池开龙母窟塔涌雁王标翠栢禅机契青莲释证饶
挥锄除障业破灶絶喧嚣五岳携孤杖三田寄一瓢流沙归路近柱史乍相邀

唐五言排律沈宋肇端盛唐则供奉右丞大都不过十韵上下繇简故精而千言数
百匪冗则糅故也明杨用修选杜发明斯义大有抑扬虽其意左袒青莲要非亡谓乃杜
诸短章亡若吴生画壁十韵杨特舍旃而沱水临中坐亟称絶到则其舛也夫诗近体五
七言八句至矣尽矣既曰排律矣恶用以长短限之况篇短而精由隆準公将才止堪十
万众过此非长韩淮阴悉蕃汉以成躡楚之大勋乱于何有则杜陵固其鹄已惟是才赋
所趋人难强合且用韵多取材博得与失参互其间则用修之论政自有不可废者唐人
藻绘十九摭之僧寺佛宫结夏西山诸招提永昼如岁漫取十二家读之至四君排律焯
然心会辄步其体格积成十章章十六韵诚知时代所压靡足以驰骋前规要以纪兴一
时备忘他日至于竞传之句已着之篇亡复因袭则近时流弊余不佞知免矣夫

少室山房集卷四十六

●钦定四库全书

少室山房集卷四十七

（明）胡应麟 撰

○五言排律一首

乙未仲冬朔舟次济南大雪百二十韵（有序并呈永叔）

诗成后雪愈盛六花如翼连三昼夜不解两崕之间琼林珠树璀璨万行沙棠溯流真如入瑶池泛银海晋人亟称山阴道上徒凡境耳余晨起披氅蹑屐从两奚奴登高阜吹玉笙飘飘然有驭风骑气想恨不携太白子微辈升五城十二楼望之入舟呼酒豪兴逸发信笔缕缕复得千言通前短章凡一百二十韵唐五言百韵昉于杜陵韩白踵作然皆歷陈时事未有咏物而韵百余者又皆用寬韵四支一先之属未有兹韵而至百余者余不佞实始滥觞即构思荒幻取证杂猥大方之家谅有余笑顾邯郸之麀粗竭于此而用事之变于词场亦庶几焉因并前什繁简互存以敬俟后君子且以为异日者考见颠末浅深之白云

密霰三冬集玄云四望同微茫屯巨壑浩荡布长空入夜光交映连朝势倍雄纷披遥坠露飒沓近含风漠漠綠堤厚霏霏入壑融凌波来冉冉逐浪去匆匆岛屿紫枯枿汀洲结乱萍（水草）修途霜淅沥閤谷雾巃嵒屏翳驱驰疾玄冥号令隆山川呈浑沌

（帝名）宇宙■〈〃欺〉共工（共工自谓水德王介甫称雪为水种）炼石娲皇瘁填河织女癯衣裳青媛湿环佩素娥■〈王忽〉（玉声）月杵春来细星箕颍处蒙

（元诗云孙捧出南箕■〈〃欺〉月娣春来北斗量）斗牛沈剑色雷电撤车攻（王介甫雪诗冻云深闭阿香车）南纪阳和伏东華灏气笼扶桑霾曙旭析木炫层穹齐鲁青如冪岷峨翠若幢重阴浮海岱积素晕河嵩潮涌钱塘阔涛蒸渤涨泽（音义俱全洪）滹沱流易合勃律宙■〈风贝〉难通（见酉阳杂俎）庐阜天连瀑燕台日贯虹

（白虹）柱凝江馆瑟弦折塞门弓弱水冰堪渡辽阳淖未灞瑶翻藏地轴（樊宗师文

瑶翻碧斂）玉戏笑天工（清异録以雪为天工玉戏）碎讶昆吾切莹看匠石砉潇湘

遗是玦宛洛种为琬琮璧唐郊荐圭璋夏庙彤（祭名）王孙珩粲烂和氏璞茏葱玛瑙

霏成屑琅玕别欲镕水晶盐味淡火浣布毛冲（白也）贝锦披文砌蛟绡错绮枕玻璃

新步障云母旧屏风蟾窟俄圆桂鸱弦骤拂桐（以白雪言）白华怀炯洁黄竹寄忧忡

处士墙颓萑幽人径翳蓬千林凋橘柚七泽冻杉枫泞隔双柑侣泥沾百草丛禾苗占上

瑞楮叶陋凡工拟絮情殊愜吹葭节渐融（和也时近长至）吟梅标逸韵泣笋验深衷

庭院饥喧雀轩墀静扑虫（蘓雪诗隔窓撩乱扑春虫）罗张梁苑兔（兔园）耒瘞邺

田螽（蝗也）潏潏传羔帐萧疎放鹤笼狼峰清代北鹊帜誓云中（太白诗梟首高悬

白鹊旗）蜃吐楼台巨鲸封观壁窿（左氏取其鲸鲵以为京观韩雪诗鲸鲵陆骨死

）鼃鼃愁永蛰鸱鸢快高翾远渚拳栖鹭荒陂窳落鸿灞桥驴蹇足蓝岭骑埋鬣汞已凝

贞白铅仍聚葛洪玉京朝柱史银阙跳壶公棺下乔应毫笙飞晋尚童餐苓延蓊训服乳

度茅衷（贞白而下仙家八事并以色言）慧可禅锋利（用少林断臂事）瞿昙佛行崇

（雪山苦行）散花摩诃幻筛粟惠能侗（见坛经首）嶂没须弥岭池添阿耨罽菩

提陈大梵优钵湛真空菩（提优钵俱以花言）冶色凌姑射炎威净祝融轩涂迷七圣
舜麓正羣工（烈风雨弗迷事）孟氏离宫（雪宫）乐颜回陋巷穷（王介甫诗拥箒
尚怜南北巷谓不蔽风雪）水精传孔父（纬书云水精子继周为素王）石髓问嵇公
秀彻肤明玠（玉人）瑰妍质粲蒙（王蒙）凝脂夸杜姣（杜义）傅粉诧何工贖亮
嗟埋树（埋玉树着地中事）怀忧叹濯桐（王大濯事）浩游贤七贵（孟浩然名浩
尝与李白郑虔七人遊雪中有七贤过關图）安卧卜三公（袁安后至三公介甫雪诗
袁安交戟岂须又用此事）竹墅深逃廡茆庐破匿全（韩赠卢仝诗破屋数间而已矣）
孙窓芸帙耀苏窖菟肠充有履穿东郭无衣晒郝隆陶巾敲自漉姜被薄谁烘蝶记元
嬰（滕王蛺蝶）寫鵝忘逸少笼（白鵝）含冤齐妇孝（东海孝妇齐地）殉节宋臣
忠（朱弁祭二帝文魂消雪窖）左伯骸将毙全师睫故蒙（全夔沮雪高卧鳌山）绋
分须贾袂褐绽范丹躬雨粟羸君骇量沙魏卒槽（道济量沙以余米覆其上）程徒传
旧业石帅擅竒功（石雄）炭化虚疑逊旌（阳化炭为妇人美肌如玉雪）薪慳孰代
崇（蜡代薪事）长谣逢贾簿（唐人赠岛诗十二街中春雪遍）大猎罢萧忠（见玄
怪録）暑檻宜河朔春盘忆射洪（杜诗）峥嵘惊岁暮朗润报年丰兰舫忻聯鷁桑弧
庆得雄（余是日适举子）倦遊秦邸外（苏季子黑貂事）乘兴越溪东（剡溪在越
余方挟策东归而与永叔聯舫故用二事）濡涩全妨舵飘飘半压篷羣器怜榜竖独钓
恋渔翁爨拥孤烟白炉存宿火红布帆悬菑峭丝竿系青葱绰约肌生疹清华日眩瞳衾
裯吟啸里几簞画图中白苕歌游子清商发侍僮逍遥披氍客肮脏被裘公角赋豪吞惠
（惠连雪赋）琯词捷仆融（张融海赋盐云积雪炎天飞霜暑路）船邀狂太白（杜
赠李天子呼来不上船）笔授隼文通（用彩笔生花事余与永叔聯舟而旦夕唱和故
以上十余韵俱寫沙棠中风景）皓齿纷相藉明妝俨作丛轻盈回曼脸滑膩衬酥胸飞
动昭阳燕翩■〈衤迂〉洛水鸿浣纱西子洁织锦窈姬聪蛾黛呵张敞莺喉簇马融登
仙惭有道中圣羨无功握尘神先王持螯思并洪（余及王君皆携家故五韵及之）百
壶携若下五石醉新丰罍玩商雕穀觚携汉铸铜藏阉拈胜事横槊鬪英风潦倒青田核
淋漓碧菡筒南皮簪竞盍北海座宁空甲煎芬逾岭天池味胜蒙（蒙山）枣梨膏野熟
薏苡酿泉冲（淡也）鼎列云英麪匙抄赤穰種烂煨樊圃芋细嚼夏畦菘汀鹭肥供案
河魴健入■〈竹聚〉（捕鱼竹器见韵）竒毛搜海雁（茂先海鳧毛事取类雪之故
亦举案中品僕言薏苡即今薏酒）异味献家豨（王武子事）虬脯时封鹿羊躡或饌
熊烹鲜庖中窾斫脍匠成风（登仙以下至此十余韵大都无与雪典然皆余偕永叔豪
饮雪中事故缕缕叙卒章）大纛思平蔡高牙誓缚戎（李靖雪中求颉利牙帐遂禽之
永叔伉爽激烈常有封狼居胥意雪中拉余登高阜驰射诵唐人欲将轻骑逐大雪满弓
刀之句北望慨然）射从飞卫习棋效积薪攻（攻治也舟中有善奕者王山人）挟日
平原畅谈天碣石江风池延小谢龙鲜询司空絕倒元平子清言复阿戎（仲子侍坐
）三坟罗倚相四部繕行冲（余与永叔坐中戏放温李旧习各隶雪事遂盈数卷）屈

宋才无敌邹枚宴未穷寥寥白雪赋千古孝王宫

唐人百韵若子美乐天集中多重出者已悉前人诗话明何仲默寿李文正韵才三十余而迭见数四尤非后学所当法余此篇凡字义同者绝不复重若字同义异或人名地名则虽屡出实与别韵无殊严羽卿胡元任及唐宋诸名流夙尝论此咸有成说顾其间一二宽韵犹不妨恣意泛滥至短促韵不盈百中又有绝不可入诗者而欲演绎千余言非此何以措手足如此篇四空字一实用一虚用一梵语一官名字虽同而义亡一同且其难用尚有甚于字异者故聊存之以备一体兼以就正大方家又前用惠能筛粟事粟即秔稻之属坛经自明与后用燕丹天雨粟事亦不同自余率放此

少室山房集卷四十七

●钦定四库全书

少室山房集卷四十八

（明）胡应麟 撰

○五言排律一首

挽王元美先生二百四十韵（有序）

呜呼此余哭元美先生之作也庚寅秋闻先生病则驰小艇过娄江比至先生病已革起榻上执余手曰吾日望子来而瞑吾续集甫成编子为我校而序之吾即瞑弗憾矣余歔歔唯命留来玉阁六旬雪涕与先生别卒岁抵家则报先生逝矣呜呼山颓木坏世将谁托吾将畴依记曩岁病瓜步先生为余作传因以传下属余弗敢当顾有片长可以自効者爰掎摭先生生平履歷闭户一月勒成此篇凡二百有四十韵二千有四百言古排律至多不过百韵至先生哭于鳞百二十韵而极奈余之才不能半古人则先生履歷非藉此固亡以征万一而冗滥之谓诚无诿于大方矣

泰岱崩颓日乾坤混阖年共惊梁木坏谁拥劫灰然北极悲遗老东吴泣大贤八荒情惨怛九域涕沦涟讵达鸡林外神遊鹿苑前青牛应独跨赤鲤詎同还忆昔嘉隆运重看间气联星移严子濂岳降洞庭巅花甲庚寅兆蓬弧戊子悬贞元逢五百盛美冠三千奕叶龙为种苞苻凤集肩修翥扬八彩异骨耸双颧毁齿惊闾族垂髫詫里廛应声题寶铗唾手拾青钱玉陛晨宣唱琼林昼锡筵茏葱韦曲雾摇曳杜陵烟柳岸青丝盒桃堤赤玉鞭墨花浮太液囊草动甘泉东壁呈辉耀西曹得静便銳情三古上矢志百王先尽却区中累全收物外权词林勤斲削艺苑恣腾骞正始追遗躅开元继絕纒抟空孤翼上歷块众蹄竣（避也）歷下论心最新都托分坚宗吴偕骏发余李并蝉连南海携公实西堂对惠连（谓次公也）张公江海契徐子庙堂縁社自簪绅合门仍韦布延伶俦嘘谢叟羈縻脱卢楸结侣攬金石同心叶筦县（乐名）虹光摇海岳雪色被幽燕入穴雒探虎登坛耳握韃遐踪恢孝武陋习起成宣（以上叙交遊事）嶠冢千江派昆仑万谷泉五经凭发笥六艺浩忘筌大笔笼檀左雄章軋孟迁漆园饶采掇郑圃纵渔畋颂发商周蘊诗紬汉魏詮中郎同丽尔都尉共超然八斗虚高第（鍾嶸第子建为上品）三闾实

冗员（审言呼屈宋为衙官）兴深陶栗里情逸谢临川叙述卑平子铺张狭孟坚灵光霞映桷景福雾盈櫂只字摩穹壤单辞耀幅■〈巾员〉喑鸣人自废踔厉世无前（以上叙著作事）楮墨时随溷缁缣半蠹椽兰膏经岁竭藜火彻明然阁上飏中垒亭中阅太玄多闻留偃赐好学嗣颜骞急就章章疏凡将字字笺虫鱼评叔夜科斗辨僧虔鼯鼠竒毛列商羊独足拳浮游无宿疾贰负有遗馀狱底知神物（雷焕）河边识女媧流觞征仲冶威斗验承天待诏今方朔司空旧茂先编成罗艳异志就薄夷坚腹贮须弥外胸藏宛委还诸刘惭博核二沈谢覃研）（以上叙问学事）絶代难酬价倾城易遣譔桓文名藉藉绛灌目眇眇道直元如矢躬行更若弦当门宁植蕙曲径詎容荃萧艾纷投隙椒兰竞构愆一麾辞豹尾双佩拭龙渊易水悲歌歇潢池武略宣緑林弢剑戟青土静弓卷（以上叙外补事）屏翰风猷着家门歴数擅高牙沦瀚海大纛仆居延池水先波及昆岗骤火延乘时交鬼蜮济恶剩蝗蝻刻木伤纆绁肩輿询竹篴千机同织贝百足漫扶螭鱼服恫谁诉牛衣困自纒形骸迷肮脏手足竭胼胝痛切肠攢猬熹微命缀蜒瘍薰肌彻骨癭决项流咽断絶张仪舌轰脍石勒拳韬铃明主惜法网柄臣牵霹雳高空下雷霆大地燿（炎也）魂飞巢压卵胆夺栋颓楨进退身维谷纵横泪若泫刳心闻唳鹤洒血和啼鹃（以上叙家难事）星散华阳市天回震泽灑善权扞紫翠阳羨卜苍矸大泽偏容卧长林不厌穿扶筇升险絶蹶屐犯危颠谢客西州墓为农北海堧楸梧存越峤禾黍种吴田茂苑繁花丽娄江秀麦■〈禾昌〉开园邻緑埜筑室傍蓝田画栋金银列雕楹绘垩填竒峰俱岳麓恠石尽平泉曲榭遥通竹飞楼迥架榭残山疑坠碣剩水似浮滇橘柚连村树芙蓉隔港沿萍颺吹袞袞葵露滴涓涓陇首珍禽戏黔南语鸟儂遊人怀鞠■〈革戚〉冶女话秋千（以上叙宾客事）揖客长停哺迎宾屡握髻交遊太丘广车骑孟尝闾急难时捐困逢迎岁竭廩（廩也）朱衣惊坐众珠履入门骈别墅矜驰骑行庖试击鲜纷纭操脍脯蹠躩蹶连钱棚效虞惊制茶呼陆羽煎沈酣桑落会潦倒竹林眠较罚逾金谷移封隘酒泉糟醪凭寄迹曲米笑流涎鸚鵡玻璃杓鸬鹚玳瑁秦鷗夷浮菌恣象鼻吸连卷笠泽槎头鮓淞陵缩项鳊连螯烹紫蟹带甲供黄鱠（鱠即黄鱼诸解并同）水茱房房坼山樱颗颗圆儿拳呈紫蕨佛手荐香椽饌敌郇厨美羹嘲党帐臙嵯峨薪代蜡嗟咄豆成鱠桂树时停楫沙棠日扣舷纶竿张氏舸箫鼓孟家船登善文皇册元常季直笺玄圭铭大夏苍佩琢于闾孟德台端瓦乌曹椽上砖月输求志费日损卖文钱（以上叙燕会事）胜负天人定升沈气运迁辞家悲李密伏阙恸王延浩荡新恩下荧煌宿垢湔勒铭同岷首封豕象祈连纶綉飞朝宁冠绅会陌阡霜蹄仍剪拂彩翮蹶蹶踧突兀烟霄上嵒嶭日月边三闕劳控馭两越寄旬宣太仆分司重中丞节制全空羣留馭駟异队别駟驢将穀频推楚兵符半摄鄢秋霜凝斧钺晴旭照戈鋌蓼上攀名岳沅湘涉大川云低神女驾月冷帝妃钿京兆鲜于敏廷评定国虔先驱驯■〈豸契〉獠密网化鷹鷂（以上叙宦遊事）倏忽人情异悲凉世态懷青蝇从抵隙白鸟任遗譏勇退羞罗雀幽栖避跼鸞世惊鹏偃息自喜螻蛄展卷忻长日悬书得大年三苍勤劊劊五纬罄

雕镌巨碣新罗购穹碑日本传褒诛崇袞钺晃朗切玃璇黼黻垂钟鼎丝纶饰豆笏江河
驰藻绘象纬错丹铅气色龙成彩声华蚁集臙家藏三郡集童习二鸣编寶箒窥灵秘真
机握大还入闕遗世事闭户息尘緣紺殿羣器絕清都百虑蠲遗经翻损益大道识坤干
真诰裁弘景阴符注李筌瑶函王母授金榜木公嬪（传也）厌次东方朔罗浮郭稚川
黄庭神煜煜紫府息绵绵白石挽霞煮丹珠滴露研虚无遊大洞冲漠憇重渊取次蒲团
熟纵横木榻穿低回迟鷺羽隱约下鸾駟太上留函谷先生叩竺干（谓古先生）普陀
谈五蘊临济核三玄作偈呈希运题书谒大颠孤峰凝独峙古月证重園砌上祇园菓池
中法界莲菩提垂寶地香积布金田灵佑军持蹋丹霞佛像■〈难上…下〉直窥无始
奥真彻上乘禅（以上叙焚修事）隱豹藏林密鸣驺入谷遄玄纁何奕奕束帛匪戈戈
礼数三台接恩光八座偏长干邀鹵簿白下注旌旃东土明无二南宗集大千雨花台上
句桃业渡头篇元礼门如海文通笔胜椽世俱荣白傅畴不慕青莲（南中日接千宾
）帝命劳疏广臣心恋偃佺归寻霞外侶逝作地行仙（以上叙再出事）放浪君平卜
逍遥善卷佃陶朱频易蠡博望几浮騫小阁披芳素层轩构碧涟（公归重构芳素媚清
二轩）鸣琴娱蒨峭吹笛和潺湲大白凌周顛深杯角郑虔（公自南都归每宾友过从
必极酣畅）优游寬礼法爽朗越拘挛拥髻回通德修蛾却丽娟闺房闲窈窕枕簟絕便
嬾（长公暮年声色都絕）玉树前阶盛金茎后裔绵虹霓烂芝桂雨露荫楠楸尺璧名
高楚千金骨市涓流沙陈騶裊汗血聚驥駟（公诸郎君名率从马）福履人生备期頤
众望颺（以上叙乞归事）殮苓逾蓊训辟谷度彭籛兜率仙宫丽遮须梵宇妍龙蛇占
起陆鸡犬候离■〈田奘〉共詫三彭伏那期二竖蹟（跋也）肺愁司马渴腰惜隱侯
腋杜疟原难起曹风不易痊兰金辞管鲍药石谢和扁驟解形骸缚初离眷属纏金棺来
烨烨玉舄去翩翩化鹄徒为尔骑鲸固有焉尚疑元放脱翻忆令威翮烈魄抃箕尾精魂
落斗躔夜台风淅淅朝陇月娟娟震悼闻双阙吞声届八埏荣封符马鬣异兆协牛眠大
树英灵在生刍涕泗溅仓皇打草屨踟躕负寒毡片刺交文举孤城托仲宣风尘饶盼睐
湖海竭陶甄宗庙裳衣列门墙短褐褰敢云千里足突覩九方歎磊落孙阳御驰驱祖逖
鞭虚怀悬藻镜侧目任衡铨翠黛双弯妩朱唇一笑媽无媒甘老大不嫁抱婣娟异代瞻
提挈中途恨弃捐佳人宁独立国士詎同怜骨相成虚负音容记勉旃文漪空啸咏碧浪
罢延緣苦思啼庄舄深惊泣郑玄良工亡偃翟巧匠失轮扁太室三花瘁曹溪六叶跽虚
闻南岳让濫拟石头迂迦叶神徒懵维摩病岂然城佳松郁郁墓宿草芊芊郢国阳春絕
邯鄲步骤■〈走亶〉荒丘盘狡兔高岭咽寒蝉堂后听丝竹垆头渍酒绵滂沱临大壑
鸣邑问重泉宇宙遗空笈乾坤入断弦惟应四部稿万古诵钧天

凡字同义异或名姓字同例得重押其字义并同者唐人虽或重押此不复沿

少室山房集卷四十八

●钦定四库全书

少室山房集卷四十九

（明）胡应麟 撰

○七言律诗八十一

首送王敬美先生入贺万寿二首并寄徐子与右参黎惟敬秘书

马首寒云碣石开 远从青雀建章台 霓裳自献千秋曲 露掌频分万寿杯 把袂应徐天咫尺 抽毫枚马日徘徊 山阴亦是旋舟地 雪夜能忘驻草莱

暮拥轩车入帝州 晓排闾阖问龙楼 西山紫气飘环佩 北极寒光照冕旒 天际薇花聊独倚 日边藜火定谁酬 荆高旧侣能相过 已拚华阳十日留

怀大司空朱公

华发归来卧洛京 三山晴望紫霞平 遥传大陆思神禹 不见孤峰下广成 日冷金滕犹泰畤 春回玉树已承明 夷门咫尺酬知晚 惨淡吴钩匣底鸣

江右王孙贞吉以书并画见贻赋此寄谢

浩渺凉风岁色徂 遥传尺素到江湖 谁夸特进鸾凰笔 自写滕王蛱蝶图 明月万家愁外满 碧云千里望来孤 携琴会入东林社 徙倚莲花醉玉壶

寄荅同伯王孙

屹立庐峯挂紫烟 中林有客坐谈玄 高轩蚤识王孙句 画阁重开帝子筵 秋远北风随雁字 夜深南斗动龙泉 何缘一借天池榻 携手银河百尺悬

送梁持伯暨还南海

翩翩舆马驻江干 暨辍含香汉殿官 云气乍看随玉节 露华犹忆对金盘 尊前叶送罗浮暝 笛里花飘大庾寒 极目故园琼海上 好携春雪向长安

观察吴先生分署东瓯与余期为雁荡之遊久不获赴小诗奉寄

行车何处不风流 名岳能将汉使留 万顷白云回雁荡 千峯寒瀑挂龙湫 深春荐福亭中醉 竟日能仁寺里遊 咫尺山灵定相笑 苦将瓢笠望丹丘

病中王山人过访有赠

年来消渴未全除 曲巷时时长者车 寶篆自探俞跗诀 金函长秘葛洪书 茅飞白昼龙随杖 杏发青山虎守庐 试事长桑三十日 上池仙液定何如

闻商侍御按部山西有寄

揽辔飞霜满冀丘 豸冠何客伴风流 千山坐拥尧都日 九派行疏禹凿流 瀚海烽清长息甲 渔阳尘起一登楼 双鸿是处南来色 愁忆长安把臂遊

望云遥祝为兴化徐别驾题

千花晴日满林皋 鹤发鸾笺照锦袍 紫气乍占函谷迥 白云遥望武夷高 天瓢露染三春树 海屋霞明万岁桃 不道伟长诗兴浅 画筵留客几挥毫

寄赵太史

紫霄遥忆汉官仪 谁似夔龙集凤池 云色并携三殿草 日华长绕万年枝 趋蹕玉佩观祠夜 徙倚金茎伴直时 无赖问奇亭下客 秋风犹占五湖湄

雪中同王少参集彭广文斋阁

飞雪千门照彩毫登台寒色满林皋论心敢讶青毡薄倚曲偏惊白苧高冶艳正随
仙客擎轻盈旋拂侍臣袍亦知郢国春难和且傍天花醉浊醪

薄暮同二君过集张明府署中

绮席华筵拥上宾飞花寒夜迥生春无论汉水千株发转觉河阳万树新艳色并看
琼作圃清光遥映玉为人天涯二仲过逢日可道王猷引兴频

明晨邀三君集舟中是日雪大作竟暮

黯淡同天际碧天溪山遥望转清妍谁将剡曲风前棹并载梁台雪里筵玉树乍惊
瑶瑟倚冰花时傍彩毫传飞觞总是琼楼客肯借阳春和昔年

彭穉修以病乞假暂还匡庐诗送之

憔悴青毡越水头一尊长啸揽吴钩高斋暮辍康成讲名岳朝看太史游五老云霞
天并入九江涛浪雪争流春花正逐离筵满忍听阳關上客舟

王次公敬美寄惠计偕集叙走笔二律奉谢

字字青云拂斗躔蓬蒿何意彩毫传双龙并出丰城夜万骑遥空朔野前当代自尊
玄晏语异时谁问子云玄亦知流水千年在敢向人间话絶弦

浩渺吴關落雁羣飞槭遥自九江瀆山川忽借潛夫色宇宙长悬太史文潦倒十年
惭赋雪吹嘘一夜有凌云无劳更觅青藜杖不忝瑶华异代闻

蚤春雪后携尊小楼独坐因忆客岁同三君子舟中饮乐甚也辄赋四韵寄麟洲公
并柬张彭二丈

百尺晴光绕画阑一尊池馆坐高寒瑤楼四照天花合玉笛孤吹陇树残郢客阳春
元寡和兔园词藻尽登坛亦知剡曲堪乘兴十载袁安启户难

夏日携尊大云山晚眺并寻白莲池诸迹

落日壶觞兴未回飘然蓝輦问崔嵬飞檣夹汉双流下画檻浮空万蝶开岸草似留
湘客怨池莲能识谢公来翩翩白蛤俱年少搦管谁当作赋才

秋日登八咏楼读休文诸诗有感

突兀飞楼雾里看当年词客此盘桓窗中二水浮天入檻外千峰插地寒海峤心情
饶伏枕台垣消息几弹冠朱弦万古重相对转觉他时属和难

杪秋遊金华芙蓉峰憩刘孝标读书处

叠岭危梯挂碧天支筇遥踏乱云前芙蓉万朵烟中出桧栢千林洞口悬采药坛空
犹晋代读书台古自梁年移家我亦寻仙客试伴羣羊絶顶眠

题管建初山人遊玄岳卷

龙峤千盘雾色开中天何处蹑崔嵬遥峰恍入飞仙户列岫高悬上帝台倚杖祝融
云自起题诗天柱月频来风前绛节如相问为拾瑶华寄草莱

送管山人遊吴

束书回首问沧溟何处逢人话客星三竺暮云藜杖紫五湖春日布帆青關心雁阵
愁邊落拂面骊歌醉里听归去万峯林屋底好携鸾鹤报山灵

秋日同郭鸿胪集赵明府宅对菊得寒字

綠野晴开一径寬清尊携客此盘桓千枝的皜明秋序万朵娉婷立暮寒露色总深
陶令采霜华谁问楚臣餐西风拂面饶相笑得似龙山座里看

读弇州山人集二首

十袭琅函散紫氛碧窓遥夜拥兰芬羣编尽废中郎篋只字堪藏太史文万古江河
谁白日千秋閭巷有青云玄亭肯着侯芭卧不向名山乞典坟

锦帙牙籤次第开披襟山色满兰台初成汉苑然藜业尽压梁园授简才一字霜风
犹缥缈千章河汉转徘徊相思几夜瑶华切肯惜如椽借草莱

東彭穉修（有序）

先是穉修与余会都门未几别去至是复来为吾邑广文云

帝城风雪苦飘零何意南天到客星埋没乍看双剑紫浮沈犹傍一毡青桃梅拂坐
春相丽苜蓿行杯午未停莫恋横经函丈底碧山时过子云亭

送沈纯父之岭南

一封谁遣上天關垂死行踪瘴疴间万里独悬羈客泪九重曾问逐臣颜天回北极
龙楼迥日涌南溟象郡闲絕塞梅花题咏夜可无魂梦到朝班

康裕卿挈家临安仅一子复丧为诗唁之

白发携家傍五湖红颜何意杳先祖一抔泪向延陵尽十口心悬伯道孤种玉尚看
回暮景投珠那忍忆长途西风独夜■〈彳 员〉啼切可道东门恨有无

送习太史还江右

草奏曾将动紫宸一麾河上有垂纶千年赤日悬明主万里青山度逐臣玉笋琴尊
余岁月金门环佩老风尘珠帘百尺滕王馆回首能无望北辰

得弇州公书并见寄诸作赋荅四首

玉树双裁照锦囊鸿书谁拟问沧浪频年紫气高函谷一日青云徧首阳门客有诗
传大雅老臣无赋上长杨烟花绕座秦淮月愁絕春城梦去长

环佩当年七子流何人词藻擅登楼筵开碣石青天尽社冷华阳白日愁八座尚看
裴相起三山聊拟谢公遊离心咫尺双龙暮醉拂芙蓉望斗牛

迢遞双緘到海涯美人何处把瑶华吴天不断云千里灞水长飞雪万家几夜幽情
悬薜荔十年愁色老蒹葭追陪遠愧龙门客目送寒空雁影斜

极目中原感慨同百年湖海叹飞蓬台空薊北无名马筑散长安有断鸿尔雅故应
穷郭璞子虚宁得误扬雄相思总傍湛卢色夜夜寒光吐白虹

送潘少丞还岭南

把袂都门别思浓河梁寒色照双龙官闲慙乞文园病宦拙那能骑省容鹤梦西樵

云惨淡羊裘南海月蒙茸莫夸贺监当年赐不尽梅花四百峰

同诸公夜饯杨使君于梁中翰宅得低字

五马长驰朔雪低衣冠握手重含凄惊心北阙辞丹凤愁色南云望碧鸡铜柱千年
标障塞鐵桥万里界封提亦知上国悬金在咫尺炎荒到紫泥

秋夜同陈太史康山人集李环卫园亭

薄暮朱门并骑来相看词客共徘徊孤亭迥对芙蓉出一径深从薜荔开夜静飞霜
流玉笋天空明月上瑶台风尘是处应刘合肯让当年邺下才

夜同童子鸣康裕卿宿香山禅寺限韵分赋

絕壁苍茫雾里看振衣萝薜上千盘轩窗尽锁西山色楼殿平分北斗寒雨过松声
随锡杖风回花影动瑶坛相看不尽凭高兴欲向蓬莱借羽翰

冬日黎员外招同思伯诸丈夜集不赴寄得云字

一尊华馆动星文客梦飘飘拟对君玄草旧从金马识青藜遥自石渠分春生大漠
飞燕雪曲奏高天散楚云零落梅花乡国遠风尘谁不念离羣

送太史赵公封楚藩

惆怅骊驹易水傍西风愁色赋河梁金函夜捧辞金阙玉节朝携下玉堂七泽星辰
浮去棹九疑云雾湿征裳丹梯絕顶岫嶙外几送吟眸入帝乡

谷日同黎惟敬秘书梁思伯中翰丘汝谦计部童子鸣康裕卿二山人安茂卿文学
集朱在明宅得宫字

佳节西园燕赏同相将才子集芳藂帘前霁雪飘仙掌席上春星绕汉宫万里清愁
悬别鹤千门寒色动归鸿梅花几度孤山下心折關河尚转蓬

送陈穉冲还晋陵

元龙何事独栖迟散发狂歌返翠微白石未忘松桂隱青山遥待薜萝衣春寒雨雪
连瓜步夜色星河傍海沂时忆燕城携手客登楼回望五云飞

送胡计部督饷仪真时二山人将南归

旌旆遥遥海色开燕城春雪照离杯分畊乍息秦兵战转饷仍劳汉使才京口云山
围省署广陵花月傍楼台烟涛极目淮流阻絕塞谁传锦字回

送刘别驾之漳南

一尊清夜此留欢离思萧萧雨雪残万里秋风还故国几年春草客长安烟开郡郭
漳流迥日落關门海气寒惆怅天南相忆处飞鸿遥望五云端

同童山人安茂卿夜集何太史宅观梅得春字

檻外幽芳欲照人相看琼朵净无尘南枝未送江头色东阁先传雪里春明月寒林
书共遠乱山孤驿梦难亲不緣水部诗情在那得花前索笑频

夜同子鸣茂卿携酒重集何太史宅观梅兼送吕山人忠父南归得湖字

清夜寻花雪满途何因东阁坐狂夫瑶台影落霜天净玉笛声残陇月孤醉拂莓苔

惊庾岭梦骖鸾鹤到西湖一枝欲赠南归客回首春山隔画图

送梁思伯内史颺还南海

彩笔经年侍赤墀离旌初下凤凰池停车欲度梅花岭望阙频扳桂树枝万里归心
残雪后千山行色暮云时蓟门回首生芳草莫使衣冠忆问奇

席上送童子鸣遊衡山得踪字

蹶躄初寻七十峰乱山秋色傍行踪中天翠削芙蓉秀絶障青含薜荔重金检自探
神禹策丹台谁辨祝融封登临忆尔层云上杖底千岩落暮钟

送杨祠部出守滇南

露冕西南瘴疠清十年玄草擅才名秋风剑佩辞天出落日旌旗傍海行赋就客非
金马署书来人卧碧鸡城昆明万顷浮槎夜愁絶鱼龙异汉京

送朱在明使长沙

西风遥夜起长杨使节翩翩下建章淮海帆樯飞梦泽楚天城郭出潇湘心摇桂树
筵中月梦绕梅花笛里霜宋玉台边芳草尽几从秋色吊襄王

锦缆朝霞出潞河双旌南去意如何泥金汉使传书下玉佩湘妃作赋过万岭秋光
天柱月千秋寒影洞庭波清尊莫滞王门燕握手葦阳待和歌

送沈金宪入越

几年尊俎净狼烟独下青霄雨露偏三殿清霜随宪节五陵斜日照离筵梅花夜绕
江城发棠树春从海国悬此去湖山堪极目涌金门外半楼船

送涂明府之龙丘

黄金台下共留欢独向青溟奋羽翰雁塔乍题唐进士鹓行仍别汉郎官江云缥缈
双鳧下海日苍茫一骑寒白昼琴堂歌咏暇看花还忆在长安

秋夜同惟敬诸子集刘观察园亭分得高字

一尊三径掩蓬蒿词客相看尽彩毫华馆乍停鸚鵡曲青藜遥识凤凰毛天垂闾阖
繁星转霜满楼台夜月高十载梁园幽兴在不妨寒色上绀袍

送伍明府景周之永嘉

遠塞寒声起暮笳离亭归思逐黄花双鳧欲化郎官舄片鸚先开使者槎旌旆夜悬
沧海月楼台春绕赤城霞乘闲拟着西征赋为报安仁鬓未华

哭梁思伯中翰四首

华发才名满玉楼思乡仍作岭南遊三秋鸿雁音书絶一夕龙蛇讖纬愁易水飞霜
闲别馆海天斜日下荒丘西风独把延陵剑不是词人亦泪流

五夜箫声逐凤凰碧桃枝下几传觴云开郭隗黄金馆花满卢家白玉堂尚拟故人
来汉阙不堪游子去濠梁相思欲吊天南冢落尽梅花大海傍

憔悴孤城此哭君關河万里见浮云空斋寂寞青绫被遗藻凄凉白练裙醉客尚余
山简梦招魂谁续景差文松风忽傍遥天起犹拟精灵下夕曛

奇絕当年顾虎头停杯为我画沧洲
毫端云雾三湘色堂上烟霞七泽流
渔艇依微临野岸人家摇落带沙鸥
只今粉墨空惆怅一片青山起暮愁

送安茂卿赋得富春山钓台同诸子分题作

百尺危梯上翠微空台长日乱云飞
山寒麋鹿归樵径水落鱼龙傍钓矶
越渚帆过兰杜遠汉庭书到薜萝稀
披裘莫道垂纶客夜夜双星动帝畿

将之武昌留别社中诸丈黎秘书惟敬（时家君出参楚藩）

万垒西风接暮秋楚天城郭暫淹留
楼台寂寞僊人去环佩凄凉帝子愁
过雁定传衡岳字啼猿初系洞庭舟
佳期南国无由共独对青藜怅遠游

刘宪副仲修

十载青衫傍帝都鄉心遙夜忆莼鲈
林间赋客闲三径天外归人问五湖
秋雨帆樯连白帝碧云原庙锁苍梧
江城玉笛休回首零落梅花客梦孤

康山人裕卿

握手孤云尔共论不堪岐路倒芳尊
经年暮雪栖燕市一片春霞阻石门
江上鸿书谁赋别天涯龙剑早酬恩
芦花夜夜扁舟色愁絕青山绕梦魂

丘计部汝谦

萧萧残叶揽吴钩才子临风忆旧游
客路遠过湘水宅离心独上武昌楼
黄陵日落千花暮赤壁云生万苇秋
岸岸啼猿江色里不堪重系木兰舟

李环卫惟寅

京洛逢君解佩刀翩翩人识凤凰毛
歌残白雪瑶华在梦倚青云玉树高
故国深秋淮甸雨归心寒月海门涛
江鱼塞雁能相忆莫滞西堂五色毫

安文学茂卿

野竹江花绕岸回长沙晴望汉阳开
浮云晓色襄王梦寒雨秋声宋玉台
白苧早飞三楚调青袍谁识五陵才
南归好逐征鸿翼一为湘娥解佩来

易侍御苏别驾蔡廉访携酒清源大雄阁饯别得才字

碧瓦雕甍玉作台真从人世躋蓬莱
盘空日月三天近抱郭南山万井开
冠盖乍逢梁苑集帆樯初望越城回
亦知信美非吾境魂断登楼赋客才

荅徐仁仲二首（有序）

返次清源阻水者几载月豫章徐仁仲遠移舟见就日夕晤语甚欢将别赋赠

相逢豪气自翩翩早覩灵光第一传
李郭仙舟同此夕张雷神剑合当年
眠云欲借匡庐顶望日聊依泰岱前
七十二君君试问几家遗碣到桑田
（仁仲赋排律四十韵见貽推寄殊笃余别有报章）

朱弦无分奏彤庭浊酒犹堪话独醒
歷落雄心悬老骥蹉跎愁鬓掷流萤
江头地遠滕王阁湖上天开孺子亭
纵是河东能邂逅千秋能似太玄经

渡江闻汪司马避暑焦山有寄

随绿瓢笠又东林玉观瑶台望欲沈长忆凤翔千仞上不知龙卧大江心名将日月
题丹洞赋拥云霞列翠岑倘觅戴逵溪畔宅秋风回棹是兰阴

淮徐归兴六首

一棹乘秋出五湖西风愁色动莼鲈金门帝许排闾阖寶剑人谁问鹿卢千尺尚悬
东海钓百年休践太行途平生烈士心长在碎擊王郎白玉壶

夹岸帆檣卫水濱苍茫云雾入垂纶三生不戴如花面九尺长余食粟身杜宇惯嘲
多病客辛夷频唤欲归人沧溟万斛吾家在好逐渔郎问去津

一望龙门兴已阑漫将陈策射金盞生来骠骑封侯易老去冯唐谒帝难栗里乍看
三径在桐江犹剩一峰寒秋风咫尺天池上未向榆枋刷羽翰

短褐犹闻卧海湄长裾曾否曳天池苍茫八翼飘云汉惨淡双肱折路岐玉洞岂无
千岁水金门宁乏万年枝从教少妇机头坐赋里黄金尚陆离

一帆春雨下淮阳柳色偏嘲薜荔裳病后风尘堪跃马归来陵谷任骑羊高山自奏
三千牍上苑谁矜十八行莫叹卢生魂梦里几人穷达在黄梁

白面题诗碣石台红颜掷尽重徘徊虚疑骏足曾双刖不信羊肠易九回缩地将随
徐甲去谈天毋拟剧辛来飞扬摠属羣公事一壑犹能擅草莱

司空潘公行水徐泗间订余晤语淮上适黄河阻风不及赴约辄因使者报谢四章
侧席天书降紫泥东山宁得遂幽栖琅函昼捧千灵集玉佩晨参百吏齐碧树交阴
笼大道苍松垂叶护长堤龙蛇满壁邮亭下一认当年夏后题

一舸南征岁月遐老臣驰骤日天涯平驱邵伯湖头雪尽筑高公堰口霞稍喜故堤
添柳色从教新涨没桃花军储络绎三边外底事屯田说汉家

■〈山截〉嶠穹碑颂姓名辉煌巨轴纪平成綠堤彩鷁千羣度掠水黄龙万队行
转粟东南无大泽飞乌西北有长城异时河洛看遗迹何限秋风壁马情

烨烨龙章下凤楼汉庭何羨富民侯中天日月低环佩大陆风云近冕旒蚤辟西园
延上客行开东阁贮名流不綠石匣司空问谁识干将在斗牛

过观察金公故居有感（有序）

公名应照宰吾邑者逾六年廉介迥絕歷官山东观察使一日无疾终余素辱知国
士爰诗吊焉

六载冰壶异政传琴堂晴色弄朱弦邴原乍肯懷千石刘宠犹憎受一钱桃李春风
繁越峤松楸寒日吊吴田门庭寂寞登龙后恻絕当时问太玄

少室山房集卷四十九

●钦定四库全书

少室山房集卷五十

（明）胡应麟 撰

○七言律诗七十九首

余为五岳之怀旧矣丙子冬将以计偕北上适少参王公自秦中过访为余剧谈莲花玉女之胜且出诸登览作见示恍然如曳杖从公游憩太华絶顶者不胜飞动之思辄赋七言律四章

缥缈青天华岳西万峰云色绕丹梯行窥日月中华尽坐倚星辰太白低阴洞古坛犹积雪断崖飞瀑几留题知君苦觅惊人句不奈清猿絶顶啼

五夜扳萝到絶颠俯看城郭带秦川携将太华峰头月独聽终南树杪泉千里河山朝白帝九霄云雾失青莲探奇漫倚孤筇啸咫尺瑶台是列仙

片片青霞屐底移半空岩壑转逶迤悲风万里来三蜀落日遥天断九疑渭水秋光犹殿阁昆池寒影自旌旗狂来健翮飞扬甚翘首宁论谒帝迟

歷尽飞泉到上头白云回望满皇州千峰不断秦關色万壑长悬汉树秋赤日阴森

■ 〈刁 员〉 语乱苍烟明灭鸟飞愁何因瓢笠相从去醉踏莲花问斗牛

初至都下康裕卿李惟寅胡文父何仁仲朱汝修过访

翩翩裘马又长安握手风期尚未阑白雪旧知心赏在青山犹作梦魂看燕台日落星应聚函谷云生气自寒却笑五年江海上飞鸿何处不凭阑

夜同黎惟敬康裕卿胡文父何仁仲朱汝修集李惟寅宅得寒字

握手论心尽鶡冠相逢何意复长安衣裁薜荔元同色剑合芙蓉好并看明月万家閬闼晓青山十载路岐寒凭陵欲望燕台气一片星河绕画阑

赠沈比部纯父

八咏风流自古闻一时江左更休文朝端玉佩趋明月署里金珂冷白云入夜骊珠真射斗高秋龙种欲空羣孤帆忽漫双溪去千里那能不忆君

同殷无美胡文父魏茂权集欧楨伯博士得情字

才子初寻碣石盟一尊遥望五云平当轩似落梅花色入座俱含桂树情四壁春阴回禁苑万家残雪拥高城翻怜旧日罗浮客不向词坛识姓名

送裕卿二首

贯酒都亭旅思长相看那忍别离觞单车客去华阳社万里人归越峽霜岐路东西空哽咽乾坤南北共行藏丹霞树树秦源底尺地还堪寄草堂

一夜骊歌绕蓟门青山何处不销魂懷乡杜甫心元壮去国张仪舌尚存梦断河梁燕雪阻星移严濑海云昏他时倘问兰陵宅风雨犹堪共一樽

南归留别无美文父茂权二首

落日长安涕泗流飞扬谁信五陵遊中原彩笔犹天地故国寒槎自斗牛抱璞已甘和氏別凌云无奈长卿愁南归是处山堪卧敲枕严陵万迭秋

擊筑长歌且未哀纷纷词藻栢梁台人因李合登龙挫客自昭王市骏回孤剑霜飘南斗近万舸云拥北风来碧山幸有藏书穴谁遣潜夫出草莱

夜同裕卿诸子集惟寅宅得中字

一夜心期握手中吴钩寒色照长空新愁紫气重關外旧宅青山大海东摧落世应
疑斥鷃翻飞人岂后冥鸿高歌颺向淮王席千载休论桂树丛

留别惟寅汝修

携手都门话息机筑傍愁见和人稀千山积雪卢沟断万里寒云碣石飞紫禁未前
明主席青门频把侍臣衣尺书何处堪相望天地东南一少微

别祝鸣皋

砍地哀歌气尚雄十年词赋与君同琴声一奏风尘下剑色双悬宇宙中已信君平
堪市隱何来阮籍尚途穷心期不道天南北对握骊珠望彩虹

潞河舟中同裕卿文父作

羸马风尘鬓色愁一帆同下海门秋星辰自合雷张剑岐路真逢李郭舟青嶂五湖
寒并倚白云三楚暮争流支机满袖琼瑶在不信银河祇独遊

寄大司空朱公

万峰晴护草堂寬帝许司空颺挂冠两鬓自悬沧海白寸心犹傍紫宸丹垂天翼驻
风云绕挟日鳞藏洞壑寒不信渭濱能久卧东南佳气满长安

寄何内翰

彩笔翩翩奉紫宸郁葱佳气满平津金门露映然藜客玉座云随视草臣司马大名
悬日月贾生愁色转风尘清尊万里论心夜肠断梅花驿路春

寄朱在明鸿胪

神武秋风万木残扁舟回首隔长安飘零敢挟齐门瑟潦倒谁论魏阙冠白纈总邀
遊伎舞青萍长向酒人寒伤心碣石谈天处寂寞浮云梦里看

登天津阁望海同康裕卿胡文父作二首

画檻横空海色开一尊携客上崔嵬扶桑日傍千帆落碣石云浮万岛回采药未应
徐市老乘风聊拟羨门来仙居咫尺蓬壶近指点凭谁出草莱

百尺阑干望未涯寒烟遥护海门斜羣峰乱吐昆仑日叠浪濒翻渤澥霞薄暮机丝
蛟客馆中天楼殿羽人家携来并有玄虚赋为寄银河八月槎

为文父题匡山读书处

面面烟霞护草堂千峰遥堕子云床琅函尽敞三坟色玉轴新开二酉藏藜火夜寒
回太乙桂丛秋遠梦淮王东林剩有迹名地不奈声华满栢梁

薜萝馆为裕卿题

缥缈烟萝护石扉幽轩十尺迥忘机吟窥彩笔青云堕坐拥瑶琴白雪飞洞口经春
词客兴山阿薄暮楚臣衣深居莫讶时人识夜夜寒光动少微

竹在亭为王孙贞吉题

清风何处洒琴书面面琳琅雪雨余千亩昼围中散宅万竿晴拂子猷居声摇淇澳
来中坐翠拥潇湘护碧渠尊酒欲寻长啸客美人空谷正踟蹰

同詹东图康裕卿胡文父集胡上舍馆有赠

大隱何妨卜市廛华裊长日拥婵娟吟余河朔堪消暑住久临邛不记年千里壮心
惭骥枥九霄寒色舞龙泉长安此夜占星斗半入荀陈座里悬

送黄孔昭还七闽

匹马何来自蓟城兰皋携手白云平长裾尚曳三峰色短剑初回五岳行夹岸帆樯
漳水夜中天台观武夷晴离尊咫尺空相望愁絕华阳社里盟

艾都阃见过不值

飞花长日掩柴關小队俄来曲巷间上客已惊题凤去元戎谁共射鵰还青天画甲
严城迥明月牙旗大海闲闻道漠南诸将在几人名姓动阴山

寄胡文父

潦倒公交车记昔遊青丝白马并皇州霜华夜拂高离筑雪片朝寒杜甫裘一代风
期谁独往百年肝胆自名流相思倘逐飞鸿翼彩笔同携八咏楼

送王先辈还二华

匹马言归太华颠五陵行色暮飘然遊吴卫玠名偏重入越中郎赋已传白阁云霞
孤剑底黄河星斗一尊前无嗟词组天南北屈指看花汉殿年

寄徐子与

车骑辉煌列上游几年方岳擅风流西山万树浮官阁南浦千花入郡楼授简客知
王勃在据床人忆庾公留毋夸石匣丰城畔振佩遥看接斗牛

寄李惟寅兼讯朱山人汝修

朝悬鹄印坐长杨锋镝平销一剑霜射虎乍闻过灞岸飞龙犹忆赋河梁丹心自照
论兵地青眼频输结客场独有夷门旧宾从偏从长揖问容光

闻安茂卿遊临安作此问讯

飞扬裘马各遊秦拂袖俄惊海上春三洞稍酬新日月五陵犹记昔风尘纷纭白眼
空调世濩落红颜已让人闻道如花仍共载若耶溪色定谁亲

喜滕公擢任浙中方伯二首

叱馭遥看五岭来双旌薇省暫徘徊三朝驟起吹嘘色十道谁先抚字才赤日扶桑
过露冕青山鄞海傍登台讴歌岂独东南借绕夜寒光接上台

南来海色傍旌旗犹似横经越峤时华省坐开新气象青衿传迓旧威仪筹输九塞
军储集佩压三曹帝宠移屈指侯芭曾问字十年长铗未酬知

送喻邦相之都下

卧掩衡门病色侵相逢词客重开襟孤尊暫詫梁园集万里仍趋魏阙深风雨大江
随擊楫云霄赤县待横琴殷勤片诺他年事北望鸿书灑水浔

送张明府移任江右

拥轍千家泣道旁飞书谁为转循良清霜乍徙朝歌署白雪俄深单父堂柳色映檐

江浦近梅花入梦海天长极知百里非重借曳履晨看到尚方

中秋夜同诸君镇海楼玩月

缥缈银蟾落庾楼凭高一望海云收千林露色天如洗万井河光地欲流大漠旌旗谁倚啸长门环佩迥添愁追陪正忆羣公语莫讶胡床竟夕留

寄边上友人

早闻词赋擅西京更羨终军独请缨万里旌旗分汉壁十年刁斗隔燕城云沈瀚海风沙起雪满交河道路平堪笑故人犹短褐欲将孤剑事长征

送人入蜀

离思翩翩把浊醪锦城西去不辞劳星辰夜拂张华剑风雨寒生范叔袍三峡啼猿青嶂远九疑回雁碧天高蜀中形胜堪怜汝定把新诗吊薛涛

送徐明府之琼州

春花缭绕凤凰楼悖被怜君赋远遊风俗自分天外郡山川愁问海南舟珠崖云气经秋断琼岛波光入夜浮惆怅一尊芳草畔不堪离恨对吴钩

秋日送人之洛中

挟策怜君出汉闕驱车晴色满山川浮云半落漳河水寒日斜分博望烟龙剑独携星斗外鸿书遥寄雪霜前绋袍对拂双蓬鬓犹是京华旅食年

送中丞曾公之成都

使者新传谕蜀章朱衣晴日下明光扬旌欲挂峨眉雪拂剑遥生滟潏霜幕府夜谈宾满坐山邮朝发吏成行共夸仆射诗情在小队时能过草堂

花朝思伯邀同诸子集李氏园亭

绿野晴开一径斜夕阳联骑到山家绋袍乍拥梁园雪彩笔先飘汉殿霞大麓春阴回远树高城霜色堕清笳看花剩有刘郎兴十载长安鬓欲华

清源道中别裕卿二首

十日平原饮未阑更携离色上征鞍浮云万里幽期隔明月千峰旅梦寒片诺久知肝胆尽深交那问鬓毛残孤帆岁暮能相过风雪桐江有钓竿

几夜风云入倡酬一朝岐路揽吴钩天悬大陆双龙语雾拥寒山疋马愁忆戴未阑王子兴登仙犹滞李膺舟秋期倘问垂纶客散髮同看大海流

齐东道中

羸马经行日草莱齐东遥望海云开春光莒父层城合曙色琅琊万井回织屨自高陈仲隱飞书谁问鲁连才遗踪九合俱零落满目晴花度野台

怀史元秉李惟寅朱汝修

浩渺春光接汉闕金茎遥望五陵间诗成碣石人犹聚赋罢长杨客已还碧汉鹓鸿堪并起青门鸾鹤几同闲芒鞋莫问天台色万树桃花照玉颜

同文父登泰山四首

百转丹梯上翠屏天门遥望海冥冥幽燕北护诸陵紫齐鲁东回万壑青松色自摇
秦帝攀芝封犹驻武皇灵残碑七十俱尘土千载凭谁问勒铭

缥缈飞云十八盘高临回首尽长安青天万仞楼台立白日千重杖履寒若木烟光
浮帝阙扶桑霞影落仙坛相携并倚孤鸾啸不向遥空问羽翰

独夜行吟到斗牛阑干遥倚碧天愁千峰日抱秦台上万岭云争汉碣流绛节光生
羣帝语玉扉寒启众灵遊吹笙不浅王乔兴杖履何年更十洲

面面芙蓉立紫烟石门丹壑迥相连遥峰雾拥星河出絶顶天回日月悬玉碣尚传
司马后苍松谁问祖龙年相看十载沈冥意梁父吟成共黯然

送文父还匡庐

涕泪江湖范叔袍相看愁色转蓬蒿人归庐岳千峰雨梦阻浔阳八月涛酒畔莲花
传般若窓前桂树咏离骚临岐漫脱干将佩斗气双悬日月高

再寄朱大司空

玄圭曾告万年功归去堂开绿野中圣主自尊前尚父蕃人来问大司空吟边驾引
新调鹤卧里车悬旧赐熊愧杀酬知长剑士白云无路到崆峒

别李季宣

万里澄江片月虚故人相望转踟蹰寒星欲堕张华剑远道仍驱孟博车独夜鱼龙
京口梦高秋鸿雁广陵书花时好订吴天约题偏楼台四百余

同茅平仲登甘露寺絶顶作

天畔危亭绣拱扶并遊词客摠江湖千山雪浪吹楼殿万里云帆下舳舻秋色平分
瓜步遠暮烟斜合景阳孤兴亡六代俱陈迹对倚西风尽玉壶

重遊金山四首

海色迢迢四望齐孤峰突兀耸招提亭噓大壑千帆尽寺绕寒空万堞低天地对悬
南北影云霞不断古今题凭高一片真堪画缥缈楼台铁瓮西

百尺危阑坐振衣白云苍雾满禅扉天空一柱中流出日午层涛四面飞秋色帆檣
淮甸遠暮钟楼殿广陵微重来为构焦君宅对狎青山住海沂

曳履千盘到上头苍烟寒梵满清秋阑干曲抱孤云色殿阁飞悬大海流日落鼉鼉
时自语风高鸿鹄晚仍留蓬萊咫尺堪乘兴坐倚芙蓉望十洲

一峰尘外耸巉岬屹立青螺镜里看万古乾坤谁卓锡三山涛浪此凭阑秋空蜃气
连江暝夜久龙宫上日寒何处玉笙吹不断五云楼殿满长安

江右鬼父佳父二王孙以书翰见贻赋此寄赠

紫气丰城望不穷雌雄龙剑拂长空持觞并入莲花社卜筑同依桂树丛天际碧云
回锦字石边流水傍丝桐青帆咫尺堪乘兴为借浔阳一夜风

寄曹山人子念

大雅曾闻郢客操蒹葭何处梦魂劳青萍夜啸吴门月白舫晴飞震泽涛海岳壮心

藜杖遠乾坤秋色草堂高西風是處堪乘興相對蘭陵把濁醪

寄朱可大進士

曾共長楊謁聖君一鳴龍種獨空羣彤墀未捧千年日紫殿先傳五色雲花氣上林春浩渺酒香韋曲晚氤氳酬知莫問馮驩狹片片霜華落斗文

登臨安鎮海樓

郡閣冥冥霧雨開蓬瀛遙望氣雄哉千檣昼挾潮聲下萬樹晴飄海色來策石舊傳秦帝輦還鄉初見越王台高歌且遂乘桴客莫問安期早晚回

蘇君禹觀察抵武林以手札詩扇附李參知見寄且勸駕北上意甚惓惓感事賦答二首

論文曾駐木蘭舫按部長懷使者勞豈謂青衿還絳帳尚從黃綬問緋袍書傳大禹千秋穴賦涌靈胥八月濤不是轡軒頻顧盼桐君山色為誰高

雙鴻迢遞問柴荆片鷁猶思下婺城祇媿烟霄勤物色能從湖海擅時名遺音空谷聞三嘆大樂明堂重九成莫向雲泥論出處乾坤何地不堪盟

仲秋北上次武林謁大中丞滕師招飲賦謝

錦瑟沉沉夜未闌胡床明月坐來寒抽毫久媿門人籍伏劍重登國士壇一壑龍門懷豹隱千山燕闕話鵬抟青帆咫尺臨安路躑躅河橋去住難

中丞滕公遣人舟傳送渡江賦謝一律

十年雲水斷風塵一為酬知謝隱淪擊楫豈容高卧士飛檣聊作浪遊人長康破冢應無恙逸少臨池合有神無奈夢魂秋色里白苹紅蓼喚垂綸（王右軍有借船帖）

別蘇觀察君禹作

曲檻回廊玉署開高雲斜日共徘徊縱橫大筆生徒候慘淡長裾客子來狂擬持竿眠漢闕老堪携策傍秦台飛查慙乞銀河去拾取支機萬顆回

君禹病疴二月余余過訪不能數語情殊戀戀途中追憶再成二律奉寄

一舸蘆花正夕陽題詩秋色照河梁風驚宋玉三秋鬢露浥相如萬古腸劍色飛揚閩海外琴心憔悴越溪傍途逢伯樂應相笑幾度鹽車扼太行

只字風雲逐彩毫雙緘雨雪問緋袍朱顏摠為懷人瘦綠鬢能無課士勞歌徹四愁神已王篇成七發興逾豪何當一喚枚乘至萬疊吳山望海濤

周元孚過訪見贈奉答時元孚方有南都司馬之擢

翩翩詞客氣凌虛朗潤周郎玉不如佐郡蚤持三尺劍安邊頻着萬言書霞飄鷄舌黃金殿霧擁螭頭白玉除四百樓台春雨後看花何處不停車

為周元孚悼亡

百琲明珠照畫樓閨中林下並難俦新詞盡壓周公瑾絕唱先傳宋子侯落月素琴千里夢西風團扇十年愁亦知王母遙相憶肯放雙成到白頭（古樂府宋子侯有董嬌嬈曲）

十幅鸾笺丽彩云双飞龙剑惜离羣哀伤奉倩倾城语恻絕安仁祭墓文夜雨乍堪
琴瑟断春风长忆佩环闻天台咫尺谁携手落尽桃花越水濱

送喻邦相移任云间

剖竹新分大郡符朱轩华毂照行途云驱五马朝辞越雾拥双龙夜入吴重遣遗民
歌麦穗尽搜奇士出菰芦双旌遍阅闾阎后酾酒能过二陆无

夜登镇海楼月色莹然万里如昼因忆王长公元美时方以司马应召南都

登坛初卸黑貂裘玉宇无声夜色流十万貔貅环汉帜三千熊虎抱吴钩歌传桃叶
清江上曲奏梅花大海头徙倚胡床豪兴发不知明月墮南楼

寄周元孚

含香犹是旧蓬莱跃马长干定几回搦管客留鵷鹄殿吹箫人去鳳凰台黄陵异日
传仙梦赤壁今时擅将材见说秦淮春满座新词何限篋中裁（元孚方失偶而主驾部
事故有凤台赤壁之句）

寄怀少宰赵公

衣冠何地不蓬莱大府晨趋百吏来拄笏云霞流十庙浮查河汉接三台牛头寺古
寻僧去燕子矶寒送客回屈指盐梅飞诏下调羹人在鳳凰台

大司空潘公寄示河渠诸刻卒業赋此奉贈

巨轴高悬照紫霞平成功就世谁加渠通上国三千里堰护长淮十万家匝地甘棠
偏捧露参天垂柳不沾沙傍观漫自工萋菲白髮臣心尽海涯

寄答刘君东孝廉时新刻乃族祖子高职方集成

邂逅长安握别年清源一望路三千双龙豫野偏藏匣片鷁浔阳未放船玄草阁深
天寂寞赤松亭古地葱芊当筵朗润真如玉为忆冰清梦寐悬

少室山房集卷五十

●钦定四库全书

少室山房集卷五十一

（明）胡应麟 撰

○七言律诗八十三首

余君房招同刘子玄胡孟弢盛太父李季宣夜集言别

携取灵光下玉墀敝裘无赖出關时那堪水部梅花燕却订王孙桂树期青琐佩环
红日近翠微车马白云迟惟应入梦君房笔永夜同过越水湄

将出都丁元父过访数四且贻诗饯别意甚倦切赋此奉酬

词组都门醉浊醪黄金台上共持螯毫端并吐千秋色筑畔谁当一世豪紫陌天回
中秘遠青山云净少微高花期首探骊龙窟肯着东方赐后袍

南归留别胡孟弢区用孺李季宣王罔伯王永叔黄季主冯咸父金伯韶八子

陌上东风御柳黄胡姬相对一传觞空传八骏来燕市未许双蛾擅洛阳握手虹霓

犹意气關心岐路独文章提携竞着南征赋万叠春山万里航

赠莫廷韩

时名籍籍尚风尘索米长安岁未贫囊草欲飞三殿色墨花长洒万家春
茶烹阳羨过名士酒酿临邛醉玉人莫恠相逢谈太剧洛中词客旧为荀

送陈玉叔大参之蜀

握手华阳别思浓骊驹一曲暫相从雄风七泽登台近积雪三峨问寺重上客
题诗留锦里佳人携手醉临邛亦知蜀道行偏易惆怅河桥落暮钟

同诸子集吴山人叔嘉馆二首

一星随客住长安折柬能开大将坛自许含毫新赋就谁论击筑旧盟寒
千门北极云中出万寺西山雪里看落落乾坤公等在春明吾岂恨弹冠

春光何地不徘徊綠酒银灯别墅开丝竹东南传胜事冠裳西北盛词才
吟呼片月甘泉下坐引羣星太液来取深杯酬令节莫教行履破苍苔

汤义少过访赋赠

看花吾汝又蓬莱彩笔翩翩气不回二酉再夸藏穴富五丁重起伐山才
辉腾白璧过秦殿色借黄金上蓊台蚤晚河东题赋就春明门外共徘徊

懷吴大参

使车何处倚星躔回首钱唐握别年海国蒹葭停鼓吹江城秔稻满楼船
千仓转运飞京邑十郡催科息市廛极目后堂丝管在独慚经术老彭宣

闻张助甫擢宁夏中丞喜而有作四首

灿烂除书出帝京词坛飞将旧知名三河拥传过秦塞六郡吹笳入汉营
露布夜驰平乐馆风旗朝猎受降城不须更问祈连道谷蠡昆邪到处迎

金甲光摇獬豸冠玉门西度旧长安黄河曲抱中丞府絕漠孤悬上将坛
鏑控流星摧冒顿旗搴大雪定呼韩千烽夜静天如水一曲梅花上贺兰（用桓伊事）

匣底霞飞玉辘轳坛前月出绣螭弧中郎再问西凉俗（助父旧任甘州）
博望先开大夏途令出材官齐候马吟成词客竞呼卢亦知记室多袁伏能奏
侬家出塞无

廿载登坛识蒯缞欣传持节到凉州风高汉壁初行塞月满胡床独上楼
骠骑三千呈角抵蛾眉二八奏箜篌青油岂少观碁兴目断關山是陇头

集刘金吾子大第作

耀马春光上苑来华堂丝竹玳筵开含杯四海俱同调授简千秋各异才
缥缈长虹悬帝阙荧煌太白动仙台共夸此夕金吾宴肯信花前玉漏催

同黄季主金伯韶两生过伯符宅时傅明府先在坐

残雪初回万井春一尊官舍暮留宾抽毫太液多名士击筑长安尽酒人
惨淡骥心逢处老飞扬龙剑合来神盘中苜蓿犹堪饱莫放仙鳧去紫宸（是夕明府先行）

送盛山人泰父奉母南归

风色萧萧散酒徒一蓑随处占菰芦将亲南下非潘岳逐子东还是大姑残月夜投瓜步
远断霞朝拥石城孤飞流百尺兰阴下倘觅玄真旧钓舫

天津访赵梦白邀同林登卿夜集并迟陶别驾不至

玳瑁筵开集彩毫侍臣相对此持螯双星碣石盟初聚十日平原气并豪画省白云
三辅色牙樯明月九江涛论心是处堪长夜怅望王祥隔佩刀

梦白业留余为三日饮余迫归解维辱遣人追送百里并出橐装为赠赋谢此章

追欢能复少年场意气偏君重太行脱剑青天明海岱抽毫白日动河梁穷途欲惯
虞卿屣绝塞翻疑陆贾装归去故园蓬鬓在下机宁似出咸阳

暮登太白楼望岱宗题

阑干十二挂城头百尺飞甍暮霭收醉客千秋曾上坐词人万里一登楼天门月并
长庚出日观云吞大海流屈指蟠桃归曼倩骑鲸八极问离愁

再过娄江路访二王先生二首

百里娄江路未遐丹砂重问葛洪家飞花似识寻源棹古木如停上汉槎织女机头
长日月秦人洞里遍云霞相逢莫话河东赋一出春明鬓已华

拂曙吴门一棹开寻真何啻入蓬莱苍虬欲傍遥天下黄鹄仍看大海来玉树双茎
悬帝坐琼花万里落仙台亦知樵斧千龄易敢道平原十日回

长公偶以小恙为余强起卧榻间隐几对谈阅二晨夕迫归告别意殊恋恋再赋此

落日长松半榻悬科头相对欲忘眠无劳香积千人供默会维摩万古禅跨鹤共观
沧海上驱鸡遥赴白云前由来肺病文园事赢得清虚是大还

舟泊樵李沈纯父邀同陈茂才登烟雨楼

泠然清兴逐菰蒲万顷玻璃浸画图水泛瀛州环叠岛山悬方丈插平湖传声箫管
时闻越倒影楼台尽入吴昏黑更须临绝顶蚤知能赋属吾徒

寄赵梦白计部（秋夜梦与梦白论文久之因寄）

落月梁间梦寐悬风神犹忆对床年官仍大隐金门后帝问长庚玉座前白马看花
孤阁雾黄龙飞粟万家烟他时倘蹶虞卿屣醉舞平原十日筵

佩玉初辞汉苑春鸣榔十月下天津由来辨马无先达谁道骑鲸不后身双阙云霞
高隐吏五湖天地独归人江东渭北论文夜愁绝邯鄲梦未真

寄余君房

中朝词赋旧名家握手都亭兴未遐北极衣冠频视草西陵环佩日看花听鸡长乐
千门月立马新丰万树霞却望四明云雾里少微星色傍谁赊

过崇德访朱可大留饮吕明府园亭二首

握手天涯话举杯河阳花色照徘徊当年擊筑豪燕市此夜鸣琴坐越台龙剑千秋
牛斗合羊裘万里雪风回双鳧莫问王乔舄烂漫恩光汉阙来

寒云一径入烟萝斗酒相逢意若何捧日乍看威凤举垂天谁问大鹏过千门树色

深桃李十里花香散芰荷经国文章吾汝在肯綠华发叹蹉跎

送赵太史之留都

锦缆钱塘霁色开题诗先寄凤凰台投簪未许文园渴前席仍看汉殿回瓜步月明
沧海近石城云起大江来青藜岂独仙曹借咫尺寒光到上台

同喻邦相别驾话旧作

高秋帆挂大江东屈指清尊碣石同一去鸿书迷远近重来龙剑合雌雄钱塘雪卷
千家白石屋霞生万岫红何限胜遊天竺顶与君携屐待秋风

重来河朔问风流握手天涯各倦遊疋马乍堪题柱返双鳧曾是佩刀留平分水月
眠官舍独占湖山坐郡楼箫鼓画船君但饮至今人羨白杭州

杨思悦茂才招同沈侍御金观察李山人集湖上得长字

荫竹穿萝一径长谁專别墅在钱塘尊携北海千秋色座纳西湖万顷凉上客风流
元贾马中林词藻尽求羊栖迟十载谈玄意白发云天卧草堂

子念承父过访同集喻邦相署中

斗酒山城薄暮开兰阴携手一登台白云汉殿鳧双下紫气吴天鹤并来席上雄心
时惨淡尊前狂态各徘徊桃花满路看明发遮莫青藜洞口回（承父将遊天台）

顾观察维舟灏水招集

斧钺辉煌汉使才曾同作赋上燕台昆明万里浮槎到灏水千山列座回潮起鱼龙
窥鼓瑟月明乌鹊傍含杯琼筵不是征西兴肯许名流达曙陪

夏日郭方伯沈侍御李祠部金大参招集佑圣道馆四首（其二补六卷尾）

骏骨燕台事有无看花重入旧玄都谈诗客岂唐供奉作赋人俱汉大夫筑畔虹飞
沧海近毫端霞起赤城孤何须遠締平原约到处黄公是酒垆

玉殿琼楼坐太清追随仙侶到蓬瀛天垂越国星文聚地拥吴山雪色明啸傲琴尊
仍北海招携环佩尽西京狂歌不信双龙合匣底芙蓉夜夜鸣

飘零华髮塞门回结社钱塘辟草莱江左才情饶陆谢梁园宾客擅邹枚含杯象纬
中天出握麈虹霓大泽来好为湖山留胜事抽毫同上越王台

赠顾不疑山人

痴絕曾闻顾虎头诸孙文苑尚琳球书飞白鹄霞光动剑舞苍龙雪色流独访秦封
过泰岱遥探禹碣上岫嶠玄亭寂寞归来事乍许侯芭一校讎

答卓澄父

相逢裘马自飞扬握手湖山兴欲狂侠比王孙居蜀郡人如宋玉在高唐（澄父美
风仪而一姓宋）千金再散名逾重百石纔沾意已忘不爽芙蓉凉夜约月明箫管到横
塘

小饮杨思悦馆

裘马飘零汉殿回为君重上越王台廿年萝薜玄亭老一畝簔笠白社开共醉不妨

中圣酒先登谁是大夫才扬云世业犹堪守莫羨平津到上台

题斋中五岳图（有序）

余髫髻即有五岳之懷顷岁疾病纠缠尚平之兴郁焉莫遂因筑室曰卧遊而绘五岳壁间每抚琴动操则众山泠泠响答岩谷几席之上白云蔚然而生不知此身匏系於尘世也爰各綴七言一章俾同余所好者歌之

絕峽横空碍斗牛孤松百尺挂苍虬中峰万仞云霞合巨壑千盘雾雨流玉节恍疑青帝下金泥谁侍素王遊飞龙为订扶桑约独探红轮大海头

右岱

玉殿瑶台跨紫氛云璈霞色半空闻龙游尚忆重华驾鸟迹长留大禹文翠岫阴森巫峡雨苍崖明灭洞庭云谁同蹑屩寻仙去天柱南头唤鹤羣

右衡

杖底明霞照玉杯黄河清洛互萦回乾坤四望鸿荒尽日月中悬混沌开大雪恍留初祖卧飞云如扈上元来三花烂漫吾将去为忆当年絕顶栽

右崧

峭壁峻嶒雾雨愁明霞天畔削琼楼金仙示迹犹存掌玉女含颿未洗头大壑风生羣虎过飞崖云滑断猿愁何当尽掬黄河水濯足莲峰话壯遊

右华

绛宇琳宫跨絕颠大荒亭堠正苍然悬嵯尽压秦城外峭峽平分汉壁前雷电九霄摧裂石虹霓百道挂飞泉狂来欲趁抟鹏翼倚杖徐看北斗悬

右恒

苏君禹观察过访奉赠四首

鲁国诸生望后尘争传环佩上星辰那知紫极攀龙客来访青山抱犊人日射蓬莱双阙晓霞蒸桃李万家春长裾不厌他年曳自棹孤航向七闽

大纛频年别武夷高牙仍为白云迟乾坤骤向论交合日月旋从握手移一代文章明主问三朝踪迹世人疑狂来渐作襄阳态高唱铜鞮岸接■〈𠂔离〉

翛然一曲住岩阿十畝横塘半芰荷隙地祇容凡鸟占垂天曾是大鹏过伤心万事归玄草把臂千秋在綠萝东望扶桑豪兴发欲飞椽笔鬪银河

赋日初从汉殿回谈天重上越王台雌雄乍合双龙气牝牡那分八骏材曳杖虹霓东海出披襟云雾北辰来亦知倾盖元如故可道浮踪隔草莱

送司马萧公入都

奏凯千官夹道迎欣传司马入承明严兵立偃三千甲谒帝初回十二营丞相经纶悬玉垒老臣方略擅金城丹青细数凌烟上横槊谁兼大雅名

徐茂吴过访赋赠

十载形容梦寐看江天雪色对盘桓贫如厌次长为客渴比临邛自罢官日涌虹霓

双剑聚天垂星斗一枰寒春风烂漫湖头约万树桃花觅翠峦

王司寇还自金陵寄讯四首

百辟衣冠饒道傍琅琊云色倚徜徉千秋职位符司寇一代文章擅子长乘兴已回
娄水棹遂初聊记弇山堂鲈鱼正熟金阊外斜日秋风尽意尝（长公先任南司马继以
司寇归故颌聯云云）

日夜丹青问草莱老臣衔命一徘徊三天泽降龙仍卧八极祥呈凤已回剑佩诸真
朝绛阙笙镛羣帝集瑶台从知六翻扶摇上倘许初平叱馭陪

长干一苇破江烟瓜步千花照别筵祖席衣冠高座寺归装环佩大罗天白牛驯抚
金田下玄鹤翱翔玉洞前极目五城楼十二不知何路向梯仙

咫尺行藏见大机娄闾晴色正熹微千身水月寻常现八翼云天自在飞核种西池
桃已熟苗长东海蕨初肥太湖万顷家林外为报君王已拂衣

天恩勅赐为杨明府题

三策当年动草莱鸣琴百里蹇徘徊园开五柳双鳧驻户植三槐驷马来惨淡高风
神武阙荧煌新命建章台承家宓子飞扬甚屈指龙光到上台

答陈司理汝立

谁人得似陈公子散帙高斋坐晚衙白马风流初佐郡金门词赋旧承家云霞明灭
看天姥岛屿萦回泛若耶若问胡郎婚嫁事赤松原上近移家

赠杨明府杨为中丞滕公内弟

十载通家问草玄龙门愁望大江悬栖迟廷尉辞宾日藉甚仙郎作今年越渚苹香
回岸幘吴城花色照鸣弦由来百里非贤路屈指双鳧帝座前

喻邦相将还括苍寄此

咫尺飞鸿堕草堂盈盈秋色限河梁神交不道千峰隔病卧翻憎一水长玉树遏云
天缥缈金茎承露月微茫西风未下观涛兴七发行传大海傍（时以病留郡城得善洞
箫者月夜聽之遂渐有起色云）

朱在明过访作

廿载重逢各鬢皤追驩宁问夜如何华阳社逐浮云散灑水船将片月过竹径谈棋
双鹤下萝轩明烛乱蛩多那辞醉作他乡客百斛兰陵任啸歌

寄问喻邦相病时中秋前二日

咫尺牙旗越水头招寻犹滞木兰舟羊裘万里归风雪龙剑三旬隔斗牛沈约病余
偏瘦损虞卿书就任穷愁生憎后夜双溪月独照胡床八咏楼

陈玉叔书来赋答

惊人曾覩孟公狂作吏咸推仲举良剑合飞龙延浦外书传回雁洞庭傍薇垣夜醉
三千客荔圃晴深十八娘莫诧宦游專胜絶将因题赋入长杨

吴文仲与余订约净慈昭庆间届期往晤则文仲尚未至也余迫归不能待意甚悵

怅走笔寄吴

春风晨驾木兰桡十里平湖正落潮万壑霞光灵隠近千峰晴色净慈遥参差玉佩
萦朱陌错落金钿照画桥惆怅美人期未得一笻何处问岩嶷

舟中寄别祝文学鸣皋

蓟门秋色近何如忆汝仓皇赋索居千里寒风晨挂席万山残雪暮驱车形容渐老
归时鬓意气偏悬别后书为报武陵花满目青鞋吾欲伴樵渔

过晋陵哭陈生穉冲

握手京华意气投风尘驰骤两骅骝人间未识青藜杖云际先归白玉楼溟海烟涛
横赤鲤乱山寒雾拥苍虬吞声欲挂留徐剑蔓草何因识故丘

寄姚安杨使君

匹马天南客梦孤一麾迢递问苍梧鱼龙夜度昆明水虎豹朝行贵竺途草檄共看
司马后题诗曾吊谪仙无燕山越峽空回首愁絶都门旧酒徒

舟过吴门奉懷王太仆元美祠部敬美两先生（时俱在燕中）

玉树双瞻汉苑才分曹清切侍蓬莱何年海岳鍾元气几夜星辰接上台草梦春生
鸿雁渚花香晴忆凤凰台遥怜作赋登高处万里浮云大漠开

联佩翩翩碣石宫陆家兄弟摠称雄云霄忽讶双龙合朔塞平看万马空东观图书
霞色里西园车盖月明中尘踪十载虚相忆寂寞孤舟自转蓬

夜同俞蔡二子集杨茂才馆

一尊岐路暂追扳词客相逢鬓已斑海内诗名谁白雪人间愁色共青山浮云西北
孤帆迥明月东南万壑闲道是子云幽兴在不妨频夜扣玄關

寄燕中友人六首（有序）

诸子皆燕市旧交自余南还音问疎离索之懷日形梦寐爰诗寄焉

谁向风尘问谪仙相逢贺监自飘然青春画省追遊地白首金门侍从年柳色乍分
燕塞底梅花长忆岭云前佳期惨淡琼瑶隔愁对孤城落日悬（右岭南黎惟敬）

江左曾闻第一流携书京洛几同遊风尘杜甫三秋鬓湖海元龙百尺楼染翰白云
飘蓟野看山明月冷吴钩狂歌寂寞当年事何处逢人赋四愁（右吴门周公瑕）

慷慨京华忆旧踪交遊南楚得元龙新丰市里三春酒长乐宫前万户钟野客心情
悬薜荔故人肝胆托芙蓉长安极目征鸿阻愁向衡阳第一峰（右麻城丘汝谦）

长啸秋风问解携黄金台上几扳跻霜飘鼓角中原静雾卷旌旗太白低伴直每趋
三殿晓看花时出五陵西相思共拂张华剑莫使寒光暗鷗鷖（右秣陵李惟寅）

天末寒风起暮秋碧云翘首倍添愁都门侠客空弹剑日下归人已倦游十里莺花
桃叶渡半帆烟雨木兰舟携家早赴青山约寥落羊何阻唱酬（右永嘉康裕卿）

把袂都亭木叶稀阳關一曲转依依天边剑拂长虹断海上帆侵暮雪飞兰杜欲纫
湘女佩芰荷新制楚人衣相思何处偏惆怅独夜寒空望少微（右濠梁朱汝修）

送谢中丞入都

剑履辉煌入汉闕苍生遥指谢公还千营夜发鲸鲵静万戟晴开虎豹闲紫电朱旗分野色赤霄华袞近天颜承明几度看花暇飞梦犹过海上山

不佞隶博士籍五载余迥遊京师不为当道所知今归业且谢去乃辱督学滕公物色风尘擢之异等而且脱略师生罔间形迹青衿之遇近代所无感德酬知辄复赋谢二首

落魄风尘几岁年凌云豪气自翩翩持竿欲挂珊瑚树挟瑟重登玳瑁筵吏部声华唐阙里长卿词藻茂陵前无论国士今难遇万古夷门白日悬

极目孤云大海平夕阳千里共含情闕前一雁凌秋起匣底双龙绕夜鸣中散形骸元傲世婕妤容色岂倾城酬恩亦是书生事愁絶江淹赋未成

寄李环卫惟寅（时乡人以惟寅燕中书至）

十载长安道路分传书重覩信陵君千行泪尽吴天雪一字神飞越海云夜帐梅花孤鹤遠秋斋梧叶片鸿闻狼烟净扫居胥外好乞班生石上文

黎惟敬得告还南海过余草堂话旧信宿别去

着绣看君海上遊白云携手问丹丘中郎旧业藏金马内史新书满玉楼山水十年桃竹杖闕河千里木兰舟题诗莫向罗浮顶片片梅花引客愁

春日韩使君过访（韩名邦宪亦曩燕中社人）

十二楼台拥帝京一时才子最闕情分符已奏淮阳绩授简仍追邺下盟袖拂骊珠江月遠光生龙剑海云平狂遊转忆当年态万井烟花宿凤城

同诸友分赋临安十景二首

万松岭

峭壁层崖万仞开离离松色隱崔嵬云排铁干苍龙舞月满瑶枝白鹤来几夜秋涛翻客枕半林寒影挂仙台虚疑日观烟霞古寂寞秦封半草莱

玉莲亭

潋滟晴光一镜寬汉宫罗绮画中看风摇翠盖凌波出雾洗红妆映日寒太液池边香自绕若耶溪上采应残莫教肠断金陵客载酒重过白玉栏

少室山房集卷五十一

●钦定四库全书

少室山房集卷五十二

（明）胡应麟 撰

○七言律诗八十三首

郭方伯以三诗见赠赋此奉答

新诗题赠遍琼瑶握手龙门路未遥姓字三朝传岳牧风流一壑伴渔樵芒鞋石室云随杖桂楫金沙月满桥极目钱塘秋渐爽一尊同赋大江潮

秋日张使君招饮湖上作

绿杨红蓼半斜曛锦缆牙旗荡潏纹水面楼台千刹绕波心城郭万家分洞当灵隐
偏藏雪峰到飞来尽入云无限畫船秋色里归途风雨湿罗裙

送屠长卿北上

十日炉头问酒频春明回首各风尘朝携一鹤还青浦夜扣双龙入紫宸霞色薊门
供傲吏云天姥卧闲人中朝手定明堂礼莫忘襄阳赋有神

中丞萧公自關中来越喜而有作

玉诏辉煌下彩鸾朱旗遥卷出长安天南再拥中丞节渭北初辞大将坛別墅谈棋
千障肃胡床吹笛万峰寒西来小队能多暇山色湖光次第看

顾观察维舟灊水招同王承父燕集迨暮乃别

江天携手一尊同锦缆牙旗夕照中十日平原今再见千秋河朔定谁雄浑疑白社
开薇省共向青山觅桂丛寂寞黄金台上事西风吹堕北来鸿

送唐刺史之洛中

分符新命下明光坐拥单车赴洛阳六载风期悬梦寐一时声价动循良先春苑雪
飘行盖薄暮嵩云到讼堂絕顶三花寻少室何人相对话胡郎

送吴文仲入都

词组溪头问鶡冠骊驹催发向长安金华洞壑神仙吏玉殿星辰侍从官东汉循良
传赐履西曹词赋接登坛嘉隆数子盟仍在肯放阳春属和难

司马汪公伯玉拉余过海上访两王先生适司马张公肖父同日至留集弇园者三
宿澹圃者再实一时之盛事因成七言四律纪之

名园楼阁丽丹青握手千秋意气饶日月双悬娄水近星辰羣下越台遥探书题柱
俱司马飞舄吹笙并子乔独有侯芭长寂寞玄亭相对发萧萧（张公蜀人汪公适由越
至王乔一缙岭周人一叶县汉人）

秋光何处一尊同十畝平泉眺望中鹤驾并留孤岛上龙泉重合大江东星悬析木
三垣紫日拥扶桑万界红矫首乾坤才欲尽那知人在闔闾宫

飞僊环佩入蓬莱木落霜清万象开宇宙文章传四子东南名胜属三才（曹子念
汪仲淹仲嘉同集）丹成鸾鹤中天下乐奏鱼龙大海来七十二峰云雾里凭将奇句勒
崔嵬

屈指词场大业新輶轩离合并伤神重逢洛下含杯客半是华阳授简人一代风期
留管鲍百年金石聚雷陈相看忍赋河梁曲荏苒垂虹挂月轮

赠王瞻美

玉树王家并寡俦翩翩羣从见风流乌衣不爱诸郎坐白帽偏从二美游蒹水秫香
晴荷锄石湖花暖夜维舟恠来双燕频相认玳瑁堂深贮莫愁

王宗伯督学招同张汪二司马王长公次公洪山人汪太学同集园亭赋

十载玄亭梦寐过登龙此日并羊何關前紫气飘槐棘海内苍生问蓼莪一代文章
诸老尽三朝礼乐二难多亦知元礼门风在摠为名流到绿萝

重九舟中怀汪司马

何人同赋仲宣楼烂漫黄花引客愁一片秋光随越舫万家寒色到吴钩波涛震泽
神龙过日月天都彩鳳游依旧六桥荷芰满不堪明夜大堤头

送徐观察之岭北

绣斧朝持出汉宫提兵遥赴粤台东三江雨色双帆静五岭霜华一剑雄虎帐分霄
延上客貂裘移日候元戎胡床不浅登楼兴万里遥瞻碣石鸿

陈观察过草堂余适游金华山中不值

西风遥驻越江船竹径深惭问草玄星斗乍看题鳳日云霞长护牧羊天秋明斧钺
羣山外梦隔旌旗一水前莫诧雁南风景絕平津开阁候登仙

送徐方伯之江右

飞动檐帷出帝京汉庭才子旧知名惊风蠡泽扬帆下落日匡庐揽辔行鐵柱蛟涎
秋尽洗石函龙气夜双明为知到日滕王宴四座争携彩笔迎

闽中谢文度以诗及新集见贻赋答

一函飞雪下江鱼惭愧同声骤起予松菊满栽彭泽径蓬蒿深葺杜陵居乾坤万事
悬车外日月双峰伏枕余不遑龙门堪汝过幔亭云色定何如

题徐大叅瞻云堂

负郭新看一径成金华山半入檐楹乔松不断瞻云色寸草长悬爱日情檻外翔乌
余涕泪楼前驯鹄动悲鸣莫言遗恨终天抱屈指征书下帝城

顾观察益卿过访

衡宇飞花暮不扃传呼车马到林垧何来海岳称同调是处乾坤问独醒一水近拖
扬子白千山遥坠夜郎青莫言寂寞扬雄卧旌节分明驻草亭

题凌使君别业（别业吴山之上用使君韵作）

五畝青山自结庐栏干十二坐幽虚烟萝地近扬雄宅水竹天成杜甫居海色千家
潮落后湖光万顷月明初飞花遶径谁相过一卷黄庭石上书

送徐大叅入都

飞旌长夏问京华紫气苍茫越水涯南国芝兰初映日西秦桃李并成霞三朝吏绩
推前辈一代儒宗见大家翘首秋风天阙近夜看牛斗落仙槎（先是公山房产芝草数十本）

岭右张使君辟园城中台榭池沼皆桂林胜絕处予闻窃向往焉赋得六题

露暖长空片月流阑干十二倚丹丘千山霁色飘银殿万顷寒光抱玉楼曳杖迴疑
天柱过吹笙长忆广陵游当年莫奏开元曲灿烂星河落翠裘

右清虚阁

曲曲雕阑面面霞何如蓬岛问仙家客来精舍谈双树人倚名园坐百花翠合暮云
流藻井红分朝日上檐牙啼莺满径壶觞在长伴羊裘阅岁华

右丛芳馆

叠岭高盘挂夕霏云光雾色乱侵衣双鸾夹汉青疑坠万鹭摩空翠欲飞北望星辰
悬帝座西来水石护禅扉他时尚共商山客日荷长镵赋采薇

右鳳台岭

喷玉千寻望转奇平开十畝漾涟漪闲花弄色全依砌古木丛阴半入池云合四山
龙起夜露浓三径鹤来时吹笙自是神仙客暫逐双鳧到鳳墀

右来鹤池

渌水微茫涨碧空佳期谁向大堤同水轮两岸飞明月玉柱三天驾彩虹殿阁半浮
朱舫外笙箫时出画阑东宜人最是新秋色十里芙蓉一夜风

右雾虹桥

突兀羣峰倚碧台如登方丈入蓬莱天垂象纬三辰列日射云霞五岳回几夜汉槎
孤泛到何年秦策并驱来从知帝梦思良弼莫讶商岩产异才

右三台石

送顾观察之蓟中二首

白羽初停越水湄彤庭北顾玺书驰清霜八郡飞长戟积雪三边照大旗异代勲名
麟阁并生平骨相虎头奇新葛满瓮蒲萄熟谁共襄阳醉接■〈𠂔离〉

铜柱威名播粤都楼船勲业遍江湖行边首定周王策出塞新分汉使符倚剑苍龙
鸣涿鹿扬鞭白马照飞狐从知幕下多词客彩笔班生定有无

寄欧桢伯水部（用传说列星事时乡人以桢伯秣陵书至）

明时大隐谪仙来紫气千门建业开几夜独吟鵙鹊观何人同上鳳凰台杨花拂雪
垆头卧桃叶乘潮渡口来莫问罗浮峰四百一官原合近蓬莱

方伯滕公起任岭南喜而有作

十载苍生望未平双旌遥赴越王城朱明洞启霞光待大庾山将雪色迎四岳輶轩
聊海甸三台剑履渐承明新题满勒飞云上铜柱谁夸汉将名

寄易使君

独把芙蓉越水湄青衿长忆问奇时虚疑剡曲帆来近转愧延平剑合迟指顾风云
随八翼踟蹰歲月上双簷青山万叠黄堂外柱笏谁同望武夷

闻王长公元美再起南都司寇走笔奉寄（时有传长公已出者）

争传霞佩出蓬莱紫气關前鬱未开金液好探龙虎地玉笙聊试鳳凰台先秋列叟
乘风去后夜王郎挂雪回林屋洞门元咫尺不妨瓢笠暫徘徊

忆燕中元夜与朱十六童三安二纵游长安陌上今條十载矣山馆寂寥再逢兹夕
感旧赋此

鳳羣鰲山出上京长安宫阙暮云平千枝火树宜春苑万炬金莲不夜城艷舞娇歌
游客醉靚妆华餽丽人行江楼此夕频搔首饱看梅花上月明

欧桢伯南归过访赋赠

四十年操秬苑盟秋风遥起挂冠情罗浮絶顶披云上庾岭归途踏雪行海岱名流
谁并数嘉隆词客半同声朱明洞口携尊日首探梅花寄越城

赠郭隐君为思清孝廉作

大隐华阳不避喧谢家庭砌尽芝兰西池鸾鹤扶双寿东壁麒麟抱二难紫绶定加
莱子服青藜长伴竹皮冠八千歳月灵椿在一诵逍遥兴未阑

送朱孺子还豫章兼寄宗良孔旻嵬父佳父四王孙

兰陵新緑乍吹醅指点银鉞为客开双剑夜持南斗出一帆朝溯大江回鹈雏五色
凌霄翅龙种千金歴块才羣从兔园应汝候彩毫齐拂豫章台

江右来相如过访同唐惟良夜集分冬字韵

严陵长日候孤筇底事芒鞋雪后逢结夏西湖眠菡萏高秋南浦落芙蓉人如司马
名堪借客比梁鸿姓易重把臂旧游肝胆在接■〈𠂇离〉那不醉双龙

敬美使君再起督闽中学闻将于歳杪暫出寄讯

重飞天诏出彤墀特看山出武夷双舄恍疑云际现片帆刚待雪中移七台高步
穿林遠九曲长吟破浪迟珍重紫阳遗墨在好将椽笔鬪淋漓

张使君招饮舟中作

五马喧传灏水傍含杯犹记旧高阳自呼南郭幽人至相对西台御史狂地挟双流
縈画舸天垂千障落胡床接■〈𠂇离〉颠倒休辞醉同是当年白面郎

题少玄宗侯册

玉检金泥出太常桐圭花萼遠相望西园车盖邀明月南浦楼船泛夕阳兔苑登台
无俗客龙沙开阁有贤王张筵可解呼王勃为听鸣銮入豫章

孔旻得王中丞所贻西僧自焚灰像因立精舍奉之乞余作诗先是惟敬永叔诸君
咸有题咏遂继七言一律

精庐何自布金银白足西飞事已陈鹿苑乍施焚后像龙池重现劫前身空门色相
元无住净土庄严合有神欲起丹霞看舍利摩尼长照大江濱

送喻邦相吴文仲试士省下

画舸齐飞灏水头潮声八月下杭州悬心两地桃花色纵目三天桂树秋日上朱衣
晴锁院虹飘彩笔暮登楼无劳石匣占双剑并识龙光在斗牛

将过娄江奉访王长公先柬二首

西风船下越江湄恍入三天问路岐云满大罗朝宴日雪飞中岳夜来时千秋一钵
劳先赠万里孤筇愧后期笑杀卢敖游汗漫丹台咫尺是蓬池（公与余相闻问十载余
数订期奉访以病不果今秋北上实以践此盟云）

片刺飞扬国士情登龙迢递阖闾城一身海岱依元礼双眼云霄属正平下里乍堪
酬郢曲中原能许问齐盟莫言把臂词场晚蹶蹻天门象纬迎

初至昙阳观访长公作二首

龙篆荧煌列太清鳳箫时落步虚声千灵剑佩朝拘翼七圣輜輶候广成王母宴时
香雾合上元归处片霞明骑羊莫问關前客石室初平是姓名

绛宇琼楼压巨鳌扶桑晴翠落飞涛攀云顿觉蓬壶近望日犹惊泰岱高面貌诸天
曾省识风神八极共游遨含毫小毕千年事长侍方平醉玉桃

次公于昙阳观傍新构澹圃落成适余过访留宿其中敬赋

青牛西去定谁从赋就归来学老农醉白堂成初养鹤草玄亭启一登龙机云洛下
堪同住梁孟皋桥欲借佣深夜曲阑池上月万峰林屋浸芙蓉

又题澹圃一首

筑宫犹自傍昙阳空观惟应侍法王扬子门庭长寂寞文殊台殿尽清凉鸣钟震旦
纷华过就枕邯郸障业忘不见西方真乐地玉莲琪树遍金堂

小饮昙阳观中呈两王先生作

十年书札满林皋先后青云识彩毫海内文章司马擅洛中才望士龙豪一珠投处
开尘榻双璧联时坐缁袍余兴正狂那得尽雪花从涨剡溪涛

次公携酒招游弇园山池登缥缈楼二首

缥缈飞楼逼汉开河山四望转崔嵬石驱瀛海千峰立池划昆明万岛回曳杖星辰
干帝座吹笙云雾遶仙台莫言缙岭堪忘世指点遥天鹤驭来

层台飞观曲相连彷彿丹梯象外悬半壁霞生林屋底八窗云起洞庭前鼇鼉岸坼
藏山夜乌鹊桥成叠石年醉望玉楼天尺五帝閤谁召笔如椽

再别元美长公

乍喜平原十日留征尘俄动鹞鹞裘南宗敢谓传衣去北塞翻同蹶蹻游娄水三天
云雾拥华阳万里雪风愁春花定约渔舟入相伴秦源到白头

寄王次公敬美时方辞督学越中之命

飞诏东来鬓未皤白云深护洞庭蓑乍堪霞佩游高阙肯戴星冠出大罗紫气昔緣
關尹住苍生今奈谢公何惟应二仲心偏契早订风期在薜萝

过樵李怀沈纯父

从军何处觅封侯落尽梅花倚蒨猴五岭雪深杨仆戍三苗云合尉佗楼登坛大业
穷犹擅伏阙雄心晚定酬一事为君差快意綠衣无恙住儋州

登甘露台望金焦作

叠岭嵯峨到碧天携壶秋色暮云前楼高北固三千丈殿鎖南朝八百年雁鷺惊飞
吴苑笛鱼龙乱语蜀江船乘风恍忆银河去拾取金焦石二拳

鳳凰台怀李白题

百尺危梯上紫烟层台十二鳳游年天浮楚蜀千檣下地夹淮滁万井悬睥睨白云
高阙底阑干红日大江前漫夸黄鹤楼中句今古长庚合并传

访李惟寅话旧作

一赋河梁事事慵秣陵阙下见扶筇观心竞作逢时态把臂频看别后客万戟天都
环虎豹孤航水国钓鱼龙亦知不是封侯骨甃学河汾谒九重

同张幼于潘象安集李临淮即席作二首

斗酒平原话各天深杯犹似梦中传青油独坐元戎幕阜帽羣趋上客筵五夜歌声
桃叶底十年容鬓菊花前抽毫忍和飞龙曲月暝长干是去船

六载华阳赋别离临淮此日见旌旗悲凉白发谈兵夜宛转红颜任侠时万户侯真
夸燕颌九天人欲问蛾眉桃花烂醉春明畔一骑旋飞到习池（惟寅已见二毛余亦安
仁之歲）

独游燕子矶作

曲檻危栏雾色开憑陵飞阁驾蓬莱江山上下千门入吴楚东南万舳来吹浪鼉鼉
衔日起擘云龙蜃挂天回凭高莫问前朝事巷口乌衣半绿苔

奉赠大司马潘公

瓠子功成帝眷驰老臣衔命出彤墀千门月静留都钥万灶霜清白下旗宾客南楼
频拥啸生徒东阁尽裁诗极知吐握姬公念踟躅河梁问路岐（时公屡致意惟寅欲余
一见余北上期迫甚遂不及奉谒）

题留余堂为潘大司马

朝日堂开霁水濱昆山入坐照嶙峋骑曹官显非先世驷马宾多属后人绿野云萝
长护色平泉花木尽含春漫将七叶夸门第百代勲庸属老臣

寿陈茂才

一经垂老意何如闻道元龙气未除盐鐵几裁文学论金银遥问武夷居七台紫雾
飘藜杖九曲青霞候草庐莫谓汉庭方贵少蒲轮旦夕有征车

真州逢李季宣

短棹东来不厌游吹箫弹铗下扬州风尘作客谁青眼海岱论交尚黑头蓟野长虹
千驿路秦淮明月万家楼相逢合在华阳邸大有荆高佐酒筹

泊广陵怀顾益卿

秋风骑鹤向天涯路入扬州兴转遐有客登楼怀玉树何人开观出琼花坛前横槩
三千帜桥上吹箫十万家笑杀紫薇今夜醉布帆无赖宿蒹葭

闻沈纯父将还有寄

南过铜柱絕风尘北望金门恋隐沦荳蔻花前千里客桃榔树底十年人骖鸾雪拥
名山色驱鳄云开大海春闻道天鸡来旦暮可令宣室迟孤臣

寶应碧霞宫宏丽甲天下其后玉皇阁高寒特立环以大河东望淮海莽苍无际余

维舟其下登临竟日恍然驭风遗世之想为赋二首

积翠中天势欲翔分明台殿到扶桑云霞上下飞丹壁日月东西抱画梁座里黄河千舶聚毫端沧海一杯长祇今谁识宣城句搔首骑龙入大荒

斗畔危梯百尺悬岩峣飞观矗层烟长淮蜃起朱阑外大泽龙吟碧槛前抱瑟湘灵时自舞吹箫秦女欲谁怜却思香案曾为吏白昼蓬莱绝顶眠

明上人居少林三十余年以游方淮上说法于通玄禅寺余从大众谛听异焉造室玄谈遂至丙夜诘旦留诗为别且订后期

泠然飞锡下西方久住名山侍法王持呪毒龙归藻椀谈经驯象过绳床诸天日月千花供大地山河一苇航我亦宿生称大士相随七佛赴禅堂（传大士金华人）

崔嵬台殿入清凉月色天香对坐忘洗钵师能容姓字留衣吾欲废文章纔叅雪窦人天近共指云门客路长计日灵山携杖去白牛车畔问慈航

沛上怀古寄喻邦相

酹酒遥当百战尘彭城山色大河滨攀龙北极非无客逐鹿中原定几人雪浪吕梁飞一舸日华芒砀驻双轮登台苦忆神仙吏击筑歌风望紫宸

次夏镇谒朱公新祠

■〈山截〉嶠宫墙跨海隅嵬峨庙貌锁清虚天开雄镇犹名夏地拥长堤并接徐疏凿岁深频想象平城功就几踟蹰丹青旦暮思良弼倘为蒲轮到玉除

寄黎惟敬

辞官不听上阳钟结社遥当四百峰仙子衣裳余白鹤词人环佩隔苍龙罗浮树袅云千色大庾花残雪万重纵是寒梅难折寄可无书札慰遐踪（惟敬晚年自称白鹤山人）

怀滕方伯先生

矫首玄亭忆问奇海天愁绝雁来时清宵跨鹤还方丈白昼鞭龙上武夷舟楫尚回明主梦衣裳遥赴大罗期星河未吐吴钩色十载寒光佩陆离

初抵都下冯咸父以诗草见贻赋此奉赠

纷纷才子竞谈天入洛何人最少年赋就三都吾欲老吟成七步世争传呼卢雪照咸阳市握尘虹飞碣石筵寂寞焦桐弦绝久为君重拭汉宫前

同社诸子招游显应观阁得台字

夹筱千林蔽绿苔飞楼百尺上崔嵬山将华岳莲花并岭学淮南桂树开隔坐三天悬帝阙凭阑七曜动仙台君平此夜成都卜应怪乘槎客未回

题陈玉叔雪坡草堂二首

平坡飞翠立羣峦大隐新开十二阑秀色迥当银阙堕清辉疑傍玉楼看歌成郢国千花聚赋就梁园万竹寒何似一舟乘兴去闭门三日卧长安

城隅一曲抱沧浪有客新裁薜荔裳槛外渔舟回七泽座中龙笛到三湘松花暮合

陶潜里草色春添杜甫堂莫向峰头歌白雪夜惊神女出高唐

答屠长卿

风尘携手各茫然恍惚西湖载画船六载蒹葭余旧梦万家桃李奏冰弦云驱赤骥
燕台下电绕苍龙魏阙前莫羨初平能辟谷餐霞曾谒大罗仙

再赠长卿明府

缤纷词客尽西京赤帜谁持大将营司马赋才元絶代文房诗律旧长城霞光若木
飞三岛雪色扶桑射四明漫向石函占紫气双龙齐傍蓟台鸣

幔亭云气圖寿陈征君作

当年词笔擅灵光白首青袍厌旧行曳杖少游行下泽吹簾仲举在长杨庭前玉树
森兰桂阙下琼花忆棣棠咲指幔亭归路近鐵船高系白云乡

少室山房集卷五十二

●钦定四库全书

少室山房集卷五十三

（明）胡应麟 撰

○七言律诗七十三首

夜同祝鸣皋话旧

玄亭遥夜一尊开握手青衫气未回击筑幽燕人渐老看花韦杜客重来千秋彩笔
双惊座万里黄金独上台咲杀公交车成偃蹇仍将词赋入蓬莱

答何仁仲见寄（曩与晤于都下）

白眼双携向浊醪平原十日兴偏豪千金客邸新龙剑五色王家旧鳳毛赤壁箫横
云梦月黄陵帆落洞庭涛持螯一醉堪名士何用床头着楚骚

赠张观察助甫四首（有序）

不佞与张公助甫相慕有年矣长安邸中邂逅识面宛如生平旋出素业扬扈指归
语语契合肝胆形骸几欲为一昔人亟称忘年交盖未足多也爰赋四诗用志鄙懷

梦寐中原问执鞭囊鞬此夕快周旋星窥碣石谈天座月拥梁台赋雪筵造父馭来
俱骏骨风胡携处总龙泉无夸片诺乾坤易屈指词场二十年

羸马西寻易水来和歌无客自徘徊翻疑地遠荆高侠岂谓天留屈宋才八郡河山
开气象七陵风雨动崔嵬从他令尹關门候纵饮黄金百尺台（时将有望夏之命）

临风何处不支頤邂逅平原即故知紫气坐间中岳近白云停处太行迟先登独着
三朝望后起犹攀七子时醉解吴钩君莫咲十年虹色伴要离（助父汝南人以山西观
察入覲）

一尊岐路去仍留唱彻骊驹下酒楼西日万山悬晋冀北风千里度燕幽词臣欲傍
褰帷老壮士难禁击筑愁最忆故人關右句牙旗金印坐边头（敬美曩送助父有金印
牙旗君好住之句）

别殷无美

桃花红照白纶巾去住阳關各惨神杜宇竞催题赋客伯劳如送和歌人何惭骏骨还青海独探骊珠上紫宸四十成名君岂暮九重开阁在平津

王季孺过访寓中值余偶出诘旦往报季孺已得第迁居矣

十里名山一抱琴那知车马到同心徘徊凡鸟题空谷怅望迁莺隔上林太乙炉香三殿迥平康弦管万家深木天咫尺羣公聚独有庄生尚越吟

汤义仍过余适余命工栲发欲起义仍亟止余对谈竟栲因相顾大笑曰竹林风致何必晋人俄余鼓枻南归兴会相思輒有此寄

散发逢君易水头红尘紫陌并追游狂呼楚客青丝骑醉拥吴姬白玉楼三馆地堪容执戟五湖天欲问归舟江声月色能相望九月鸿书到敝裘

别章陈二进士

龙楼春色鬢徜徉满袖桃花越客装望里黄金高碣石行边白璧照咸阳云沙西北双芒屨象纬东南一草堂君自乘车吾戴笠暮天长揖下河梁

别刘仲清

卢龙寒色暮萧萧指点黄金半寂寥廿载声华传岳牧宿生缘业在渔樵尘埃击筑千山动宇宙藏书一壑遥无限渭城杯酒思行人车马出河桥

别朱汝修祝鸣皋

一蓑重问旧渔矶回首桐君赋式微客路千山明月老靚闾万里白云飞幽燕姓氏穷先辈吴越行藏旧少微莫怪荆高携送遠春明门外和人稀

赠济上张公子

飞霜匣底辘轳寒玳瑁堂开白玉盘豪士扶风新阀阅儒风曲阜旧衣冠当门鳳尾俱成竹后院蛾眉欲夢兰肯许四明狂客醉一尊河斗任阑干

赠姜计部仲文

蚤向龙楼夺锦袍含香鬢辍下仙曹牙樯十道催燕饷画戟千山醉楚醪芒砀龙蛇闲大泽吕梁鱼鳖静飞涛莫夸戏马前朝句今日登台属俊髦

怀大中丞滕公二首

雨露经时竭海壖东南民力两茫然潢池骤喜惊波息沃野重看化日悬气象三垣元拱极勲名八柱已擎天丹宸蚤夜思良弼肯放归畊下泽田（时公方上疏乞休不允浙中频歲饥饑复当多故兵民帖然公之力也）

十年尘土快遭逢碌碌渐为国士容业在祇应扞薜荔恩深何处効芙蓉寒风海甸驱千鰐晓日天门扈六龙独有梦魂长恋恋夜随征雁过吴峰

与朱在明订期江上十年矣是秋北上余复病不能赴约走笔寄此并询诸郎

彩笔翩翩照画桡青春曾赋广陵潮谁言鲁国风流尽自许夷门侠气饶白发怀人犹四海红颜结客已三朝成行玉树阶庭下可记当年抱阿瑶（在明初得子日余与黎

惟敬诸君咸集坐中惟敬以阿瑶名之)

复作此戏柬在明二首

马馱沙长一棹游朱家十六最风流屏前小小初匀额画里真真欲点头客到玉台
花似绮人歌金缕月如钩参差已尽浮生乐独欠银河问女牛

象枕牙床白雪骄画楼朱阁暮云飘能将鸞鷟排高髻肯惜骅骝换细腰桃叶盛夸
三妇艷莲花差比六郎娇（在明行第十六貌不甚扬而风度致佳）何因骤发观涛兴
来听扬州月下箫

夜泊京口怀李惟寅

金钗十二迥成行彩笔三千照画堂座里新霜流汉阙尊前明月满胡床箫横赤玉
元戎醉拍按红牙上客狂一片秋光浑似画烂烧银烛理霓裳（时大江明月如昼因忆
燕中旧游寄此）

梦游白下遇朱十六鸿胪

一枕黄梁白日悬西风遥上木兰船江光翠落千门底山色青浮十庙前酒压吴姬
春似海香消卢女夜如年何因唤取朱家侠尽出红妆玳瑁筵

病中张别驾以薪粟见饷赋谢

昨日江风大放颠六花成阵月明前三浆错拟天人供一饭真逢地主贤郢里寒光
飞白苧河阳春色弄朱弦殷勤为讯文园客可是登台作赋年

赠余明复水部（时枉过舟中）

青雀黄龙驻彩旄牙樯锦缆照宫袍当今学士谁山斗自昔文人擅水曹象纬中天
流说剑云霞絶壁堕挥毫他年胜迹留孤艇肯让登仙郭李豪

大司空潘公驰驿夏村时不佞卧病舟中公特使相存且为觅舟南返感谢二律

崛起东南见伟人行藏咫尺动星辰丹心自许乾坤业白首谁称社稷臣拥传百川
劳灌注持筹万国待经纶遥知夏后功成日灿烂玄圭出紫宸

華夏勲名二十秋大臣风节迥难俦扶天厯捧三朝日凿地频安四海流九塞飞乌
停帝阙八方轮粟涌神州他时名姓麒麟上肯让平阳第一筹

夏邨病剧不能北上而返有怀大中丞滕师

国士知从最少年飞扬腾踏拟无前何难虎观名三百总为龙门路八千太白东南
孤配月长虹西北遠连天无惭老作扬亭客白发犹堪侍草玄

再叠前韵怀滕先生

十二楼中二十年一身浑拟当三千虚疑骏骨图中问不信蛾眉画里传酒肆欲寻
西蜀底盐车长阨太行前从教老被婣娟误肯抱琵琶向别船

司空潘公浚渠迄工纪事

突兀高牙驻海湄峨■〈山可〉大舰接淮沂千山凿就鱼龙圉百水输成雁鹜池
（渠中水自济上来泉源凡七十二道）赤日燃灯穷魑魍碧天横锁镇支祈何辞尽白

潘公髡一代君臣际遇时

柬余明复乞舟

台上黄金半草莱追风蹶电且徘徊穷当岐路千愁集老向风尘百病摧上国寒梅
从报雪故园新笋已闻雷殷勤为问余工部几日青帆泗上来

寄王敬美太常时新赴白下任

一官谁道太常闲六代名山任意攀句曲洞前扃峭蒨石头城下弄潺湲青天跨凤
高台去白日飞驹大桁还若问季真狂态尽风流何客伴酩酊颜

陈玉叔方伯以书扇见贻寄荅并与索鲜荔子

飞槭频到灏江滨意气宁知岳牧臣帝谓旬宣劳大吏天将形胜属才人棠阴护处
连三蜀荔子尝来遍七闽道是枫亭神韵绝可能笼寄隔州民

题张大宗伯闲云馆

十二阑干照碧梧郁葱台馆傍洪都闲将太乙青藜杖颺憩东方白玉壶大泽未应
龙卧稳高岗宁许凤鸣孤蓬菜五色天光近屈指黄麻到画图

张大来过访适余至自新安大来以诗见贻赋答兼柬明府叶公

萧然行李发清笳握手江城思独遐一去白榆干象纬千秋玄草赠云霞津头乍合
司空剑海上仍飞博望槎满目河阳桃李色不堪离恨对瑶华

赠俞山人

杖屨千峰度夕岚青鞋踪迹遍江南风轮独悟恒沙劫水运重飞碣石谈望里牛眠
占自合封来马鬣气长含骑羊独有金华客不向公明问石函

题白云遐思卷

郁郁名山瑞气藏青囊闻说受曾杨三秋落日悬高陇一片飞云堕太行松柏望中
愁并远蓼莪吟处梦偏长终天我亦同遗恨飒沓寒风到北堂

再寄汪司马先生时司马避暑焦山未返

蒹葭晴望迥苍苍白露溥空尽作霜倦客已辞天北极佳人犹在水中央江霞万叠
晨殄丽海月千帆夜坐长咫尺羣真蓬岛近大将椽笔洒扶桑

赠武林章太学

百里钱塘路未分幽栖谁狎鹭鸥羣扶风豪士能题赋蜀郡王孙旧好文白苧飞觞
时堕月青萍悬榻夜生云凉秋莫负楼船约烂漫芙蓉越水濱

寄吴宪使先生

太微重照越江南何似薇花对夜谈雪色双龙频掩映风棱千骑并驂驄平湖西去
浮青黛大海东回望郁蓝十里芙蓉公事尽可辞椽笔寄云岚

闻汪伯玉至自京口暂寓武林僧舍走笔代柬并以奉期

钱塘此日停丝竿鐵瓮经秋卧锦袍虎豹有时惊仗钺鱼龙无处避挥毫湖头寺拥
三天竺海上楼观八月涛百里兰陵归路近西风那不醉葡萄

滕中丞行泛海上奉寄

秋色辕门照大旗
千山玄甲度熊罴
频年河内讴歌借
此日淮阴号令驰
大海潮生强弩合
平湖波簇画船移
何人为草征西檄
得似袁宏幕下时

黄公补过访话旧寄讯喻邦相胡孟弼

双树萧萧对不眠
狂歌痛饮竹林前
何来把臂蕪阳夕
宛似论心碣石年
北极寒星随舄履
西山踈雨待楼船
江州旧识如相问
寂寞扬亭抱太玄
(公补弟公绍时在南昌)

奉寄中丞滕师

倚天雄剑切云冠
山岳犹惊柱后弹
虎豹留都环仗钺
鲸鲵淮海避登坛
牙旗挂月千艘静
玉笛飞霜万燧寒
最是青油暮兴剧
不将藜杖到长干

题叶明府两台交獎卷

动地欢声彻紫宸
偏从盘错覩经纶
芝兰万室围仙吏
桃李千山照玉人
舄下青云鳧欲化
帘前白日雉偏驯
极知姓字悬当宁
百里那能借鳳麟

送大中丞吴公之洛中二首(吴公初擢南都)

雨花台畔乍停车
重覩青鸾下玉除
大府宾僚迎独坐
中原豪杰避前驱
云飞雒邑朝巡外
雪满梁园夜燕余
屈指内廷征异绩
门人谁荐治安书
(余吴公所举士也)

几年方岳借雄才
奕叶龙章汉殿来
帝宠骤移中执法
军容初建大行台
戈鋌掩映崧陵日
鼓吹喧传洛水雷
小队云中寻二室
何人词笔竞邹枚

送少宰赵公入都

五夜丹青出九重
千秋廊庙庆遭逢
儿童夙昔传司马
元老当今属卧龙
馆近弘文天咫尺
宫深平乐暮从容
三台望处偏清切
不尽东南瑞气浓

喻封翁八旬寄贺

八公曾否下淮阳
五老真看出豫章
梦逐非熊游绛阙
身将雏鳳住黄堂
冰桃坐上初留核
玉树庭中俨作行
翹首仙都云气合
夜来笙鹤正徜徉

中丞滕公移镇越中寄讯

鐵骑牙旌控上游
飞书驰檄羨风流
谁言夹谷偏文事
共识南阳借武侯
大吏百城环绣斧
材官十郡扈清油
千山月色胡床夜
独奏梅花坐海楼

苏观察君禹校士吴兴回省余入访留饮署中作

一榻萧萧万籟澄
阑干十二暮同凭
当时虎观谁先达
此日龙门谔独登
着就新书逾越絕
携来名酒自吴兴
极知顾盼王阳在
不羨轻肥遍五陵

张孝廉大来以诗翰从叶明府见贻赋荅

稷下论心兴未遐
风尘回首隔天涯
迷花有客栖三洞
采药何人卧九華
篋秘龙韬光射斗
书传舄气凌霞同
声咫尺仙郎在一
棹能无向若耶

允达卧病山中寓书拉余过访先此寄荅并促拏舟

榻上寒山拥夕阳西风憔悴芰荷裳丰城自昔多龙气邺下矜今少雁行
渴露相如情独苦观涛枚叔兴偏长何肯定作东篱客白酒黄花尽意尝

易使君还三衢寄讯

黄金辉赫下龙楼竹马争迎郭细侯渤海盛传新政绩河阳犹诧昔风流
山中白石经时卧洞里青霞隔岁游莫恋桃花樵斧畔含香仍见入螭头

送郭观察之秦中

大旆晨飞下越台咸阳宫阙正崔嵬三秦紫气悬书出二华青云作赋来
海畔棠阴犹蔽芾天边藜火独徘徊亦知太史留遗宅重向龙门辟草莱

送区太史使江藩便道还南海寄讯程孔信山人

玉册摇光下帝畿春明霞色上朱衣不妨闭阁停玄草犹记听钟直紫薇
海月夜迎仙盖满江云晨逐使槎飞丹梯万丈罗浮顶几折梅花问少微

送熊茂初之闽中

才子成都第一流含香遥下凤凰楼词场蚤压三千客酒户偏宜十万侯
金钥夜悬青琐梦玉箫晴引赤城游新诗九曲留题徧莫忘飞鸿激水头
(茂初订余为赤城之游)

赠冯观察二首

识面冯君最少年何来双鬣并苍然黔阳万壑寨帷后潞水千家击筑前
大雪当杯驻马首清水盈匣赠龙泉殷懃遍踏吴山色肯许文园卒岁眠

把袂秋风白苧凉垆头犹记旧清扬谈兵武略雄三署校士文名擅八荒
得句乍逢天姥客飞书曾偈夜郎王那堪后夜河桥别落月啼乌上客航

寿方翁为门士祝华父作

拂座桃花映寿觞清歌一曲和霓裳真人忽驻青牛驾处士新开白鹤庄
酒送芳筵林月满筹增华屋海天长经年彩笔玄亭闭一为侯芭荐颂章

寿何宗伯启图六秩宗伯(为仲默先生冢孙时尊人亦以是年八秩)

紫气东溟日夜悬安期飞舄画堂前图书再覩生申地甲子初回降岳年
虎观千秋藜作杖龙门三世笔如椽灵椿更入飞熊梦尽压人间玳瑁筵

送丁文统少府之龙溪

百里浮沈上驷才一官袍笏下蓬萊寧辞海畔哦松去摠为山中抱檄来
孤剑星辰延水跃尺书云雾幔亭裁熏风荔子衙斋熟好寄筠笼到越台

送范使君之寿州

骖驔五马尽骅骝灿烂双龙拂斗牛圜土西曹推执法专城南国借名流
徐方树色侵官道濠上花香扑郡楼为探霍林天远近秋风行拉巨卿游

寄题王明府湘山别墅

拙宦频年鬓色侵归来松菊渐成林河阳小试栽花技彭泽寧忘爱秫心
赐履尚方

曾易识挂冠神武定难寻名驹正接天闲步可恋湘山入处深

奉东师相赵公二首

北荡东征尽敌巢指挥廊庙失萧曹功高已见玄圭锡道大翻怜赤舄劳漫说南郊
饶薏苡终看西域醉蒲萄（时甫有事西方）他时四海平成后盛集词人赋彩毫

华夏安危属上臣折冲尊俎冠羣伦云霞梦屡飞黄阁天日忠偏系紫宸祇见龙裳
增黼黻寧容贝锦玷丝纶中宵试望长安气烂漫台垣扈北辰

送何仁仲之白下

又整行装向石头春云无赖紫骅骝千门树色开长乐双桨桃花过莫愁罢赋上林
吾偃蹇吟诗东阁汝风流深秋倦下金陵鷁为扫城南太白楼

贺陈玉叔六秩二首

百尺楼头卧正长东来紫气绕扶桑三湘雪色流花径五岳霞踪寄草堂经世文章
唐宿老登坛词赋鲁灵光无论伏枥雄心在奕叶天池鳳羽翔

廿载驰驱岳牧劳悬车踪迹且渔樵家传楚客青云旧洞讶秦人白日遥伯玉诗名
元四海孔璋文誉已三朝犹闻昨夜麻姑信书到浔阳正落潮（玉叔家近武陵）

寄张观察时驻节婺中以翰贶见讯

双虹何处伴吴钩按节遥当大海流染翰云霞千岭色褰帷城郭万家秋时同仲举
开陈榻日伴休文卧沈楼莫讶骆生频献赋州民谁不颂行驺

送苏叔大还岭南并游白下江都买妾

一枝南海见琅玕词赋翩翩刷羽翰彩笔半倾鸚鵡座青衣羣着鷁（义鸟）冠
言寻桃叶江都去不待梅花碣石残我亦南中行买宅春风藜杖到长干（苏生美风韵
多安陵之好故云）

题卢思美大雅堂

大厦新成燕雀留高轩长日坐夷犹图书四壁窥河汉枕簟双扉宿女牛尼父删垂
洙水畔杜陵题寄蜀江头他时八咏标名胜底事东阳说沈楼（黄鲁直题杜陵所居大
雅堂）

送张仲立之清源

花簇红亭帐解携敝袍犹恋故人绋双龙剑岂当年合驷马车仍旧日题彩笔雄风
横泰岱铜符名郡控青齐飞书蚤报循良绩旦夕黄金下紫泥

送叶起元入都

飞扬三策射蓬莱龙剑翩翩度越台蜀国盛传中散赋河汾谁似仲淹才旌旗太液
春风绕鼓吹平康夜月来到日彩毫干气象泥金先向洛阳裁

少室山房集卷五十三

●钦定四库全书

少室山房集卷五十四

（明）胡应麟 撰

○七言律诗八十六首

喻明府邦相新至邑适康山人裕卿自虔州还雁宕过访同集署中分韵得杯字
双鳧新自鳳城来正马言寻雁宕回万里风期仍下榻千秋词赋共衔杯云霞彷彿
飞燕社星斗依微堕越台试问移官湘水日曾将宾客并邹枚

冬夜喻水部康山人过集斋中

萍踪十载共相望邂逅重开竹下觞客子驱车还越峽词臣飞舄到河阳虹霓色动
高天外日月春生大海傍会见桃花连四境先携赋草过西堂

曹子念歲暮过访夜同集喻邦相署中分得云字

仙槎逼歲下江濱客馆张筵傍夜分西北万星悬对酒东南片月堕论文鸣琴是处
栖鸾翻岸幘谁能唤鹤羣不信茂陵愁绪减坐深庭叶渐纷纷

寒食喻明府以诗招集署中

折简应怜令节徂琴堂尊酒坐频呼青云渐许词人合白雪偏随傲吏孤海峽仙风
回玉舄江天明月堕冰壶河阳树树催春发一问安仁赋有无

题邦相容膝轩

一椽容膝构初成坐挾胡床碧藓平漫拟柴桑归日傲慙同梁父抱时情窓临南浦
千花入帘卷西山万树明自是太玄耽寂莫可容双屐问柴荆（陶审容膝之易安）

午日王次公过访小斋邀同邦相夜集二首

几年词赋忆登楼锦缆初停节使舟午日正逢花县赏（是日先集邦相署中）薰
风仍赴竹林游歌来大泽青天暮语入长安白雪愁漫道匡庐帆色好于今地主是南州

千骑辉煌出帝都一尊携手话长途桃花忽驻吴门鷁柳色重邀汉殿鳧坐里天回
卿月并亭前云拥客星孤无轻此夕平原醉容易人间觅酒徒

明晨邦相为具邀余同次公登兰阴山迨暮乃别

絕磴飞梁杖底回阑干遥望夕阳开天悬万壑低吴岫地拥双流抱越台赋就定应
雄屈贾游成端不负宗雷藜兰满目堪携兴一为千秋辟草莱

扞萝日暮到苍茫絕壁看天兴转狂三洞霞光迴蜡屐九峰云色堕胡床青精欲借
仙人箸白练偏题国士裳怅望十旬虚左意片帆箫鼓下浔阳（是日次公为明府及余
作大书至十余纸）

王长公两寄余书不值乍次公之江右始得之时公雅慕长生将以八月闭關与尘
世絕书来云云怅然奉寄二首

落落登坛意未降生花长梦笔如杠风霜骤喜来空谷云雾犹惊隔大江上界仙才
元第一中原词客定无双三山尚计当年约肯迟寒空白玉幢

郢曲徒劳望海天吴丝真愧玉堂传频年客夢青绫外一代神交白苧前大药蚤闻
飞姹女灵图曾否下真仙西行莫谓秋期近紫气關门日夜悬（时公以吴绫及诗扇见

贻)

寿邵使君八秩（司成许公命作邵为侍御君父）

海峤千花簇绮筵金章遥并绣裳悬趋庭正值乘骢候卧阁犹思下凤年天姥月明
飞梦过若耶云起探春还垂竿可道偏行乐咫尺蒲轮渭水前

寄杨计部

颺辞簪笔下蓬莱缥缈风烟越峤开放鹤夜眠高士墓呼猿晨谒梵王台平湖弦管
千家集大海帆樯十郡来早晚长杨思献赋岂应岩穴滞仙才（时杨寓钱塘放鹤亭呼
猿洞俱在湖上）

胡文父自燕中回同邦相夜过斋中小集

故人青眼话从容明府朱弦并过从此夕风烟回薜荔十年星斗散芙蓉神来未觉
匡庐远梦去先愁越峤重下榻南州今好在漫将离色赋飞龙

同胡文父集喻邦相署中

射策初从汉殿迴风流地主重徘徊三年共记看云别万里真成挂雪来摇落剑光
偏傍斗浮沉书札但含杯无夸席上荀陈聚紫气中宵遍越台

中秋日同邦相饯孟弢于兰阴山得诗四首

絶顶秋光面面回平分吴楚一登台尊前白日双龙下履底青天万象开握麈并高
词客兴含毫深忆大夫才（先是王次公过与邦相及余同登是日出观所留诗卷）银
蟾渐起东南色遮莫骊歌薄暮催

漫向名山赋别离芳尊纔愜故人期婵娟万里犹今夕兄弟中原自一时地拥兰皋
余气色天迴澱水尽涟漪使君大有襄阳兴醉舞何妨并接■〈𠂔离〉

彩笔曾将擅帝京何来愁病卧高城乾坤渐老文园客湖海犹深魏阙情一代应徐
非异域千秋潘陆是同盟相逢此夕虽云易忍挂青帆月下行

一时宾主并风流无柰离心傍客舟待月总携天柱兴观涛俄失广陵游凄清画角
同归暮缥缈寒砧独去愁咲杀平原期十日不禁卢女望刀头（孟弢以思家亟归故末
句嘲之）

大司空朱公招余过访余以病卧不获赴意甚感焉辄成小诗奉寄

领袖三朝岳降神乞归江畔有闲身云霄北望犹明主日月中原自老臣青玉乍携
扶肮脏玄圭载锡偃经纶极知一水堪移棹愁絶文园病肺人

王孙孔晷以乃翁自号竹隐因作亭曰依隐走册索余赋诗

淇水何年卜素封依然丈室寄遐踪高枝逼汉曾栖凤新箨连云更卧龙色照西山
青万叠影摇南浦绿千重清吟不讶王猷傲蓝輦何妨日过从

送广文闵先生之樵李二首（闵乌程人余尝及为诸生）

为羨除书下日边一官犹抱昔时毡菰芦旧业行偏近苜蓿新斋坐更偏绣服春回
茗水上青衿云拥澱门前莫夸竒字空千载蚤向扬亭授太玄

五载兰阴宦辙劳移官华发未萧骚衙斋地僻占龙气闾阖云深忆凤毛夹道吴民
夸绛帐分行越士泣青袍偏怜百里苕溪路竟日能传若下醪

寄答宗良王孙

渥洼何处问龙媒共识南州八斗才海峤未容双剑合江城俄报尺书来天回滕阁
霞生座地近梁园雪满台见说鸣銮多乐事一帆能许傍邹枚

寄答孔暘王孙

寒涛寂莫豫章舩翘首朱门客思悬片诺未交南斗下千行遥堕北风前亭依孺子
堪招隐阁近滕王借草玄咫尺龙沙春信到白梅青柳定谁传

邦相以新正趋府舟中望金华雪色见怀赋答

乍喜春风问鷓冠开緘白雪照林峦飞花迥落邹枚座丽藻先登屈宋坛江浦楼台
晴弄色海天城阙暮生寒瑶京咫尺三山在乘兴能过十二阑

人日邦相过访小斋留集至暮分得寻字并怀燕社曩岁之集

飘然双舄暮相寻佳节频过意自深扫径乍当梅柳下飞觴遥坐薜萝阴中天日月
燕台色万里江山越峤吟举目赐环应有诏大明宫阙翠华临（唐人有人日大明宫应
制诗）

奉贺观察吴公擢任大叅二首

除书五夜下青霄共识吴公治行超象纬坐看燕阙近云霞行忆雁山遥湖心锦缆
维春色城上金尊落暮潮倘许侯芭仍叩阁紫薇花下问琼瑶

牙旗又转越江西荏苒年光惜解携转粟慙劳萧相画看花犹记白公题云屯大陆
千仓满雪照长淮万舸齐回首石门歌啸地几从明月望丹梯（时吴公职督运）

寄怀方伯滕师二首（时方卜筑武夷）

万山何处粤王台半榻寒空寄草莱白社定偕高士卧青门聊学故侯开风尘西北
悬车净宇宙东南曳杖回愧杀草玄亭下客攀云无路到崔嵬

十载频含帝命驰挂冠偏称黑头时风云一代归文苑日月千秋弄武夷白傅诗情
囊草在谢公幽兴杖藜知扁舟九曲谁言远极目桃花徧路岐

送王次公观察视学關中六首

咫尺除书气象新渐看霄汉问词臣文章一代初推轂名姓三朝旧斲轮露冕星光
遥动邺褰帷雪色欲飞秦柏梁台殿抽毫处年少谁当属和人

牙旌初入豫章台绣钺俄看灞上开把袂云霞匡续去飞书河岳巨灵来公余雁塔
谁高倡客满龙门孰上才寂莫汉庭迁史宅遗踪一为问蒿莱

绛帐遥趋大国风悬腰双剑拂长虹旋收骏骨过秦市尽攀蛾眉入汉宫紫阁烟霞
晴望里黄河冰雪醉吟中惊看岳顶重题后万古金天色对雄

拂袖骊歌共黯然青山孤照越门筵蓝田画好推摩诘灞岸诗成忆仲宣朝日未央
千樹起暮鍾长乐万家悬何愁肺病当年事对倚金茎玉露前

鼓吹朝巡百二州五陵花色傍行驹山回菡萏终南出殿鎖芙蓉太液愁异日诸儒
传白虎（班氏通德论）早时多士识青牛葡萄细酌咸阳夜好是经过旧酒楼

西征车骑去翩翩夹道争迎使者贤执宪盛推何李后雕文重识汉秦先檐帷翠逼
长安柳杖屐青携太华莲莫以上林秋雁尽緘题凭寄白门船

秋日送僧游天竺遂之五台

寒风挂席下沧溟是处名山适性灵胜地蹙依三竺紫高天遥望五台青中林伏虎
云生座絕涧寻龙月满鉞若见文殊劳寄语法门何日拟谈经

吴文仲明府过访有赠并柬喻水部

词组青云照玉珂惊看结驷傍岩阿河南政绩吴公最邺下风流季重多岸帻晴光
三径满鸣琴秋色万峰过同声咫尺何郎在倘许频来醉薜萝

秋日邦相署中对菊作篇末兼期枉过

僊令裁花自国工幽香竞吐曲阑中瑶台骤立霜千朵玉砌浑敲露一丛摘处杜陵
堪歲晚餐来屈子未途穷白衣剩有江州酝莫遣东篱怅望同

邦相游烂柯山值雨不遂以长歌见示赋此奉嘲

曾闻樵者说丹丘流水桃花事事幽风雨忽摧飞鳥兴云霞如妬烂柯游千秋且向
尘中住十日谁能洞里留好趁峭帆安道宅青天豪饮灑江头

易惟效明府过访有赠

萧条一曲卧烟霞忽有轩车到狭斜天阙九重曾揽辔河阳百里蹙栽花寒星婺女
随春棹片石江郎对晚衙回首烂柯仙宅近几从飞鳥问丹砂

乡人有自吴中来者谈昙阳仙师坐化事奇甚信笔奉寄王长公元美

自是梯仙第一才岂无清梦到蓬莱书飞南岳夫人下燕罢西池阿母回高浪驾天
悬玉阙絳霞扶日近瑶台三山金记应相授曳杖行看出九垓

哭穉修博士

斗色俄看散楚墟青袍犹忆上公交车十年风雪淹行卷万死乾坤逐谤书冠挂尚
留神武恨壁空谁问茂陵居相思忍诵招魂曲满目陈编涕泪余

贞吉以秦镜并短歌见贻赋此奉答

谁讶轩辕旧物留美人持赠自南州传看玉质千秋上不愧冰心万里投勲业杜陵
堪徙倚云山王绩任遨游莫夸照胆秦宫事一对蛾眉客自愁

送易使君之延平

骊歌催发向华筵千骑延津去黯然偃蹇金鱼辞上国辉煌铜虎出高天三山叠翠
流公署九曲分青照画船何限武夷云际色时从絕顶候飞仙

闻杨懋功辟园城中有寄

拂袖匡庐兴自浓开成池沼半芙蓉青山九叠窥玄阁綠水千家抱素封燕社琴尊
时寂莫龙沙冠蓋日从容伤心直北谈天处坐尽双林雪夜钟

东陂菡萏盛开即事

紫骝何处系垂杨菡萏初分太液长
十万红妆齐銜色三千彩袖各飞香
游童戴叶翻歌扇稚女穿花出画航
最是夜来添怅绝湖南一路下新霜

题吴文仲万绿轩

万绿沉沉一径开幽轩十尺净无苔
帘垂吏向花间出印锁人从竹下来
晚色挂云流渭浦秋阴笼月住
湘台含杯倘借清谈客日把琅玕醉不回

同邦相携酒兰阴送曹子念入闽作

平原此日又离筵夹坐青山对惘然
丹荔欲餐闽海上紫兰重撷越溪前
船过杨仆行师地剑访雷生作客年为向
武夷看谪籍东归同赴大罗缘

再送子念一首

长啸东游罢请纓闽天何处一帆征
黄须自识英雄后白眼谁猜肮脏名
(杜赠曹将军途穷反遭俗眼白子念方以贫故客闽故用为戏)
蕉叶覆溪猿狄下桐花夹路鷓鴣鸣
芒鞋试踏三山徧酹酒无诸旧筑城

奉题昆山草堂二首为中丞潘公读书处

万卷缣緌百尺台白苹风起对衔杯
窗中日抱吴山下座里天浮震泽来
秋兴赋成聊偃仰河渠书就一徘徊
无夸太乙当年事已见寒光属上台

曲榭雕楹雪水傍琅函插架照沧浪
丹青正锡尚书履绿野先题相国堂
句就松风闲鹤浦梦回萝月上鹄行
凭谁寄问花溪叟稷契何由近庙廊

夏夜座主观察吴公招集行馆赋谢

画戟初残晏寝香遥从阁夜问飞觞
登龙旧忝诸生列倚马新叅上客行
拥架图书回秀色当筵丝竹动清商
莫将异数夸羣弟谁似彭宣到后堂

秋日同邦相明府敬承太史集郑氏园亭薄暮携酒登大云山二首

浊酒虚亭共解颜歳星双伴客星闲
云藏翠竹迷深径日落丹枫照暮山
赐履渐回金阙梦鸣珂初散玉堂班
由来一壑高人事纵许羣公只蹙攀

其二(时方仲秋)

石磴千盘上翠岑回看秋色半兰阴
携琴共识仙郎过曳杖重占太乙临
病里河山双极目狂来天地一论心
莫将峴首夸遗迹屈指残碑异代寻

送颺上人游临安

一肩瓢笠自飘然遥向西湖觅梵天
坛上万僧昭庆刹寺中千佛净慈筵
传灯共挟西来侣绽衲重寻北去縁
便欲辞家同出世祇今摩诘病沉绵
(昭庆戒坛净慈罗汉五百俱在西湖上)

闻王次公自關中回寄

關外千言定有无重看紫气照三吴
青牛独夜驱函谷赤鲤经时太湖宫
柳折余闲薜荔岳莲携得傍菰芦
秋来倘忆乘槎客坐扣双仙白玉壶

金伯韶以春怀小草见诒讶其结交甚盛戏为赋此（伯韶与余同举于乡时年甚少）

看花曾共忆明光携手声名动洛阳
献赋竞夸童子日封书犹记丈人行
交论一代饶知己语到千秋孰擅场
若问景纯双彩笔好飞魂梦过钱塘

丁节推以滕公书过访夜遂梦游武夷

洞底遥探十六天苍茫龙蹻踏寒烟
瑶台雾里三山出金阙云中万界悬
絶顶笙箫闻上帝隔林机杼见羣仙
桃花肯着秦人住长侍丹经碧落前

九日丁喻二丈约访太史赵公山庄值雨不遂夜遂同集署中对菊

萧萧风雨暗林塘难醉龙山落帽觞
白苧怀人当五夜黄花留客过重阳
金门恍惚看鹓序玉署参差过雁行
满坐青云名胜在雄谈谁柰孟嘉狂

送丁右武入都

摇落西风大海涯美人愁色共蒹葭
冰壶夜照闽天月玉佩晴飞碣石霞
驷马于公新上计双龙雷焕旧名家
他时鹵簿江州驻倘记柴桑问菊花

奉寄中丞萧公

宪节新持下玉宸函關西去息征尘
輶轩尽压三秦吏斧钺先驱二华神
紫塞风云回夕望黄河雨雪避朝巡
青油幕静含杯处能忆天南授简人

奉寄左司马汪公四首（有序）

不佞倾慕左司马汪公久矣向以卧病不获通姓名左右乍忽致书邦相明府首辱垂询且勉之出赴公交车意蒸蒸溢楮墨焉感知酬德辄赋四章并以代贄

功成一疏下蓬莱寂寂平津昼未开
九伐尚传司马法千秋重覩卧龙才
天悬白岳云霞驻地拥黄山日月回
闻道藏书岩穴遍好飞椽笔到兰台

垂旒朝日侍明光开府频年控粤裳
幕下诗名收李杜朝端文誉重班扬
行藏未许亲鱼鸟栖处还应是凤凰
最是怜才心更切逺题书札问陵阳

紫阁归来鬓尚玄朱轩遥忆宦游年
毫飞雪色三湘外剑吐霜华百粤前
尺地东陵聊寄迹扁舟西子蹇随缘
漫从九折夸回驭屈指蒲轮日下传

乾坤何处独支頤咫尺龙门驾尚迟
七步已非年少日四愁偏向倦游时
书传一雁堪飞动匣隐双虹渐陆离
纵是焦桐惭拂拭会将流水傍鍾期

大司寇豫章李公以手书见贻赋谢二首

八座归来鬓未斑三朝旧德迥难攀
云霓尚切中华望宇宙偏容大老闲
赋罢滕王无彩笔书成匡俗有名山
独余吐握当年思尺素蓬蒿问闭關

斧钺频年寄折冲乞身茅屋傍萧峰
霜威大漠犹方虎斗色孤城自卧龙
匣底剑花收菡萏囊中诗草泣芙蓉
莫夸骤贵东京纸屈指三都未易逢

太史赵公于山莊后开二洞并前为六命堂曰六虚斋曰三山同邦相赋二首

卜居太史乍江潭携酒仙郎更夕嵐
户列三峰天上下堂开六洞地东南
侵阶瀑色

悬空翠八座云光散鬱蓝十里衙斋山路近尽教明月候归驂

鬢解朝绅卧越台重飞仙舄傍崔嵬寒岩雪喷双龙下叠岭云驱万鹭回花木平泉
春缥缈藤萝谷口暮徘徊临池莫诧山阴兴今日登高尽赋才

曹子念东归同邦相携酒兰阴作

纷纷白眼又吾曹睥睨山堂对浊醪白昼星辰羣下榻青天云雾一挥毫归途渐喜
还江县起色重因望海涛十日平原堪此地千峰寒月坐来高

王长公闭关修玄谢絶一切独期余过访禅堂余以母病迄今未赴春日索居读公
所致诸札掩袂太息怀不能已积成七言律八章用摭鄙臆词之荒陋不暇计也

屈指玄關大药成仙台咫尺见蓬瀛河山渐隔青霞色宇宙空悬白雪盟避客草深
句践里怀人花满闾闾城芒鞋尽识皋桥路踟躕遥天去雁鸣

梦寐龙门曳客裾浮云东望独踌躇乾坤片刺华阳后海峽孤吟越絶余千里壮怀
悬谢屐百年游兴属潘輿何如卖药吴闾外七十云峰恣所如

寂莫千秋大将坛谁标砥柱立狂澜三坟读尽神偏王四部成来鬢未残大泽风云
回雁杳中原日月卧龙寒代兴总愧当年约极目遥空十二阑

拂袖吟行大海傍闕门紫气正彷徨心悬寸草时千折泪洒孤桐日万行下榻尘埃
慚仲举驱车岐路畏王阳亦知把臂濠梁近愁絶兼葭尚一方

题诗遥向大罗天负笈曾期问草玄信宿未酬中散驾经春长系孝廉舩形骸病后
销孤枕意气狂来付絶弦弹指歳年三十过几时林屋剩周旋

弹铗频年赋远游独将离恨对沧洲魂飞桂树千山色目断桃花一水流海内何人
偏御李尘中有客尚依刘（李令伯祖母刘）高秋倘借南溟翼万里抟风到玉楼

病余天地骨全销荏苒行藏付寂寥终古神交玄度在异时昏嫁尚平遥红颜转自
宜丘壑白眼那能对市朝愧杀美人千里顾可从青雀问琼瑶

十载风尘国士知论心深负白云期迟回五岳天难问落魄三都世尚疑敢向周王
夸骏足聊从越女鬪蛾眉高山久絶人间调试拂水弦问子期

游仙诗六首再寄王长公

弱冠登楼汉大夫中年舍宅傍浮屠青霄忽下缙山鹤白昼频飞叶县舄仙篆可携
中散读神鞭欲赠蔡经无由来一局千秋易遮莫狂歌醉玉壶（偶忆王家故事遂至八
句各用漫存以发作者一咲王子乔乃太子晋周汉异时非必叶县王乔也）

采药何时下帝闕看花聊复住人寰昆仑日月悬高卧勾曲云霞照大还絳节逍遥
鸾馭迥丹■〈施，童代也〉缥缈鳳楼闲骑羊漫有初平骨未乞灵砂护壮颜

曾携玉杖侍东华一谪频年卧海涯万顷太湖堪洗药千层弱水待浮槎吟窥弄玉
台边月醉蹶飞琼座里霞何事当时勾漏客远从荒徼问丹砂

矫首扶桑帝阙开人间真覩谪仙才青牛未向函闕去白马先从汉殿来下界悬壶
聊戏剧中天乘蹻独徘徊灵图阿母如亲授乞取蟠桃下绛台

五夜玄扉闭薜萝坐闻仙乐度岩阿云中剑掷苍龙起海上车乘白鹿过金阙九重
瞻泰岱玉楼千里问岷峨遮须却笑陈思国八斗何缘到大罗

咫尺瑶坛上界分自携真诀傍氤氲龙蛇大陆飞丹灶鸡犬全家住白云种得神芝
遗桂父携将灵药寄茅君华阳瞬息乘风到一鹤能无洞口闻

少室山房集卷五十四

●钦定四库全书

少室山房集卷五十五

（明）胡应麟 撰

○七言律诗八十二首

冬日同喻水部赵观察赵徐章叶郭郑六孝廉赵唐童范四文学游灵洞山房十首
初抵碧霞宫集赵明府汝申别墅 宫汝申新创祀碧霞元君有升仙岩礼斗台诸
迹

出郭青鞋不惮劳草堂新筑万峰高天容二子探竒入地引羣公发兴豪蓬岛秋声
犹鹤驭武陵春色渐渔舫（天气燠甚桃杏已有开者）东方自识前身是少别元君又
碧桃

午过青芝馆小憩 汝申丈墅中炼药之所

归来散发卧青山丈室峰头自闭關大药欲成丹灶底灵芽先涌白云间餐来四皓
鸿堪住采罢三茅鹤并闲一笑风尘吾渐老会寻瑶草上仙班

薄暮游涌雪洞洞 山之麓乳泉流漫蜿蜒如雪中甚竒邃炬尽辄返未有穷其穴
者

石窦中开雪乳悬迎人百折自蜿蜒瑶池忽覩三山下玉井平分二华前素练生风
摇大壑白波吹雨涨平川由来郢客才堪并一借阳春洞口传（邦相先有日对寒泉自
咏诗之句）

夜投紫霞洞童范二文学携具小酌 洞突出山腰高明宏敞羽流宅焉宋隐士于
介翁以古诗有轻举乘紫霞之句故名即其诗所云洞门相对是吾家者也

扞萝昏黑度崔嵬万炬山腰石扇开巨壑迥排丹峤出飞桥横跨赤城来桃舒锦障
猿初下草长金光鹿未回莫鬪谢家成绮句朝携五色上蓬莱

同邦相集赵太史山莊作 地故白云寺址四山围合中忽平敞清泉竒石为一方
最太史公选胜得焉

回合千峰望未真平开十畝坐嶙峋双鳧忽驻神明宰一鹤曾闲侍从臣（清献事
）阮籍啸歌聊玩世尚平婚嫁故留人山灵咫尺堪携手白石长松对结邻

山行观飞来石 山堂之后巨石千尺峭立平地峰峦秀出势欲飞动灵隐之具体
而微者

午夜松风袭锦袍起看孤屿矗林皋初疑片石飞灵鹫忽似三峰驾巨鳌仙掌扞时

应拆汉神鞭驱处欲惊涛何当一棹西湖上卧对寒云万尺高

登洞山絶顶至白云洞 邑东南最高处云气出入其中岩壑宏朗径路窈窕游人至者徃徃忘返

踏尽青山兴未还帝乡仍到白云间琼楼特起三千界絳阙遥封百二關自拟探游穷地脉谁论呼吸近天颜亦知怡悦幽人事持贈聊当茂宰闲

自白云返由故道抵新洞 久蔽榛莽近樵妇堕其中居氓踵入得之洞类白云而深窅峻絶游人鱼贯累累而下秉炬千盘始抵石室路中复断用梯乃得达平敞处

蹶屩褰裳列炬从投身捷下最高峰壶中地欲穷千尺杖底天犹隔九重跂足青泥扞虎兕荡胸苍乳攫虬龙梯仙是处吾家在莫遣流泉世上逢

新洞或以飞龙名之余谓弗善与邦相谋更他名洞中最胜者苍壁陡立飞泉数十道回旋直下邦相击节目余曰水帘哉余因为更赋二首洞虽晚出故不谓不遇也

絶磴千盘下翠微遥惊瀑色挂丹扉淋漓恍堕蛟人窟灿烂全窥织女机天遠玉绳浮帝座地寒珠箔护仙衣庐山谷畔寻常见得似灵源洞底飞（庐山康王谷有水帘洞）

其二（洞中先有避秦来此处何必问桃源之句）

雪浪盘空望渐低清湘一幅似堪携灏纹细绉千丝润练色平铺万杼齐丹阙夜悬银是檻絳宫晴卷玉为梯重来莫障刘郎步咫尺桃源记旧题

暮春游白岳十二首

同游者谢少廉汪士能吴肇成方羽仲余有题花草中

齐云岩

中天城阙吐蓬莱万仞芙蓉压翠苔紫雾昼连三竺起青霞晨傍九华来龟蛇隐见灵仙窟龙象蹇腾上帝台竒絶东南谁并此祇应人世有雄才

小天门

重叠崖峦护翠屏何人持斧凿青冥千寻峭壁移夸父一线寒空透巨灵鍊石谁当搯玉灶丸泥吾欲闭金庭不縁混沌频年斲千岫桃花隔钓舡

太素宫

絳节宸居北斗悬金银台观屹相连朱甍宿雾千峰外碧瓦笼云万岫前粲烂灵旗朝帝日飞扬神劔伏魔年何因屣蹶罡风去一叩玄關意惘然

香炉峰

斗絶穹窿四望竒削成员峤置坤维孤峰宛自庐山得一柱真从太乙移青燎夜升云黯淡紫烟晨合雾淋漓漫思香案曾叨秩少住尘寰八百期

紫霄岩

万峰晴色暮登临望入山腰翠欲沉雾拥楼台横碧落云拖■（施，童代也）盖出青岑雄文勒岱知司马秀句题匡忆翰林三絶祇应留异代莲花千丈扑狂吟（汪司

马李太史各有诗)

紫玉屏

峥嵘香案帝庭留万仞高悬翠欲流九叠似张庐岳顶三峰如削华山头长舒雾色
黄金界半掩霞光白玉楼椽笔大挥飞瀑底凌云何似仲将愁

司马碑

十丈穹窿峙翠屏如椽真慰北山灵虫书半蚀先秦字龙画傍分大夏铭虚拟相如
论泰岱漫劳太史序云亭何人解摸邯鄲碣祇是中郎读未停

飞雨楼

悬泉百尺乱侵衣珠箔银屏护翠微雾裊重嵯浑欲堕风迴羣岫尽如飞山楼夜榻
眠苍藓石室春盘饌紫薇一宿已知尘累断竹西犹梦旧渔矶

无量阁

荧皇金碧挂檐楹兰若翛然出化城十里乱云双屐到万山斜照一钟鸣岐崖北绕
飞梁现黟水南拖匹练明自是圭峰飞锡地何须尘外问蓬瀛

榭梅庵

移根何代植崔嵬结构名犹借榭梅千里漫劳孤驿寄一株元自太和来花翹鹤膝
时沾雾干坼龙鳞乍起雷嫩蕊疎枝浑欲折凌风无处问瑶台（今梅毁于火）

五老峰

苍然离立尽彭聃底事乘风下鬱蓝四皓衣冠犹减一八公环佩仅余三移来不借
匡庐顶飞去重寻雁宕南潦倒青莲头渐白乍因奇絕驻征骖（雁宕南山亦有五老峰
见志）

三娥石

参差霞佩出蓬莱次第云鬟立翠苔石上同心朝帝罢山头聯臂望夫来从游宛入
黄陵庙（舜有三妃见大戴礼）争艷如登白玉台（古乐府题有三妇艷诗见玉台集
六朝多为之）漫说桃源双占尽尚留倾国候仙才（是游也伯玉司马有送余东还记
叙诸厯览甚详）

西湖十咏（有序）

余自九龄从家大人客武林迄今三十余载湖山面目狎习久矣乃篇咏未尝数数
也今秋再过社中诸同志固以为请酒酣援笔得七言律十章王司寇元美尝谓钱塘越
佳丽地不应例以關洛之调写之兹作数篇颇窃其意第老翁涂抹作态儿子终于本色
不伦以供来者之捧腹庶几云尔

雪消尘净见层空山色湖光面面同巘嶿遍围云母障波涛长浸水晶宫青天游蓋
飘香雾白昼飞梁堕彩虹隔岸近移苏小宅画舫齐泊藕花东

一鉴空明暮靄收短箫长笛乱云流天浮殿阁连三岛风引帆檣到十洲峰际欲呼
巫女下波心如抱洛神游翩翩苏白留题满得似才情灑水头

缤纷桃李尽成蹊夹岸晴沙送马蹄
遠水落霞萧寺外孤峰残雪断桥西
阑干半倚青林出睥睨遥看碧树齐
小扇轻罗歌未阕楼船已到百花堤
（元人西湖乐府有小扇轻罗曲今尚传）

徙倚危阑醉目醒淡妆浓抹望难停
波摇西子眷端绿山叠文君髻上青
杨柳千丝围别墅芙蓉万朵簇南屏
回桡欲到钱塘岸一派弦歌月下听

锦缆牙旗夹画桡双高晴色望岩龔
诸天龙象围三竺大地鼇鼉架六桥
丹壁旛■〈施，童代也〉时隐见白云饶
吹互飘摇斜阳一抹人归处多少红
妆落翠翘油壁香车夹路驰目成何
处两蛾眷荷风锦席参禅夜梅雨纱
窓入梦时湘浦佩环无别恨曲江亭
院有佳期菱歌唱彻黄昏后对对文
鸳浴水湄

千山台殿列金银草色湖头绿渐匀
白傅堤前题柳客陆侯祠畔卖花人
连峰黛簇婣娟髻满路香飞叱拨尘
四百旗亭游未半遥看斜日堕红轮

一望平湖翠幙悬湖心亭上剧堪怜
凌波舴艋双双度掠水鸳鸯队队眠
灵隐僧归云色里净慈人醉月明前
吴姬十六俱年少竞结同心玳瑁筵

碧空如水净无氛雁子鳧雏荡潏纹
系缆半依秦帝石携尊齐酌岳王坟
荷花色照千门月桂子香飘万壑云
向暮西冷风转急淥波横濺石榴裙

玉勒金鞍照绮罗游人成队出清波
（门名）丹青屏障穿萝竹紫翠楼台
夹芰荷丝箏似携卢女到画桥曾约
泰娘过千篇未少风云气柰此湖山
媚客何

后西湖十咏（有序）

十咏成湖中景物大都具矣自余峰峦
台榭诸名胜未尽穷也座中诸子更有
乞余分赋者漫尔占缀数亦如之为西
湖后十咏焉

湖心亭

万顷寒波荡潏纹朱帘十二挂綳緼
阑干尽压鱼龙窟箫鼓长惊鴈鹭羣
山色四围晴拥雾湖光八面夜飞云
中流好是西施宅早晚鸱夷挈画裙

灵隐寺

画棋雕甍势欲翔居然台殿到清凉
三天竺色全窺户九里松阴半入廊
絶顶竿■〈施，童代也〉红日近中峰
饶磬白云长异时禅榻惊人后彩笔
犹传婺女傍（用骆氏事骆婺人）

飞来峰

突兀空明架紫苔纷然龙象凿瑶台
昆仑一柱从天下灑灑孤根拔地来
飞到岂縁夸氏力（夸娥移山事见列子）
削成庸假巨灵材他年挟汝乘风去
不羨如拳寄草莱武穆祠

十尺崑崙岳降神当年横槊狗边尘
中原万姓遮留日絶徼全师恸哭晨
阴雨旌旗朝上帝春风笳鼓酹游人
凄凉大树英灵在尽拱南枝向北辰

三天竺

百尺金身峭壁前三峰云气屹相连浑疑竺国诸天坠絶胜秦城太华悬（以三峰言）随处法身分翠竹（禅家有青翠竹尽是法身之语）无穷妙相示青莲瑶駟咫尺西方在一叩如来结梵縁（观世音为功德山王如来）

九里松

鹫岭西来梵刹重长松落落倚芙蓉千林夜涌涛声出九陌晴飞露气浓翠盖中天巢鸛鹤苍髯匝地舞虬龙餐霞亦是华阳客遮莫秦娥树底逢

孤山宅

兀立中流四望竒谁开丈室枕涟漪云埋洞口呼猿日雪拥湖头放鹤时藁桂作花犹满砌疎梅横萼迥当篱凌风却月憑谁和一树寒香入梦迟

寶所塔

絶顶浮图出化城扞萝如蹶太空行孤标突兀神光现七级玲珑妙相呈大海云霞频幻色平湖日月通生明亦知多寶元无相何暇当年阿育成

六桥堤

千尺晴虹架彩旂阑干三百大堤头缤纷冶女迷花到杂沓王孙戏草留玉管竞催明月上金丸时遂暮云流春风一路堪图画万树桃花簇紫骝

涌金门

鼓吹喧闐一望遐湖头云日乱蒹葭三千舫舫家家月四百楼台寺寺霞桂影荷香迷越客竹枝桃咏醉吴娃天容乞与西泠地独拥寒涛卧钓槎

武林徐明府招集西园时风雨骤至剪烛剧谈几达曙矣赋谢二章并以为别时明府将入覲余往吴中

握手新知兴欲狂荧煌灯火夹华堂荆州意气归元直（明府楚人）邳郡声名擅伟长白苧生风摇彩袖青萍飞雨落胡床为知政绩书前殿不遣双鳧出上阳

痛饮狂歌意未平坐听寒漏滴高城装因北海经旬滞烛向西堂尽夜明是处湖山重借色他时风雨各關情含毫漫詫双龙合拂曙河桥问去程

少岷山房为曾大叅题（有序）

少岷山在蜀之合江郑继之杨用修各为曾计部作歌大叅曾公以世泽索题诸末简

积翠遥天挂玉台少岷山色峙崔嵬双溪云雾尊前合六洞烟岚杖底回阁上玄经中散卧堂中诗句拾遗裁从知胜槩堪游目蹶屨何时万里来

汪茂才献于以先隐君像千里函致乞诗

大隐风流世未孤少微星色卧江湖园荒汉上甘携瓮室僦于陵但辟纁甘载避人呼漫叟一书遗子号潜夫天池鳳羽行看近日听鸾章下帝都

游烂柯山题青霞洞天石室中

布袜芒鞋兴未阑天风吹客上层峦仙山七日柯初朽人世千秋局未残塔影半摇

苍霭暮钟声微度白云寒龙肝食罢知难老咲揖羣真跨紫鸾

过嘉定集张伯隅阁上同房仲孺谷诸君

绿埜堂开碧水头平原河朔让风流雕阑百折扣霄汉画栋双飞挟斗牛丽赋总输鸚鵡捷清歌如跨鳳皇游莫将十日淹行旆极目华阳待紫骝（时伯隅先得隼将上春官）

即席再赋得台字

百转长廊入翠台不知身世近蓬萊当门渌水流金谷绕座青山挂玉台旧主人非吴下客新郎君是洛阳才（戏用张解元事）琼筵咫尺春光到深夜狂歌落早梅

别赵张两生还越张以气侠闻青楼赵雅歌吴闾称最浹日同饮舟中甚乐也

白舫青莲任意游好天良月大堤头金衣骤掷张公子玉笛频吹赵倚楼奏罢阳春无和客酣来河朔尽名流那堪后夜骊驹起千叶吴闾竞送愁

别房仲泊罔伯逸季

尊酒淋漓醉复歌紫箫红烛夜如何犹嫌十日平原少未信千秋碣石多狼藉杯盘沾重露纵横舟楫漾明河惟应伯季吴闾远怅絕河桥一旆过

再为房仲赠侍姬（时独居一室以禅悦为事）

禅闕趺坐寂无尘水月长余自在身行雨尽忘三峡事餐霞时伴四天人天桃媚柳寧同色忍草灵花别占春莫向维摩论侍疾由来舍宅是王珣

幼于留寓曲水园张九卿周懋修钱功父黄仲华赵凡夫吾君先后过访赋赠此章屐齿纷纷破绿苔争携流水入平台清风骤拥三高至明月仍将二妙来西第琴书慚浪客南皮觞咏尽词才春晴定卜沧浪墅不厌相过暮百回

陈长洲杨吴县访曲水园幼于携尊夜集以河阳花作县秋浦玉为人拈韵余得花字时二明府皆将入覲并以赠行

茆堂烧烛散林鸦车骑聯翩夕放衙越峽移来闽海荔吴天裁遍蜀城花朱弦和处双凌雪玉舄翔时并带霞翹首黄金天阙近尽将离思入蒹葭（陈君闽人新自永嘉移任杨君蜀人）

过晋陵访安茂卿泊乃兄绪卿光祿时长至前一日也

握手浑疑梦寐余故人杯酒蹙踌躇尊前重碧香仍艷席上轻红态未除菜甲初传春早信桃花不锁夜来渔西陵咫尺元方在片石何妨共结庐（轻红茂卿童子尝入余诗）

寄朱在明

五载幽怀尺素传北风犹滞木兰船横江欲度偏愁浪下泽堪居未买田桂树飞扬招楚日桃花零落避秦年沙头定舣春来楫共结扬亭话太玄

夜同徐茂吴宋化卿集许才父听歌作

把袂重过白板扉一尊岚霭坐霏霏云因洛水先春现雨为阳台彻夜飞（时大雨

连日夕) 烂漫歌喉萦锦瑟轻盈舞态拂罗衣当筵授简俱词客唱彻梁州露未晞

中丞滕师入越赋贺

十万貔貅候羽旗登坛横槊赋成时频年汉阙丝纶下此日辕门号令驰大海潮生
强弩合平湖波暖画船移丹青第一麒麟上肯数班侯骨相奇

送迁客之岭南

离心何处一登楼折槛嶙峋汉阙留晓雾乍将龙豹卧朝阳行覩凤凰游梅花醉折
罗浮顶桂树闲吟庾岭头为问蓬莱朝上帝如何砥柱在中流

千秋阁四首为司马汪公赋阁在千秋里中

伟阁嵯峨北斗前千秋谁擅笔如椽窗中玄草云霞入座上青藜日月悬中令才华
惭绿埜右丞名理让蓝田惟应太史书成日突兀龙门四海传

缥缈飞楼大谷傍雕题遥接海云长中原雪色高黄阜太乙星精下紫阳五柳莊前
蓬作户百花潭上草为堂却思香案紬书日十二楼头侍玉皇

紫气青都属望来荧皇飞构入崔嵬玄龟左右图书出翠鹫东西法象回草就滕王
千客避藜然天禄万灵陪莫夸名姓麒麟上别擅乾坤在草莱(公所居太函二峰环抱
昂首相向宛类龟形)

湖海飘然一敝裘纵横豪气未全酬闲凭司马千秋阁絶胜元龙百尺楼座里风云
迴客傲壶中天地纵神游寧知文举双眸白大有忘年在黑头

夏日三衢水亭作(有序)

易使君李司理招同屠仪部夜集城南水亭使君新创屹立水心四面环菡萏数百
夹堤散植桃柳芙蓉青油画舫一系亭下容十人尊壘箫管错列其中每公暇燕集临亭
放舟微风自来平波如掌银鳞鲜鲫近人可数杂花芳树应接不遑真姑篾一胜境也先
是衢苦无游观处自使君实始营此而司理佐之人以方苏白两公云

促席张灯唤巨罗习池心赏未蹉跎半依城郭栽桃柳小着亭台伴芰荷露洗长空
沉皓魄风摇残夜落明河相逢倏尽东南美不饮其如浩兴何

徐明府仁卿招集墅中(有序)

时孙生国梁金生石声在坐酒酣命小奚歌红线侑卮入夜别明府过刘总戎两生
拂衣从余潦倒几申旦复发兴携两生入徐纳言宅观梨园适演杂剧黄四娘乞人有借
名杜拾遗者傍观争目两生余为抚掌一大噱而出

面面朱帘霁色流主人携榻自南州三年颍水传新绩一夕临安话旧游舞罢青萍
霜照匣歌回红线月如钩衔杯未剧高阳兴笑杀君卿事五侯

徐纳言汝材过访邀集赋谢并东其诸郎君时二尊人皆耆寿无恙

舞罢斑衣玳瑁筵琼林玉树半阶前纵横冀北三千队聚散兰阴二十年亭倚惠风
临曲水径穿奇石到平泉莫将贝锦紆行乐宣室行看太傅旋

李司理招集署中

玉署烧灯共岁残胡床携手不知寒微言总为千秋合纵饮何妨乙夜阑竹送清霜
流藻井梅飞残月下雕阑传家剩有河梁句莫诧双龙唱和难

送刘傒如吏部入都

早擅昆丘片玉场仙曹司法蹇徜徉深宵藜火悬书阁白日蒲鞭卧讼堂去曳朱衣
朝汉帝归携彩笔赋滕王雄飞不独铨衡借八翼天门次第翔

雨中董使君招同汪司马集诸天阁

树树桃花点绿苔万山金碧挂崔嵬筵开五马春风驻座合双龙暮雨来汉殿才名
饶董梁园词笔愧邹枚无论借寇当年事突兀黄金拥蓟台

夜过汪士能家看灯同肇元太学奕戏赠并呈司马公

万炬烟销夜色潜一尊明月吐朱檐游同太傅偏能奕貌学参军未有髯画阁盛开
云母帐瑠盘时荐水晶盐扬州肯挟刘晨去十万红妆尽卷帘（参军肇元父也王长公
尝赠以闻道参军颇有髯之句）

憇啸园有感（时汪公在小普陀）

油壁香车在处逢鬼然飞阁架巖崿争传西竺留司马谁向南阳识卧龙古磴千盘
藏桧柏芳池十亩漾芙蓉亦知杖锡三天上布帽何因曳屣从

十九日为大士诞辰司马公施像庵中适余为友人邀游别墅奉寄四章

方丈庄严辟草莱天龙八部俨徘徊函關是日真人过竺国当年大士来千室笙饶
临寶地十方瓔珞施瑶台骑羊莫咲初平拙恍忽前身是善财

苍茫云气百花潭总为灵光下郁蓝般若向来传自在圆通浑欲问瞿昙须弥界似
移金竺兜率天疑近太函漫向弥陀论法嗣只今龙象在江南（司马所居山名金竺在
肇林西）

阁浮提界蹇徜徉海上曾闻一苇航紺殿乍传金粟影红楼初放白毫光慈云迴结
三天外慧日高悬八水傍千亿化身何日遇漫将词笔问空王

玉树金襴百寶陈低眎睇目坐阳春蹇来东土依檀越谁道西方得美人净妙总因
圆觉相庄严元是法华身君看一传琅琊后大觉从教万古论（自宋世讹大士为妇人
王长公始辟其妄余有考详庄岳委谈）

寿汪参军六秩

紫气遥占白岳傍青鸾长驻白云乡张筵邨下三千客照坐扬州十万妆观里琼花
初破萼庭前珠树欲成行他时倘问参军句一笑掀髯向画堂

赠汪元清肇元二太学

寶鐙银鞍白马调乌衣羣从尽兰苕同携宾客探瑤树并载婣娟弄玉箫别墅风流
安石共中林才思阿咸饶秋风骑鹤能相过定约扬州第几桥

士能屡迟所欢不至仲淹怒使家众数辈促之来座中戏作

寒雨萧萧闭绿苔乍闻环佩下阳台不因枚叔观涛至已作王郎挂雪回国色名花

双烂漫（是日初见牡丹）高山流水共徘徊腰肢沈约偏能瘦狂倚东风唱落梅

方景真邀游幔亭同司马公赋（有序）

山本名乌石突主人张绣幄为幔笙歌粉黛周列其傍观者属路余因谓司马公昔李白张谓泛湖郎官之名迄今不朽兹山胜绝而不佞幸从公后傍观者闻讶咸以为武夷君请遂以幔亭名之司马击节曰善同集者谢少连汪士能潘南仲吴太宁诸子详司马公记中

窈窕肩舆度白云幔亭霞色转氤氲千山夕照罗峰外一线春流练水瀆冠盖尽携文苑客笙歌如下武夷君名花满座天孙外何忝玄光百代闻（武夷山道书称白马玄光之天）

方于鲁以墨谱乞诗卒業赋贈

粲烂双螺出魏台奚潘遗法伊重裁玄云蔽月非烟下（武公业妾名非烟）紫雾寥天太乙来九锡漫夸龙献兆七香宁假麝为媒何因饱咽金茎露一吐王郎万斛才（非烟寥天一七香金茎露方氏墨名王勃作文磨墨水数斗饮之万言一挥见唐小说）

少室山房集卷五十五

●钦定四库全书

少室山房集卷五十六

（明）胡应麟 撰

○七言律诗七十四首

寿贞吉王孙太夫人七秩并寄芾斯孔昫

婺女寒芒接豫章天孙云锦落持觞金芝百本来西极玉树三株耀北堂紫凤夜含灵笈舞苍虬晨逐素书翔窥帘敢作偷桃客愿借天厨一脔尝

题希夷高卧图奉寿郭泰和封翁大参知相奎尊人也时年七秩

蹶蹶罡风度十洲一筇长啸华山头神游欲尽三千界梦断俄惊八百秋绛阙征书回紫凤（图南表文）丹台灵笈驻青牛（函谷华山密迹）龙光忽照匡庐下重遣蒲轮出帝州

寿舒封翁七秩二首

寿域晴开傍海隅安期双舄渐凌虚秋明南极三天上夜燕西池万里余鹤筭定知同绮皓扁舟宁假问陶朱虚疑卓氏临邛盛次第黄封照里闾

青雀西来瑞气浓方塘秋色照芙蓉华阳是处传丹篆渭水何人敌素封桂树阶庭巢六鹤棣华天阙近双龙翩翩叔寶今华发尚记东床卧日容

题赵汝元白云莊

岩崑飞磴入林丘天际遥看漱水流青壁祇疑人世断白云何羨帝乡游茆檐上月千花暝草阁吟风万树秋闻道生徒多受业蓼莪篇废定谁酬

颜廷愉过访有赠时廷愉将之都下因寄诸友

片帆风雨泊孤城一刺龙门曳履迎
阅平原推世德诗篇光禄擅才名
风期乍拥衰颜壮雪色频扶病眼明
多谢酒人燕市上竹林吾已负生平

赠宋化卿

廿载钱塘怅独游风尘何意片言酬
严城画角双鸿下客舍清灯驷马留
赋就几人春雪和篇成何处夜珠投
明朝烂漫湖头约十里桃花照画楼

送苏君禹观察之岭右八首

握手衡门思欲狂相逢如夢在河梁
三年素札咸阳断十日青尊灊水长
絕塞风云悬马首大荒岐路出羊肠
因君一问龙标尉明月梅花遍夜郎
(青莲诗我寄愁心与明月随风直到夜郎西岭右与接壤故云)

极目遐荒共黯然苍梧何处问楼船
天穷象郡千峰外地隐龙城六洞前
飞诏金門频计日传书铜柱易经年
无劳更阅河东记海色黄溪昼夜悬
(桂林隱山有六洞见吴武陵记黄溪详子厚文)

万里襜帷涉瘴氛炎州风物向来闻
罗池翠羽多充赋林邑蛟珠竞购文
豈蔻飞花园似雪桃榔垂叶路如云
伏波祠庙经行处一奠椒浆桂水濱

腰下双悬玉鹿卢拂天雄剑倚昆吾
褰帷雾洗三苗窟露冕霜飞百粤途
荔子尚祠迁客否蕉花能忆美人无
七星岩畔题诗过羨杀朱旛在画图
(韩诗荔子丹兮蕉黄见罗池庙碑闽中有美人蕉故颈聯云)

锦席孤飞散曙鸦如椽双笔气凌霞
遐荒词赋传中国絕徼文章配大家
漓水瘴云行驻节鬱林奇石坐当衙
红潮醉颊槟榔熟努力朝餐望里加
(文章谓柳州也)

万山行尽见牂牁处处椰浆酌叵罗
赤日猩鬚啼古洞青天龙蜃出层波
风生羽节炎威静露洗牙旗瘴色和好
作刺桐花下客细吹芦笛听夷歌

双旌行色暮萧萧天地西南问沅寥
姓字始兴悬竹帛功名新息树铜标
藤江水溢青萝近荔峪嵐深翠障遥
珍重大廷思彩笔看君六翮上层霄
(昌黎送人之岭右云江作青罗带山如碧玉簪)

灿烂新除下玉宸聊从殊域试经纶
传书已见回周史谕檄能无待汉臣
夜月三花流皂蓋朝霞八桂上朱轮
玄亭咫尺堪谁守一盼东阳问字人
(君禹自關中返登崧岳赋诗寄余尾句谓李生允达尝受知也)

戊子之秋与君禹督学晤武林时方病
症仅仅数语别去己丑春余自夏村归
适君禹擢關中前发阅月矣秦越茫然
邈不闻问比余居先宜人忧夜分车骑
过从则君禹再擢岭右中途不通一刺
特为余舣棹兰阴感旧论心达旦忘寐
申言饯别成诗八章岭右山川秀甲

夜泊金閨寄奠王敬美先生八首(有序)

不佞卅歲游燕则次公以年家见知凡竿牒下询家君齿及不佞亡虑十数顾不佞

未尝识面也丙子秋次公以参知赴江右过访兰阴邂逅蓬茆词组投合杯酒扬挖形骸顿忘尔后不佞拏舟闯阖者四次公停车灑水者三每一把臂辄潦倒淋漓濡首乃别比次公入南都不闻问几半载询诸吴中则报次公逝矣是秋北上极意酹酒娄江少致国士之感适病中愤愤不及遄赴爰赋七言八律以代奠章

明时何客并登坛宇宙文章属二难大海云霞麟鳳出（鳳麟洲在海中）中途风雨鹤鸪寒三天谒帝更容鬢八极游神快羽翰不遠桃花瑶水上飞书无路问青鸾

白面含香上紫宸前身曾是石麒麟天容作赋游關洛（公有關洛纪游诸稿）帝遣传经到越闽（次公尝督学二方）飞蓋西园饶和客曳裾南国尽才人重来欲话当年事落日山阳笛满邻

飞诏频年下赤霄故园薇蕨兴偏饶高风突兀回三代大业荧煌擅九朝礼乐夔龙元事舜（敬美为礼官有兰省等集）耕耘巢许亦逃尧（所居草堂名澹圃有田可耕）莫言遗冢皋桥畔古人传玉树标

仙游何处白云乡绛节飘飘上帝傍五叶世传中令贵三朝谁识次公狂丹青永夜悲前席丝竹频年醉后堂茗椀酒鎗浑似昨不堪重过綠萝庄

环佩当年碣石台一时才子盛追陪鐙悬太乙人初聚漏尽长杨客未回楚泽悲风迷屈宋梁园残雪散邹枚龙门咫尺无穷恨谁共登楼赋七哀

年纔四十五游成昏嫁何须毕尚平泰华两登天地小崧衡齐蹶斗牛惊九疑峰忆帆前墮三叠泉犹杖底鸣瓢笠王郎今在否朝骑鸾鹤上瑶京（次公于名山惟北岳未登余四岳外太和匡庐武夷皆杖履所歷具名山游记中）

抗手吴门歲月除三年秋色断鲈鱼清江一曲题诗外大海千峰入梦余紫气尚悬朱雀桁丹霞长拥白牛车何因一问梯仙道并捧金珰拜玉除

短褐长安记昔游忘年倾蓋见君侯淮阴敢窃无双誉江左元推第一流吟尽白云鵙鵲观坐残红日鳳皇楼萧条往事空华发落木凄风遍海头

赋八诗后鄙怀不能已已伏枕呻吟再成八律共前什计十六章辄命使者焚之几筵次公有灵当为我击节三神之顶浮一大白也

中年真诀至人传晚歲仍参佛祖禅夜雪尚疑中岳顶朝霞俄赴大罗前黄金阙近双龙驻白玉楼高万象悬为问仙都题记者几家词笔并如椽

才名伯仲世争奇并握隋和照海湄大野正看仪鳳日荒郊俄遇泣麀时惟应翰墨留千载盛有文章落四夷烨烨鸡林传赏遍悬金寧俟国门知

作赋东南见大夫平将彩笔擅菰芦青衿问字环三省白帟传诗尽五湖辽海客归应化鹤猴山人去定飞鳧天瓢万斛金茎满肯忆黄公旧酒垆

绰约仙山大海东神人何事颺乘风裁花已见潘安似掷果将无卫玠同入座朝霞明遠岫披襟寒月挂长空屋梁此夜看颜色犹作当时梦寐中

紫綬金章白玉珂风流谁柰使君何文雄剩欲夸天寶句好寧甘压永和大斗十千

倾绿蚁崇台二八贮青蛾名园一别空回首满眼霜棱折芰荷

宿世含毫自右军池头秋色照鹅羣吴中骤贵乌丝纸海内争传白练裙片石峩峩枯树赋（次公家有褚河南枯树赋刻石）千金零落送梨文（次公入覲都下有以大今送梨帖来售即倾五十金易之才七字云）空余太极台前榜大笔高悬驻彩云

三年移疾住吴阊不改清斋旧太常岂谓龙蛇能作讖坐令鸿雁不成行游同兜率非天姥秩主遮须胜夜郎犹忆向来尊酒兴乱山风雪灞桥傍

总角携书到上林华筵何处不招寻淮南桂树枝枝赋蓊北梅花片片吟斜日剑锋双黯淡暮年书札半浮沉锺期一去弦堪绝碎折床头叔夜琴

张仲立过访舟中邀集新居奉赠二律

修竹千竿蔽草庐蓬蒿一径共踟躇囊倾记室三都外（张景阳注左三都赋）架插司空万卷余茂苑祥光迴鸞鷲吴门秋色到鲈鱼他年孝友知侯在底用寻源上玉除其二（是日适与仲立棊故用张玄事青钱并鸞鷲并文成事浮家志和事）

青钱万选世谁伦金镜千秋动紫宸三篋当年穷宇宙七车遥夜辨星辰枰空淝水知无敌剑合延津自有神倘许孝廉船上约浮家何惜去来频（仲立博核羣书二诗每篇八句用一张氏事存之以备此体）

赠幼文幼文丁氏逸季侍童也常置帐中余从诸客徂伺得之赏其丰神莹彻为赋二首

入幕何来傅粉郎居然容色似龙阳书裙是日逢王令（大令为羊欣书白练时欣方幼）断袖当年忆汉皇曲里含桃歌鞞鞞车前名果掷琳琅异时开府能相过莫遣才人坐别床（庚信事见北史）

秋水为神隔绛纱何年捧剑入王家床头梦有金茎露庭后春生玉树花才比郗郎偏有意色同弥子更无瑕他时倩汝汾阳宅飞挟红绡上太霞（捧剑见唐小说）

为房仲赠姬人时斋素独居一室

尽抛铅粉着袈裟长日焚香诵法华不学杨枝辞白傅颺同桃叶住王家台深弄玉鸾箫断殿锁飞琼鹤驭遐自是莲花离火宅子猷狂兴为谁除

答赠戚山人不磷不磷工绘事及诗寓逸季所

飘然孤鹤下玄關十日高阳共破颜白苧霜华萎子国青缯云色敬亭山囊中毛遂人争识庠下梁鸿客未还惭愧五君劳入颂风尘吾已鬓毛斑（戚投余诗有见说五君无尔敌之句）

赠王孟嘉弇州公从孙也

弇山堂下一逢君玉树翩翩自不羣马埽谩呼狂武子龙山寧学醉叅军朱弦颺习南风操玉剑行冲北斗文最忆竹林深夜语乱星残月坐宵分

寿王公詹七秩

琅琊门第旧称雄握手翩翩大令风函谷云霞新紫气燕台日月旧青宫竹枝赋就

征才子桃叶歌成教短童闻道瑶池开燕日万花如绣簇帘栊

再挽王长公二十首（有序）

余既为长公挽章二百四十韵矣顾鄙怀犹有未释然者忆曩哭次公赋七言律十六章长公读之数过因戏谓古今哀挽之什至子多乎哉第辞竭思枯即异时吾不讳何以措手余亦戏荅方公为鲁灵光砥柱百世仆以朝菌观大椿虽欲有言得乎长公目余一咲耳音泠泠诚不意鸾骖鹤驭倏忽升于大罗也追惟宿诺勉尔含毫呻吟一夕成二十章于乎伯牙弦绝江淹才尽余此后亦永谢笔研矣

绛节初升上帝朝清都何处问岵毳龙归大壑乾坤暮鳳返高冈日月遥文字八荒传袞冕诗篇六合诵箫韶莫言名世期终在永劫人才付寂寥

遥夜青鸾帝阙来骤看黄鹤向蓬莱三车诘载平生业八斗难名间世才心折班扬愁搦管汗流枚马避登台风流咫尺人寰尽恸绝琅琊玉树摧

万象文光烛海湄蚤闻名姓动华夷雄飞宇宙三千劫独应贞元五百期龙去南阳高士远麟归东路哲人迟生刍泣奠娄江下不为杨朱感路岐

一谪长庚茂苑前红光白日照奎躔词华尽挈三唐调文管兼操十代权夷貊尽传鸚鵡赋儿童能诵鸚鵡篇亦知上帝频前席白玉楼中万景悬（长公有鸚鵡赋鸚鵡诗并见集中故借祢衡郑谷事）

四部书成兴未穷名山随处勒崆峒开函再覩三坟出列架浑疑二藏同大业龙门卑马史竒文虎观陋扬雄平生谬作谈玄客寂莫侯芭鬓已蓬

三十年来上将坛平将赤帜树狂澜山頽泰岱千峰失海涸昆仑万谷残素旒翩跹来大鸟丹台游戏挟飞鸾便应瓢笠相寻去灵药何由借羽翰

蹶履频年到海涯青童环佩结飞霞毫端巨壑翻云梦研底春涛涨若耶庚子日斜惊鸚鵡鸟戊辰年远怪龙蛇憑谁更发山阴兴肠断王猷一棹遐（公有戊辰三郡稿）

弱冠中原结驷行朝阳争覩鳳皇鸣朱弦万古回长夜彩笔三朝擅大名座上雪花凌楚泽垆头虹色贯秦城为知兜率迎新帝不向遮须问旧盟

粲烂双钩倚鹿卢人伦一代擅风胡删诗秩继周司寇作赋名高楚大夫阙阅五朝传父老门墙四海见生徒寻仙政有青莲癖日候长鲸返太湖

三篋曾夸暗诵能七车今代几同乘金泥篆辩神仙窟玉鉴文窥帝子陵海上专车无巨骨山中着械有奇形干将一夜飞雷焕服匿何年问陆沉（读卮言附録作用张寛安世嵇康江淹防风贰负等八事）

十载玄闕闭绿萝一朝禅榻蜕维摩金棺掣电飞西竺玉舄抔风上大罗丹阙授书偕素女绛台摘藻侍皇娥青天度索山头望试问桃花发几何（皇娥歌见拾遗记）

七隼翩翩聚紫宸陈思才调拟谁伦葦阳馆内飞谈日碣石宫前鬪赋晨白璧千秋无大楚黄金一字有先秦参差王气东南歇怅望遥天绝后尘

奕叶琼枝照锦袍何人不羨二王豪争传一帖辞中令忽报孤琴逝马曹大地骅骝

纷蹀躞中天麟鳳并游遨云浆万斛西池上好忆金华溅露桃

双旌曾驻白公堤夹岸桃花送马蹄大笔今悬娄水上高门元峙越台西两高岩壑争奇句三竺云岚护旧题陈迹诸王何处问乱山严濑夕阳低（娄江之王实吾越睦州分水自国初徙吴今尚同谱系云）

棘闱绵上旧踣蹠彩笔宁论晋问如汾水真儒罗上第晋阳精甲候前除千峰曙日褰帷外百谷晴岚眺望余翘首太行云雾色几回梁国为停輿（长公庚午校士山西程序咸出其手寻以内艰归）

一疏东南卧草亭自将游屐卧沉冥丹霞蔽日攀林屋白露横天泛洞庭角里携家迷故迹灵威入穴辩遗铭泠然一梦乘风去怅望吴峰立翠屏（长公有阳羨洞庭诸游稿）

尚思斧钺驻郟關开府中丞节制闲万马不嘶云梦泽孤鸿时达洞庭湾（用柳毅事长公尝开府郟阳云）朱弦夜和湘灵瑟白苧秋纫汉女环极目招魂劳楚梦三闾能复恋人寰

白门花月漫撩吟可柰蒲轮歷岁寻一曲五湖频入梦三生八座詎萦心风摧玉辇高山絕露掩金刀大壑沉信有骑曹清癖在仇池新竹渐成林

台殿金银挂夕阳娄江百畝慙徜徉全收五岳壶天内别起三山陆海旁堂上凉风生綠埜亭前奇石护沧浪（弇园有凉风堂苏子美沧浪亭在吴门仅百里）祇今谁主花溪宅万朵芙蕖泣露房

短发飘萧大海头登龙曾是昔年游长裾晚曳三千队彩袖朝倾十二楼字挟风云心未老名悬日月望难酬无劳动色真长问已尽人间第一流（长公旧赠余诗云一字风云争吐气千秋日月破藏名又云代兴天地有词坛国士谁能不让韩俱非余所敢任云）

抵新安访汪司马伯玉八首

叠浪奔流大壑摧龙门咫尺拟蓬莱三千界迥乘风入四百滩长挂雪来隘地黄山无俗辙中天白岳有仙台跻攀一快平生目肯作咸阳十日回

匣底青萍焕陆离酬知今日愧前期三朝词赋羣公尽一代文章大老遗宇内高名晔北斗垆头陈迹怅南皮關情最是娄江色万树桃花落海湄

紫气新都间白云關前晴色望網缦谁家片碣无题字到处名山候勒文亭倚太玄空八代囊携副墨象三坟何言吉甫偏能颂手系楼兰粤水濱

当年横槊气如虹战血犹殷大海红七泽戈鋌移小队三河饶吹候元戎营中赋客袁宏俊幕下诗流杜甫雄拂袖麒麟成往事乱山云色卧空同

十载东山挂梦魂归从西竺问乾坤孤惊自寄函三室大法遥探不二门香积饭僧忘歲月菩提叅佛悟晨昏犹余慧业差萦念尺寸毫端万古论

艺苑宗盟四十年暮途真契少林禅云扶砥柱千秋壮日揭灵光万古悬虎帐韬铃

聊偃息鸡林词笔竞流传无论片诺登龙易大雅堂深列管弦（司马有传奇四卷名大雅堂集世方盛行）

当年怀刺出菰芦倾盖钱塘月满途绮席衣冠连北海画船箫鼓出西湖
荧皇丽句悬金刹烂漫清歌送玉壶双剑只今犹赋草擅场能忆祢生无

五子当年迹已陈竹林携手重伤神齐驱碣石无先辈学步邯郸媿后尘
海内谁当司马客山中今见牧羊人惟应乞取朝元诀坐啸天都望玉宸

抵太函适汪司马赴许将军泛舟余遂为不速之客座中分赋

暖日暄风照画船茂林修竹聚羣贤双旌乍识元戎队片刺忻同上客筵
邂逅洪都无彩笔赓酬郢国尽朱弦归来更下函中榻千树梅花伴独眠

司马公邀同谢少廉吴太宁集函中

万山回合太玄亭五夜雄谈入杳冥绕座春风凌白苧当筵牛斗落青萍
抽毫客似登梁苑张乐人疑在洞庭醉拥如花明月下路岐何用叹飘零

是夕遂宿太函

金碧檐楹护翠岚鬱葱云雾绕东南频年司马悬高榻此夕元龙卧太函
古桧飞霜盘绝壑踈梅翹雪点空潭水晶帘外千家月细酌天池佐夜谈

董使君过访赋赠二首

朱颜携策赴长杨笑揖花骢大道傍赫烨封章驰紫殿飞扬名誉出黄堂
新都日月三天近梦泽云烟一水长回首竹林成旧迹垆头犹记阿咸狂

天人三策向来传万室争夸太守贤梦绕花骢长乐外风行竹马大鄣前
朱楼画阁滩声近紫殿琳宫岳色悬烂漫黄金双阙下蚤携繁露入甘泉

送汪象武之南都

祖帐天都树色重悬腰长铗动芙蓉游梁上客传司马入洛羣英艳士龙
五夜桃花朱桁落三春杨柳白门逢飞鸿咫尺平安报奕叶泥金瑞气浓
（象武汪先生仲子故有司马士龙之句）

少室山房集卷五十六

●钦定四库全书

少室山房集卷五十七

（明）胡应麟 撰

○七言律诗七十六首

聂水部报命北上订余握手溪头赋此为别

河梁挥袂惜追游五夜双龙拆斗牛皂盖欲飞燕阙底青帆仍逾越溪头
荧煌御气瞻华袞慷慨穷交惜敝裘明月梅花春事蚤为公悬榻在南楼

忆苏别驾以修（有序）

忆在清源日与惟效使君以修别驾沈饮十旬极人生聚首之乐一别五载使君出

守三衢尚获谈谑朝暮以修归卧巴蜀遂絶无鳞羽相闻惟是使君擢任观察以修实其州民焉岂龙剑有灵天作之合乎余既悲使君之行而又窃幸以修之遇感怀恋别情溢乎词

笑忆清源市上年沈酣长伴酒家眠空传剡曲三冬棹竟阻咸阳十日筵犊鼻正穷司马赋貂珣谁达子云玄花驄此际堪携兴极目双鳞灑灑前

题徐纳言具庆貤封册

寿域双开越水头金章赫奕下龙楼星飞南极晴光烂月涌西池瑞气流八百年方骑紫鳳五千文欲驻青牛承家况是仙郎在戏彩翩翩近玉旒

登鹿鸣山絶顶憩小蓬莱观易使君留题作（有序）

山与郡城相望超然亭孤峙其颠四面无际俯瞰衢闾万瓦鳞次飞流百尺环抱其前吳云楚树映带左右近郭一大观也旧止玄武一祠葺而新之为游览所寔始使君云

絶顶仙风面面来中天何异到蓬莱江流喷雪飞吳甸石磴盘云上越台览胜欲穷游子目留题谁并使君才含毫骤发登高兴莫讶银钩破綠苔

次日复携酒酌山堂晴眺再题壁之左方

徙倚危峰散鹿羣尊前吳楚望網緼亭台四壁全披雾城郭千家半入云薄暮飞樯环浦下中宵寒磬隔溪闻青霞忽记观棋约曳杖行探玉笈文

赠李司理二首（有序）

司理楚嘉鱼人曾祖承箕举于乡弃弗上南宮与陈公甫倡和岭表即白沙集所称李世卿者也从弟承勋复以战功列名臣文词勲德棣萼相望司理寔世其门阀尊人孝廉亦有集行于时

环佩翩翩下玉除汉庭司法定谁如才名供奉骑鲸后家世将军射虎余座里雄风回七泽囊中春雪照三衢探竒不独青霞兴物色时能到草庐

识面荆州更有无频将意气傍菰芦青春紫殿夸陈策綠鬓黄堂佐剖符三尺清风悬水镜万家明月浸冰壶铜鞮况是山公在把臂何妨学酒徒

寿喻封翁七秩

三生曾授大还丹七纪长看住翠峦座上双龙随舞雩亭前五马候驂鸾西江水接东溟近南极星朝北斗寒莫道授书年尚少蒲轮行见出长安

张成叔过访以尺牋诗草见投颇深推挹赋答四章

意气翩翩入洛才衡门游屐破苍苔朱弦惨淡佳人絶彩笔峥嵘大将来宇宙渐开新兔苑风云重上旧燕台从知国士深难遇片诺何妨共草莱

十年尘迹叹飘蓬倾蓋何由道路同一顾骥羣空牝牡双飞龙剑隔雌雄名流上国交垂尽才子中原业未穷怅望四明云雾满独将离目送高鸿

片席乘风下海头屋梁明月梦难酬尚虚文举三年刺谁共元龙百尺楼大业乾坤孤鳳起长途雨雪片鸿愁京华旧识如相问老尽桐江钓客裘

粲烂蛟珠海色傍飞光遥夕遍茅堂千金易水看过市片玉昆山总擅场白日鸿心
游浩渺青天鹏翼破苍茫为君一诵如渑句齐晋他年可慙忘

欧桢伯八旬矣而神逾王千里饷书颇寓前薪之愤寄答二章

老大登坛兴转豪悬书雨雪问终袍文章得失宁儿辈意气纵横尚我曹壮节转深
题柱感雄心曾怯据鞍劳期君一在天风上信宿罗浮望海涛

十载西风叹路歧菰芦长卧越江湄宫残碣石才人尽殿耸灵光赋客遗斗酒乾坤
回肮脏尺书湖海问支离奇峰四百飞云外题遍梅花夜雪时

夜同孙金潘叶四生集文如美人馆

系马高楼兴未回铜瓶春色照寒梅人同师利观空坐客似维摩抱病来雪后何妨
寻剡曲云深无处问阳台相逢肯下高唐榻总为当年作赋才

张大来至泰和以翰贶见贻赋谢

鸿书遥下白纶巾闻说题桥气象新赐履乍闻中禁侧鸣琴独坐大江滨蒹葭漱水
孤蓬夜桃李河阳万室春莫向龙头嗟晚暮翩翩八翼上平津

丁观察以两台疏荐留住四明赋怀二律

千骑纵横夹上游飞章推轂动宸旒干旄旧识长城寄斧钺重因大海留玉局闲敲
风满座金尊长啸月当楼春晴试弄桓伊笛何限梅花越水头

咫尺楼船号令新欣从帷幄覩词人关中久自推冯异河内今谁属寇恂溪拥越来
清雾雨山横秦望絶风尘大挥椽笔成功暇修禊兰亭正暮春

送易惟效观察之蜀中同李司理作八首

粲烂除书汉阙来蜀天何处望蓬莱黄堂久擅分符绩乌府新推仗钺才雾拥双龙
行剑阁云随一宦度琴台百花潭上题诗暇几唤词人共绿醅

荧煌箫鼓夹离筵处处棠阴拂画船叱馭重看行栈日观棋犹忆烂柯年瞿塘急峡
高牙外夔府孤城大纛前满目匡山云雾色好凭遗碣问青莲

宪节朝巡白帝宫千山行色望难穷城悬灩澦飞涛上署涌岷峨积雪中社稷关心
龙剑紫乡闾游目锦袍红极知河内追思切伏阙何由借寇公

彩笔西南见吏情风流何似在承明花香匝地文君肆树色浮天望帝城揽辔岷山
千骑肃飞书泸水百夷平莫言玉垒堪长借翘首双珂汉阙鸣

楚水巴山别思重经游何地不奇踪黄金作客怜司马白羽谈兵羨卧龙絶栈三千
行蜀道危阑十二望巫峰高唐赋罢堪携手咫尺云华梦里逢（巫山神女号云华夫人
见太平广记）

江城晴色照蒹葭彩鷁鸣榔散曙鸦鼓吹乘风还七泽旌旗摇月上三巴扬雄阁畔
题玄草杜甫堂前觅浣花到日海棠开欲遍可能移植到山家

绿酒红颜怅和歌金垆银烛奈愁何青羊肆远孤旌驻白马寒江大舶过锦里春风
啼蜀魄阳台暮雨狎湘娥双鱼是处能相忆极目遥天剑水波

歌罢骊驹散夕氛天涯何处怅离羣猿啼骆谷千峰雨马踏蚕丛万岫云大树尚留
严武碣小桃偏护薛涛坟眉山伯仲衔知久唱和能令越客闻（谓苏以修伯仲也）

题琴鹤重鸣卷（代送易使君）

绣斧辉煌下越城江天晴色耀飞旌当年烏化双鳧去此日琴偕一鹤行巫峡彩云
晨送客巴山明月夜谈兵何烦更就成都卜回首花骢向北平

春日送赵均甫敬甫二文学一之北庠一之南雍秋试并寄怀大学士汝迈先生

画船箫鼓发江浔犹为离鸿一抱琴彩日燕吴双鳳下青云南北二龙吟辉皇棣萼
聯高阙烂漫荆花簇上林何事中朝论闕阅万方翘首祝商霖

题陈玉叔天尺楼

宸章烂漫烛奎躔呼吸真看帝座悬闕阅九朝韦曲后声华三世杜陵前风云仲举
方高步湖海元龙漫独眠翘首佩环红日近好开东阁待如椽

李允达过访赋赠

十年尘迹愧疎慵一刺何来倒屣逢文彩乍斑难隱豹鬣毛垂白为屠龙尊前词组
江河尽笔底千秋海岱从何限朝真诸洞色暮天凝望白云重

早春汪司马伯玉抵严陵以手札见招先此奉柬期司马过小园时仲淹同至

踏尽名山兴未回一筇春首问崔嵬东华紫气真人驻西竺青莲大士来絕壑鱼龙
迎系缆中天鸾雀登台千门雪色澄江上咫尺能无过草莱

雪中寄司马汪公泊方山人刘文学

千峰寒色坐霏霏极目瑶华倚石扉八座慙回司马驾孤亭遥问钓鱼矶同云匝地
江华暝密雪连空海树微莫道剡溪仍返棹子猷狂兴正横飞

汪司马偕龙博士登严陵赋雪寄讯

萧森寒色照菰芦缥缈青山入画图不为文星移海甸能令春色遍江湖千花桐濑
飞瑶瑟万树兰陵照玉壶况是郢中才子集赋成题寄茂园无

同徐茂吴集唐惟良兰阴馆

兰阴携手白云平湖海重追旧日盟魏典乍传中论在楚词曾赋大言成（用唐勒
事）千崖薜荔谁同往五亩蓬蒿任独行莫负习家池上燕烂烧银烛照山城

王长公二郎君同补邑庠寄贺

六朝门第盛琅琊五叶儒绅冠海涯片玉蚤曾夸郤氏三珠仍见属王家雌雄出匣
俱生雾伯仲当尊并泻霞屈指天闲抡上驷大搜龙种向流沙（伯仲句用三雅事东）

梁持伯内史过溪上夜谈燕市旧游感而有赠

握手无言意已消江干晴色此停桡千年紫阁幽期在万里青门别梦遥掩径有心
酬鹿豕巢林何事拟鷓鴣尘埃漫忆东华日浊酒长歌剑影摇（时擢观察山）

寄喻邦相二首

辉皇除目下蓬莱绣斧麟符拥上材揽辔东方千骑合口褰帷南国片鸿来扼趋日

月宣尼庙叱咤风云管仲台莫道临淄能久住太微寒色正崔嵬

双飞龙剑出天涯烨烨寒光射彩霞碧海楼台环碣石青山城郭抱琅琊齐都按节
民风变鲁壁探书世代遐底事徂徠看日上扶桑晴旭正当衙

张幼于悼亡作

十载青闺戒妇仪一朝环佩赴瑶池伤心孔雀孤鸣夜照影文禽独立时霜薄骑曹
愁里鬓月残京兆画时眉自从巫峡云归后不向人间怨别离

寿王转运八秩二首（代长公作转运元美从子也）

紫绶金章照暮天斑衣玉树间华筵八旬正值飞熊候九折能忘驻马年屣蹑仙风
阳羨顶船邀明月洞庭前东山咫尺过从易岁岁看花共阿玄

南北驱驰鬓未皤一身盐铁寄婆娑乌衣坐处官仍达黄绶归来客竞过桃叶兴将
中令远竹林年较仲容多明朝倘赴安期约双舄同凌大海波

易计部过访赋赠

辉皇鹵簿到兰舟认是栽花旧易侯岸帻已更新气象弹冠犹问昔交游携来梁父
中天日望入江郎大海流美酒顿浇愁顿释不知行李驻山邮

答李允达秀才四首

风霜遥坠笔如椽有客论文自绮年八咏漫愁人代隔千秋重覩帝京传（来诗及
隱侯八咏宾王帝京诸篇事）乾坤寂寞华阳社雨雪蹉跎灏水船莫讶中郎贪割炙于
今国士定谁怜

浊酒兰陵怅望频如澠今覩代兴人居然鹏赋追仙客谁解麟经作素臣（允達业
春秋）雷雨延津夸合剑星河严濑照垂纶无论白首侯芭业八翼看君近紫宸

青眼横承百尺楼尊前何物慰离愁丹山月老寒栖鳳白石云荒夜饭牛属国才名
犹奉使轻车勲业漫封侯期君对挟飞鲸去小作人间汗漫游

消渴频年寄茂园何人词赋竞中原花生曼倩三千牍草就蒙庄十万言梁父云霞
期望日昆仑星斗待穷源螭螟一室犹堪共莫使清风隔晤言（史记称庄周著书十万
余言）

寿王司寇元美六秩四首

长公之初度也实前丙戌之岁今甲子一周矣冥灵大椿以五百八千为春秋区区
人间世驹隙眇不足论矧长公身居赤城名首仙籍即冥灵大椿亦小年耳而何有于一
甲子耶第遐龄亿算此实兆基詎容无祝以虚大庆辄赋四律代颂嘉辰海内苍生当同
此愿云尔

玉佩曾闻下帝都金丹此日兆悬弧千秋事业周司寇六秩行藏卫大夫伯仲埶箴
麟是友孙枝兰桂鳳为雏吴门午夜麻姑到仙酿何妨醉百觚

红颜纓玉上彤墀秋苑纵横大将旗万古文章尊泰岱三朝名誉盖华夷灵光突兀
云霞拥朶率高寒日月迟七十二峯元宅畔从教鸾雀醉中骑

安车迢迢出枫宸侧席明光问老臣独步诗名齐大雅高悬文价重先秦追随崔馭
三天客出入龙门四海人漫诧蓬莱云色里西园台殿尽金银

曾从弥勒问三禅更逐方平炼九还寄迹乾坤中土外飞身云雾大罗前桑弧想象
庚寅日花甲周回乙酉年莫笑骑羊人老去抠衣常侍玉华筵

送王次公入贺万寿

履底山川遍七闽仍将金镜入枫宸三为大国抡文吏两作中朝献寿臣拄笏露华
流紫殿称觞霞色动青旻为知燕锡承明后首问华阳击筑人

祝山人将过白岳访汪司马即席赋并寄汪公

四海苍生卜谢安谁同司马话登坛新安水似龙门出白岳山将泰岱看明月乍淹
萝径晓西风遥洒薜衣寒亦知幸舍堪弹铗曾否中林问鹖冠

沈明府二亲貤封寄贺

八咏当年诧妙才鸣琴南国暂徘徊循良政绩飞三殿抚字声名动两台单父云当
公廡入河阳春傍讼庭回危楼百尺东阳近肯握如椽到草莱

新正怀喻邦相方余过云间恍忽不及往晤拟至都下握手复以病归漫此奉寄

孰是携书问帝都聊同捧檄向江湖愁多总入三秋鬓病久那遵百折途赤日虹光
龙剑杳青霄云色凤城孤春风远忆朝元客满锡黄金醉玉壶

清源访苏别驾以修邀同蔡景明夜集

扶疎双树似禅堂绿酒银瓶唤客尝丽藻世传苏属国高名人识蔡中郎三峨云雾
挥毫落九曲溪山入话长已■〈才弃〉平原留十日漫将离色赋河梁

同蔡观察苏别驾集张文学园亭分赋

阑干百尺暮云流八面疎棂瞰斗牛彩笔词人纷入座青衫游子独登楼无论河朔
千秋胜已过平原十日留一笑骊驹魂自断不堪明夜木兰舟

应麟自髻髻即辱大司空朱公赏识兹公将南归不胜恋恋谨再赋七言二章

刊木当年夏后才乞归优诏下蓬莱黄河万里昆仑静紫气双帆碣石来北海琴尊
初寄傲东山杖屨蹇徘徊莫言五老云松近斗色峥嵘照上台

十载讴歌扈圣君三朝出入冠人羣华夷并切姬公望河洛长思大禹勤赐履燕台
晨动色悬车庐岳暮生云犹怜越客干将在拂拭寒光射斗文

同赵明府郭鸿胪游洞岩山

石壁高盘涧道分夕阳钟磬坐来闻云堆絶壑嘘龙气雾拥危峰下鹿羣曳杖乍招
丛桂侣吹笙遥问大茅君移家咫尺堪忘世那得钟山更勒文

大司马张公秋日过访溪上余时留武林不值抵舍后再往谒谢二首

熊车遥度越王台骏骨仍惭汉殿回廿载登龙频入梦当时题凤亦怜才三峨云气
飘萝薜五岳风期动草莱翘首未央天咫尺祗今东阁定谁开

交游七子气凌云出入三朝帝眷勤文武并传周吉甫诗书长诵郟中军风高秦望

双旌入潮落钱塘万弩闻突兀南楼秋色里胡床能许坐宵分

送戚都督之岭南二首

大府新移镇粤台辞天白马下蓬莱三边帐幕霜华净五岭囊鞬雪色来说劔荆高
多侠士抽毫袁伏是奇材征南汉将曾飞檄宁似元戎出手裁

絶徼重飞上将星扬旌伐鼓度沧溟长驱吏士过南粤远播声威到北庭杖杜含杯
千埃肃梅花吹笛乱山青罗浮铜柱燕然石万古何人并勒铭

秋日湖上奉访汪司马伯玉时仲淹仲嘉同至

十载龙门梦寐长披襟何意共钱塘轩车骤拥西湖畔剑佩遥占北斗傍业就千秋
陵左马家携二仲胜求羊漫夸四百临安寺遍勒新题向草堂

湖上逢王承父

溪上秋风罢举杯湖头白眼重登台乘槎汝自昆仑至蹑履余仍少室回三尺劔花
凌宇宙十年囊草秘风雷惟应烂醉乌程下尽解鹞裘付绿醅

送唐别驾之虔州

芜城初别凤凰箫水国重过驷马桥共惜士元居小郡何如长孺在中朝千林大庾
含芳近万葢唐昌入梦遥便觉佩刀干气象驿亭风雨夜来饶

送大司马张公还朝四首

赤羽初销万灶烟朱旌重闪入朝年鲸鲵观筑三吴外虎豹关清百越前西北风云
驰劔履东南日月护楼船莫夸定远封时事一代殊勲太史传

中天名岳降崔嵬望里三娥雪色开父老竞传司马谕君王遥借卧龙才长城乍起
当周甸大海初澄傍越台纵是抽毫难和客幕中犹许孟坚来

氛祲天南逼大荒独持双斧到钱塘三年幕府蟠蛟蜃一夜辕门缚虎狼淮蔡囊鞬
争伏谒朔方旗帜尽飞扬宾僚漫拟从军乐手定饶歌十八章

大纛生风入帝城双龙遥夜雪花鸣余皇十万清吴塞练组三千肃汉营淝水苍生
偏听捷潢池赤子竞输诚何人第一麒麟上彩笔词场更主盟

王山人世周以长歌及七言二律见贻赋答二首

旅食经秋傍越台王郎瓢笠为谁来平收南国双金价自老昆冈片玉才侠气尔仍
標海岳诗名吾亦困尘埃寻仙倘觅金华洞双跨虬龙出草莱

客馆逢君思欲狂吴山握手望钱塘寒光骤吐青萍匣秋色先凋白苧裳老去云霞
忘世态穷来天地问词场漫将七子推同调不尽雄心骥枥傍

中秋夜司马汪公招同吴越诸名士湖上玩月得秋字

缥缈晴烟一望收楼船明月大堤头芙蓉花发重湖夜桂树香飘万壑秋彩笔乾坤
谁大雅青衫吴越尽名流何当醉逐羣公去十二瑶台次第游

十六夜喻别驾邀同汪公重集俞园得池字

满坐青山照习池上公携客共含卮中天月色重圆夜大海潮痕乍落时杖掷广寒

银阙近杯倾河汉玉轮迟当筵触目俱名胜烂醉高阳白接■〈𠂔离〉

是夕邦相以公事先行余同司马移舟六桥布王崑山人席堤上澄湖月色万顷如昼箫管间作诸君剧欢丙夜乃返

十里长桥跨水涯狂呼明月醉流霞平湖影落虹千丈远岫光飞雪万家映席枫杉俱锦树回船葭莩半瑶华洞庭秋色饶相似莫把云门异代夸

陈观察留饮赋赠

豪气曾闻百尺楼重看下榻自南州双悬斧钺名山区独坐楼船大海流絶顶云霞藏雁宕中天雷电挂龙湫探竒不浅王郎兴瓢笠能容次第游

少室山房集卷五十七

●钦定四库全书

少室山房集卷五十八

（明）胡应麟 撰

○七言律诗八十首

七月望抵武林陆履素使君招集湖上乐人周生瑾者年少善歌酒酣持扇索题即席涂抹四韵

华星明月遍西园卓盖追随识大藩南国风流周小史东吴才望陆平原朱弦度曲飞霜丽玉局观棋坠露繁夹岸芙蓉千万朵归来何异宿桃源

秋夜集程仲凯玉树亭同梅太符罗高君作

珠帘十二锁兰苕一树亭亭碎月摇贝叶恍疑天竺寺琼花如覩广陵桥阶前秀色呈诸谢庭后新声度六朝最是缟衣明夕梦相思愁絶彩云遥

雪钱太学懋谷过访奉赠余懋穀年家子也

奕叶风流大雅堂飞扬才藻敌文房青鞋遍踏吴山下卓帽频敲越水傍赋就长杨迷国艳栽成丛桂发天香东南彩笔钱郎旧名士今谁列雁行

寄赠龙君御校文南都便道入楚省覲

湖头晴色罢参禅又覩风流白下年六馆才人争射策三吴词客候谭玄云拖彩服椿庭外雾拥朱衣棘院前莫恋长干风景丽西泠何限木兰船

寄赠长洲江明府明府楚之桃源人

十载风期梦寐踪相逢何意骤天涯栽成林屋花千亩恍入桃源树万家画鹢秋分吴苑月飞鳧晴蹴汉宫霞青旗夹岸休回首满目河梁散曙鸦

舟过广陵访陆无从夜集托以买宅桥东因寄赠此作

桥上相携不厌频钿车油壁半香尘贫将玉树夸词客老向琼花作主人■〈干阝〉浦月华秋似练曲江涛色夜如银青楼肯着狂夫卧传语吹箫为卜邻闰

九月望后抵淮上包穉升水部邀集署中二首（有序）

衙斋之傍雕栏曲池特擅华胜入夜登西台长空无云皓魄如昼酒酣乐作小溪歌

红线行巨觞豪饮剧谈遂至申旦盖余自癸酉之岁以大中丞滕公命入武林与穉升及元采立夫辈同学万松精舍屈指二十四秋浮沈异趣穉升故人之谊恋恋犹昔云

白面扬亭话草玄升沈回首一潸然飞扬六传浮淮日潦倒单车入洛年剑合青萍明月底杯分黄菊暮云前投醪■〈才弃〉吸长河尽可奈平原是别筵

雕栏十二净无尘绿酒银灯劝客频持节汝为都水使乘槎余是问津人风生锦树鸣霜叶露洗瑶台上月轮莫讶秋宵谈易彻廿年朋辈各参辰

泊天津遇陈孝廉仁夫为十日饮赋赠

把袂飞扬易水头当年驰疏识名流从军自结三千客破敌频呼十万侯剑拂秋霜临虎穴毫挥春雪上龙楼期君一在新丰市烂漫桃花扑锦裘（陈雅喜谈兵欲以三十六人横行日本如班定远故事）

初入都与惟寅话旧白雪斋作

聚散升沈二十年一尊携手暮云悬观鱼尚忆濠梁下市骏重逢碣石前意气乾坤谁并许头颅霜雪竞相怜从知奕叶麒麟贵彩笔何人载世传

仲冬长至大学士赵公汝迈大将军李惟寅同日先后招饮赋谢二章

飞葭六管动芳晨玳瑁筵开并帝臣长揖将军元有客扫门丞相讵无人黄云绝塞闲金甲紫雾中天护玉宸不为上公双吐哺荷衣容易到风尘

旅馆阳回雪乍晴梅花吹角暮云平羹调上相长杨殿酒出元戎细柳营鹈鹭三千随玉陛熊罴十万卫金城酬知何限干将色夜夜双龙匣底鸣

至日同俞孟武顾朗生朱汝修集李太保惟寅白雪斋即席得来字

朱门遥喜一阳回晓逐春光上薊台陇右英豪元世业淮南宾客尽时才驱车岂为千秋出击筑重将万感来取深杯酬令节参差银漏滴蓬莱

次日再同俞刘朱三子集李汝藩斋中分得花字

华堂烧烛散林鸦坐拥红炉片月斜渐喜春光回白苧尚余秋色对黄花孤蓬游子冲残雪大笔才人照绮霞莫讶金闺年少甚岐阳词赋旧名家

夜同孟弢诸子集白雪山房得云字

画戟清香上紫云西园明月坐綰缦三年桂树尊前别一夜梅花笛里闻白雪斋中人渐老黄金台上客成羣朝来太史占星聚灿烂干将易水濱

上元雪后过宋忠父入直不遇寄怀

缥缈天花散鹤羣瑶台十二迴难分光摇火树甘泉月焰吐金莲太液云殿上攀龙文苑客坛前飞骑羽林军知君此夕高堂梦一赋晨看帝座闻

过王思延斋头读所撰新草并钞本夷坚支志十■〈弱，左半〉主人索七言一律及诗藪三编为报即以见归走笔赋此

万轴琳琅照五车天涯何意复吾庐登堂尽读潜夫论入幕先携仲任书赤水频年回象罔丹铅遥夜校虫鱼此书余向求未获（以钞本多讹脱）从知锦被参军业挟策

重过大酉居（王时为京营参戎）

题帷幄元勋册八首（为相国赵公赋）

宁夏献俘

十万材官奏凯旋天威如电扫祈连穷追冒顿萧关外尽缚中行汉殿前宿雾三河沈剑戟新霜六郡洗戈鋌金门咫尺瑶编就何限殊勋太史传

五载干城急上材传呼中令出蓬莱长纓北系名王去大纛南俘叛将来净扫烽烟张掖郡平销云雾赫连台谁论淮蔡功成易为说元戎是姓裴

朝鲜复境

飞骑纷纍易水傍羽书题处笔如杠月支故主仍修贡日本残兵尽乞降鼙鼓渔阳空大磧戈船鸭绿静长江经纶黄阁真谁并一代凌烟照画■〈施，童代也〉

清秋辽左阵云寒伐鼓吹笳上将坛乍见嫫姚屯细柳俄传都护夺皋兰千樯触浪长鲸碎万弩乘潮巨鳄残一望越裳天似洗大标铜柱报金銮

關西告捷

一鼓居延万甲驰风雷摇曳助褰旗天骄胆落犁庭夜日逐魂销度漠时朔雪顿随驪褭净阴风旋挟虎狼移金城却问诸年少可解营平授策奇

露布风驰入紫宸何人第一画麒麟双旌出塞元飞将一柱擎天自老臣突兀燕山铭处石纵横辽海战时尘橐驼千队南驱夜不数周家白雉驯（时边将获橐驼千头）

日本祈封

巨筏连云尽度辽纷纷乞命候封轺单于斃面思归国赞普输心愿入朝九塞军容销战伐八方民力谢征徭安危华夏看今日一骑何烦出渭桥

平明闾阖露华晞六服怀琛候紫薇岛虜行成祈北面蕃臣重译到西飞清风絕塞尘沙净赤日扶桑燧火微从此御戎传庙略上公横玉赞垂衣（日本使名小西飞）

雪中同胡孟弢诸君集宋忠父第分得歌字

朱楼百尺帝城阿策蹇东来问叵罗献赋客当梁苑聚寻诗人自灞桥过千门落絮银为殿万井飞花玉作河寂寞郢中高唱后重将白雪擅新歌

薄暮雪霁改席小西园步缥缈台玩月入清华洞观梅花复张乐堂中华灯火树丝竹间作丙夜拥炉小斋听韩生琴与周生较奕达曙再用韵赋之

春光遥逐片鸿过有酒宁论夜若何东市张灯云气早西园飞盖月明多孤亭草色丛青桂古洞花香翳绿萝十二金钗屏后满竞翻瑶瑟奏吴歌

雪中同王明府蔡仪曹集恒叔冢卿宅

缥缈关河冻欲含灞桥吟兴正驂驪千门雪照梁园赋万古天空碣石谈柳絮楼台迷塞北梅花篱落认江南相逢尽是朱弦客一奏阳春意未惭

翌日再同恒叔冢卿集释含仪部第

携手高斋散鹤羣帝城春色渐綈缦金庭日月三都赋（恒叔有五岳游草）玉洞

云霞二酉文（稚含自号二酉山人）雪霁炉烟紫树起风清砧响隔花闻朝来共策黎
眉去折尽寒梅易水濱

奉寿大学士洪都张公四首

律转洪钧万象移金茎承露出瑶池蓬弧已卜三千外花甲才周六十期雾拥青牛
来绛阙云飘黄鹄下彤墀凭高一望台垣色南斗中天正陆离

海屋筹增玳瑁筵东皇灵气夜周旋三台拱极星辰上八柱擎天日月前左马文章
鸾掖贵夔龙勲业鳳池传桃花漫忆西华外玉洞明霞万树悬

二百年锤命世才垂绅端笏住蓬莱三神山外青鸾下五老峰头白鹿来中贵传觞
临玉陛大官行饌出瑶台无论吉甫清风颂灿烂宸章属上裁

赤舄双瞻傍紫宸华夷谁不羨经纶安危一代征王佐侍从三朝识帝臣异日才名
金驥裊当年形貌石麒麟闲云极目匡庐畔能忆玄亭问字人（公在南成均日余出门
下命赋闲云馆诗）

雪中陆使君过访时大计初解严

千山飞雪灞陵桥策马长安路未遥岂为鱼盐来上国争传牛酒锡中朝绋袍碣石
交情古（使君往与余邂逅长安弹指遂三十载）彩笔甘泉气象饶八百璫楼春苑外
新诗随处勒岩峣

赠吴翁升

握手新知更酒徒由来奇伟擅菰芦星河静日飘雄剑风雨残宵击唾壶白玉堂中
人在否（翁升买一姬甚丽而早死集感怀之作为山黛阁编）黄金台上客来无异时
苔雪家能泛何用扁舟狎五湖

夜同胡孟弢龙君超杨世叔三孝廉周陈二山人集宋忠父第观梅花繁英盛开芬
郁殊絕适侯万二都尉在坐琳琅珠玉与花艷相映发同集诸君应接不遑余倾赏丙夜
几欲醉卧阁中作赵师雄罗浮梦矣归赋一律似忠父并博笑侯万二君

姑射双仙玉不如一尊花底斗璠玗梦回大庾繁霜外吟断孤山片月余寂歷寒香
飞枕簟玲珑疎影出庭除东风何处吹长笛极目江南旧草庐

区太史用孺过访小饮

浊酒翻歌意气长金门环佩慙徜徉词臣暖借青绫被倦客寒消白苧裳赋雪何人
还郢里谈天吾辈尚华阳相看伏枥同盟在未遣雄心阨太行

夜同子玉过用孺出荔枝酒轰饮至酣即席赋

烂漫名花压酒卮主人留客鳳凰池何烦大白呼桑落宛似轻红擘荔枝把臂浮云
春尽日持螯明月夜阑时莫教一骑华清笑腸断当年杜牧之

送赵盐铁之维扬

燕山晴雪照宫袍车骑东方意气豪台上千金骐驎骨池头五色鳳凰毛深花扬子
迷春渡遠树芜城落夜涛二十四桥人似玉画筵何处伴挥毫

送孟弢之沉中

东风帆色潞河漉无赖杨花舞别筵龙剑未收丰狄底蛟珠犹泣洞庭前千人漫拟酬春雪一士何妨守太玄（庠士仅二十人）此去长沙应计日受厘明主在甘泉

赠李大将军二首

谁夺天山盖世勲登坛长铗动星文陇西猿臂传飞将蓟北麟台属冠军十万瑯戈营似雪三千珠履座如云犹怜射猎平原后彩笔拈诗过夜分

金锁花深醉玉壶绿沈苔卧伴雕弧争传都尉晨风曲自写将军落照图转战频年屯涿鹿禽生遥夜出飞狐长缨不道终郎懦跃马萧关日未晡（李善丹青）

同贺伯闇集苏叔大听谢孙两孺子歌曲作是夕贺遂以获隼归

曲巷浓春到竹扉羊求相过并忘机尊前月似罗浮出座上云偏碣石飞花院管弦流翠幄棘垣灯火动朱衣慈恩百尺青霄外姓氏晨看彻帝畿

曾人倩春日移居招同诸君夜集余偶以他燕不赴赋谢此章

韦曲西南大隐留卜居春日近龙楼金门诏许东方待玉殿书将太乙雘柳色甘泉移砌上花香平乐过床头羣公正引挥毫兴愁绝青丝绊紫骝

奉赠大学士冯公

当年曾谒大冯君卓盖飞扬灏水瀆华国更传中秘草名家谁嗣太玄文香浮赤舄唐宫雾烛引绯袍汉殿云解道凤池霞色满余波长借白鸥羣

夜遇蔡弘父馆中呼卢戏赠时蔡将买妾长安

屈指新丰散酒徒长灯明月蹙呼卢关东意气惭吴质洛下风流羨蔡谟翠缕同心金是屋青丝垂手玉为壶曲江花事输年少一载婵娟向五湖

王文学以忠八十余徒步入燕访大学士赵公而神明茂甚诗以壮之

五字新诗一钓纶携将帝座问星辰聊行雪里山阴道肯逐风前洛下尘大厦万间依梓里危楼百尺近枫宸无嫌扫叶王生耄结袜犹能重相臣

送屠田叔之七闽

抗手春明话别离为君重赋七闽诗官曹盐铁酬文学佛寺金银卧武夷目断紫骝红杏苑歌残黄鸟绿杨枝侧生饱啖枫亭下可忘京华识面时

应挥使招集坐中北乐侑觞赋谢

燕寝清香散鹤羣玳筵霞色坐綉缦踟蹰舞袖花间出嘹唳歌喉竹下闻旅梦乍回燕邸月乡心犹共越溪云凭高试望东南气灿烂明星拂剑文

钱参戎移任北平二首

飞将新移右北平度辽横海旧知名珠弓射日千鷗避玉帐连云万骑鸣羽檄昼驰平乐馆饶歌春满受降城曾闻异日东征绩半夜天山已结营

一剑凌空舞雪花双旌摇日动龙蛇从来骠骑能忧国未灭匈奴肯顾家苜蓿城边吹箎策燕支山下奏琵琶大标铜柱祈连外第一凌烟摠浪夸

王通侯世叔以新刻诗草见贻卒業赋二首

奕叶金貂大海濱风流王谢旧无羣清标突兀麒麟画彩翰飞翔鸞鷟文勅勒歌成
才冠世燕然铭就气凌云宁知逸少将军贵擲管千花拂练裙

年少登坛笑伏波飞章云锦粲明河大挥陇右屯田疏重制伊州出塞歌谒帝华筵
闻杖杜怀人清兴入藤萝翩翩白马燕台暮频许荆高挟筑过

寄李逸人李好谈长生别余入咸阳白云将炼药终南与人世絕

黄河遥望尽飞沙一别难寻汉水槎白苧闲过韦曲柳青萍狂狎杜陵花长生策在
颜终驻太乙丹成鬢未华寄问旗亭耕种叟荒原曾熟邵平瓜

送鍾太学天毓归越省其尊人观察公

骊歌不断夕阳楼又折黄花赋遠游六馆诸生惊翰墨三河羣少羨风流朱衣上国
谁青眼彩袖高堂正白头归去若耶西子近丝纒烦为片云留

奉贈大司徒蒲坂杨公二首

当年袍笏借南宫片刺曾劳答孔融世德摠传■〈雨上只下〉八座家声遥羨四
三公乌飞絕塞军储盛粟挽长淮帝眷雄自媿銜知年少日蒲梢憔悴太行东

三朝出入佩双龙四岳谏谿近九重社稷勋劳周太宰川原筹划汉司农朱旗代北
边烽静绛帐关西世泽浓廿载长安聊再入不禁风雨蔽芙蓉

中秋夜大学士赵公招集待月赋谢

长廊秋色转斜曛握手平津上客羣酒出天厨容并醉羹调帝座许平分黄金城阙
笼香雾白玉楼台挂彩云酣醉莫辞过丙夜清辉萝薜已纷纷

中秋先一夕同吳允兆周元父集宋西宁园亭翫月申旦即席分赋得郊字

秋半园林易水郊郇厨频出大官馥茆堂一叶霜华下桂殿千花月色交极目蟾蜍
初展镜惊心乌鹊未安巢清光傥为侯门驻后夜重携上客敲

秋日王太学行父招同顾朗哉顾静父李叔操李本建袁微之魏颖超汪明生王资
敬集长安西曲

碧瓦朱甍大道傍招邀台馆尚华阳垆头击剑多燕侠泽畔抽毫是楚狂露黯翠梧
频换色风酣红芰乱飞香疎帘清簟人间世赌墅凭谁敌谢郎

中秋后一夕苏叔大招同汪公干胡昌世区德符携尊步月西长安遇赵汝元兄弟
痛饮达曙

一尊星斗挂长空良夜招携桂树丛玉镜尚圆千里外瑶台同望九霄中高林坠露
惊栖鸟遠塞飞霜落断鸿廿载素娥成遠别天香零落广寒宫

蔡立夫素不事曲蘖入都下忽以酒人名每一举觞辄酣畅累日夜乃醒醒则复呼
酒酒已复醉或至经月始复常自名连环饮得歌者苗鳳时置屏障间相酬酢余甚高其
风格戏贈此章

击筑燕台兴转狂离骚读罢思飞扬经时曲阜邀从事尽日糟丘卧太常帐里玉箫

传鳳吹筵前珠履集龙阳竹林风致看垂尽倦许频过白面郎

何长卿至自南都技益精絕赋贈此章

一掷千金散彩云愀然长啸大江濱生花驟入银钩梦倒薤俄成玉筍文帝命灵篇
传七纬人谁竒字话三坟玄亭十载清吟断为汝重题白练裙

汪象先伯仲招游城东阮姬馆即席索诗题壁间

落魄长安思转豪新声同听郁轮袍看花悞入林中竹（姬阮姓故）采药迷行洞口桃（亦刘阮事）小玉横钗频拥髻阿环持砚伺挥毫（妓名琼琼）酣歌剩发青莲兴莫遣汪郎笑二毛

汪象先复邀集阮氏明月楼

羸马东郊不厌狂坐携豪兴入平康观风上国来吴季（坐中吴生善歌）待月前溪遇阮郎石上桃花迷对奕垆头竹叶照飞觞青衫漫湿浔阳泪一曲琵琶万恨忘

长安秋暮

万户西风急暮砧钱塘秋色梦中寻毫端漫诧相如璧橐里谁操郭隗金长信宫寒云漠漠华阳社遠日沉沉登高且逐黄花醉遮莫霜华入鬓心

陈太史孟常过访

环佩翩翩洛下逢越溪犹记旧芙蓉瑠弧百中长悬虱寶剑双飞欲化龙载笔西清霞缥缈雒书东观日从容高楼肯作陈登卧大辟翹材傍九重

寿李惟寅五秩初度八首

紫气清秋驻玉宸苍生华夏颂经纶三千劫外悬弧客五十年中仗钺人文彩声名符鸞鷟丹青图像照麒麟崧高突兀生申后谁复成周话降神

楼台十二静飞沙带砺山河柱国家映日阶萸呈五叶（公以暮秋五日初度越三日乃为重九）先霜篱菊绽三花纷纭瑞鹤游蓬岛蹀躞名驹聚渥洼虎帐麟袍天北极人生何处觅丹砂

黄菊初开玳瑁筵羣仙齐降大罗天登龙预报重阳日跃马才过半百年北府声歌传出塞西堂名胜斗凌烟貂蝉肯挟元侯重五夜花生巨笔前

十万材官大将旗安危南北鬓毛知青萍错落谈兵夜白羽飞扬誓众时雁塞争传都尉曲鸡林频诵拾遗诗（李白亦拜左拾遗惟寅新集名青莲阁草故云）烽烟净濯榆关外赢取天河作酒池

廿载阴山慑大名天骄消息断龙城长驱蜃鳄扶桑界尽宿貔貅细柳营疎勒勋劳班定遠先零筹策赵营平由来文武中朝宪一颂聊烦吉甫评

登坛才气冠时髦横槊风流擅彩毫乔梓家声双鳳跃孙枝门望八龙豪（公诸孙正得八人）青油幕护淮山桂赤玉盘行闾苑桃尚记少年裘马事西园旬日醉葡萄

北海筵中醉未停南皮社里叹飘零青衫白璧聯燕市（余与惟寅尝合所作诗为聯璧编）紫绶黄金压汉庭宇宙同盟三十载江河齐算八千龄赤松少俟功成候把袂

驱羊入翠屏

海岳风期聚草莱江山文藻半莓苔独看鲁国灵光殿长峙燕关碣石台射虎纵横
当世略雕龙沦落异时才朱弦久绝云门调一为锤期次第裁

送汪象先还歙中余将卜居秣陵象先订余买宅杏花村同以明岁秋晚

青萍长夜舞离筵绿绮犹将别路弹岸夹丹枫云外寺江鸣黄叶雨中船乡心半咽
骊驹外客梦孤飞雁阵前携手杏花原上约凤凰台月几回圆

同王行父吴允兆沈孺休李本建魏颖超汪明生李叔操集惟寅宫保第得飞字

玳瑁筵开半褐衣侯门犹忆故山薇当尊紫气函关落绕座青霞碣石飞客醉南楼
秋浩渺兵谈北府夜霏微中天试望长庚色灿烂晴光彻帝畿

赵相国斋中芍药盛开即席赋

春色长安尚未阑平津西第近金銮琼林种就三珠树玉砌妆成七宝栏露浥朱唇
霞竞吐风回粉面月初团调羹况值台垣暇百遍休辞大白残

同王水部蔡祠部袁仪部集高比部正父邸中同赋兼送正父南还

一骑遥冲雨色来金门曾念旧蒿莱含杯四座俱仙吏授简三曹各赋才紫气丰城
看射狱丹砂勾漏待登台春光倘忆成都客人日诗篇海上裁

再用前韵送正父

斜日苍凉转翠苔一樽秋色指蓬莱西山林叶仪曹兴时正父以恤刑暂归南海
(柳子厚有秋日游西山诗蔡袁两君皆尝为仪部郎)东阁梅花水部才(王君水曹
)璧睨秦庭仍旧邸金残碣石岂空台南征何限登临句四百峰头取次裁

少室山房集卷五十八

●钦定四库全书

少室山房集卷五十九

(明)胡应麟 撰

○七言律诗八十首

大司马东明石公过访奉赠二首

百万良家白羽中驱除南北羨雄风坐收貔虎无双策谁擅麒麟第一功带砺河山
新气象旗常社稷旧精忠遥怜抗疏黄门日折槛长留玉陛枫

三朝词笔大如椽琬琰勋劳柱石前七尺安危悬宇宙■〈雨上只下〉钩离合动
星躔陈兵巨鹿登坛夜破敌卢龙出塞年堪笑班生头渐白欲将铭颂勒燕然

送罗浮陈山人

挥手元龙客思遐十年豪气共天涯愁深白下三秋月梦入朱明万树霞卧榻经年
闻帝座支机何处问仙槎乐游原上飞霜色惆怅离心折暮笳

同胡孟弢张仲立过集李惟寅宋忠父作

欲馆相如赋倦游归心频折大刀头桃花一树空含笑柳叶千丝尽唤愁狂逐春风

眠北里醉呼明月上南楼应门莫怪齐竽拙挟瑟时能过五侯

雨中同行父元兆集惟寅第作

卓帽敲斜白苧袍尊前华发渐萧萧西堂残暑驱纨扇南陌新凉上彩毫风度蛩声
油幕透月分萤影画墙高从知只字千秋在底事平原说四豪

夏日集大学士赵公斋中时羣从诸孙咸集

画槛雕楹焕陆离雪桃冰李坐含卮天回广厦流云入地拥长廊夕照移绕砌兰孙
夸奕叶当筵花萼斗连枝朝来霖雨商岩足好奏南熏上赤墀

夜同谢友可集曾人倩新居分得台字客罢复对奕丙夜

深居赢得近蓬莱路转黄金百尺台入座风流垂拱客登坛名誉建安才双扉积翠
西山堕四壁新凉上苑来清簟画帘争奕罢坐携明月向苍苔

寄赠李参知

突兀龙门重汉都谁从长揖望司徒天边紫雾飘熊轼日下红云抱轳种就甘裳
连百粤携来玄草半三吴胡床见说风流甚试问南楼月有无

为行父赠西曲薛生

谁挈名花到上林居然一笑谢千金江天桃叶凌风渡水国蒹葭抱月吟朱鳳半翹
綠比翼翠蛾微敛为同心白家长恨殊堪诵早拂东床侍玉琴

薛生以七夕初度故小字巧巧又清斋学佛复有素素之称行父拉余过曲中薛持
笺索题走笔赋此

名花移植近金盞一朵能倾十二栏巧思正鍾天女夕素肌长抱月娥寒清商管协
河东鳳（驻婺中出示吳下名流诗帖甚都薛于坐吹玉箫汪明生作白眼和之絕类燕
中瞽目弹琵琶者众为之大啸云）赤锦笺裁蜀郡鸾可但校书推学士龙门飞将旧登
坛（薛涛称女校书仁贵以白袍显素素于骑射甚精皆薛氏云）

李本建招集薛馆薛于弧矢最精挟弹尤称絕技是日纵观许为李作长歌赠薛先
赋此篇

曾伴天孙侍玉宸偷从太白下峨岷惊看絕代无双质解道登坛第一人（薛一见
余即以此语相赠）翠袖弯弧长贯月青丝驰轡不飞尘亦知八斗才华絕能复抽毫赋
洛神

同谢友可集王行父馆中

一尊长夜把蒲萄邂逅燕城贯锦袍彩翰旧飞三楚雪青萍初濯九江涛销沈往事
迷鸡肋歷落雄心擅蟹螯惊座莫言狂态甚风流王谢总人豪

王行父入都以鹅鮓糟鲋葛簟等物见饷赋此

玄经曾授楚三闾赋就河东出草庐馈我正思衡岳雁为君重食武昌鱼苍筠卷雪
真无价素葛含风玉不如漫向美人论识面十年魂梦倚璠玕

唐从事邀集酒楼观女乐即席赋此送唐之歛中

锦缆黄河忆共来辉煌袍笏下蓬莱风流暂借莲花幕意气频呼竹叶杯海上昼游还越郡天涯春色遍秦台双驹倘憩齐云石为扫题名旧绿苔

同王行父集惟寅斋头得来字

曲几疎棂照绿苔高阳狂兴逐人来即看谈虎当今事何减雕龙异日才座上彩毫仍楚泽门前珠履半燕台蛟螭剥落司空字犹记岫嶕絶顶裁（时出大禹承帝碑）

杨博士招饮馆中（博士成都人旧为长洲县尹）

白板双扉护碧苔何人携酒问奇来玄亭暂寄成都客宣室初还洛下才座里杯盘仍苜蓿宫前袍笏渐蓬莱无论麋鹿姑苏畔蚤逐飞黄上蓟台

仲夏初度惟寅为余举觞话旧感怀赋谢此什

年少相逢结客场翩翩裘马赋河梁风期肯逐朱颜尽意气偏偕白发长阁上麒麟云缥缈宫前鵙鹊月微茫桑弧莫话男儿事纵目天山大树傍

蔡穉含招同王恒叔永叔雨集

绕架琳琅四壁前翛然门巷似神仙风驱残热先开径雨送新凉骤入筵三俊翩翩飞宛洛一经憔悴卧幽燕毋嗟老眼风尘下赌墅犹能压谢玄

同王太仆蔡祠部集永叔黄门馆中

十日平原燕未空千秋河朔思偏雄双携彩笔邀王粲一抱朱弦和蔡邕太液轻阴回骤雨甘泉残照挟飞虹淋漓大白休辞醉何限兰心玉署中

周窾六招饮斋中

苜蓿空斋坐典坟居然野鹤在鸡羣前身宋玉偏能赋早岁陈思善属文絶顶匡庐打坠雪深秋滕阁卧飞云何须更作如椽梦粲烂朱华邳水濱（窾六临川人）

赠王吏部

江左高门旧不羣垂绅端笏气凌云千秋藻鉴山公疏一代菁华吏部文漏待明光天咫尺香含长乐雾網缦干将此夕堪延伫何限飞虹易水濱

惟寅治第于瓮石中得大禹岫嶕碑因函置壁间赋此纪事是日同观者王行父汪明生

十丈穹窿照海湄玄圭犹忆告成时不縁奇字中郎识那得灵文大夏遗雾拥蛟鼉晴挂壁星攒科斗夜临池他年手勒燕然碣万古银钩对陆离

赠京兆尹钱公

宦迹三朝旧建章风流习习满维扬高门奕叶推王谢大府聯翩接赵张谒帝竞传京兆尹入官曾记礼曹郎燕台百尺衙斋近灿烂黄金出尚方

赠答郭太史美命

缥缈蓬壶十二楼锵金鸣玉扈宸旒客传江夏无双誉人拟汾阳第一流紫闼霞明螭陛底青宫云绕凤池头遥怜后夜藜灯色曳杖频携太乙游（太史江夏人）

与君禹苏丈别且六载入都后忽闻以大计至余喜极策蹇访邸中君禹方病齿谢

客跃起拥褐对谈丙夜各赋一章

金银宫阙驾蓬莱入觐欢声汉使来一自骊驹传象郡那知龙剑合燕台新书碧荔
枝头寄丽赋红蕉叶下裁秉烛对谈■〈才弃〉永夜参差梁月堕莓苔

张中丞助父两以书寄余余亦两书寄助父而皆不达郎君后之都下再得手札赋
此奉酬

廿载梁园望目勤西风林叶转纷纭浮沈殷羨书中字明灭荆卿剑上文地尽中原
惟片雪天长南国有飞云悲歌屠狗燕台事寂寞年来未易闻

寿柳封君

紫气东溟日夜悬琼楼春色照华筵簪纓世袭河东后纶綍新传渭水前桂树一株
偏倚月桃花千度不知年谁论五马人生贵屈指青鸾绛阙传

区太史用孺招同屠田叔胡孟弢曾人倩崔子玉谢天章高正甫张孟奇夜集得霞
字

青荧藜火隔窻纱咫尺瀛州路未遐执戟共夸中秘馆飞觞频入近臣家毫端丽赋
燕台雪座上雄谈碣石霞不道罗浮天万里玉堂清夜看梅花

秋日汝元招集城西李氏高啸台即席赋

百尺阑干挂斗牛千家帘幙净高秋慈恩花竹深藏寺太液芙蓉远入楼槛外飞云
盘野鹤尊前斜日堕沙鸥脱巾洗足俱成趣莫负平原十日游

惟寅偶中人言不佞复将南发去住之懷凄然岐路漫成此章

虎将亲提十万师功成频奏乞归词宁知巧贝生文锦不信明珠溷素丝上将且开
黄菊宴游人先到赤松祠飞霜夜发河桥舫愁絕乖龙入梦思（时值暮秋）

别沈司空纯父二首

津亭黄叶正纷纷不断秋声马上闻客子衣装鸿雁队元戎旗帜鹤鹅军携归海峤
犹春雪望入河梁几暮云万里孤舟三刹畔不堪重泊过宵分

何限飞霜易水头木兰舟楫慙夷犹四愁是处羈平子八咏当年擅隱侯羽扇论兵
朝北塞胡床携客夜南楼谁言片月关山远夜夜双龙合斗牛

别李太保惟寅

一骑西风问故山淮南丛桂正堪攀华筵首列三千坐大厦长依十万间出塞功成
辽海戍携家秋尽洞庭湾高牙突兀云霄上清梦频飞玉笋班

别郭太史美命

午夜西风兴式微并门黄叶背人飞孤云万里还丹壑列宿中天覲紫微异代汉庭
谈结袜他年周鼎佐垂衣莫愁楚越音书断何限阳春落海圻

别王文学行父并所知薛生

长啸都门话草莱骊驹犹傍夕阳裁新诗絕代王摩诘妙舞倾城薛夜来尺璧故应
还楚峤双珠何日问秦台纱窻绣幙论心地飞梦时能到绿苔

次潞河少保赵公太保李公各遣人以绫锦追遗赋谢

灿烂双緘裘彩毫春风如拂潞河涛寒销学士青绫被艳借元戎赤锦袍范叔岂忘
归魏思苏卿宁惮入秦劳江干好伴羊裘客垂钓三山问六鳌

与行父别都门意殊恋恋抵潞水则象先尚未发舟把臂惊讶雄饮浹日言念行父
再赠此章

兴尽西风策蹇驴河梁酬唱未全虚那知流水思君日（徐干诗思君如流水）正
值阳关送客余（是日辰别行父夕遇象先阳关王维诗也）中断雁行仍比翼双緘鱼
腹互传书（行父象先彼此致书问讯互以不佞为言）由来象纬占离合遮莫寒光射
玉除

潞河南发永叔黄门虚所乘舟以见待赋谢二章

北上青冥问紫宸东归沧海话垂纶那知锦缆登仙客犹恋绨袍谒帝人万里长风
吹浪日千山晴雪渡江晨豪游是处堪河朔底事平原话浹旬

携手双星散玉函故人憔悴百花潭多情落日停丝管无恙西风入布帆大泽鱼龙
天上下清溪鳧雁地东南联舳且角新题句何限江枫逐夜谈

永叔舟中同王山人石父较奕作

天末归心堕钓纶青鞋能复恋红尘仙槎此夜偕王质旅店何年卧积薪满座星辰
寒照客半窗风雨夜留人无论甲子须臾事笔底桃花万树春（奕经有半轩风雨集）

次夕饮酣永叔得句云柝声频入夜霜寒余为足成一律时仲子弼侍坐而余于司
空为年家

柝声频入乱霜寒灯烬交飞片月残词赋千秋携玉树风期三世见金兰宁亲海甸
驱驰急送客河桥去住难回首烂柯吾旧宅石门天际候青鸾

林计部天迪招饮达曙作时舟次清源关下

华馆邀宾驻玉骢当筵霞色照新丰西园公子留明月东海词人擅大风十道帆樯
飞挽外千门弦管啸吟中匆匆把袂南州去腸断清源驿路枫（天迪宗伯公子也）

是夕伶人奏剧客有以救蛇获报者戏于席上赋此呈林君

千帆晴色下高舂锦席华镳夜过从尘榻久悬徐孺子角巾长垫郭林宗青云是处
披文豹紫雾何年化白龙愁絶呉枫江路遠飞霜寒彻曙天钟

天迪以新诗属序未及脱稿赋此报之

青藜遥夜并过从白帽聊将对曼容一遇仙郎惭倚马从知词客擅雕龙丹霞恍忽
闽山驻紫气苍茫岱岳重遍读新诗三百首江天何处觅芙蓉

雪中再作此呈永叔

迭鼓严钲报曙鸡关河寒色望凄凄飘摇落絮紫高■〈才弃〉绰约飞花罩大堤
鹤鹭乘风天上下渔竿横雾月东西兰芽暮茁休相咲玉树王家遍旧蹊

舟次清河逢王世叔通侯先是惟寅以尺素贻世叔至是遇于途中二律奉赠

大纛高牙镇海濱山河带砺汉元勋旌旗汴泗千艘合箫鼓淮徐万舶闻开府世传
严仆射轻裘人识杜将军翩翩白马平原外时见双雕落彩云

征西勋烈冠云台奕世威名被草莱十道军储横海节三朝人望伏波才抟风白鹤
飞旌度喷雪黄龙巨舰来后夜南楼豪兴发新诗何限月中裁

永叔舟中遇稚升水部再柬二首

声名藉藉动皇畿锦缆牙樯出海圻万鹳连云金翅拥双龙横雾玉鳞飞淹留彩笔
歌丛桂濩落青衫问采薇同学廿年年少友几人袍笏到丹扉

双旌寒拂大河东舸舰如云节制雄十载诗名传水部一时才望重山公风清
干阨浦梅花句月朗淮堤桂树丛咫尺牙璋龙阙畔金绯悬锡大司空

赠王中叔别驾二首（中叔为永叔伯兄次圭叔与余同乡荐三君并抡魁）

移官何啻入蓬瀛矫矫朱霞丽赤城荀氏一龙夸首占薛家三凤羨偕鸣江天楼阁
金陵壮海岸帆樯铁瓮明闻道画帘清兴剧欲将藜火较楸枰

名家曾识晋司空佐郡重看借大冯岸帙光阴诗卷外褰帷名胜画图中西江楚蜀
帆交下铁瓮金焦寺对雄屈指中朝优诏下肯令神足限追风

入武林寓沈材叔园亭作

行李萧萧倦客囊衣襟憔悴北来霜花阴忽睹扬雄宅草色重开杜甫堂刹远尽流
青嶂色帘疎长浸碧湖光亦知八咏才情富曾许风期在末行

曾方伯过访寓中奉赠

婺水分符接画桡声名八咏共岩峣纵横彩笔留三洞灿烂双旌驻六桥拥雾薇花
燕阙近参天棠树越城遥酬知未和休文曲独把干将剑色摇

再柬陆履素使君

矫首湖天望目长画船箫鼓出钱塘东京骤贵桓宽论南越都忘陆贾装幕下清霜
流彩笔楼头明月据胡床芙蓉万朵沈酣夜曾忆当年共酒狂

陆使君过访作

门巷萧萧闭绿苔高牙俄报使君来惊心雨雪违燕市把臂星辰聚越台寂寞玄经
沈草莽飞扬丹诏出蓬莱春花四百湖头寺彩笔将因次第裁

少室山房集卷五十九

●钦定四库全书

少室山房集卷六十

（明）胡应麟 撰

○七言律诗七十九首

沈侍御杨茂才同邀太虚楼燕集余适留滞湖上以薄暮过则宾主偕行矣戏柬一
律

萧萧寒雨隔孤篷惭愧平原十日同是处新诗怀沈约何人玄草故扬雄地偏云际

留双鹤天阔湖头滞片鸿握手后期堪永夜暂将离恨托丝桐

送程仲凯之两都

五夜山阴兴独乘海天遥望白云凝囊携剑色过燕市船载箫声出广陵何处新诗
酬北雁当年奇气羨南鹏高台倘遇荆丹辈好上黄金第一层

黄禹钧邀同张总戎泛舟湖上作

飘然飞鷁下澄波千顷其如叔度何郭外云岚芳草合湖头风雨落花多参差碧殿
浮丹鹜曲折朱栏竚翠蛾握手茂先雄剑在夜来星斗共摩娑

送赵符卿之燕中

夹道衣冠灏水傍欣看承诏入长杨龙池乍逐抽毫客凤阙新超尚玺郎旆拥飞霞
行碣石船随疎雨出钱塘中朝相业谁堪并竹帛行占太史扬

梦王行父并寄薛素卿二首

水殿云廊卧碧纱长风吹梦入东华高梧帝苑犹飞叶藜菊仙台尽试花江上数峰
湘女瑟河边孤月汉臣槎墙东是处新妆丽莫恋青门旧种瓜

天街何处问平康不卷珠帘见画堂粉面三千回薛媛朱颜十五侍王昌名驹蹀躞
黄金勒乳燕呢喃白玉梁斟酌章台人在否罗巾犹护百花香

同茅山人过胡上舍园亭作

面面珠帘护绿萝平湖十里漾清波长风广榭飘梧竹细雨孤亭拆芰荷愁绪顿随
秋色远赏心殊为暮凉多相逢大有高阳兴不驻征骖奈尔何

赵中丞以督学檄祠乡贤中丞宗鲁别驾尊人也

归来三径抱云眠片石江郎大隱年五亩尽忘中令贵一乡谁并太丘贤青门旧吏
怀风素紫阁名卿问草玄共识佩刀龙种在翩翩才望达甘泉

荧煌飞檄到乡闾犹忆中丞旧上书九列勲劳存琬琰三朝名姓重璠玕纳言司近
双龙阙廷尉门容驷马车咫尺遗风劳梦想高槐留荫在前除

送赵宗鲁之河间别驾二首

双旌摇曳蓟门东易水飞花扑乱红国宪久传中执法家声重覩右扶风交河壁垒
巡行近渤海楼船控制雄屈指循良推第一征书晨出未央宫

十载明经擅草莱青云摇曳佩刀来名家旧识中丞后佐郡仍推别驾才拥盖日华
流汉殿抽毫霞色动燕台应徐咫尺南皮近彩笔雄章次第裁

大学士赵公手书促驾赋谢二首

十年台馆布甘霖回首高山怅玉琴身傍红云扶日月梦随黄石到家林天边八骏
堪谁馭海上羣羊漫独寻惭媿草玄门下士大挥椽笔到江浔

苍苍云雾绕渔矶漫说商颜战胜肥丈室拟从三岛借尺书仍傍九天飞肩携瓢笠
来青琐梦掩琴尊出翠微清切上台连紫极不烦河畔访支机

淮甸张公旧守吾州将繇上考擢行省参知闻余僦居武林夙驾见枉且邀饮署中

并命舟资送京口感其厚遇赋谢此章

曾是司空旧莫耶精光摇曳傍高牙胡床正落南楼月大旆仍飞北府霞蔽芾甘棠
怀海峤青荧藜火梦天涯衔知未愜如渑报心折江城奏暮笳

流河驿遇蔡仪部稚含话别作并订约晤于武林

握手双龙去住悬河桥晴色对潏然中林骤报亡猿日北塞真同失马年曳杖天穷
苍岭外抽毫霞涌赤城前戴家精舍溪头近乘兴能飞雪夜船

送人还会稽

夕阳行色怅孤蓬大海家林挂树丛芳草不堪吴塞绿飞花犹恋越台红相看游子
悲春尽何限才人泣路穷明到钱塘潮落后书邮频寄北来鸿

登樵李烟雨楼寄沈纯父侍郎

夹岸春波漾绿苹千家晴色照垂纶独为烟雨楼中客遥忆昆明殿里臣九塞兵车
闲仗钺五陵冠盖避埋轮应知屠狗风尘下大有华阳击筑人

淮上遇景陵徐丈以参知督开新渠余目击其胼胝之苦兹工将告成先赋二律柬
之

四载功成翊帝尧驱山鞭石梦魂摇葱茏紫气腾天阙灿烂玄圭锡圣朝白浪南排
千谷回黄流东注万川遥当年璧马俱陈迹何藉宣房汉殿謠

海岸清秋奠六鳌空蒙元气护临濠平成载睹唐尧世疏凿宁知夏后劳大野寒风
回浊浪长淮晴雪下飞涛他年太史河渠传错落金泥映彩毫

徐参知总角与余游中间显晦殊途不相闻问者廿载兹邂逅淮甸特邀余为具署
中清灯话旧不胜今昔之感即席载赋二律时参知以青雀见假由此竟达燕中矣

踪迹云萍半杳然相逢岐路剩留连惭称鲁国通家后好是丰城拭剑年锦席易中
贤圣酒牙樯难认孝廉船衔恩不尽穷途思极目长淮大旆悬

濩落长途赋远游青帆驰载出河洲双龙吐雾莲花合片鹧乘风竹箭流搦管东南
空大泽飞旌西北近神州酬知一寸将何事日夜薇垣望斗牛

稚升水部余同甲子而艰于嗣育亦略同兹抵淮闻诸姬有将就馆者余为喜而不
寐先赋一律柬之

舟航长日寄菰芦紫气淮阳照客途蹀躞共夸骐驎种飞鸣今见凤凰雏芳兰九畹
移金屋（君侍姬美且都）丛桂千山照玉壶（用淮南小山事）为爱谢家庭树好三
珠林立报悬弧

彭城晚泊蔡别驾载酒驿庭话旧蔡以前西安令迁淮上署篆于徐

一尊何处慰穷愁清夜前除问蔡侯露冕中原新政绩鸣琴南国旧风流波声淮海
环公署山色徐方照郡楼明发可堪挥手恨青帆遥遯大河流

龚观察子勤旧分部越东于不佞大有国士之遇兹舟过济上奉寄二诗

朱旗曾闪越城头渤海重看政绩留南国双龙飞电彩东方千骑擅风流嵯峨杰构

灵光殿缥缈危梯太白楼后夜胡床明月满可容词客并追游

江风无赖木兰桡济上逢君兴独饶一代循良垂琬琰千秋词赋勒琼瑶参天松色秦封近际海棠阴越甸遥莫笑征途频系缆孤云随处是河桥

济上遇王世叔通侯时龚观察邀王同集太白楼以督运迫简书不能待辄此寄讯并柬黄说仲山人

玳瑁筵开半寂寥青帆无赖木兰桡波涛水国双鸿度星斗天门一鶚遥阅阅累朝传带砺诗篇频夜梦琼瑶何人共赋从军乐咫尺长安近灞桥

观察晋陵龚公招饮城南太白楼二首

百折危梯上翠台飞楼云际划蓬莱客疑供奉乘风到人似征西玩月来宇宙并悬终古迹山川重遘异时才当筵何限清秋色欲挽羣仙步玉台

五夜骑鲸八极游千秋陈迹尚高楼窗中齐鲁青如画槛外徂徕翠欲流呼吸旧知通帝座飞腾今见近宸旒酣歌敢作长庚态清切寒光射斗牛（呼吸帝座太白旧话）

翌日载集杜陵南池二首（有序）

杜旧有五言律见集中后人因为亭馆植荷芰池上岁久颓废龚公子勤至改葺涂缮焕然复新且以济寥寥一水乃两拾遗并有藻翰揭之千秋因建祠城东合奠太白少陵实词场一盛举也余以行迫不及赋诗辄并纪此序中

济水东回众壑驰才人名迹尚清漪高楼百尺曾供奉旅馆千秋更拾遗白苕飞扬春雪后青萍离合暮云时浣花溪上愁无限得似修篁荫夹池

万瓦鳞铺霁色分沧波长日下鸥羣当年海岱留词客此日河山共使君大业庭中玄草在孤芳池上白莲闻风流咫尺饶相望擗管长天对夕曛

王新建邀集楼船赋谢二首

幕拥清油近玉除筵开红拂荐郇厨侯门是处容弹铗相府何劳话曳裾天外欲归辽海鹤霜前频脍潞河鱼珠帘十二饶清燕一枕棋声梦寐余

古树疎花照绿苔楼船开燕客频来营门礼数宽长揖记室诗篇媿上材大旆生风鸣朔野飞旌摇月动燕台宁知一代元侯重彩笔华笺次第裁

秋日过茆厚之同胡劳徐三子小饮作

径裊松萝半榻悬图书四壁倍萧然挥毫是处惭先达伏枥能无笑暮年旅兴苍茫斜日底雄心寥廓断虹前千金抵售长门赋谁解成都觅太玄

赠南吏部

吏部声华四海闻山公才望世无羣南金并夺中朝誉东壁兼传太史文水镜清光悬白日冰壶寒色驻青云从知意气风尘外几夜长歌拭剑纹（吏部为太史从子）

送南太史归关中省覲

西风晨起木兰桡垂柳千丝拂画桥梦倚日华中秘近心飞云色太行遥翩■（衤迂）彩服娱春燕奕叶青绫话蚤朝一笑下机秦媛在箫声频夜合琼瑶（尊人亦读书

中秘)

同徐皞明茅厚之过胡上舍园亭听闵生琴作

夹道修篁带茂林一尊携手暮登临咸阳赵李频相过易水荆高不待寻花榭云霞
流秉烛萝轩风雨入鸣琴亦知湖海原兄弟暂借衡门话陆沈

赠孙水部用纯用纯工文赋学无不窥至弧矢之精侪辈尤罕及者

缥缈黄金蓟北台高天虹色异人来雕弧七札穿杨技彩笔三都视草才秦望山川
盘禹穴昆明池水夹蓬莱谈诗东阁饶清兴莫遣斜阳堕翠苔（用纯会稽人藉六诏）

过孙水部谈兵

一剑虚堂共眼明谈天打虱异时情曾闻漱石临沧海几为餐霞赋赤城燕侠未荒
屠狗事边庭偏畏射鵰名长缨莫漫夸樽俎远慑匈奴避汉营

孙用纯署中观射作

金仆姑悬铁裯紫髯豪侠旧孙郎曾携短剑过平乐欲请长缨出未央东阁梅花
聊入咏南州竹箭共称良何当手勒燕然碣白马横飞向大荒（用纯官水部而原籍越
中）

送人入蜀

龙剑光摇大海濱河梁斜日赋离羣三千蜀栈长飞雪十二巫峰半出云回雁祇从
亲舍落啼鹃偏向客途闻新诗一寄临邛肆投梦先过卓女坟

寄徐方伯二首

惆怅骊驹系绿杨一灯聊为故人长朱丝永日闲清庙白纈深宵出画堂耒耜风云
莘野畔舟航霖雨傅岩傍碧天吴越相望近对倚青萍拭剑铓

长啸归来话陆沈草堂新筑近东林南州尚忆朱旛度西洛争传绛帐临匣底星辰
蟠玉剑床头山水拂瑶琴探竒莫恋登高屐飞动蒲轮越水浔

赠黄山人说仲二首（时居王新建幕中）

短发飘萧话转蓬玄心寥廓送飞鸿楼依庾亮窥明月剑倚荆卿击断虹古洞天台
桃自发小山淮海桂偏丛燕然絶顶题名处可羨班生制作雄

幕府翩翩旧孟嘉居然长揖傍高牙携将江夏波千顷共泛山阴雪万家记室雄词
飞彩翰营门高啸和清笳荒台百尺斜阳里惨淡黄金宿暮鸦

寄区用孺太史兼柬高正甫秋官

四百竒峰取次游飞帆重溯潞河流纯钩乍合双龙剑彩笔偏修五凤楼日转薇花
连帝座星分藜火近宸旒翩翩常侍同盟在风雪华阳几唱酬

参知淮甸张公以崇正书院志属余校定且命赋诗寄以七言一律

画栋雕甍越岭前抠趋名迹俨羣贤宫墙百尺星辰聚俎豆千龄日月悬絶学龟鳧
留正统（婺中旧有邹鲁之称）遗经龙马识真传衣冠夹路甘棠化絶胜文翁治蜀年
闻惟寅谢事寄慰四章

铜柱勲名日月傍谁将薏苡溷行藏袖椎无客同朱亥弹铗何人过孟尝动色燕台
传市虎关心辽海问岐羊他年首事金城策老为先零出庙堂

焯焯声名驾四豪边烽十载罢临洮藏弓敢抱孤臣恨授钺宁知上将劳篋里千章
饶赋雪床头七发快观涛赤松黄石俱相待底用留侯辟谷逃

明灭烽烟大海头可堪投杼入龙楼降王尚自惊飞将醉尉能无阨故侯马革场中
心未老鸱夷湖上兴难留河山带砺先朝事遮莫功成赋远游

十万良家剑气腾天威南北倚凭凌虚疑都尉降沙漠不遣元戎驻灞陵宇宙论功
谁白马江湖流谤几青蝇宁知廿载东山梦一到瓜田恨未能

无题二首

行尽春风白鼻騮倾城倾国漫同夸纖腰欲妬三眠柳笑靥长欺百合花紫陌鸣鞭
朝映水青门挟弹午飞沙高唐颇忆襄王否独向词林说景差

窈窕珠帘护绿苔平康三曲近蓬莱黄鹂百啭金钿盒紫燕双栖玉镜台北苑丹青
元絶世东邻红粉最怜才传声为问章华客尚许刘郎隔岁来（曲中有善丹青而好游
丈士者）

榜人自潞河归再寄徐观察时徐丈以河工奏计晋阶

雪花长日坠干将何限酬恩国士肠挥翰敢期王逸少飞帆重借顾长康河流百折
蛟鼉静海岸千秋蜃鳄藏是处平成夸帝力玄圭三锡下明光

秋夜长安邸中同叶叔明灯下酣饮至醉作时叶以闽中公务至

木叶纷纷堕翠苔西山秋色半蓬莱青灯载下陈蕃榻浊酒频呼郭隗台云暝帝城
双鳳宿月残仙掌片鸿来无嗟宦辙风尘下歷块行占上驷才

赠傅吏部代同人

屈指兰陵校艺年飞扬环佩入甘泉水壶独抱风尘际水镜高悬日月前价踊层台
收骏骨光浮深狱辨龙泉吹嘘倘借东风力旦夕河东上御筵

夜集相国赵公府中话别作

衔恩龙剑色凄凄何限霜华照鸛鹑红日已看中秘近白云犹傍太行低亲闱菽水
飞魂梦相府藜灯惜解携莫怅燕吴成远别春帆先到潞河堤

相国赵公邸中夜谈因留宿斋头作

剧语深杯兴未阑平章西第傍金盞高斋敢谓青绫薄暖阁浑忘白苧寒密筱飞霜
流藻井疎桐移月下雕栏无劳夜望三台色万仞晴光烛翠峦

送沈司马请告还越西

易水寒风遡画桡归装行值广陵潮休文老去腰围瘦昭略狂来意兴饶白日鸿心
犹惨淡清冥鹏翼转逍遥看君司马书成后藉藉埋轮在圣朝

相国赵公屡疏乞休未得请见寄二章奉和

启事频年叩玉宸飞书遥夕降丝纶东山是处催贤佐北极能无仗老臣三殿风雷

驰豹尾九重天日耀龙鳞他时太史如椽笔肯放平阳蹶后尘

江天何处问蒹葭六洞三山照紫霞朱草欲寻仙梵宅赤松犹驻帝王家经纶魏阙
忧难竟黼黻虞廷望未涯十载飞熊仍梦寐沧浪能复恋鱼鰕

潞河夜泊同黄说仲过陶懋中舟中二首

白舫青帘半画图金尊银烛夜呼卢投簪元亮开三径泛宅朱公住五湖太液新霜
流菡萏长安明月坠菰芦荆高眼底看谁在目断燕城旧酒垆

跋扈飞扬纵巨罗一尊携手暮凉多江湖意气关萝薜（说仲时居世叔通侯幕）
海岱行藏狎芰荷片月新秋蟾阙吐双星明夜鹊桥过西风玉笛胡床上无限梅花落
绛河（时七夕前一日）

闵山人逸之工琴奕丹青而卖药长安市秋日过访即席赋赠

短褐翩翩向暮过居然名胜对藤萝燕京旧识悬壶技易水重闻击筑歌杏苑春光
频烂漫橘林秋事近如何西风渐起枚生色同步长安太液波

送李太史使秦中

乍捧龙章上玉墀飞旌遥别凤凰池云开乍识莲花掌月满频攀桂树枝赤社琴尊
操管夜黄河箫鼓落帆时朝元阁上春风绕为赋河山百二诗

送区用孺之楚中便道还粤

吟尽长安白鼻騮一函晴捧下金华青圭夜剪唐藩叶彩笔晨飞汉殿花星动斗牛
人倚剑天垂河汉客停槎飞云绝顶重攀处莫恋罗浮葛令砂

送钱将军之北平

斧钺朝移右北平东方千骑去还鸣霜飞大纛卢龙塞雾拥高牙涿鹿城将苑扬班
新授策词场韩白旧知名梅花一曲胡床暇草檄时过细柳营

与张仲立顾靖父别且十年余忽晤于顾山人斋中喜而赋此

忆别西昆二十年陵阳双璞尚依然声音未变论心后鬓髮频惊握手前风雨差池
河朔社乾坤寥廓汶阳田高斋此夜长虹色何羨黄金帝阙悬

熊茂初蔡伯华袁景从招集刘仲修园亭

掩袂风沙赤日昏长安西曲乱云屯花前一驻黄金勒树里频呼白玉尊汉柱文章
高八斗燕台弦管落千门竹林嵇阮俱陈迹突兀灵光尚帝阍

题李大将军郑大司马阅武诸营册

精甲横陈大野傍上公文武并鹰扬貔貅万队连营出鱼鸟千羣列阵翔剑拂天山
红日近旌悬辽海白虹长功成羽猎仍题赋不道词人是姓扬

送崔子玉之川中

细雨行装发潞河都亭握手听骊歌倾残竹叶能留否飞尽桃花奈别何郢里雪深
词客到阳台云满逐臣过鸾笺十样饶春色蚤寄西征向绿萝

送谢友可还临川

斗酒都亭落日悬清霜红叶舞离筵长驱骏足燕台上少别螭头汉殿前秋事转深
陶令菊归期曾约逵公莲东风韦曲花千树早发浔阳下濂船

秋日高正父邀同汪公干苏叔大游天宁禅寺

玉拱璇题照画廊珠扉银钥护禅堂青狮蹑雾游天帝白象拏云坐法王树老菩提
双刹在花残优钵一灯长前身我亦龐居士倘许先登七佛航

登天宁寺浮图送高正父南归得霜字

天豁西郊半大荒高秋云日散微茫三千界涌招提色四十门开舍利光易水荒台
传市骏罗浮归路问骑羊孤航拂曙河桥别月满长堤万树霜

寿李太夫人太夫人为本建孝廉母昆季五人

紫气秦台上碧纱支机何处问仙槎庭前瑞鳳啼孤竹（太公观察先逝）阶下名
驹列五花南岳金瑯摇彩日东陵玉舄步明霞当筵可认偷桃客一笑重来阿母家

送胡昌世还岭南

漫道虹光烛斗躔尘埃犹蚀旧龙泉不禁徐干成中论谁识扬雄抱太玄桂树霜林
孤渚外（昌世有别业在桂州）梅花乡国乱峰前罗浮翠羽人如玉絶胜长安杜曲眠

送汪明府之兰溪二首

双鳧迢迢出枫宸驷马喧阗拥画轮邑宰成都衣锦客关逢函谷授繻人春风水驿
栽花遍夕照山衙扫叶频回首御屏书第一循良何事问州民

河梁初日照栖鸦玉舄高凌大海霞射策中朝新上第传经南国旧名家香飞桃李
盈山郭秀撷兰苕傍水涯屈指黄金征汉殿漫将离色赋蒹葭

暮秋望日同潘少逸蔡稚含夜集王水部宅

过从良夜拂朱弦上客相携玳瑁筵工部诗名三世后司徒文望四朝前梅花尚忆
扬州署桃叶频呼白下船莫怅秋光重九暮月华仍向鳳城圆

是夕月色如昼水部改席庭中酣畅丁夜再赋

万顷蟾光浸碧空千门雁阵卷西风高天霜露金茎外大地山河玉镜中团扇欲辞
清暑殿胡床如坐广寒宫夜深谁唱霓裳曲极目飞鸾大海东

少室山房集卷六十

●钦定四库全书

少室山房集卷六十一

（明）胡应麟 撰

○七言律诗七十首

暮秋舟次南皮故人太末赵宗鲁以别驾经略河渠邀集行馆话旧并命小溪拨阮
放歌酣畅达曙即席赋赠二章

长夜高斋坐绿苔扶风名郡近蓬莱中丞海岱传高节太史河渠录异才月影似窥
桃叶下风声如和竹枝来谁言百里淹骐驎满眼黄金碣石台

促膝谈心宛故庐雕栏香阁夜踟躇千家海色尧封近九派河流禹凿余啸引雄风
来大陆歌延明月下前除腰间漫诧度刀在咫尺甘泉揽佩鱼

留别宗鲁别驾二章

河桥霜落片帆迟握手平原佐郡时共道宾游新北海那知名迹旧南皮毫挥五色
霞飞动剑拥双钩雾陆离一笑主人情不浅兰桡先订来年期（宗鲁署在泊头驿东偏
河西南皮皆汉魏古迹）

萧萧寒雨菊花晨握别那堪卫水滨愧我尚为浮海客知君元是济川人滹沱雪净
千门晓渤澥霞明万树春甘载羊裘仍大泽东风愁色话垂纶

重九前一夕宗鲁携具泛舟中流月光澄彻千里如练命北部乐人合丝竹二奚童
以南音佐之丙夜改席登台畅饮主客咸潦倒濡首复泛舟奏乐而归二首

缥缈沧波浸绿苔仙槎摇曳见蓬莱登高不为重阳住送远仍携片月来夹岸旌旗
紫舸舰飞空铙吹动楼台惊心后夜河桥别彩笔频将丽句裁

古树寒花夹细莎玳筵银烛照清歌城临大陆飞霜蚤舟放中流得月多鼓瑟似逢
湘女下抽毫如覩洛神过不缘别马风期远谁解沙棠泛绿波

九日舟次吴桥过顾生楼船夜酌即席赋

古道垂杨映绿莎中流横吹咽清波黄花九日凌霜发白苧三秋并雪歌朔气乍传
金柝冷秋光遥坠玉绳多朱门岂必非同调大有才人挟瑟过

寄周文学懋修余客岁过吴门宿其斋头听懋修歌自制吴歌甚适二首

郭外寻君系短篷芦花深映夕阳红江东似尔真公瑾吴下何人更阿蒙淅沥商风
回锦树飞扬春雪和丝桐纸窗竹屋青荧处苦忆疎灯夜半同

沙棠遥下越江滨握别垂虹几暮云胡广自惭东汉誉周颙宁负北山文风前郢曲
阳春度雪后吴歌子夜闻三畝太湖容客住荷衣行赴白鸥羣

与狄明叔别十载迩来舟过清源凡三系缆俱不及晤特紆道访之南郊

黄河南下半飞沙一别旗亭鬓已华玄阁千秋扬氏草青门五色邵侯瓜频年罢击
霜天筑几度空浮雪夜槎闻说玳筵歌吹满春衫行醉碧桃花

狄明叔后房姬侍甚都而新畜小鬟十余合奏南剧尤为宾客艳慕先是余未及覩
特此讯之

十斛明珠燕子楼白樱桃下最风流争夸静婉腰围细每忆娇娆态度柔买处赤绳
频系足歌来红锦半缠头龙钟定远龟兹外底事当年笔浪投

戏柬张刺史仲立

咫尺刀州近帝都为官何事执金吾青袍懒逐唐先辈墨绶争迎汉大夫越贾三千
饶泛宅齐姜十万尽当垆骚人一借循良传莫讶南皮旧兴孤（张时为清源守）

送林贞耀擢岭南大叅

慷慨芙蓉拭剑锋飞扬云色射双龙留题竺国三千界倚啸罗浮四百峰驿路梅花

春浩渺郊原棠树暮徙容那堪大纛钱塘外把袂河梁急暮钟

张孝廉话旧作

济上相逢话独长燕山回首廿年强听莺日醉秋千陌走马时穿蹴鞠场
历落雄心摧倚剑蹉跎华发付沾裳前驱为谢诸年少曾是新丰白面郎

为曾人倩题风木楼

日惨天垂大庾阴楼居人去白云深千秋尚记灵椿祝百折常悬寸草心
砌袅余花增怅望窗摇残叶助悲吟枝头夜夜啼乌宿肠断西陵月下砧

寄欧太史用孺曾内史明吾

双飞龙剑隔天涯五夜干将映莫邪客自西清传起草人谁东阁代宣麻
参差玉佩聯清汉突兀金茎驻彩霞回首长安犹尺五不堪魂梦到霜笳

任城待闸再柬龚观察子勤二首

高牙犹矗岱云间松色徂徕堕翠鬟北望燕幽饶大陆东回齐鲁半名山中
流鼓吹洪涛静远岸楼台碧海闲一代循良宁久借春风明月向朝班

绣斧霜天羨独持百城民吏候朱旗宫墙曲阜扼趋日郡郭琅琊眺望时李杜诗篇
千古并唐虞文字万家遗风流漫诧铜鞮絕几度南池岸接■〈平离〉（太白楼杜陵南池并在济上岱宗亦仅百里余）

寄懷徐参知二律（时君尚驻淮沛问）

十载元龙兴未颓使君高谊重徘徊争传大纛台端借不道孤帆阙下回千仞吕梁
云缥缈万山芒砀日萦洄浮家莫话鸱夷事愁絕乡书限大雷（时余以家君久不得问故暂归）

一舸晨移越海濱边淮林叶正纷纭飞扬使节持沧水憔悴亲闱望白云世业久传
中论就家声犹借太玄闻由来国士身堪许夜夜湛卢刷斗文

桑园晚泊民家篱菊盛开因寄宋通侯忠父

苦忆东京宋子侯娇娆歌曲擅风流金花灿烂紫金谷玉树玲珑照玉楼西第壶觞
频啸傲东园车马盛淹留一尊何日长安市醉插霜华任满头

夏镇得家君手书寄谢相国赵公一律

客舍何因恋采薇亲闱长日梦魂飞犹欣太白陪明月漫讶中台隔少微龙袞乍开
新鳳阙羊裘聊问旧渔矶春风咫尺长安道拂曙兰桡度海圻

王通侯世叔与余订约同舟余以诸故人挽留未发世叔解缆先行特驻济上为岱宗之游以相待寄谢此章

突兀徂徕控斗躔如云车骑去飘然行窥紫气天门上坐倚红轮日观前吴越封疆
千垒尽云亭坛壝万家传苍松百尺遥相迓一笑秦皇避雨年

舟抵留城追世叔说仲闻已达淮上矣

十日侯门醉玉壶西山晴色满燕都蹉跎上国停车盖缥缈秦淮下舳舻调合双龙

诗思远愁牵独雁旅魂孤遥知王粲徙军乐绕夜霜华照鹿卢

登邹观察彦吉鬯阁望九龙诸山

古桧新篁浥雾浓芳池晴色照芙蓉雕栏紫翠飞千雉画栋丹青列九龙搦管登坛
春雪莉衔杯开阁暮云重何因结社精庐畔杖履名山日过徙（彦吉构新居甚华整晋
陵胜概咸在目中）

七夕张汝元诸君醮金见过命乐工奏南剧申旦乃别

令节过徙正女牛天河斜挂越城头高贤总逐双星聚大火初当七月流玉树阶庭
懷乍遣金兰湖海兴难酬清歌烂漫红妆出秉烛风林尽夜游

挽吴鸿胪（年政八秩）

彩笔凌云帝座知投簪旋赴鹿门期三朝宦迹疎玄靖一代人伦重紫芝鹤驾乍飞
缙岭日鱼竿纔弃渭濱时佳城郁郁黄山畔泪尽阶庭玉树枝

后重九舟过姑苏再泊葑门访周文学懋修夜集坐有善歌者即令歌懋修所制新
词余醉憩斋头达旦登舟为别

乔木吴阊带浅莎子云亭下即烟波那知九日黄花艳重聽千秋白雪歌霜色乍侵
罗袂冷月光偏向玳筵多亦知古寺寒山近愁絕钟声夜半过

武林夜泊雪大作晨起柬陆履素使君

萧萧风色晚来严淅沥天花照画檐粉署乱飘云母屑雕盘斜拂水晶盐歌成宋玉
才情丽论就桓宽政绩廉咫尺段桥春思近蚤梅何处吐幽岩（履素时司盐铁）

入武林再柬陆转运

千骑东方皂盖从云间才望旧人龙金银佛寺游三竺盐铁官衙寄万松送客湖头
青嶂遠懷人天际碧云重桃花树树长堤上忆醉精蓝静夜钟

汪明府行春阡陌寄柬

行春车骑寂无哗人识仙郎上汉槎溪涧芝兰初绽萼郊原桃李竞开花飘飘玉舄
携云气缥缈瑶琴弄月华却笑当年勾漏令赐金何以问丹砂

夏日同诸君访黄元枢于禹钧刺史邸得中字

踪迹频年怅转蓬披襟聊此坐雄风平原十日心期在河朔千秋意气同南郭几凭
朝雨后西堂帘卷夕阳中无论异日黄香誉明月双悬射彩虹

夜同詹东图邵道卿过禹钧元枢邸即席作

妙舞清歌出玳筵一尊携手醉花前藜然刘向谈经夜草定扬雄作赋年话旧总深
天竺雨烹新重醉惠山泉不堪明夜河桥别憔悴双龙剑色悬（詹癖茗事有醉茶轩）

贺曾方伯迁左二首

灿烂除书绛阙来叅差红日近蓬莱河山十二分齐甸（浙中凡十一郡一州）城
郭三千控越台大树帝思冯异绩甘棠人忆召公才那知鼓吹西泠畔剩有闲情赋绿苔
烨烨双旌瑞气浓湖天晴色半芙蓉枫宸黼黻三孤近薇省衣冠百吏徙澌水当年

符借虎丰城遥夜剑成龙谁言陝服棠阴旧突兀黄金近九重（曾君旧守吾郡而家豫章）

王中叔擢北部归省天台以尺素相闻赋此代饯时永叔乞假里中二首

除书遥逐夏云来希白斋空赋浪裁突兀螭头还汉殿飞腾骥足上燕台桃花满路迎仙客棣萼分庭对上材烂漫瑶池金醴熟早携青雀赴蓬莱（仲叔倅润颜其署中轩曰希白有赋传于时）

三山回望暮云平岩石嬴镌傲吏名玉漏乍趋新建礼金波犹恋旧承明帆拖雾色临沧海旆拥霞标向赤城一笑季方重握手夜床风雨二龙鸣（中叔先任南曹今擢北部故颌联云云）

王水部招集署中

荧煌银烛照窗纱握手新知鬓未华忽向西园吹桂树浑疑东阁玩梅花峥嵘四岳排青汉突兀孤峰逗紫霞（署傍有四古石甚奇中一峯特高秀）锦瑟沉沉春满座何须蓬岛问仙家

伶人奏剧适歌陆浚明珠记戏成此章呈水部

朱门何事滥吹竽玳瑁筵开系白驹是处云霞联赵璧频年风雨泣隋珠华名第一归仙客高价无双得丽姝美酒十千■〈才弃〉尽醉共将行乐赋山枢（仙客无双俱剧中语）

无题戏为义山体

兀兀匡床旅梦遐银屏珠箔思无涯阳台作客千峯雨汉苑怀人九陌霞旧恨经年迷锦瑟新愁频夜泣悲笳桂堂东畔天如水空结同心咏上邪

唐明府长公以诗札见贻赋答二律

浪迹山川信短筇尘埃十载笑疎慵声华郢上推唐勒词赋云间识士龙囊草云霞飞薜荔剑花星斗湿芙蓉无论咫尺神交易不忝鍾期异代逢

绣虎经年识姓名飞鳧遥夜入承明诗篇六代夸彭泽文学千秋擅武城突兀山河留间气踌躇天地话同盟看君赤羽登坛日粲烂双龙匣底鸣

林贞耀观察以先集新草见贻赋谢

飞书遥羨笔如椽满握骊珠破夜眠三世青藜千载业一时玄草万人传星辰剑色延江外山水琴声越署前尚记阿咸林下醉风篁摇曳梦魂悬

再入武林柬王水部并怀蔡南宫

琅琊门阀擅三吴携手燕城醉玉壶尚记南宫邻北阙那知东阁傍西湖帘栊夜月飞吟啸船舫春风入画图谁道宦游乡信隔长洲咫尺在菰芦（曩在燕水部与南宫寓所仅隔墙头）

右方伯曾公过访赋赠二首

十二岩城坐啸中湖天晴色画船空薇垣镇静周方伯棘寺飞腾汉上公环佩乍看

燕阙底旌旗曾闪越台东犹怜竹马争迎日屈指黄金召次公

突兀高牙大海傍分符犹忆旧黄堂儿童是处夸骑竹父老经时识种棠北阙丝纶
催晓露西泠弦管竞斜阳双龙总属司空佩几夜寒花拂剑铓

读唐明府奇樟公传作

亭亭苍盖立莓苔彩笔偏宜太史裁四海竞传枯树赋千林重覩大椿材低枝乍挟
虬龙动老干遥惊鸞鷲来见说三珠瀛岛上可辞飞舄向蓬莱

送赵钧父之都下

黄金台下暮云平首蹶駟騶问去程帝里声华驰孝穆相门经术重玄成秋风大壑
潜虬化春水长天画鷁明莫道平津犹卧阁三台遥夜映吴城

方仲闇招同袁履善张汝元黄元枢陈忠父游湖上高梧飞叶菡萏盛开舟行乐甚
即席赋

背郭名园一径幽佳人同载大堤头千花别浦犹呈艳万叶平湖尽报秋夹岸轩车
红雾袅飞空弦管白云流沙棠后夜仍堪共方外无劳问十洲

袁履善过访余报谒秋湘馆则先一日避暑入虎跑矣泚笔题此章芭蕉茎上毋以
为嵇生之凤也

野外玄亭翳白茆朱门犹带夕阳敲寻僧何处开龙藏避客经旬住虎跑掩径寒松
飞雨集当檐修竹乱云交徙知叔夜疎狂甚片刺无劳续解嘲

赠王秀才秋夕遵考冬官招饮署中坐命嗣君出迓文恪公四世孙也

握手阶庭意气悬双瞳秋水照华筵荧煌玉树三朝后奕叶瑶华四世前江左乌衣
元上座山阴鸿笔旧如椽高台百尺云霄近翘首飞黄入蓟年

陆使君邀集净慈作有序

湖天晴色照楼船酩酊桃花又来年阜盖徧留三竺顶青鞋时曳万松前尘埃司马
裘空敝海岱元龙榻尚悬莫向盐车谈吏隠黄金台色正苍然

过任侍御池亭留奕达旦

菰芦何处一留连握手任安意气悬八郡风棱持斧日三山霞色烂柯年梅花惯觅
湖头寺桃叶频呼渡口船莫讶秋宵银漏促分行云髻簇华筵

寄周懋修文学并懷殷无美职方

飞书遥下楚江濱锦字横题白练裙作客潇湘频望月懷人闾阖几停云红颜总擅
当垆曲黑发先传告墓文最是沧浪亭下约不堪魂梦绕鸥羣（懋修订余卜居吴中）

与詹东图别十载余邂逅武林邸中乞余所著诗藪余拉其绘事为报戏赠此章

廿载都门醉浊醪重逢岐路兴偏豪携书笑我非麟角落纸看君尽凤毛（君名景
鳳）中岳乱云秋梦远少林深雪夜禅劳殷勤且趁吴山色对握如椽望海涛（詹别号
中岳余以邑有嵩高尝自称少室山人）

追和黄侍御滇游诗册（有序）

夏日过友人黄禹钧第仲氏元枢出示先大父滇游诗一帙李于鳞徐子与谢茂秦皇甫子循方君九叙施君峻诸名流遗墨咸在焉琅琊长公一篇盖其弱冠时作风骨已自铮铮吾邑章黄门适七言律亦整致不后诸君而今集似不载且章集中余诗备出此下岂文字之传真有幸不幸耶然此篇大类李于鳞或一时同社稍为彙括也元枢力丐余追和余于诸君惟元美子与石交余率未面而臭味风期不啻兰艾且黄君先大父夙与家大人同朝余虽晚未及把臂即一时文士麇契若斯趣尚固可概见因课一章并占缀数语卷末而蜀州散帙之感不能不怅惘于暮云斜照中矣

朱旗摇曳度丹梯白笔辉煌下紫泥宇宙忽看铜柱外山川遥问铁桥西猿声九驿催龙剑象迹千崖送马蹏咫尺风流庭树在缙缡吟眺夕阳低

秋夜遵水部招同钱山人蔡文学集署中其前庭古桂数株皆合抱芬馥袭人时遵考瓜代将及矣

握手青袍恋旧绶华堂风雾酒频携梅花东阁传新赋桂树南山忆旧题（古乐府南山一桂树）万壑天香灵隐近中峯月色广寒齐淹留莫唱王孙曲赫奕征书到紫泥薛叅知过访奉赠

蓬门千骑寂无哗肯向盐车问渥洼海上双龙新气色河东三凤旧声华旌旗日闪钱塘树鹵簿霞明澱水花咫尺寒光牛斗近支机何用望仙槎

黄贞父过访寓中余报谒已计偕北上矣

握手蓬门话太玄如云车骑去飘然长鸣騶駟燕台上淡扫蛾眉汉阙前是处名山藏彩笔何人流水和朱弦花枝烂漫平康下好趁春风十日眠

俞声父饷书万言推挹深至殊愧过情搦管附酬并期见过

破浪双鱼下越来何人携掷向苍苔开函尺璧飘虹气伏枥千金滞骏才流水胡麻寻玉洞（俞君有玉石岩志）名山灵药问瑶台莫嫌元礼门风峻五夜玄亭辟草莱

三楚卢使君过访时以考绩抵武林

五马风行治蜀年欢声驰颂使君贤重飞八咏双溪上旧事三闾七泽前画鹳高秋停雾雨苍龙遥夜揭奎躔明光上考亲题后烂漫黄金汉阙悬

卢文学以宁亲来婺中赋赠祁阳郡公子也

意气翩翩接雁行遥徙朗润识卢郎轩车此夕留河内阙阅先朝重范阳贯日干将虹惨淡凌空毛颖雪飞扬神交未极班荆思目断钱塘一水长

送王思延还洛中兼询陈别驾耀文

崧高云色正峩峩拂袖言归故绿萝三箭流星传紫塞片帆飞雪渡黄河徒余结袜心犹素羨尔投簪发未皤问讯颍川痴别驾君苗焚笔近如何

赠杨不弃山人杨工书画篆刻风致甚高二首

净几明窗照绿萝锺王遗迹自摩挲双钩忽覩唐贞观八法争传晋永和碣石谭天新尘尾严陵披月旧渔蓑弹歌漫作冯生叹剩有黄庭换白鹅

画史曾闻顾虎头诗情重覩郑台州挥毫白练霜风起研濯红丝雾雨流篋底灵文
传赵璧尊前奇气问吴钩羊裘莫漫披燕邸昨夜星芒动斗牛

贺赵仲子擢秋官作

图书东壁正逶迤环佩西清更陆离六翮骤飞鹓鹭省一毛曾占凤凰池香含太乙
云霞拥漏听长杨日月迟奕叶玄成门第远并将经术报彤墀

贺李廉访本宁初度二首

紫气朝看越海屯加餐消息徧乾坤文章一代灵光殿阙阅三朝建礼门北斗转依
南极耀长庚偏傍太微尊方城汉水看如昨大业桓文次第论（北斗用泰山北斗语）

东方千骑拥华筵金粟如来下降年黄菊盛开重九后丹桃长熟小春前明堂共倚
材如栋艺苑争夸笔似椽为驾青牛还汉阙书成函谷已流传（时重九后十日）

王罔伯至武林以彙辑武侯全书见贻卒業赋

梁父当年泽畔吟千秋鱼水坐谈深成汤聘后闻三顾大禹征来见七擒渭水飞扬
平寇畧祁山憔悴出师心风期奕世朱弦在史笔烦君次第寻

郑太初明府过访赋赠先是明府大父光禄君与惟敬惟寅及余辈结社长安今三
十余载故人寥寥独光禄巍然晚境并此寄懷

声名藉藉重璠玕赐履飞腾上玉除文举通家三世后仲宣惊座万言余花香樵李
连公廡柳色柴桑近故庐咫尺高堂人健在新篇光禄定何如

少室山房集卷六十一

●钦定四库全书

少室山房集卷六十二

（明）胡应麟 撰

○七言律诗八十首

御史大夫豫章徐公过访（有序）

徐公方督大工而破冗过存兼以赋赠勤渥殊非所安赋谢二律

万户千门辟草莱甘泉驰道拂云开梯航絕塞中丞绩柱石明堂大匠材邺郡风流
齐七子丰城虹色射三台宁辞病骨盐车下矫首长鸣郭隗台

天都翘首碧云重粲烂轩车此日逢廷尉高门容驷马司空神剑合双龙丹扉夜辟
乾坤静绛阙晨披雨露浓最忆登坛清兴遠千篇晴色照芙蓉

唐叅军相国赵公客也以需次居积燕中戏赠兹什

三尺芙蓉照鷓鴣居然大隱帝城西懷中片玉仍依赵橐里千金欲擅齐紫殿衣裳
云色近青楼弦管月华低何来短簿轻相笑计日斜封下紫泥

潞河侨居逾月媵人于首夏望前举一女逾旬复举一男黄燮卿王至卿胡静父胡
谷元茅厚之过集斋头戏作

拂曙悬弧向草莱经旬弄瓦坐莓苔雄雌敢谓双龙出络奕偏劳驷马来柳絮何时

吟院落芝兰遥夜发庭台无嫌婚嫁催头白九域名山候赋才

相国赵公命馆人除舍授餐以待余适产二雏未及趋赴先此寄懷二首

设帨悬弧仅隔旬翩翩游屐阻风尘加餐乍慰江湖客吐哺重劳社稷臣五岳尚平
先系念三峨逸少晚留神他年嫁娶酬生事万里相随叩玉宸

长铗归来叹夜眠黄金台色正苍然高悬一榻平津上骤启千门碣石前风雨未教
凌白苧乾坤何意问朱弦无劳大厦歌寒素柱石明堂四海传

王贞伯总戎曹能始计部偕僚属并游胡氏园亭昏黑言旋二君更衣拉余痛饮申
旦时张中贵为主人

急管繁弦兴入云新歌妙舞送斜曛花间乍别鸳鸯序竹里重呼鸛鹤羣飞盖陈思
元结客抽毫王粲旧從军无论夙昔司空佩永夜双龙合斗文

饮王茂才园亭戏作

碧天翘首暮云流笑揖双龙问斗牛赋就转深司马渴诗成不散杜陵愁千春海岱
留高迹万事乾坤托遠游大白满斟花满座姮娥今夜宿南楼

寿相国赵公二首

突兀平津见老臣天容黄发佐金轮八荒寿域开玄圃三殿祥光接紫宸操管异时
符鸞鷲悬弧当日兆麒麟亦知竹素流千载一颂聊同四海人

绮阁晨开玳瑁筵东华金醴百壶悬周流花甲仍三五迢递椿龄尚八千紫气正留
函谷外丹心犹照渭濱前他年无棣分封广玉烏虚劳大海传

长安逢吴允兆赋赠

布袜芒鞋易水游相逢频典鸛鹤裘论交宇宙谁青眼握手河山共白头上座飞譚
回九列后车传食遍诸侯他时叱石金华顶迟汝同登十二楼

同允兆夜譚作

残灯遥夜话飞蓬慷慨燕歌照白虹青海未停东伐骑黄河犹滞北归鸿毫端秀色
三都并筑畔雄心万古同一笑鍾期弦絕后高山重拭旧丝桐

过王中翰奕棋作

清簟疎帘照绿莎匡床曲几对维摩庭中白昼销碁局席上青山烂斧柯赌郡宣城
知得否连营淝水定如何无愁晚色催归骑大有银蟾绛阙过

答东阿张明府肃仲时肃仲遠命书贖物色余长安风尘中不遇几返胡孟弢特为
致之感而赋答并似孟弢

履齿苍茫破绿苔飞緘云色满蓬萊应怜疋马齐东驻敢望双鸿代北来遥夜石函
干斗气异时金镜补天才何当一别荆高筑抵掌华阳百尺台

送章行父之景州

五载玄亭忆问竒秋风晨起出關时天涯客况谁青眼海岱人伦见白睂一水移舟
燕月墮千峰摇笔岱云驰铜驼陌上花如锦大有山公醉接■〈𠂔离〉

赠翁少府

新样春衫白苧裁翩翩游骑近蓬莱桃花尚狎潘郎貌莲幕曾倾庾尉才岂为鲈鱼
还越郡仍驱驷马入燕台当垆漫奏文君曲夹座红桃映绿苔

访李汝藩狱中作

贯日长虹暮色凝淋漓杯酒颂如渑含凄小吏呵周勃雪涕中郎和李陵书就圜扉
肠拂郁剑埋深狱气翀腾文皇每饭思飞将荏苒金鸡下玉绳

王行父授官上林赋柬（有序）

行父久需次不调忽以是月拜上林喜而赋此

五载缙衣徧洛尘明光晴日拜丝纶唐宫全树依官舍汉苑飞花接帝宸玉陛含香
春缥缈金门持戟夜沈沦八川向背分流处能忆当时奏赋人

送徐大司空还豫章时俞羨长挈家附公楼船南返

挂冠神武思飞扬挥手浮云八座傍剑拥霜华辞碣石帆飞风色过浔阳天高自鉴
葵心赤地近初逢菊蕊黄漫逐羨门瀛海去宗臣劳绩在明堂

寄李长史

修竹叅差映夹池十年归梦阻江蓑曳裾汉殿春风蚤飞盖梁园夜月迟七发盛传
才子调四愁偏失美人期唾壶歌曲英雄老憔悴青衫易水湄

送宋少府之南康

一叶秋风度蓟台争传飞檄下蓬莱云收函谷青牛去雾拥匡山白鹿来帝惜扬雄
甘吏隐人占梅福是仙才香炉紫气三千仞为扫题名旧绿苔

送范参军之白下

藉甚参军鲍照贤携书遥赴秣陵船清江桃叶怀人夜绿水莲花作吏年大府旌旗
朝燕合高门袍笏昼游旋峥嵘鸚鵡金波丽赋就先徙洛下传

中秋同允兆诸子集赵相国第玩月二首

静夜胡床拂斗牛天街凉月涌青虬银窥帝释三千界玉倚仙人十二楼坠露迥沾
长乐梦飞云旋逐广陵游淋漓桂醕黄封在一洗都门万斛愁

吐握平津近帝阁盐梅佳节许同论蒲萄汉殿驰中使薏苡燕台出上尊玉笛飞霜
连四野金茎零露满千门霓裳阵阵天风落犹记嫦娥一笑温

林回卿过访作

一别钱塘梦未回朱明云色几含杯旌移合浦风前叶传拥罗浮雪后梅建礼含香
清蹕近甘泉司仆紫泥催三千駉牝驰金埒倘许飞黄托乘陪

查少叅入贺赋赠

献赋当时共洛阳翩翩裘马少年场追思文考朱颜丽转愧安仁白发长暮雨轩车
留碣石秋风船舫隔钱塘金银四百湖堤寺怅望遥天菊蕊黄

送斯惟武之塞上（惟武余郡人负奇气逸才与李允达善以尺牍千言谒余）

河东裁就笔生花聊逐秋风问汉查身着短衣随属国手提长戟事轻车千言谒帝心逾壮一赋従军鬓已华奇绩贺兰峯顶望万山明月照龙沙

赠邓叅军明府遠游尊人蚤岁弃官隱匡岳

手板那能谒路傍扁舟归兴逐浔阳叅军不恋芙蓉幕仙尉偏宜薜荔裳钓倚宫亭明月近樵穿庐岳乱云长谁言玉树阶除畔百尺峩峩在庙廊

送郑明府之山东

百里弦歌遍讼堂铜符墨绶正飞扬桥迎驷马过平乐烏化双鳧到上阳汶水星芒流剑匣齐山云色堕琴床看君异日循良宴第一雄飞汉殿傍

送邓遠游令浦江

九月西风木叶黄才人初释芰荷裳无论白雪夸金马聊为丹砂问石羊缥缈孤查凌大泽聯翩双鳧度长杨江城咫尺弦歌起桃李新阴匝讼堂

送邓遠游之浦阳时将以便道归匡庐为太公寿

黄金台下骤骅骝又见栽花大海头洞倚匡庐新白鹿關停函谷旧青牛三都赋在惊玄晏八咏篇成和隱侯溪上秋兰吾旧宅一觴行为灏纹留

送张博士

赋就河东绛阙传一官行李尚寒毡青衫乍脱燕城下彩笔仍飞越峽前去日云霄偕雁序到时星斗动龙泉扼趨咫尺南宫近莫滞侯生问字船

送张仲蔚之庆源

河桥尊酒醉还醒惆怅离歌薄暮聽五夜芙蓉双剑紫万山桃李一毡青何人帝里酬春雪有客仙都问岁星计日子虚天尺五生徒犹诵太玄经

送陈座师之岭右

除书初下玉宸班诏遣词臣谕百蛮一棹郁林先访石双旌梨岭尽穿山风云絶域聊乘障雨露明堂欲赐环花底刺桐春万树七星岩洞并谁攀

挽吴别驾

藉藉贤声动草莱翩翩半刺未尘埃三台总擅功曹绩八郡同推别驾才易水佩刀残月堕天都归棹断云哀无嗟司法吴郎逝巨笔曾烦杜甫裁

题管建初紫宸宣对册

五彩毫挥白练裙紫宸前殿召偏勤百篇留宴唐供奉三絶亲题郑广文斗色已看龙剑耀家声重诧凤毛闻长安多少担簦客咫尺何人覩五云

送万伯修中丞之朝鲜四首

鹄印朝従汉殿悬欢声云拥蓟门前休戈陇坂屯田日伐鼓渔阳出塞年结客威名驰豹尾封侯消息到龙泉胡床不厌王猷傲烂漫梅花笛里传

甘泉初锡紫貂裘剑色飞扬射斗牛定遠侯封天北极受降城筑海东头连营甲冑分丹穀拥道旌旗照碧油道是征西唵兴剧月华遥夜满南楼

万斛余皇照巨罗清江鸭绿笑颜酩山西上将能横槊塞北名王尽倒戈露布夜除
玄菟垒霜笳晴拥白狼河金闺漫作辽阳梦一战燕然石已磨

辉煌珠履将坛徙奕叶金貂帝眷浓座上短衣容薜荔尊前长铗叩芙蓉扶桑日出
消千蜃细柳天回驻六龙可念茂林词赋客当垆憔悴谒临邛

答张孝廉

貂裘垂敝尚游梁欲挽盐车上太行剑拥石函龙阙下毫挥金镜凤池傍中山曲米
浇愁尽大庾梅花入梦长道是妆台饶锦瑟佳期晨夕按霓裳

与黄山人舜夫别三十年绝不相闻问忽道遇于长安青灯话旧不胜今昔之感即
席赋此

把袂风前各怆神青灯明灭潞河滨三生恍覩前朝客万死惊逢绝域人寂寞未妨
龙剑老飞扬犹喜凤毛新同声咫尺荆高在散发狂歌傍紫宸

少林浮屠秋溟行脚都下以姑布术持卷乞题赋赠（代）

麻衣道者术亲传石室瑶编岂偶然一钵旧携中岳顶双灯今续大沔前封侯定远
宁无骨入相刚成且问年愧我黄扉头白早丹青行辟四门贤

寄王新建世叔并询黄山人

小队寻花易水傍元戎旌节乍徜徉千樯楚塞飞葭莩万斛吴都下稻粱赤管频年
贻上国玄圭他日告明堂翩翩门客饶朱履喜怒惟应共郗郎

夜过邓远游剧谈申旦先是远游赋五言八律见赠属余病冗未报兹当握别援笔
近体四章付远游小史歌之

落木萧萧夜过徙青灯明灭照芙蓉囊鞬骤觉中原尽旗鼓俄惊上国逢雾拥双龙
悬碣石风驰驷马到临邛他时广乐钧天奏莫忘斋头旧雨浓

乍释青衫赋远游翩翩文彩跨登楼踟躇易水新交定濩落夷门故老留寸管乾坤
才欲尽双灯湖海话难酬无论一盖倾如故已订词盟到白头

面壁传衣事已陈孤云寥落傍风尘青萍万里长为客彩笔三朝未授人把臂垆头
倾海岱持螯天末动星辰何辞大白终宵醉话入如渑对怆神

拥坐黄花照别筵西风无赖木兰船千人楚国回高倡一士成都抱太玄叔度经旬
贪晤语渊源少日慰周旋那能骤割新知兴极目河桥思惘然

寄赠项观察二首

幕拥青油坐绿苔高牙三辅近蓬莱函关吏识终军貌宣室神占大傅才雪地呼鹰
回乐堡霜天驰马赫连台谁言帅府多袁伏露布千篇属手裁

词组鸡林百镒传何人不慕项斯贤飞扬北府谈兵夜磊落南宫谒帝年绝塞雄风
回白羽长空明月堕朱弦高门倘记登龙客一借胡床玳瑁筵

寿李翁

蓬矢桑弧绣闼悬桃花开落又千年流沙欲度函关外弱水聊乘汉阙前拂曙霞光

三鸟使横秋霜色二龙泉无论宝篆方平授窈窕麻姑出玳筵

夜同张转运叶观察秦孝廉集凌比部宅坐中王大理孙太史曹计部皆同年友也
秉炬高堂话昔游升沈离合递生愁江东阅阅三才聚洛邑轩车四贵留下榻共青
今夜眼驱车全白异时头朝来一剑仍岐路相望邮亭各斗牛

答吴观察文仲时文仲以长歌寄余

彩笔翩翩汉史才黄金持赐出蓬莱长驱五马过秦望遥寄双鱼下越来大海云霓
晨仗钺孤城雨雪暮登台名山万仞金华色屈指题名到绿苔

锦字千行坠北平飞书天末故人情挥毫白雪流三洞露冕青霞接四明水国蒹葭
寒入梦山堂萝薜夜寻盟琼珠满握惭相报惨淡长途一剑鸣

章纳言宗理有事诸陵拉余同谒归赋七言四章

壶中何处问三山攀路苍茫弱水环雾拥六龙回地轴云扶双凤出天闕雕梁翫玉
丹台净画棋铺金绛阙闲五夜灵旗清蹕近萧森风雨落人间

百二河山望未涯飞流环玉漱云芽宫悬剑舄长春近殿拥旌旗太乙遐古洞藤萝
时坠雪仙源桃李乱飞霞钧天忽听箫韶度七日那能记暮笳

中天晴色敞玄扉秣马平明度翠微碧嶂巧分千鹫立苍泉寒擘九龙飞云霞散彩
铺瑶阙象纬飘光动玉旗旧识上清童子在应门犹着五铢衣

突兀玄宫护翠苔金银随处现蓬莱乾坤南北昆仑峙日月东西泰华来永夜旌旗
环帝蹕清秋弦管逐仙台鼎湖一望龙髯近欲起轩皇驭世才

题赵比部崧高卷

六洞三山缔夙缘崧高云色正苍然金身百丈飞龙日宝篆千秋记凤年杖锡乍移
吴苑外香灯长护越台前菩提一钵开甘露犹忆中林静夜传

投赠沈相国八首

金鼎调元赞玉宸羣公环立让经纶华夷一代瞻王佐社稷三朝仗帝臣绛阙频年
回雨露彤墀遥夜接星辰异时伯仲标鸿业肯向伊周蹶后尘

万丈花光笔似椽明时蚤岁夺青钱垂绅迴立烟霄上振佩长趋日月前白发枢衡
调鼎夜丹心帷幄运筹年平津漫诧封侯贵赤舄勤劳四海传

屈指蒲轮魏阙征苍生翘首属蹇腾文章八代占重起礼乐千年待中兴西极云沙
驰象马南溟涛浪浴鲲鹏亦知赐杖堪扶老未许东山日暮登

飞书遥度玉门闕鸭绿江清燧火闲万甲骤空玄菟垒双旌遥夺贺兰山纷纭虎帐
咨良策磊落麟台画壮颜漫说平阳饶汗马中天一柱定谁攀

十年调鼎系遐思霖雨亲承玉陛词八士夜登元恺族千官晨谒帝王师逶迤树色
长春殿缥缈藜光太乙祠惭愧钧天韶濩在入将流水奏朱丝

冠代词华八咏俦中天霞色四明流黄冠未许归贤相彩笔聊将和隱侯环佩西园
晴赫奕图书东壁暮优游无论消渴须盘露百尺金茎望斗牛

廿载貂裘客路难青冥长日望鹓鸾华轩肯挟三公贵大厦宁忘一士寒日月夔龙
新政府风云扬马旧词坛玄亭不厌侯芭学扫叶频过十二栏

十年懷璧卧山堂老逐盐车上太行矫首乾坤空骏骨關心岐路半羊肠星河暗蚀
芙蓉佩雨雪全凋薜荔裳道是姬公勤吐握将因词笔献长杨

感事

九折曾闻蜀道难绋袍谁恋故人寒长鑣杜甫朝朝斲短铗冯驩夜夜弹垂首乾坤
皮骨尽侧身湖海鬢毛残天风习习扶摇近会向南溟刷羽翰

送李叅军使秦中

朱节朝持下紫宸北风扬旆潞河濱飞槎渭水星为使授简梁园雪照人去路正逢
葭莢夕归期先趋棣棠春遥遥草色西池畔何限新诗入梦频

赠孙太宰二首（代）

名世中原间出年三朝人望属材贤冰壶独抱青云上水镜高悬白日前珂色葱茏
分建礼履声摇曳动甘泉千秋启事传緹帙肯让山公笔似椽

征书晨下建章宫赫奕蒲轮眷注同黜陟千官周太宰安危一代晋司空尊壘尚忆
东山胜柱石遥瞻北斗崇咫尺黄金飞兔满骊黄聊为辨追风

章纳言得雄过是将益燕山之数贺以七言一章

梅花南陌正氤氲兰萼东风瑞气含四凤桓生重遣一八龙荀氏仅余三充闾此夕
传歌颂跨灶他年入笑谭屈指琅琊符胜事珠玑林立待分甘

陈罔卿过访二首

危楼百尺暮云孤象纬寒飘玉鹿卢校士当年曾越郡空羣此日更燕都天闲尽获
龙媒否海甸仍求骏骨无最忆牙樯兰水畔沧浪一曲和潜夫

高天云雾玉宸班咫尺龙鳞近圣颜静夜鸣珂朝北极清秋拄笏望西山风驰騶袅
三千队电拥骅骝十二闲惭愧方皋谈灭没盐车憔悴太行间

惟寅病榻对谭作

大厦华轩接上林闲窗孤榻类山阴朱颜我向愁中掷白发君随病后深枥下骥心
时惨淡杯中蛇影任浮沈蒲团兀坐黄粱熟万户燕台急暮砧

徐文明馆中聽歌

清歌一曲暮云长秉烛呼卢万事忘朱履三千回别院金钗十二照华堂谁言工部
生来瘦漫说司空见后狂妬杀卢家双乳燕春风聯翼向雕梁

夜饮徐文明邸即席作二首

相逢湖海尽词才车马苍茫踏翠苔万里乡心同越峽新年春色到燕台筵前栢叶
风初动庭际梅花月渐来遮莫河梁成遠别黄金新诏出蓬莱

散发狂歌动紫宸天街良夜月如银朱颜暂借逢春客白发偏惊受岁人宇宙风期
回击筑江湖消息报垂纶高阳是处名流集痛饮何辞大白频

胡谷元招同茅陈诸生夜集余适留滞都门不及赴

折简招邀玳瑁筵那知春色负华年才人并集春明外倦客孤吟建礼前易水乍闻
新击筑稽山殊愧旧移船■〈才弃〉成十日平原醉栢叶椒花次第传

寄何转运（代）

严城平楚正苍然突兀高牙大海悬三辅云霞双阙底九河冰雪万家前公交车竹
箭同登日宦邸梅花独赋年漫说鱼盐留滞久家声八座在甘泉

少室山房集卷六十二

●钦定四库全书

少室山房集卷六十三

（明）胡应麟 撰

○七言律诗七十一首

赠戚山人伯坚（有序）

始邂逅戚山人伯坚于弇州园别去十载而山人游金陵获少姬丽甚以壁立复出
谒所知适冯太史开之倡社湖上遂留馆太史家拉余赠章戏成此什并呈太史博一掀
髯云尔

散发相逢大海头弇山堂下即糟丘余归故里携通德汝向新亭载莫愁底事歌鱼
来越郡谁能骑鹤上扬州皈依合傍莲花社天女维摩话昔游（时太史拉诸名胜为净
土之会）

七夕冯太史开之邀同俞羨长潘景升吴泰宁德符喻叔虞傅太学王山人集湖上
观少姬走马戚不磷泊仲君继至余夜分返太史以轻舟载羨长不磷宿玉莲亭

折简秋宵兴欲狂东南名胜半沙棠天孙河畔停乌鹊地主池头宿凤凰绿树回风
全送暑红蕖摇月细生凉无劳更觅牵牛信一骑湖头到谢娘

过天津访万中丞伯修四首

建牙吹角下蓬莱飞檄千章尽手裁晋代诗书元帅业周家文武上公材还摇大纛
天骄遁曾系长纓日逐来漫道平阳曾第一无双筹策照云台

翩翩白马气凌虚老将渔阳尽不如出塞盛传破敌策筹边频上护羌书千檣跨海
长驱鳄万弩乘潮各射鱼落落元规豪兴在南楼明月半长裾

威名十载镇祁连又见登坛仗钺年列校总驱横海节偏师遥下伏波船风行蜃鳄
扶桑外观筑鲸鲵细柳前屈指饶歌飞捷夜抽毫何客代如椽

玉帐梅花照巨罗南楼吹笛夜如何中丞节钺行三辅大将楼船出九河赤日桑干
穷兕虎青天蒲类息蛟鼉燕然片碣题铭处万丈穷崖絶顶磨

李万户过访舟中作

寂寞孤帆滞水滨双旌俄报李将军虬髯本自山西出猿臂先從塞北闻异代凌烟
谁左席他年冒雪有奇勋燕然絶顶聊相待为扫班生石上文

夜集万伯修中丞署中聽奚童弹琵琶即席赋

鼓瑟吹笙夜未阑狂歌醉舞烛花残清光琥珀浮金笋逸响珠玑坠玉盘细柳生风回绮席丛篁扶月上雕栏真堪十日平原饮莫向叅军话路难（行路难始鲍叅军）

同陈子卿胡灏元集黄茂才馆茅生击鼓侑觞席上戏题

旅鬓萧然越客踪故人文酒暂従容风霜骤击渔阳鼓云雾深藏碣石钟春尽短衣残薜荔夜阑长铗笑芙蓉朝来曲水堪沈饮何处桃花问旧峰

春日黄文学馆中送陈子卿南归访马生即席赋

行李萧萧易水寒不因题赋到长安魂摇蓟阙千门树兴入湘台九畹兰击筑风云晨肮脏抽毫星斗夜阑干东归未值秦淮棹愁絶春风两鬓残

禊日再送陈生

布衣行色又风尘携手平原未浹旬易水悲歌逢壮士兰亭修禊属才人扁舟自许浮东海龙剑犹堪射北辰归去白门机上女莫言裘敝出三秦

黄燮卿王至卿胡静父灏元茅厚之过集

萧萧四壁似禅關纵饮宁辞十日闲邂逅江湖成白社叅差河朔见青山垆头乍发幽人兴庖下频开倦客颜台殿黄金原咫尺朝携瓢笠共飞攀

送包稚升观察之蜀中

握手河桥兴未阑春风笳鼓出长安千波已见淮流静九折宁辞蜀道难酒肆才人原犊鼻花溪词客尚渔竿岩嶷雪色三峩上何限新诗勒翠峦

首夏少傅赵公斋头縱观宋元本朝书画名迹出家藏焦尾命作梅花三弄饭罢奕棋留连浹日即席赋诗

画槛雕楹白玉堂高山流水落胡床墙头树色分长乐户外花枝接上阳笔札西清悬琬琰图书东壁散琳琅翛然一枕蓬壶畔卧聽棋声入梦长

少傅赵公斋头烹供虎丘新茗适侯家以紫牡丹至清香艳色应接不遑即席二首
杨花飘落遍天涯十二雕阑散曙鸦玉盃坐邀阳羨月金盘驰送洛城霞清香恍坠幽人席艳色偏归上相家入梦故园红紫遍千峯寒瀑漱灵芽

楼头红日近扶桑乳燕叅差入画梁雪乳乍分卢处士天香元属魏平章移来上苑非金谷烹处中冷是玉堂莫便清风生两腋聯翩倾国在明光

曹计部访寓中赋赠

词藻翩翩跨七闽楼船曾宿大堤春辉煌结驷寻燕侠缥缈惊鸿问洛神阙下云霞飞锦綬湖头风雨湿纶巾知君暂驻玄亭笔盐铁将成献紫宸

詹司理过访并邀集寺中夜谭司理家去余邑百里而近

驷马骖驔碣石东持杯萧寺问飞蓬无论客思孤航外何限乡心一座中说剑春云流绮户抽毫晴雪照丝桐尘埃暫试空羣足荏苒黄金出汉宫

王将军过访不值次日遣信相闻走笔四韵代东时方拜总戎之擢而余寄居胡氏

园芍药盛开故诗句云云

高空遥望碧云残细雨萧萧一径寒小队朱旗频出郭元戎金印乍登坛双龙色照芙蓉匣驷马光生芍药栏为报主人林竹在天风晨夕候飞鸾

方伯苓徐彦伯胡静父王孟博吴云從同集茅生斋头

相逢湖海合吴钩笑拂青萍上酒楼坐里风霜流覆局檐前星斗坠藏阍三生障业输芒屨十口生涯问敝裘取高歌酬令节红牙催拍按梁州

王贞伯过访胡园作时澍雨骤至轰饮几达旦归

握手高阳尽赋才叅差游屐点苍苔虚疑上客寻花过总为元戎看竹来急雨乱飞巫女峡雄风遥度楚王台谁言定远先投笔粲烂如椽勒草莱

王总戎携酒同登新城南楼即席赋

突兀飞甍潞水头栏干十二挂朱楼云拖汉阙双龙度月拥燕城万雉流坐里胡床应尽兴登来彩笔鬻销愁山川信美吾乡异聊伴元戎作壮游

东黄水部孟修并乞其绘事

才名江夏世无双耆旧襄阳接姓龐兴里烟岚流彩笔吟边云日弄纱窗鸿冥大泽心长远驱逐中原意已降识面长安吟晚暮烂烧红烛醉银缸

花朝过刘金吾斋阁小饮即席赋

暖日暄风半画堂金吾西第暮传觞图书粲烂偏盈架綠竹叅差尽绕梁赋就桃花潜弄色吟余梅萼乱飞香接■〈屮离〉颠倒休辞醉能忆通家旧雁行

杨不弃吴用卿追送潞河作

惨淡尘沙吹别颜都亭杨柳并追攀河梁客趁双鱼下海岸人浮片鷁还白芷淋漓燕雪底青萍摇曳潞云间谁言岐路分飞近縱饮犹■〈才弃〉十日闲

曹计部至自盘山极谭夜宿招提之胜赋此

乱山回合暮云齐流水桃花汉阙西絕顶双灯悬舍利中峯一刹现菩提萝深忽跨猿猱上树古聊同鸛鹤栖最是夜深铃铎畔天鸡如傍法轮啼

过万都尉馆赋赠（万君虚懷好学风致甚高）

坐卷珠帘夏日长主家楼阁凤城傍金池草色连兴庆玉洞花枝映寿阳逸气千秋回处仲玄谈一代擅真长春山写就难停笔次第蛾眉出后房

过区用孺太史适长公绳玄诞日即席赋赠

五夜文光切上台三春晴色绕蓬萊桃花漫向秦源觅棣萼先從汉殿开紫气網緼红日驻清歌摇曳彩云来丹砂勾漏容相问六翻從君跨九垓

送吴太学游边

燕台秋色乍阑珊少借垆头十日闲说剑风声流易水弯弓云色坠天山平沙夜伴孤鸿宿大漠朝驰驷马还愁絕南楼离恨杳西风吹梦出阳關

潞河东郊同胡生踏青即席赋

春色三分二已过空门相逐问维摩新红破萼盈高树浅绿回茎上细莎雪里袈裟
留絕域风前杖锡度恒河頽然一饱香厨饭坦腹绳床话贝多（时饭维摩庵中）

送王遵考使君之岭南

鹵簿春风出禁城驂驪五马向人鸣南州桂树传新赋东阁梅花问旧盟铜柱乱云
行处合金门残月望回明名山莫恋罗浮色前殿长杨识姓名

熊中丞出塞诗

百万曾提阃外兵君王西北问长城埋轮疏上豺狼避横槊诗成虎豹惊川入大非
晨按垒河当无定夜移营雕弧白马翩翩去尽遣降王歎帝京

于凤鸣得雄赋赠

窈窕笙歌出画堂将雏一阁暂徜徉羣珠合浦争呈艳片玉昆冈乍发祥藪畔青云
麟趾集池头丹日凤毛翔无劳骨相占英物已聽啼声出后房

江汝成驾部留集丙夜即席题

振策西游半五陵旋车聊待帛书征三天会见翔孤凤六月何妨息大鹏欸语凉风
生白鬣酣歌明月坠青灯犹闻彩笔多奇句题遍慈恩第一层

黄观察自沛上擢济南赋柬二首

奕世通家问孔融频年经国倚司空千檣大海羣飞鷁六传高天并驾熊雨浥杉松
秦帝時风翻匏竹鲁王宫犹能一识荆州面漫向關河问落鸿

竹箭南州贡竞输梅花东阁梦频趋彭城浪息三千仞济郡泉疏七十区白马何天
沈汉壁苍龙随地献隋珠拾遗池上飞豪翰笑揖长庚下紫枢

过济上昭刘大司空奉赠二律

玉匣双龙挂斗躔金堤千鷁度楼船褰帷大吏羣趋日缓带中丞独坐年碧汉云霞
高凤羽黄河冰雪净蛟涎无论四载驱驰急烨烨旗常太史悬

宝篆琼函焕赤文支祈摧伏奏元勲旌旗泰岱瞻红日节钺琅琊驻彩云搜粟漫劳
横海校飞刍何待伏波军由来据饋深延客倘借胡床坐鹤羣

淮上访王世叔留集署中座出新鮓共饱即席题

急管繁弦次第陈歌鱼宁叹暮途贫峥嵘铁网飞银鬣粲烂金盘照玉鳞岂为江莼
能唤客祇因岩桂共留人孤亭环碧他年过遮莫羊裘动帝宸

东叶侍御初抵武林（叶公旧为余邑明府）

霜威拂面豸袍悬突兀声华柱后传鼓吹春风吴苑外楼船秋水越城前芝兰竞发
曾游地桃李偏滋旧植年珍重鱼盐聊驻节抟空鹏翼上甘泉

送赵总戎之北平

大纛高牙照彩虹除书遥下建章宫前驱半杂三河少别队新分六郡雄驂裏登台
呈逸步麒麟开阁待殊功平津突兀钧天上吐哺能无忆转蓬

张叅知睿父过访赋赠

委巷萧疎卧绿苔高牙俄报上公来溪头弭节临三洞海畔扬舲度七台此夕星辰垂草莽当年日月扈蓬莱长杨一代推题赋白首能怜问字才

寄吴文仲使君八首（先是文仲以长歌寄余兹复屡使过问积成八章）

大纛飞扬驻草莱孤查寂寞坐莓苔花溪乍识元戎过叶县争传令尹来雾涌双龙呈玉匣云驱六骥上瑶台中原匠石凋零尽敢向灵光惜赋才（文仲旧为余邻邑宰）

百尺清潭理钓缗双鱼何意向沈沦维舟敢道菰芦客入幕偏容草莽臣海峤尘沙埋骏骨天都日月覲龙鳞峥嵘八座家声在香案能无捧玉宸

十载青尊帐未同云天随处系孤篷东方号令驱千骑南陌音书坠片鸿洞口观碁销永日垆头击筑动长虹竹林旧眼容青白何事车前泣路穷

白羽登坛意气豪偏従寒谷恋终袍三年天姥迷清梦十日江郎醉浊醪紫电苍龙明说剑朱霞白鹤丽挥毫烦君一棹相携去并赋钱塘八月涛（吴公自四明擢三衢）

輶车晴驻越台前指点金华叱石年万井霜飘观察旆双溪云泊孝廉船囊中旧草余孤愤案上闲花落太玄漫道经时流水絶相思长抱伯牙弦

缥缈寒霜坠鹿卢江州卤簿昼频呼犹疑玉舄飞三洞不道金尊泛五湖径倚蓬蒿新白社蹊寻桃李旧玄都天门八翼星河近试问长庚谪有无（文仲旧宰金华）

尽日江头卧白沙长天孤梦隔瑶华田余元亮曾栽秫县接安仁旧种花六洞浮云迎仗钺双溪明月候飞查菟裘半畝胜漂泊霜落东陵正熟瓜

突兀长歌赠远游淋漓霜色堕高秋如闻桂树招淮上祇为梅花别陇头晴雪万山迷款段夕阳千坞乱钩辀归来咫尺堪携啸极目云天下彩旂

送包稚升入闽（稚升先擢蜀中）

锦缆初停泛蜀船骊驹仍送入闽筵无夸积雪三峨外尽占飞云九曲前柳拂檐帷春燕候花迎袍笏昼游年为君拂拭双龙去遥夜延津斗色悬

黄尧衢屡寄诗札余读其九漈游草慨然兴懐赋答一律（尧衢才高博雅诗文外杂着几百■〈弱，左半〉）

卧掩衡门鬓欲皤双鸿嘹唳坠岩阿三山傲吏偕三谢九漈飞仙挟九何献赋柏梁知自许藏书天禄定谁多荒园万卷堪留客载酒能无问绿萝（时同游三君宦闽者）

送李太史之秦中

绛节朱旛太史才春风鸣玉下蓬莱鸡声万井开函谷马色千山度薊台授简明光朝日近飞觞平乐暮云来含香旧侣深相忆莫遣玄關闭绿苔

送江汝成驾部之秦中二首

祖席骊驹唱未停河桥寒色晚冥冥高天六传飞函谷隘地双旌出井陘雨雪苍茫南北路星河明灭短长亭干城岂独扶风借百镒黄金下帝庭

百壶春酒照华筵曾是荆州识面年问竹敢劳中散驾看花频系孝廉船峥嵘斗色双钩堕粲烂虹光四壁悬明发旌旄凝望处太行无际白云前

初入葛湖同王仲升章茂德陈惟敬夜集盛明元思达思弘思齐思登思逊六昆仲社中赋赠

垆头十日又高阳年少羣趋作赋场人比竹溪非异姓客方莲社是同乡论心海岱千秋合握手乾坤万事忘贪把深杯华月下不知零露坠衣裳

是夕阴霾无月诸子酣饮夜分而唐祝两生不至命小溪奏乐侑觞拈韵得中字即席赋

曳履南楼兴未终胡床相对一尊同霜飞玉宇秋将半露湿瑶台夜正中绕树叅差飞倦鹊衔芦嘹唳坠征鸿更阑竞奏霓裳曲谁唤嫦娥出海东

葛湖草堂四首为盛氏六生题

沧波九迭浸芙蓉夹岸千峯与万峯才子溪头频拭剑仙人陂上旧携筇高天雾隐前村舶落日风传古寺钟莫遣桃花飞一片津门流出世人逢（葛溪铁李益剑名）

十里澄波镜面秋鸡声一坞住中流闲花半落辛夷岸古树平连杜若洲晚日亭台朱户掩微风箫鼓画船游红妆队队湖堤上唱彻菱歌兴未休

湖上茅堂秋可怜浣花流水不知年缘堤藻荇浮仍没隔浦蒹葭断复连过雨鳧鹭临槛外乘风鸥鹭到门前携家信宿堪忘世底用频移雪上船

众壑天然敞画图牙樯明月坐冰壶双流近接双龙洞九曲遥穿九鲤湖野客为园当薜荔奇人结社傍菰芦他年会挟西施过日占烟波理钓舫

同盛明元散步山冈望金华诸洞壑赋示思达思齐思弘思登思逊五生

五岳长懷济胜才三山何事问蓬莱冈头处士龙仍卧岭外飞仙鹤并来积翠中天藏洞府空青半壁堕池台翩翩羣從俱奇隼为扫如椽向绿苔

明日泛舟湖上王仲升以公事先行即席再赋

牙樯秋霁喜同登极目长天暮靄凝月色正浮三翼舸星芒如彻九微灯汀洲曲折沿芳草岛屿萦洄出乱藤投辖乍堪消永夜双鳧宁畏简书征

十三日再同王仲升陈实卿章茂德王仲济盛明元六昆季宴集祝华父唐污父适至分韵得前字即席赋

鼓瑟吹笙玳瑁筵狂歌醉舞兴飘然疎星竞向寒更出明月偏宜后夜圆（时中秋前一夕）气色荧煌双劔底心期迢迢一灯前经旬漫詫平原约千日中山任晏眠

又明日泛舟东湖湖蜿蜒十里许渟泓靚澈大类辘川时微雨洒空旋即开霁中天皓魄朗然如昼芙蓉一树亭亭南岸若凌波仙子含情婉约不可名状余命维舟其下小溪吹笙拨阮歌沧浪明月之章飞白无算宾皆潦倒比归就枕漏下五鼓矣

载酒鳧鸥静不猜谢家羣從故多才沿堤竹树叅差发隔坞芙蓉烂漫开晚色拖烟笼遠寺秋光含雨湿平台寻源异日扁舟到夹岸桃花次第栽

中秋诸子雨集遲祝生不至赋以示嘲

天际轻阴绕画楼绿波俄涨大堤头清秋漫忆乘查去尽夜何妨秉烛遊殿闭长生

收月影园荒独乐罢风流无媒一覩嫦娥面正为阳台雨色留（明元所欢淑卿华父数赠以篇什期是夕挈以来而复为所羈又祝生以园地为族人所侵夺故云）

再迭前韵寄祝生时明元以舟遯之不得

怅望幽期越水头蒹葭白露满中流空悬仲举千秋榻苦恋休文八咏楼玉笛關山偏引恨珠帘云雾迴生愁惟应天柱寻仙客曳履孤峯尽夜游

十六夜雨不絕同唐祝两生集明元齐头秉烛剧谭四鼓乃罢

骤雨凄风断续闻西堂烧烛话偏勤空劳神女飞三峡不见嫦娥驾五云叶落仙萸秋缥缈花残丛桂夜網缦朝来一舸乘流去尽撷芙蓉越水濱

别明元思齐六昆季时余将卜筑葛陂之上诗以订盟二首

短发江湖抱太玄归携羣從兴飘然当年溪上闻诸逸此日林中聚七贤卜宅旧寻阳羨口移家新赴陆浑前他时尚遂桑榆策一笑玄真卧钓船

十口经年系短航何如一曲借沧浪天空穩卧扬雄阁地僻粗营杜甫堂西塞鳧鷖迎啸咏北山猿鹤伴行藏不缘二仲翩翩甚投老那依玉树行

赠喻叔虞邦相明府季子也携来余邑日仅十许岁今儻忽廿载余矣时俞羨长吴泰宁同集

花县雏将玉树丛当年见汝仅成童惊人彩笔飞王粲狎客清樽醉孔融赋草欲追膝阁丽谈锋偏向越台雄高阳烂漫名流集莫负渠莲十丈红

少室山房集卷六十三

●钦定四库全书

少室山房集卷六十四

（明）胡应麟 撰

○七言律诗七十四首

李本宁廉访入武林以手书新愿饷余溪堂却寄七言八律

白面登坛寸管驰縱横九域让蛾眉神龙大海双飞日老骥中原独步时丽赋梁园春雪满长歌蜀道暮云迟谁言越客朱丝断极目遥天候子期

八代文章覩典型鸡林重译购题铭无劳大泽夸云梦久识钧天奏洞庭禹庙冠裳回百吏胥台檣櫓压千灵精庐四百湖堤上烂漫新诗勒翠屏

翘首湘潭半夕阳谁传词藻赋高唐宗盟一代闻三李伯仲千秋见二王北极云霞回指顾东山日月谢行藏新篇漫惜南游寡海外流传徧越裳

中冓名山迹已沦太函高座定何人传衣两地归南岳赐履三天上北辰大厦纷纭罗国士孤查浮没问波臣中兴咫尺葵丘畔寓目江淮一旅陈

一麾环佩下甘泉双管横操百代权灿烂图书游洛日飞扬文字入秦年风云八座长秋近象纬三台太乙悬不是观涛瀛海上西泠那驻木兰船

入剡名山思转遐云岚晨夕候高牙宁无逸兴歌天姥大有闲情赋若耶万岫分青

悬梵刹千岩飞翠落官衙香风夹岸骅骝倚队队明妆越水涯

佩玉含香事冕旒横金驰传出龙楼游穷八极飞仙在望重三朝宿老留白帝城探
新雨色黄公垆续旧风流无夸海上干将合昨夜精芒射斗牛

邂逅金绯照石渠卢沟桥畔暮踟蹰同盟敢托先朝后并轨犹惭易世余转自慵疎
怜叔夜宁因消渴慢相如无由共赋南鹏翻大旆抟风上玉除

送徐惟得还楚中

岁晚莼鲈乐事饶凄然风雨发征轺弘文馆辟双龙近神武门深一骑遥梦渚寒云
飞猎旆湘江晴雪候渔橈凭君漫卜东山墅三锡玄圭下圣朝

王别驾过访赋赠

当年词赋满林皋阅琅琊擅俊髦骥足暂纡龐统驾鸡羣聊试吕虔刀齐封鲁甸
驱驰急郢雪秦云眺望劳咫尺风期同调在碧天河上首重搔

送张仲立上计二首

龙剑双飞入蓟城一尊挥手暮笳鸣分符帝问淮阳绩授简人推邺下盟万树未央
春雪暖千花长乐曙霞明亡夸烂漫黄金锡前殿如椽勒姓名

飞旌千里问神州驿路梅花照锦裘上计词臣新渤海称诗才子旧长洲风烟御苑
回金埒雨露明堂下玉旒惆怅河桥深雪里尽将离恨入齐讴

朱吴于三生携酒同游城南观音禅院

皂帽青鞋霁雪前丛林遥望七灯悬乾坤万古空王劫水月三生大士缘下界风旛
摇贝阙上方云磬落金田踟蹰未办西归衲杖锡香林对惘然

张博士以壶觞过访余病不能起迓赋谢此章

野外孤篷系白茅斋头长铗倚青郊壶倾博士莲花酿盘载先生苜蓿馥海岱云霞
驱别梦天涯冰雪馆穷交亦知凡鸟堪题字浪逐扬雄赋解嘲

张别驾过访舟中以新刻饷惠岢聘修郡志将成

灿烂词林见白詹挂冠偏趣黑头时安仁宦就花盈郭元亮归来菊绕篱作赋高唐
巫雨过飞书东岳岱云驰十年流水希凡调试拂冰弦和子期（张君先任新安尹）

狄明叔邀集新居命女伎奏剧凡玉簪浣纱红拂三本即席成七言律四章

名花十院尽蛾眉美酒金樽照陆离雾里双鸾腾玉阙云中八骏下瑶池参差赵瑟
传情远缥缈秦笙度曲迟后夜屋梁频怅望河桥孤馆月明时（伎十人二尤善讴）

痛饮狂歌白日酣何人同住百花潭明妆陈女开金屋妙舞羊姬弄玉簪满架荼蘼
风乍入当庭杨柳月初含追欢■〈才弃〉竭良宵兴满眼關河系别骖

绣柱雕栏夹画图幽栖河上擅菰芦壶觞元亮开三径舟楫陶朱泛五湖草色共悲
吴苑废花枝犹傍越台无干将对舞东风夜灿烂明星坠辘轳

画槛参差照绿苔三山何处问蓬莱朱颜骤向新春合红拂偏宜静夜来风袅梅香
萦玉砌月穿萝影度瑶台高唐总入襄王梦未拟重怜宋玉才

于生高冈以早春九日初度赋赠二章（时生年二十）

东来紫气绕华筵玉舄飘飘大海■（田奕）九叶莫舒元旦后千秋桃熟早春前
驰心高密谈兵夜屈指重华谒帝年试问嘉名悬锡处桑弧晴色广陵悬

玳瑁堂开霁雪凝百壶春酒照如澠断冰奇句推良史明月新篇和武陵鸿雁渚寒
劳梦寐凤凰池遠待鸞腾追欢况值梅花早倚啸晴空望玉绳

夜同朱吴李徐诸生集于茂才宅聽歌

南陌朱楼并马寻一尊尘外共披襟齐姜久擅高唐曲越客同操下里吟烛映纱厨
春色浅香飞罗袂夜寒深云门寂寞当年调惭愧鍾期抱玉琴

送赵太学之北雍

束书迢递赴皇畿岩壑何言战胜肥绿绮正携春雪过青帆俄逐夏云飞雄材世许
攀槐棘古调时能问蕨薇到日含饴穷燕乐千花晴色映荷衣

送黄上仲归赤城时以伯兄说仲书至

翩翩戎服傍高牙长揖归来兴未涯别梦乍悬淮海月乡心遥引越城霞毫端秀色
舒毛颖匣底寒光照莫耶最忆元方油幕卧独将清啸和悲笳

朱太学元长以新刻过访卒業赋赠余与元长大父司空尊人廷尉通家再世覲其
韶令喜溢于辞

静掩衡茆觉地偏辉煌词笔照临川通家政自推文举倒屣能无属仲宣殿筮甘泉
晨赋雪宫深碣石夜谈天春风一骑长安邸何限飞花坠玉鞭

彩笔翩翩骤过從居然文藻挹芙蓉门留廷尉甘罗雀剑授司空欲化龙谒帝明光
春浩渺论交平乐暮從容当年国士双垂眄握别衔知思万重

寿胡隱君九秩为玉吕茂才题

杖履飘然鶴鶴羣函關灵气暮綢緼三生夙擅荣期乐二典新传伏氏文大海亭窺
秦望日清溪船弄越来云毋夸经术承家旧屈指鸾章帝座闻

送赵汝信奉常入都

挂席南风锦树重频年溪上濯芙蓉寻仙玉洞云长满谒帝金茎露正浓午夜素琴
偕一鶴商秋神剑合双龙台垣咫尺黄扉启灿烂棠花拂过從（奉常于少傅为昆仲）

送吴文仲观察入贺四首

鼓吹江城落日悬牙旗明发使君船青牛一望函關外黄鹄双飞汉殿前北极衣冠
晨拜舞西池环佩夜畹连垆头夙昔荆高辈极目燕山共惘然

灿烂明星坠辘轳悬腰双铘并昆吾千秋錄就呈金镜万寿筵开送玉壶飞盖西园
凉月满垂鞭南陌夏云徂加餐何处频相望嘹唳征鸿下太湖

斧钺中吴羨昼游闔閭城下暮淹留安期舄捧遥天外博望查飞大海头北斗文章
新气象南皮谈谑旧风流黄金台殿三千尺击筑凭谁共酒筹

椽笔翩翩赋颂裁诞章晨捧入蓬莱花前彩鷁飞吴甸柳外青骊系越台长乐露华

金掌下建章云气玉绳来天颜尺五称觞地尚记吴公第一才

寄区用孺

一棹栖迟大海滨桐江云色绕垂纶青山乍饱闲中目白石犹饥病后身别去龙门
无国士归来鲋辙有波臣故人藉甚甘泉畔日醉玄都万树春

汪明府邀集衙斋陶驾部懋中适至同赋

秉烛高堂燕笑频歌喉摇曳玳筵新琴中白雪飞仙吏坐上清风挹故人剡曲蒹葭
千里梦河阳桃李万家春凭栏无限青云色欲唤双鳧到紫宸

入郡城访睿父叅知适文仲观察以公事至同集

西园高宴月华浓咫尺台垣并过从座上儒冠容一鷁尊前神剑合双龙阴森棠树
春光满灿烂薇花夜色重最是胡床清兴剧羊裘何惜醉蒙茸

是夕二丈以直指叶公招中席辍赴毕燕仍过戚园轰饮达曙乃罢

阜盖叅差越水头千山寥廓暮云收风前并遯王猷棹月底重登庾亮楼彩袖翩

■ 〈衺迁〉传楚舞朱弦嘹唳和吴讴梅花渐吐新春色秉烛何妨尽夜游

直指叶公枉顾赋谢四章

揽辔千山入画图偏徙岩穴问潜夫台端此日冠峨豸阙下当年舄化鳧把臂蓬蒿
新白社關心桃李旧玄都天门六翮雄飞近一盼盐车在暮途

灿烂西台白玉珂频年直指向關河丰城剑抱双龙出灊水桥乘驷马过作赋风云
回缥缈飞章山岳动嵯峨宁知一代苍生寄几向清溪问绿蓑（余邑浮梁数百年靡修
复者叶公一旦谈笑新之诸遗爱沾渥婺中童孺咸悉焉）

大纛高牙控斗躔豸袍骢马出甘泉云霞骤划双溪上雨露偏浓八邑前秋浦棠阴
悬节钺河阳花色映楼船无劳汲孺夸长揖竟日茅亭话太玄

又拥朱旗入婺城清江寒色暮云平霜飞竹马儿童集日照花骢父老迎绣服三天
传疏草绋袍一代见交情由来国士非凡遇匣底干将夜夜鸣

夜集王仲升新第即席同盛氏诸仲分韵得寒字

画槛雕楹十二栏一时尊酒盛词坛风人把袂游平乐月姊更衣下广寒台接丹山
翔彩凤箫横碧落度青鸾徙知子敬多豪兴桃叶歌成宴未阑

王仲升以五言长律见贻赋此答赠

尺组长纓奋草莱清香画戟卧莓苔北门鎖钥归雄镇东观图书集上才迭嶂分青
横几簟双流飞翠入池台知君未厌徙军乐大纛高牙帝座来

入三衢访文仲观察邀同睿父叅知酣集丙夜期以诘朝方舟下灊水即席赋

玳瑁筵飞白苎新莺喉摇曳舞梁尘金尊竹叶销长夜玉笛梅花绽蚤春雪照吴门
双彩笔星环越署两朱轮朝来共有鸣榔约一棹能无系水滨

同张吴二丈方舟东下沈饮三昼夜四之日始达灊濱即席赋

仍飞宝瑟佐清酣豪兴飘飘灊水南河朔千秋今见二平原十日已过三含毫鸚鵡

催词赋倚席鱼龙狎笑谈信是青云留白蛤一丘谁讶管宁憨

遇张孟孺于湖上未及问姓名别去诘旦以羨长书泊新作来谒赋答此篇

相逢今雨大堤头梵刹丹青暮霭流赫奕家声曾御李飞扬门阀旧封留何须铁骑
桑干战暂解金鱼杜曲游昨夜净慈秋色里霜华寒透鹞鹞裘

陈明府书来赋答

尚忆登仙共李膺风抟水击羨鲲鹏天长片鹞飞淮甸地近双鱼出广陵桃李城头
春色满蒹葭堤畔暮愁凝高楼百尺堪同卧把袂何时第一层（时陈君令广陵旁邑）

登赵太学文镇溪云阁懷睿父文仲二公

帘栊十二挂高寒突兀楼台峙翠峦六洞烟岚长绕座双溪云月半憑栏丁丁樵斧
飞春暮杳杳渔舟泊夜阑此日平原堪尽兴深杯何惜醉词坛

寄陆使君使君旧治河济上同龚观察及余名姓余弗知也

挂笏黄堂坐晏然双旌犹记北来船时名赫奕机云后世业巍巍逊凯前六洞晴云
江郭绕双溪明月郡楼悬甘泉咫尺征良吏突兀龙章汉殿传

上元同睿父叅知文仲观察夜集溪堂看灯作

千骑聯翩集水涯上元灯烛兴偏遐凭栏火树千枝月照坐金莲百本霞织就蛟绡
珠有晕妆成鸾镜玉无瑕深宵■〈才弃〉醉平原席遮莫兰阴送曙笳

诘旦两公各以诗来走笔和答

聯飞鸿翼度天涯并握鸾笺思转遐季重词名元海岱孟阳诗笔半云霞提携顿觉
燕金重顾盼宁愁赵璧瑕宛转双珠呈夜色不知庭月坠春笳（时歌者赵璧在筵）

寄张睿父叅知时以新赋三律见示

风前何处觅新裁目断仙槎系翠苔画戟东方千骑绕朱旗南国片鸿来桃花烂漫
飘吴岫棠树阴森蔽越台莫道干将长射斗司空袍笏近蓬莱

陈太学过访为借沈材叔园亭以顿行李赋此谢之

意气翩翩越水头居然名士擅风流独将仲举千秋榻悬向休文八咏楼几席平原
堪纵饮杯盘河朔竞追游亦知庑下梁鸿寄一为穷途破旅愁

侍御叶公疏陈鹺事得请赋东二章

谔谔千言奏彩毫英声直气冠仙曹批来岂惮龙鳞逆触处真怜豸角劳日揭虞渊
消雾雨云收溟海息波涛惟应报国丹诚竭五夜霜华袭鬓毛

一疏回天四海闻欢声驰颂越江濱臣心总为埋轮切帝眷偏從折檻勤十道乘骢
争吐气三朝鸣凤欲空羣西京底事搜盐铁为报桓宽正属文

邓遠游以书贶见贻赋答二律

飞蓬何处遂幽栖咫尺云萍怅解携吏隱欲兼山大小客居难定灑东西鸣琴海国
双鸿度锁印江城独鸟啼是处休文饶八咏危楼曾否共攀跻

病肺经时息茂园淋漓书札到丘樊花栽樵李三千树草赋长杨十万言尔自飞鳧

临大邑人谁逐鹿向中原盈盈一水相思切极目湖头暮雨繁

观察林公过访赋赠

才名藉藉冠青钱执宪欣逢入越年起草夜停双阙下看花晨憩六桥前飞扬白马
笳声动缥缈苍龙剑色悬四百楼台题咏处登临谁不羨如椽

寿陈隐君

瑞日暄风满画堂东来紫气近钱塘千春大海筹增屋十里平湖树夹航盛世讴歌
情正洽明时耕凿兴偏长何当醉挟元龙去百尺楼头话对床

赠仁和刘明府曩有事计偕邂逅君于济上同舟驩聚者月余

识面长淮记苦吟黄金台馆独登临当年飞舄过严濑此日鸣琴坐武林南斗夜光
雄剑合西湖春色画檣深悬知汉殿循良诏屈指晨催大海浔

侍御叶公既按部吴会复以鹺政倥偬驰返临安谕檄通逵众以大定辄缀七言四
律代柬行麾

东来紫气又临安拭目苍生望未阑一剑乍过千垒静单车纔入万家欢霞光北极
飘清禁斗色西台照画栏信是批鳞头易白霜毫时拂惠文冠

比屋香灯越水濱霜天晨夕望氤氲中朝独占乘骢步大海争传谕鳄文柱后峩冠
心捧日台端摇笔气凌云栽花漫忆河阳事灿烂芙蓉拭剑纹

吴山晴翠拂高车只字风霜绕玉除骢马近传盐铁论鸡林遥诵治安书三台色动
回天后十郡欢腾煮海余最是怜才勤吐握登龙时曳旧长裾

绣斧朝持越郡前花骢行部笔如椽风云西北飞扬候海岳东南镇定年秋思芙蕖
明玉笋春光桃李媚琼筵宁知鹵簿江州贵日向蓬茆话太玄

寿龙使君六秩

旭日扶桑绕画栏安期双舄对盘桓红霞一曲秦源近白雪千家楚水寒小径壶觞
移竹树前庭袍笏映芝兰山香莫问羣花落一唤飞琼舞翠峦

送章宗理纳言使楚中

辉煌丹诏出蓬莱窈窕玄關闭綠苔剑佩青云辞玉阙衣冠红日下银台河桥薄暮
蝉声起驿路深秋雁阵来漫忆观棋淝水上苍生元属谢公材

送王永叔入都四首

大旆翩翩越水濱朝天白马向枫宸飞扬跋扈千秋思磊砢峥嵘八尺身兴里平原
宁计日欢来河朔动经旬谁言彩笔偏词赋已卜螭头气象新

垆头促膝又吾曹斫地王郎思独豪九陌霞光迎剑佩千山云色度旌旄中朝奏疏
關辰极故国音书问海涛尚忆春明门外事红牙催拍斗持螯

吴山晴色堕高牙歌阕骊驹兴未涯锦绶乍抛沧海月绯袍犹绾赤城霞垣扉烛影
宵分直禁闕棋声午放衙明发武林關外路尽将离恨入征笳

把袂钱塘又别筵升沈往事一潸然公交车贾傅全游日帝里班生独上年握麈何

天非碣石抽毫无地不甘泉亦知疏草焚难尽谏猎书成太史传

睿父叅知入武林余过署中适以公燕湖上不遇留柬

寂寞玄亭卧草莱登临长忆谢公才犹疑斧钺清溪驻不谓帆樯大海来绣服定过
吴子国珠帘同望越王台金银万寺湖堤畔椽笔能无丽赋裁（时文仲文将达吴门）

關忠义侯庙作二首

绛节绯袍气凛然巍巍遗像识忠贤河山万古精灵在宇宙三分壮节悬灿烂黄金
辞操日飞扬白刃刺良年莫言遗恨章丘下五夜英魂照玉泉

巨颡长髯貌絶伦当年驰骑破黄巾峥嵘正气鍾三国惨淡英风敌万人缚禁已酬
吞魏志诛蒙犹现伐吴身双旌异代盐池上想象铙歌入帝宸

送右辖吴公擢左山西

并门遥望思如何缥缈棠阴十郡多鹵簿北风辞粤峽楼船西日渡汾河青萍谒帝
龙光近彩笔懷人雁字过上考吴公元第一题诗能到旧烟萝

季秋同李邓二明府俞山人寻灵隱故址作（有序）

楼观沧海日门对浙江潮骆义乌灵隱诗也今寺在山麓于二语殊不合山之腰最
幽絶处有弢光阁登其上则跨重湖揽江海十字真境俨在目下石梁亘絶考之终
篇皆符乃知今灵隱建自宋时非考功觅句地也

迭磴危梯万仞悬嵯峨飞阁架苍烟天浮海色雕楹外日荡江流画栱前玄鹤并携
珠履客青鳧双下玉台仙谁言康乐题诗旧婺女犹闻笔似椽

少室山房集卷六十四

●钦定四库全书

少室山房集卷六十五

（明）胡应麟 撰

○七言律诗五十二首

直指叶公以高堂大耋累疏陈情爰自孟冬移节茗上不佞分忝州民遇隆国士分
庭抗席迴出形骸睽携在兹睠恋弥剧河梁握别情见乎词二首

突兀高牙镇海涛衡门犹恋旧绋袍千秋烈日扶肝胆五夜飞霜袭鬓毛报主共知
心计竭思亲谁识梦魂劳他年大节标良史一代名臣付彩毫

萱花遥望北堂悬一疏陈情四海传绣斧声名红日下斑衣魂梦白云前埋轮未促
燕中驾鼓柁聊移雪上船屈指瑶池华宴近蟠桃消息报新年

憩唐生污父舟中作

羊裘白眼天蒙茸独占芦花鸥鹭丛月底科头弄双楫日中坦腹眠孤篷江湖散人
陆鲁望烟波钓徒张子同底事陶朱鬢毛白西施窃负骄儿童

方伯吴公过访话旧先是吴公北上余邂逅于金陵至是垂廿载矣

青春携策赴甘泉邂逅金陵北上船杰观并游鵝鵲底高台同宿凤凰前飞身碧汉

三千仞散髮沧浪二十年慚愧操觚成白首紫薇黃閣共周旋

賀吳方伯擢晉中左轄

赫奕除書下帝庭六橋離思繞烟汀旌旗匝地過陽曲鼓吹中天出井陘望重三垣
頭轉黑論交一代眼長青太行絕頂凝眸處海上紅霞接幔亭

鄧遠游以浦陽改劇檣李孟秋有事棘垣不佞邂逅湖上二律志喜

黃金台下賦河梁兩見栽花越峽傍烏化雙鳧離灑水琴携一鶴度錢塘雄談自許
千秋合痛飲那能十日忘莫詫重垣霜色里繽紛桃李候門墻

片月燕台萬戶懸芳尊何地不留連飛揚碣石論交夜潦倒臨邛作客年大邑桐陰
流靡宇重湖花色媚樓船遙憐客歲青燈下達曙狂歌玳瑁筵

蚤春寄宣律師

風範支公昔未頽龍池曾辯劫前灰竹齋疎雨焚香坐花徑閑云乞食回地勝東林
時卓錫天長南海一浮杯金銀四百湖堤畔得句能無贈蚤梅

湖上同喻邦相泛舟離淨慈入玉泉觀魚池上徐茂吳以家釀至余迫暮同吳生德
符先歸

抗手河梁二十年談心湖上一潸然乘風泛鷁離金界冒雨觀魚向玉泉葉墜丹楓
孤剝底花余黃菊斷橋前余杭曲米堪同醉不奈秋空咽暮蟬

叅知洪公得雄寄賀

扶桑晴望海雲開蓬矢新看射越台玉樹正從文苑出（公方以學使擢任）金莖
元傍武夷栽（洪公家七閩奕葉貴顯）鸚鵡燦爛凌霄翻龍種飛揚歷塊材信是高門
蕃七葉祥光頻夜繞珠胎

秋日集汝申使君喜雨作時潘生對奕久之

淅瀝寒聲繞畫牆高梧飛葉半銀床珠帘乍卷三秋色玉局徐生五夜涼南國蕙蘭
應被野西郊禾黍漸登場酣歌不是耽行樂二頃城頭有汶陽

寄鳴皋

邂逅京華得向禽攀花携酒日長吟聽鶯上苑雲連陌并馬西山雪滿林一夜征塵
迷寶劍三年流水隔瑤琴傷心碣石論文地零落寒烟夢里尋

劉觀察仲修席上言別

抗手河梁思不窮高天遙望楚王宮吹簫几夜騎黃鶴解劍經時斷白虹潞水霜華
猶拂坐湘潭雲葉已浮空風塵別後頻相憶錦字千行墜北鴻

同惟敬諸丈邀劉觀察集李園（有序）

時李惟寅朱在明安茂卿康裕卿梁思伯咸在坐凡一十六人余得寒韻

樓閣淒淒雲霧殘幽盟河朔此盤桓庭催黃葉風交響席倚青萍月共寒一徑秋光
搖碣石千門晴色繞長安題詩剩有鵝枚侶并拂朱絲興未闌

題劉觀察日涉園

锦石清沙动画阑深居赢得近长安晴窗雾压亭台湿夜榻云移枕簟寒径掩杉松
回白鹤池分梧竹下青鸾门前俗辙虚劳问十载焦桐已罢弹

送左辖赵公入覲兼便道还晋中

双帆晨掠大河飞烨烨星辰动紫薇上党风光停绣钺太行云色候绯衣流传竹素
盈江表蔽芾棠阴尽海圻青史赵张元藉藉燕金驰赐出皇畿

阜盖飞扬白日前汾河秋色半楼船辉煌白壁抡文夜（时公甫毕试事）烂漫黄
金奏绩年握里骤夸双剑合囊中争覩一琴悬匆匆锦里停车日尽折梅花玳瑁筵

题唐山人莲叶舟二首（有序）

莲叶舟轻自学操唐人句也山人轻舸湖上悉屏长年青笠绿蓑悠然独往余为载
赋二诗

芙蓉花压大堤前六尺沙棠任晏眠南楚旧闻唐勒赋西泠重覩白公船吹箫极浦
凌风去把钓前滩抱月还三十六陂新水涨行吟何地不堪怜

琴书一榻任夷犹画桨朱帘荡碧油夕趣蒹葭移远岸晨攀荷芰入中流飘飘舴舺
风前戏泛泛蜻蜓日下游莫笑米颠今载见孤山双鹤在湖头

答睿父叅知四首（有序）

余自遘室人之变侍家大人于里中榷關蓬莽几与世絶辱叅知张公札询拳至奉
谢鄙律四章

双鱼晨下灞江灋字字瑶华握里悬倦客已归青嶂底佳人犹望碧云前千秋宇宙
供挥麈五夜风霜入断弦莫诧婺光长伫倚大微清切照龙泉

廿载江天逐塞鸿归来华髮叹飞蓬三坟左氏窥难遍六事张卿问易穷伎俩久嗟
齷鼠薄心期犹诧蠹鱼雄胡床夜夜双溪月咫尺元规帐未同

半壑东南寄草堂牵萝扞虱且行藏风前漫自歌招隱月底那堪赋悼亡海岱飘零
冯叟挟湖天摇落米家航徙知上客饶珠履愧杀淮阴愿未偿

寂寞清溪罢钓纶蹉然穷谷问遗民明堂政尔思方岳宣室能无叩鬼神玉笈叅差
罗二酉金章摇曳动三辰支机总为浮查出底事重寻卖卜人

答郭方伯舜举（有序）

郭方伯舜举屡致手书慰问惓切感愧之余赋答二章

先朝名德重长杨拂袖言归大海傍南浦轻烟流画鹢东山明月候胡床风期肯逐
红颜尽意气偏徙白首长莫诧林宗巾角折苍生频夜卜行藏

双鱼晨下越江浚厯厯加餐问向禽代国声华余赋草汾阳勲绩擅词林名山是处
藏瑶笈流水何年和玉琴屈指梅花春万树西泠桥畔雪堪寻

答世叔通侯见讯并懷说仲词盟

尺素双传灞水鳞江天翘首一伤神绯袍紫绶云霄客羽扇纶巾社稷臣藻翰千秋
鸣鸞鷲勋庸三世勒麒麟相思幕下偏惆怅不见黄生又几旬

费孝廉过访投赠新诗将由钱塘入广陵买丽姝长干而返即席戏赠
伏枕衡门万事忘为君颠倒着衣裳红丝欲系朱颜客彩笔偏携白面郎一榻星辰
吟处堕半轩风雨话来长临安咫尺堪携醉千树桃花拂短航

送张大叅知睿父擢江右廉访四律（有序）

自杪岁与张公晤语溪上疎旷迄今闻擢西江别惊郁懔走笔成赋四章
万户欢声彻海圻喧传除目下皇畿当年石室紬中秘此夕天垣动太微玉匣灵文
双剑启银河寒影一槎飞谁言鹵簿江州贵小队时能问蕨薇

朝看纶綍下宸旒千骑传呼簇上游帝命西江移斧钺人從南国望轩輶能无丽赋
夸滕阁剩有雄章压沈楼惆怅双溪溪上月胡床遥夕梦风流

突兀匡庐雾里来登高词赋并堪裁留题欲占青霞色倚和谁当白雪才九派寒光
彭蠡泽万家晴色豫章台遗踪谢监俱零落一为名流问草莱

望里檐帷大国悬一时名胜摠堪怜蓝舆数载征君过木榻长偕孺子眠赋忆寒云
三洞底书酬明月九江前何缘并撷香炉秀徙倚东林话白莲

赠汪中丞四首

鹄印朝驰下九重双飞长剑拂芙蓉诗书异域传方虎礼乐中朝待卧龙勒石燕然
云缥缈登坛淝水日從容纷纷坐客饶朱履吐握能无问短筇

一疏埋轮四海传三台推轂借豪贤飞狐倒马当關日巨鹿卢龙出塞年燧火北亭
残帐幕波涛南粤净楼船凌烟异日论功最十八饶歌被管弦

尺羽纔飞万灶收先声何藉冠军侯风驰细柳三千壁电扫扶桑六十洲玳筵开
晨北府琉璃屏蔽夜南楼遥怜月底桓伊笛吹彻梅花兴未休

三辅旌旗控月寒九河台殿压风湍元戎旧建征东节上将新登镇北坛列校任驱
鹅鹳阵高流容脱鷁■〈义鸟〉冠悬知王粲思乡切一赋從军为路难

直沽逢丁元父夜谈作余与元父别十年余而邂逅中野真万里不期之遇也

邂逅天涯总白头双帆偕发潞河流孤臣海岳犹生色独客乾坤已倦游旧疏间關
辽水舶新诗迢递岳阳楼黄金何限干霄色落日荒台起暮愁

一疏千言动紫宸三台九列望经纶犹闻絶岛追穷寇未拟清时放直臣日月并悬
新折檻风云长逐旧埋轮更阑秉烛真如梦把袂狂歌各怆神

送邓汝高督学滇中

燕台春色照龙泉藉甚王褒奉使年奇字旧從千古识遗经重向百蛮传高峯越嶲
停征旆大海昆明息战船万仞点苍题赋日抽毫何似帝京前（邓旧草名帝京篇）

曹能始改官南都

题诗遥向凤凰台人识青莲冠世才宦薄南曹宁薏苡官闲西寺亦蓬莱苍山建业
排云上渌水长干漾月来为报郁金堂畔女流黄重织候新裁

寿吴太学母七秩

紫色朝临玳瑁筵斑衣垂手画堂前双金突兀高燕市片玉荧煌映婺躔青鸟未归
天外使苍虬长逐地行仙帘前认我东方朔一摘蟠桃又几年

赠盛征君

不学文园赋倦游高风遥夜揽貂裘枵傍骥尚思千里厨下鯖长合五侯桂树丛生
淮海岸桃花深发武陵丘郁金何日延州道玉盃相携醉莫愁

集惟寅第同顾朗生王行父作

嵯峨西第接蓬莱窈窕闲窗卧绿苔倦已携书还越峤狂犹击筑上燕台宫云五色
迷花驻苑月千枝映树来何事观涛溟海上当筵枚发正堪裁

詹山人伯虎以玉印赠余乞诗

奕奕昆吾诧有神双鱼遥忆附书晨千秋玉玺传丞相十袭瑶华赠美人错落蛟鬣
吹雾雨荧煌科斗拂星辰江潭何事占鸡鹜白岳黄山会结邻

过汝元太学话别作同仁夫孝廉

河桥寒日弄新晴唱彻骊驹恨远行惨淡黄金辞上国苍茫白壁抱连城舟移片鹢
时时望剑拆双龙夜夜鸣挥手不堪梁月色乱山犹傍客途明

同赵汝元集陈仁父痛饮狂歌亶亶申旦离别之臆备见乎词

把酒疎星傍玉除相逢犹是旧公交车高堂秉烛三更后故国浮查万里余海岳未
妨携短剑风云那复恋长裾他时两地遥相望尺素能无问鲤鱼

即席再别仁父汝元

征马萧萧倦客游天涯憔悴鹈鹕裘雄才尚抱千金璧豪气难忘百尺楼野戍孤云
频入梦關山明月正添愁犹余旧日荆高筑彻夜狂歌易水头

是夕剧谈漏尽相对黯然余与二君邂逅湖海订盟金石者廿载于兹拂袖故山且
榷關为终老计来晤未卜仍赋此章

列炬华堂夜不眠骊驹歌彻最堪怜浮云未信君门隔明月偏随客棹悬四海正逢
多事日三生犹结并游缘乘时何限雄飞思努力加餐玳瑁筵

久不得赵汝元问乡人乍至自都下云墓木拱矣

少日风霜堕彩毫中年日月厌青袍红颜意气消鸡肋白发心期付蠨螋作赋中山
酬薏苡飞书西域问蒲萄天津桥北糟丘近试觅青莲望海涛

米仲诏书画船卷即席题

泛泛风光易水濒沙棠晴照白纶巾中流荷芰藏仙客极浦蒹葭望美人经卷香炉
晨独倚笔床茶灶午相亲悬知舟楫商岩待漫向鸥夷话卜邻

忆燕中仁甫汝元余三人晨夕縱饮垂十载余顷挈家南旋话别仁甫斋头缕缕申
旦归后闻问杳絕今汝元告逝仁甫竟客何方载赋此什志感

击筑层台夜放歌十年灯火寄婆娑天空颍水荀陈隔日落咸阳赵李过阁上旧藏
玄草富斋头新种白杨多悲凉廿载谈天客不见三星聚钓蓑

同王行父顾朗生胡孟弢俞羨长集惟寅白雪斋分得人字

南北驱驰道路频一尊携手话沈沦惊看邨下抽毫客渐少华阳击筑人四野雄风回白雪六街飞雨净红尘应怜狱底干将在绕夜寒芒射北辰（时汝藩在狱中）

再送座师陈公

一赋骊驹共黯然春明回首夕阳悬绋袍邂逅三千里绛帐分携二十年祇见中朝传风德谁従幽谷辨龙泉苍生万室瞻依久阙下行看太傅旋

少室山房集卷六十五

●钦定四库全书

少室山房集卷六十六

（明）胡应麟 撰

○七言律诗五十一首

唐明府长公新构园亭三泖之上书来征诗赋荅二首

翛然十亩占菰芦净室名香馥埜蒲赋就园亭闻拙宦书成闾阖识潜夫青山有梦飞盘谷绿水无心乞鉴湖漫道岩居堪独乐苍生能识谢公无

亭子萧疎隔水开闻君十尺卧苍苔芝从角里先生乞术倩茅山道士栽檐际数峰如斲就槛中羣石尽飞来清沙荡漾鳧鸥集永昼相过暮不猜

寄邓远遊远遊书来云新构书楼高矗云汉索余一律纪之

闻尔为楼近郁蓝晴川历历豫章南当檐河汉三千尺绕架云霞八百函径压蓬蒿同蒋诩阶藏兰菊类罗喏书成白马深相忆不得南皮竟夜谈

春日张明府过访赋赠二首（明府闽清源人而为乌伤宰骆侍御举邑贤祠明府力也）

荧煌车盖集檐牙握手孤城送暮笳紫气乍浮苍岭月清光时坠赤城霞双飞玉舄高天外独奏瑶琴大海涯闻说河阳春烂漫一箴能许叩官衙

空斋一榻卧莓苔上国双旌叩草莱拂劒星光延浦合飞觞云色幔亭来诗传励志惊高唱赋倚思玄识异才莫讶弦歌犹下吏黄金千尺步燕台

闽中黄孝廉过访作

花底何来抱玉琴一灯联袂夜堂深舟移九曲多云雾笠戴双溪半雨霖射虎愧余终落魄雕龙怜尔骤同心胡床欲起征西燕百尺危楼望水浔

晋安林计部以翰贶见存赋谢并寄懷仲兄贞曜先生（时计部在淮扬）

经旬寒色倚终袍穷谷蹉然堕彩毫五夜书传淮海月千秋词压广陵涛中朝劒舄声华远故国坝篔梦寐劳二十四桥花满目吹笙弹瑟拥持螯

分曹何处最风流灯火维扬近石头萧鼓万家随画戟舳舻千里遇牙筹东园棠树经春别西岭梅花历岁遊计日候公■（干卅）水上月明重卧旧青楼（扬州有梅花岭）

题天恩四谥册（有序）

晋安林氏自文安厯康懿文僖文恪四公并翱翔八座賜谥易名一门之盛古所未有乃文恪二仲奋翼熙朝子姓绳绳弥益显大将来异数未可量也览诵钦惧輒綴尘草奕叶恩光道路频一门华袞动星辰三传鳳德依清庙（自文安至文恪三世八座皆以正直忤时不及大拜）四拜龙章出紫宸金匱易名藏太史玉阶銜命发行人君看琬琰新成錄百代何方殿后尘

读林氏文僖文恪二公集（有序）

家君登己未第文恪公知贡举而不佞受知贞曜仲季盖两世通家云

金茎云色近蓬莱礼乐文章寄上才三世声华悬魏阙一时词藻擅梁台莲灯后夜中官集藜杖先春太乙来羨杀庭阶双玉树聯翩花萼照鸿裁

屠纬真访睿父叅知厯朝真诸洞壑暂憇葛陂寄声盛氏兄弟渴欲不佞一过从乃余自临安归纬真发逾月矣赋此寄讯且期再至同入天台雁宕为汗漫之游

洞口君携赤玉虬湖堤余跃紫骅骝四愁明月歌平子八咏寥天问隱侯上苑雕龙羣彦絕中原逐鹿几人留桃花万树仙娥近为报屠郎续旧游

忆在临安舜举观察数过从旅中自庚午迄丙申岁致手书益以嘉祝屈指嘉隆词客几尽灵光一柱仅观察存而余以晚进忝窃深知殊感且作园居多暇赋此寄懷

嘉隆词客草半半指点灵光一柱悬紫电苍龙浮大壑朱霞白鹤丽高天晨飞杖屐东山墅夕纵壶觞北海筵溪雪满空狂兴在聯舟何日话登仙

世叔通侯以选诗新刻见贻赋谢因讯说仲文学二首

材官十万淨蛟涎赋客三千侍草玄剑拂苍龙淮海上帆飞青雀潞河前中郎论岂当年秘太史书宁百代传妒杀南楼弦管夜胡床相对月华圆

天吴河伯静无哗独坐平乘似汉查客子抽毫题桂树将军横笛弄梅花藏山业在神偏王治水功成鬢未华莫上燕台频倡和风传双啸入龙沙

叅知洪公举骆侍御吴中丞朱比部同入贤祠喜而有作（先是苏君禹督学按部余为骆举呈入郡祠迄今始祠于邑）

庙祀新裁日月悬千秋輿论协名贤高风惨淡三君列大典荧煌八邑传俎豆并陈丹腹底旌旗同曳翠屏前乡闾不尽抠衣思倚和犹能笔似椽

题张明府子环考绩荣封册

百里歌声奏管弦三台驰疏达甘泉椿萱日永高堂上桃李云蒸大邑前灿烂冠裳龙阙下飞扬纶綍鳳池传中朝屈指思良骥极目黄金照海瀟

送汪山人还四明

骊歌一曲乱云驰白帽黄冠照路岐八咏楼中人卧久四明城外客归迟高天暮雪帆飞动大埜春星劔陆离极目河梁渐握手垆头霜色对凄其

送徐太常之白下

骊驹又唱灊城西龙剑尊前惜解携旭日葵榴争吐艳春风桃李自成蹊千秋大业
传邹鲁六代繁音陋宋齐屈指凤台吟啸暇可无雄笔到幽栖

吴允兆过访同赵太学夜集坐中骤雨如注申旦乃别

望断双鱼雪水漬深居长日念离羣词人蹶屨来今雨病子支筇出乱云缥缈兰膏
延度曲缤纷梧叶坠论文相逢垂老堪留恋莫厌萧萧彻夜闻

同吴允兆登赵文学环翠亭时梅雨大作谈棋竟暮

危亭高峙越江湄城郭千家暮霭移北海声华闻异代西京才藻见同时雄风却暑
离山径骤雨催凉到石池最是辟疆豪兴发一枰花影度敲棋

送吴允兆还雪中

戴笠披缙问隠沦平原相值未经旬湘山萝薜悬高士越水兰苕限美人游览漫夸
双屐惯分携长恨一舟频浮家咫尺非难事为觅玄真旧钓纶（张志和婺人徙雪中）

寿叶母赵太孺人诗（有序）

邑明府涇上叶侯宰我三稔民用大和监司奏厥绩天官得貶恩所生母孺人命垂
下而母适以是秋届七秩翟冠霞帔玉醴瑶浆一时并集竒斯甚矣不佞沐侯知逾越覩
兹大庆喜溢乎辞

紫气沧溟日夜悬玉冠琼帔照华筵谁将黄鹄歌中事尽入青鸾诏里传南岳霞光
雕辇外东陵云色画堂前桃花万树瑶池熟好是仙郎作今年

王叅知过访赋谢

风雨衡门一径寒青云何事问鱼竿辉煌鹵簿留丹壑摇曳旌旗度翠峦永夜薇花
千吏肃深春棠树万人欢酬知不尽书生意慷慨鱼肠抱月弹

叶明府创浮梁新成往来利涉二律以纪乐观并寄师相赵公

夹岸津亭架彩旂■〈舟冲〉不断大堤头长虹尽压双溪浪画鹢横分万里流
几处尊壘浮白坐谁家环佩踏青游甘棠满植沙洲上荏苒仙鳧近玉旒

三百栏干照画檣澄波如黛压飞梁天浮乌鹄长河畔地接鼇鼉大海傍游女东西
矜拾翠行人南北罢褰裳乘輿最笑公孙拙何限恩波灊水阳（竹书架鼇鼉以为梁）

春日侍家君过祝太学留宿别馆夜出羣少侑觞豪饮申旦醉梦中拈韵得此诗题
壁示太学并示山人无殊

十日高阳兴未阑一樽云雾绕朱栏光摇银烛春偏丽焰吐金炉夜不寒旧业中郎
仍闭户新诗常侍已登坛清歌妙舞桃花下痛饮何辞玉漏残

饮酒漫成寄李允达

击节长歌兴转豪浮名何事读离骚飞扬跋扈元吾辈放逐飘零更汝曹白日骑羊
三洞遠青天扞虱万峰高先秋已订浮槎约散发扶桑弄海涛

挽刘仲修观察

斗酒逢君白接■〈卍离〉谈天长醉习家池犹闻碣石千人废不见灵光一老遗

蕙畹兰皋斜日外竹枝桃叶暮云时他年渤海词名盛十五宁论作赋迟

秀上人自永嘉过谒乞余言介绍汪司马公将以是秋驻锡黄山白岳间赋赠

赠我新诗灏水前天台霞色案头悬来征玄晏先生序去结青莲大士缘白岳何方
重示迹黄山随地足安禅莫言垂老才情竭和汝犹能笔似椽（江淹尝拟惠休诗）

聽雨齋

十尺幽轩静者栖碧梧苍竹乱云齐初惊滕阁珠帘暮渐讶阳台玉佩低翠色西山
寒并倚秋容南浦净堪题美人正有芳尊约目断芙蓉万顷西

朱山人卜居广陵持卷遍乞名公题赠余赋二章

武夷山色最堪怜何事维扬觅画船乘兴剡溪春雪后卜居■〈干阝〉水暮云前
枚乘丽赋经时和杜牧新诗异代传二十四桥人似玉明妆十万胜腰纏

回首高斋翳綠苔大江晴望海云开言将德耀居吴苑不学灵均放楚台一叶乍从
兰浦过四松先傍草堂栽抽毫试觅平原叟曾寄双鱼到越来

医张生世业痾余病卧半载生以针砭起之持卷索诗为赋

病里过从问独醒何来年少解忘形三彭遁守庚申篆五运重搜甲乙经碧洞骑羊
原有术青城化鹤岂无灵相逢拚作平原醉何限名山入座青

新春鲁总戎招同李都阃夜集署中座上得筵字作

尊酒孤城急暮筵玉壶金缕兴无涯茶烹雁宕千峰雪酒釀龙山十日霞幕府春光
回大纛辕门晴色护高牙相逢况是河梁客握手何妨片月斜

喻邦相过灏上余以病痾床褥不能出晤寄讯此章

一病衡门罢草玄归鸿长盼灏江瀟那知叔夜风前驾真作王猷雪后船五畝蒿莱
元独乐双溪桃李尚争妍飞龙自古多乖隔怅望河梁白日悬

同赵使君雨中登大云絶顶夜饮见一楼题

缥缈危梯望目蒙微茫秋色半江城苍龙掣电千禾立白鸟栖烟万树明北浦鱼竿
夸旧涨西郊农锄快新成携壶不尽追遊思剪烛虚堂聽夜鸣

聂水部招集署中赋谢兼送聂公北行

握手翩翩兴未穷芳尊何意武林同不堪坐倚琼枝畔饱聽歌翻玉树藂越海地偏
云气紫燕台天近日华红春风烂漫甘泉侧赋就能无望北鸿

邓遠遊过访溪上握手移日别去无何太公讎闻促归小诗奉唁

春花携手灏溪傍满目飞云望太行念我驥心犹伏枥悲君鸡骨驟支床孤航不柰
蒹葭遠一枕偏怜薜荔长蚤晚寻君丰狄畔星河频夜合鱼肠

寿张母八秩诗（母冢子元春琅琊两王皆盛推其绘事）

蚤跨青鸾下玉宸宁馨争羨膝前人斑斓张仲诗传孝彩翰僧繇画入神鹊渚夜寒
星炫彩蟾衢秋半月重轮方平莫晒姑年少少驻尘寰又八旬

虞鸿胪以精舍借居竟不克往赋谢

典尽鸛裘易水浔高台何处问黄金一枝吾自安幽谷全树君犹借上林庑下伯鸾
逃世念垆头司马倦游心亦知大厦堪栖寄百遍宁辞抱素琴

懷管秘书

浪迹燕山叹滞留一朝名姓动宸旒金门执戟推龙尾玉陛抽毫羨虎头草色杜陵
供眺望花香韦曲伺遨遊从知遇合堪青史莫笑冯唐未拜侯

答顾叔时吏部二首

余与叔时相慕积有岁年兹属安茂卿以手札投寄托契良深报谢二律

忆赋河东紫极傍娉婷摇曳动明光千金函谷高悬市片玉昆丘蚤擅场直諫世传
韩吏部清修人识顾长康盈盈一水吴枫外愁絕菰芦引梦长

藉甚雄才北斗悬緘书何意茂陵传屠龙技絕三朝后射虎心雄百代前会见名山
藏彩笔聊从流水和朱弦延陵一棹堪相傍信宿扬亭话太玄

再叠前韵寄叔时吏部二首

拂曙鱼緘溯草堂美人题寄自泾阳双钩匣底星辰动一刺懷中道路长綠水蒹葭
浮梦寐青山薜荔伴行藏相思会发兰阴兴烂醉青莲玉盃傍

一径蓬蒿任晏眠东南云壑乍晚连浮踪宇宙三生合词组江湖万古悬越水鱼竿
忘岁月吴天龙鏑射星躔阳春落落犹堪和敢向鍾期话絕弦

睿父丈既有西江之擢复闻台疏挽留将以大观察移节会稽三郡兴文枪别更赋
六诗异时一棹溪头绝倒子猷之兴尽也

明发双帆大海滨玺书遥夜出枫宸關中乍拟征黄霸河内重看借寇恂君子六千
初仗钺生徒四百竞攀轮犹闻仆射花溪上竟日菑堂话隱沦

分陝频年召伯棠千家巍碣颂琳琅纔闻大纛移江右忽覩高牙驻海傍月下登楼
懷婺女风前开阁谢滕王山阴咫尺堪携兴雪夜能无棹短航

江城秋半促骊歌醉解鱼肠柰别何紫翠林峦三洞隔丹青城阙四明多仙人绝徼
寻方丈大士高空谒浦陀漫詫越裳重译至十年鲸海静烟波

褰帷霞色候朱衣缥缈稽山入翠微千骑乍环秦碣转六龙长抱夏陵飞公余卧阁
紉玄草吏散行台忆紫薇遮莫山阴乘兴访若耶溪上醉芳菲

阜盖翩襍越海头当年椽笔照龙楼琅琊山水词臣醉天姥云霞赋客遊黄绢色丝
时想象青鞋布袜暂淹留灵篇禹穴探行遍何似緜縑詫邺侯（张公先任南滁有琅琊
代醉等编）

大府征西接上材参差飞诏出蓬莱金华石室双仙去玉洞天台二女来月色微茫
方广寺日光浮动妙高台无论擲地兴公价彩笔纵横巨赋裁

少室山房集卷六十六

●钦定四库全书

少室山房集卷六十七

（明）胡应麟 撰

○七言排律一十四首

侠客行六十四韵

朝端新拜大长秋，赐第东方最上头。曲榭华甍藏燕雀，画堂飞栋列貔貅。论功肯就
平阳列，相骨争夸定远俦。太宰均裨容接席，中丞停节让鸣驺。前苑鼓角陈清吹，后队旌
■〈施，童代也〉树碧油。几为高名罗蒯彻，时从长揖见曹丘。雄心黯淡操戈发，奇策
纵横借箸筹。博浪误惊嬴主中，白登长抱沛王羞。长驱欲践天骄血，转战思椿日逐喉。然
诺季心轻海岱，风声剧孟重山丘。朱家缓颊共排难，郭解捐躯代报仇。八百家奴怀蜀镪，
三千门客佩吴钩。登坛辟易渔阳帅，分道凭陵博陆侯。向晚章台嘶叱拨，深春韦曲叫钩
辀。麒麟阁耸飞身上，鹄鹳宫扃掉臂游。入幕嘉宾窥喜怒，当场摩诘效俳优。微行汉帝令
衷甲，清暇唐宗待蹴球。絶代妖童颜比郑，倾城小史貌逾周。频呼第五嬉金埒，屡窃无
双下玉楼。贵介原尝元并峙，奢靡王石定谁优。双珠跳脱迎无畏，百宝流苏障莫愁。云母
屏开红日耀，水晶帘卷碧天幽。灯笼锦织流黄被，火浣衫裌集翠裘。五彩同心饶绶结，七
珍如意竞雕瓠。盈拳鞞鞞商胡赠，径尺琅玕贵主求。象齿穹窿来絶域，蛟精莹膩出灵湫。
齐璜楚珉相辉映，鲁璧秦碑互校雠。彝鼎蚩尤存大夏，尊罍饕餮验成周。华笈溢案锤王
聚，妙墨盈箱顾卫留。绿垫遗踪看载辟，蓝田名迹羨重修。为园直跨新丰市，凿沼斜穿太
液流。曲岛回汀浮滟潏，孤峰层巘矗瀛洲。岩峩睥睨通河汉，■〈山截〉巖罨罨碍斗牛。泉
美乍分扬子渡，石竒先载郁林州。偏箱络绎驰山荔，巨舶联翻饷海榴。选匠荆扬乔木尽，
营工川洛众材鳩。瓜田灞沪联郊隧，柳陌咸阳夹置邮。十院名花行索笑，八窗文杏坐销
忧。松风昼起娱贞白，竹露晴翻媚子猷。芳草梦时连骤靦，蟠桃栽处朔勤偷。相思树底闲
情剧，连理枝旁逸兴遒。菡萏飘香萦桂闼，芙蓉输艳扑兰舟。青萍瑞实浮江上，绿萼寒英
寄陇头。俊鹳东方劳远致，神鹰南国费穷搜。爰居受享翻成福，吉了能言不解愁。子母玄
猿携上峡，雌雄丹鹤贮浮丘。当阶桧柏龙鳞劲，侧径梧桐凤羽稠。把钓文鱼时拨刺，开笼
细鸟日啁啾。玻璃盏净屠苍鹿，玛瑙盘殷脍赤虬。食进万钱忘下筯，羹调千镒未盈瓯。牛
心探馘熊蹯脆，蟹足熬膏■〈豸 賴〉髓柔。李尉庖中羸宝屑，郇公厨内足珍羞。从容握
■〈鹿外生内〉延诸谢，慷慨呼卢轧二刘。侯白抗颜陈戏剧，秦青扬袂动歌讴。数声子
夜明星落，一部阳春霁月流。别馆笙箫云共咽，回廊灯烛雾难收。杯传鹦鹉长酣醉，杓满
鸬鹚通劝酬。五斗椰浆尝异核，百壶桑落荐芳筵。生来梁孝豪游擅，蚤岁燕丹侠气投。日
杳虞渊犹角逐，天倾杞国漫咨諏。无论萧相居帷幄，漫说孙郎近冕旒。倏忽韶光倅闪电，
须臾沧海变浮沤。霜华烂熳催红颊，石火纷纭照白头。好是太玄扬子业，书成名字在千
秋。

青楼曲三十六韵

紫陌青楼接上林，香车油壁凤池阴。珊瑚绕砌萦丹嶂，玛瑙当窗甃碧岑。絶代祇看
双白璧，倾城何啻万黄金。蛟鲛帐暖匀苏合，玳瑁筵芬蕪水沉。树树相思巢比翼，枝枝连

理结同心风鬟坠马娇堪画雾髻盘龙力未任淡扫春山重阁曙斜拖秋水曲房深床头
琥珀镌文贝几上琅玕琢翠禽沙净鸳鸯翹绮褥泥融鸂鶒睡罗衾葱笼石竹绿衣绣馥
郁溪兰并带经理棹湖堤春漠漠乘槎河汉夜阴阴波填乌鹊虹千丈水戏鱼龙兽百寻
鼓瑟湘妃传丽句吹箫嬴女发清音褊褊舞燕甘泉畔宛转惊鸿洛水浥天女大罗邀把
袂仙姝少室恋披襟三三楚岫朝相似六六巫峰暮半沈玉洞玄浆霞共泛瑶池丹醴月
同斟青鸾惯向前除下赤凤偏宜后掖寻日隱未央频望辟霜飞长乐骤闻砧银屏照胆
悲华落铁锁传心怨陆沉织锦素娥情惨淡题纨班氏兴萧森崔徽谢客容颜瘁薛媛懷
人涕泪霏窦太主骄长卧疾息夫人憾但如瘖生来陈后情元妬老去徐娘思尚淫岸隔
杨花愁岁暮江迎桃叶畏寒寝虬髯邂逅緣持拂犊鼻逶迤为聽琴破鉴德言怜濩落投
梭益寿笑■〈山上歌〉崑霓裳殿迥唐宗入铜雀台高魏帝临东壁王昌懷易暢西邻
宋玉赋难禁时凭劒术祛凌暴屡握刀头盼滯淫落尽紫薇重倚架开残红杏独停针成
阴结子须臾事肠断春风杜牧吟（事多出汉唐杂史小说杨花即杨白华劒术如聂隱
荆娘之类）

挽朱廷尉可大十六韵（先可大以建言论斩恩诏释归寻疾终）

冠玉凌云美少年峥嵘人代擷青钱批鳞日惨双龙阙折角风吹五鹿筵劲气千秋
横碣石余生万死出甘泉无论廷尉张罗事政忆司空解绶年石匣苍茫南斗下盐车沦
落太行前吹嘘土壤人谁测物色尘霾尔并贤赫烨兰阴回鹵簿殷勤灑水系楼船腾空
駉駉庸多让贯日虹霓岂偶然去住未妨鸿羽隔升沉俄析雁行聯飞扬大业河山并突
兀雄词海岱悬共拟隋珠还汉阙那知和璧瘞蓝田藜空向阁残新序草没雄亭掩太玄
强直自知文季遂贞孤谁并伯喈传關心雨露酬前席极目乾坤倚断弦函谷青牛沉紫
气匡庐白鹿吊黄泉生刍一寄遥天外万壑松湫冷暮蝉（朱暉字文季强直自遂蔡邕
称朱穆贞孤羔羊之节可大生平行谊大类二朱）

朱十六在明订余过访沙上念载矣岁杪得手书犹故情曖曖也新春忽闻长逝感
怆不胜挽以长律十六韵

慷慨朱家结侠年金罇何日不花前仙源洞府三千辟帝苑池台八百悬夜夜更衣
遊太液朝朝聯袂入甘泉临淮桂树通侯第大庾梅花上客筵突兀雄心摧海岱飞扬豪
气挟星躔建安遗瓦酬双璧宣德新磁破万钱彩翰如椽仍自贵黄须张戟定谁怜官微
耻抱齐门瑟宦拙宁回越水舡海月亭中邀月坐江云楼上抱云眠明眸皓齿罗闺阁妙
曲新声被管弦舞罢柘枝频笑傲歌余桃叶乍留连孤松尔自陶元亮芳草余慚谢惠连
几夜梁园期作赋经时扬阁候谈玄生年忽报龙蛇值哀讵俄惊鵬鸟传地僻高陵盘狡
兔天垂荒陇咽寒蝉酬知未遂延陵诺愁絕生刍寄墓田（在明家有园池声伎江云楼
最轩爽每订余海上为十日饮余亦欲卜居其傍竟参商未如愿）

憇清源旧遊禅寺懷苏别驾以修二十四韵（有序）

忆曩在清源日易使君座中邂逅以修别驾握手定交淹留累月穷极平原之兴一

别十年闻问杳絕扁舟再过不胜今昔之感云

十月繁霜正满篱孤城凝望碧云驰青衫落魄还舟夜绿绮传声命驾时玉勒乱嘶章氏苑铜鞮高宴习家池龙蛇四壁毫飞动牛斗双函劔陆离妙曲西园陈翠管清歌北里近彤墀豪遊南郭朝朝共胜槩东山日日期绮陌朱楼情浩渺纱窗红烛梦逶迤何人作赋非同调若个谈诗不解颐一代平原懷竟爽千秋河朔兴难疲从知意气關寥廓詎谓形骸判别离驿路论心愁泛梗河梁挥手惜临岐穷来海曲甘垂钓泪尽山阴独解维摇落惭余同塞柳漂零闻汝逐江蓠茫茫白水迷三峡历历青山碍九疑无客乘风来灌口与谁寻雪上峨眉雕阑绣柱孤悬榻清簟疎帘静覆棋漫诧王媵留鳳辇徒闻薛女画蛾眉君平易肆虚谈卦扬子玄亭失问奇岸拆黄牛回舸舰城深白帝罢旌旗遥天滟潏双鱼絕僻地临邛驷马迟秣贯十千时潦倒柑题三百尚淋漓清风明月羈玄度流水高山咽子期越国啼魂无翠鸟蜀天翘首但黄鹂亦知聚散人间世极目长空雁影移（后再过闻以修歿矣）

寿吴封公七秩

遥遥紫气度沧溟翹首文园见德星三世龙章偏鳳跃四朝鸞羽独鸿冥才高曼倩飞千牒道直刘蕡困一经肮脏田方骄富贵蹉跎杜甫惜娉婷传家夙擅瑶华誉报国争传玉树馨赫尔盛时新闕阅依然名士旧门庭姑苏麋鹿遊春墅震泽鱼虾卧晚汀闾阖庙前闲倚仗沧浪亭下戏扬舲高阳藹藹耆先白大耋垂垂鬢尚青东望瀛洲鸾驭出西来玄圃鹤书停花枝灿烂供谈笑竹色葱芊伴醉醒神枣安期遗履烏冰桃王母降輜駟前除冠盖如虹集后苑笙歌带月聽纶綉几看回结驷緜纒犹自忆囊萤天河路近槎堪泛海屋筹多户未扃蚤识大椿千万禩南山无事祝修齡（封公文端公孙纯叔少叅子而文仲使君父也后先膺仕以潜德弗耀于时）

挽周征君公瑕二十韵

艺苑灵光四十春翩翩奇气上青旻飞翔鸾鹤三千界惨淡龙蛇百六辰北岭彦伦非异族东吴公瑾是前身宗雷绮岁耽玄寂禽尚生来习隱沦虎阜池头寻紫劔鲈乡亭上岸乌巾雄章甓社珠同耀丽藻昆丘璧共陈玉筋纵横三李合银钩摇曳二王亲（山勾）嶮絕顶文摹夏梁父中天篆勒秦巨榜华夷悬突兀穹碑河岳斗嶙峋西泠倚棹吹黄叶南浦垂竿弄白苹好士孟公腸磊落无儿伯道思艰辛羣仙闕苑招同列上帝丛霄忆戏臣太傅遗踪沈草树中郎余业散荆榛家残甫里悲罗雀冢翳皋桥叹获麟是处霜飙摧大厦当年湖海问前薪浮名早借遊燕客秀句偏携入洛人剧饮平原宁计日高谈河朔动经旬踟躕旧雨舟藏壑痛哭酸风笛满邻瘞鹤铭存徒自惜笼鹅帖杳定谁真惟应彩笔星河畔元气淋漓照玉宸

送万伯修中丞经略朝鲜二十四韵

突兀熊车控九边荧煌鹄印下甘泉元戎夜仗黄金钺壮士晨驱白玉鞭骤拥全师过碣石徐分小队出祁连骅骝五色羣连代鹅鸛双飞阵拂燕赤羽登坛环甲冑青油张

幕护楼船云销上谷旄竿驻雾涌丸都箭镞穿伐鼓吹笳行塞日飞槎浮筏度辽年诗书
总属中军好文武咸推吉父專曲逆竒谋神鬼运嫖姚雄略帝王传辕门妙算闻三策乐
府豪吟擅百篇西第征歌霞照席南楼舒啸月窥筵椎牛有客俱长孺倚马何人不仲宣
潦倒鸛鷓杯似杓淋漓鸚鵡笔如椽千言草綴陈侯牍一传花生杜氏笺横槊澄江天破
浪拔刀穷谷地生泉摧牙怪鰐鳞堆阜授首封狐血涨川道左累累迎吐谷管中历历拜
呼延宁知报捷凭公异会见题铭压孟坚后乘长驱母寡入前茆生缚郅支旋扶桑日上
清妖气细柳虹飞息燧烟定遠威名元独步平阳勲烈旧无前铜标直建三韩外铁券遥
颁万户先虎豹崇關茆土辟麒麟高阁画圖悬穀城伫待功成后一舸陶朱钓巨鯪

蚤春寄懷大学士赵公三十韵

金扉银钥散炉熏玉座琳居架斗文日为唐尧悬北极风因虞帝动南熏花明建礼
宫前雪树拂含元殿里云长乐烟光晨浩荡未央霞色昼缤纷衣冠肃肃甘泉聚环佩锵
锵太乙闻左邑亭台行未厌西清城郭望难分九苞鸞鷟俱呈瑞五色鴛鸿并作羣求友
黄鸝啼广陌将雏白鹤卧斜曛昭容户外垂罗袖采女车前曳绣裙十樣蛾眉桃李艳千
盘鸾髻麝檀芬荧煌甲煎中庭燎缥缈都梁别院焚水泛昆明宁习战山遊兴庆讵成醺
明堂禹益攄谟诰清庙夔陶绎典坟献赋班扬驰彩笔陈诗枚马擅风斤傅岩板筑真符
梦莘野鉏犁合罢耘优诏异时仍白璧辟书何处更玄纁趋朝政喜羣公洽报国应怜太
老勤绛阙频年劳上相丹扉无策对明君羊裘数问严江外雁序长瞻灑水瀆琐闥交章
神转王平台传论思偏殷三千鱼鸟张旗帜百万貔貅砺剑纹龙武尽收榆塞卒鷹扬全
护棘门军材官甲冑先浮渭大将楼舡欲济汾举鼎威名雄夏说扬鞭豪气迈高赍仓皇
跛足知狼顾踣躅狞牙见豕豮海匝鸡林传帝力江寒鸭綠净妖氛耆英紫綬堪圖洛狂
客黄冠会入鄆讲易庭前饶管辂传书门下半羊欣淇园荏苒龄齐竹邺架叅差帙散芸
翹首越裳重译至赤松岩畔候元勋

叅知张公睿父观察吴公文仲过访吴公旧宰金华订盟莫逆张公神交十载近始
识荆乃并辱提携收之方外高轩枉问燕洽连宵国士之知敬酬此什

绣服绯袍试晚晴荒途曲巷谢逢迎州民礼数容长揖地主风骚接大名幄里双虹
交映日輿前千骑并干城人伦张仲推忠孝吏绩吴公擅治平白雪中原驰锦翰青霞太
末射楸枰三都浩瀚裁新注七子崢嶸締旧盟志续齐谐罗艳异书传博物洞幽明朱旗
蹙借台端曳玉佩行趋阙下鸣蹀躞久虚陈榻梦飞觞何限庾楼情茆檐岂为看花入草
径聊同问竹行业综緗縑元自得篇携绮绘定谁评从知国士深留盼愁絕文通赋未成
送周大叅之楚中

当年文价重连城蚤向词坛识姓名玉署鸣珂朝建礼金门持戟扈承明中天正属
飞龙起南国遥看结驷行侍从清朝臣不厌驱驰赤社帝關情叅差原勒含毫待次第英
皇抱瑟迎衡岳雁回双节迴武昌鱼跃片帆轻登台风雨三湘暗按部云霞七泽明方岳
大藩形胜地甘棠宁讓召公评

送叅知洪公入贺圣节十六韵

暖日暄风上柳条楼船晨遡越江潮腰悬玉佩趋辰极手捧金函入圣朝鲁国生徒围讲座燕台豪侠避行轺棠阴婺里關情切荔子闽乡送目遥藉草定过平乐市看花频宿灞陵桥天浮太液明霞丽地接甘泉湛露饶彩笔何方留鼓吹朱弦随处叶箫韶南皮旧事犹飞动北海新盟未寂寥骏骨千羣随顾盼雄心八极任遊遨空囊历年藏孤刺陋巷经时挂一瓢洞里秦人扞峭蒨山阿楚客寄嶠峣观禾乍许亲田父伐木偏能问野樵敢谓龙蛇同奋蛰深知鹏鷲异道摇移床实奉元规宴下榻虚烦仲举招荏苒三卿回独坐逡巡九列讓元僚从知岳牧明堂近蚤伴皋夔翊帝尧

懷王恒叔十四韵（恒叔以擢任还天台寻赴白下中途病卧京口卒）

南迁新命下蓬莱紫气函關日夜开霞色乍眠方广寺月华频坐妙高台三山兴尽思三竺九曲吟成梦九垓瑶圃勒铭推哲匠玉楼题记仗雄才荧煌赋草传中国灿烂文芒接上台轶里晨霜流桧柏茂陵秋雨滴莓苔穷交此夕摠孤愤故友当年和七哀授简甘泉夸骏骨飞觚碣石羨鸿裁峥嵘汲郑交难续嘒喏荆高世尚猜咫尺遮须寻子建龙门曾识仲宣来

哭苏学使君禹十八韵

皐盖朱旛辟众僚青鞋白帽问山椒犹思藉草过三洞尚记看花就六桥划地雕戈红日驻倚天长剑白虹飘论心北海尊偏洽握手西园盖未遥一水骤萦桐柏梦万峰俄矗桂林标（君之擢岭右参知也先铨曹两拟中州命皆不下）桃榔树色浮公座荳蔻花香扑使轺玉管暮挥盈洞壑金函晨捧接烟霄长门鬪赋惊先达宣室紆谈误早朝十日河梁懷并郁经时濠濮兴难消将因索处寻公叔詎意飞升逐子乔斋老白杨情漠漠阁残玄草意萧萧中郎典籍悲零乱太史篇章恨寂寥躑躅五龙飞帝阙旌悬双鹤度神飙胡床激水迷秋月画舸钱塘咽暮潮国士中原时自惜名流东域定谁骄遗书百代鸣孤愤大乐千年閤九韶潦倒酬知肠寸折不禁寒雨堕深宵（君禹过余必却鹵簿掩蓬茆留连浹日余病或不冠对谈亶亶形骸尽忘）

少室山房集卷六十七

●钦定四库全书

少室山房集卷六十八

（明）胡应麟 撰

○五言絕句八十五首

自桐卢至新安杂咏十六首

（原阙）

石壁

天风吹客衣削壁遠如堕何人扫石来独抱苍云卧

辛夷馆

爱此幽人居春风满庭户指点辛夷花忘却来时路
瀑布

亭亭瀑布泉风吹一千尺朝来海上帆挂断长虹色
方干宅

万山围欲合一水去仍遥不识方干宅桃花满路飘
谢翱坟

西岩谢翱冢一径惟莓苔相对鹿麋坐秋风时自来
新安江

苍郊四无人轻桡荡空碧春江不断流满舵靡芜色
仙桃岩

绝壁耸精蓝孤悬五千丈何代武陵人移家此峰上
胥口

落月溪水寒漾舟时未已西冷何处村望望茶烟起
北高峰

言寻王子乔吹笙跨鸾鹤高峰不见人日暮藤花落
南高峰

维舟北岭下摇荡青芙蓉欲向南峰去夕阳千万重
乌石矶

瞥见双白鸥飞来似相识翩翩欲近人复溅苔花湿
桃花硖

移舟信江风沿洄不知暮前村路转遥系缆桃花渡
题翠虚亭廿绝（有序）

亭在刘氏园四围皆竹万绿森然余尝避暑其中因酬以廿绝（逸三首）

雨色凝书案秋阴拂画墙万竿云雾里知宿几鸾凰
上枝凝翠柏下叶染苍苔莫使王家见清吟不肯回

昨夜凉风起笙簧满坐幽何当裁万玉吹尽楚天秋
霜朝庭耸玉雨夕院敲金一自淇园后诗人几废吟

栖禽藏密筱鬪雀堕高枝老干空千尺何人写楚辞
镂就云门玉吹成嶰谷音昼日过沧海蛟龙不敢吟

鸟雀下前除幽篁百尺余昨宵风雨过寒洒杜陵书
野色琴书里江声枕簟傍恰称幽人卧湘云昼满床

参差临绿水袅娜拂秋霜忽记文同画生绡六尺强
涓涓薄暮霜袅袅经秋雨深院寂无人丛篁自相语

晋代诸名流清谈自相诧何如阮嗣宗长啸深林下

倚阑无俗事解带自清吟一雨朝来霁千竿翠欲沉
菱蕤紫翠间珍禽自游戏何当觅羽人共跨青鸾去
闲来晚翠亭四壁皆清翫传声王丈人更致蕲州簟
缥缈碧琅玕森沉下彩鸾佳人翠袖薄日暮不胜寒
截作箫君管携来弄玉家一吟双凤举白日赴青霞
迢迢风雨夜卧此一窗幽恰似扬舲日潇湘两岸秋
宫怨二首

罗幌寂无人玉阶秋草绿永夜不成眠飞萤照华屋
学得琵琶曲深宫不忍弹水晶帘幕下寂寂倚阑干
夏日斋居杂咏八首

阳春馆

一雨过修篁微风动清夏万籁昼萧然援琴北窗下
绿筠轩

独坐清风里流云湿画栏空斋无长物十万紫琅玕
漱芳池

明月照芳池倒影浴层嶂文鱼不畏人竞出沧波上
驭风亭

五岳非我乡九州岛非我宅泠然起太空忽见蓬莱日
西园

闲持一杯酒独向西园醉想象邺中人青云动飞盖
东园

西园复东园焚香送余日微风扫落花忽堕幽人席
啸台

铿若鸾凤音随风落天半空令阮籍闻未许嵇康见
卧游室

泠泠七弦琴飞声白云上三十六洞天不假卢敖杖
小斋宴起偶题

午日照柴扃先生宿酒醒科头了无事散步读黄庭
题神遊八极卷（为金华高生）

青天骑大鹏汗漫游八极笑杀牧羊儿空山弄拳石
题画（僧寺四景）

青鞋趁桃花杳杳前山暮霞标起赤城渐入天台路
赤云遍长空何处清凉国遥望五台山中天挂金碧
一钵复一钵相随不知老苍苍太白峰落叶秋多少

剪月作蒲团
云为破衲
岁晚入峩嵒
千山万山雪
绿筠轩夜深作
岸帻坐微凉
荷池雨新足
永夜寂无人
流萤度深竹
长日抱疴掩
闕谢一切客
朝夕相酬往者惟斋中十六君焉
兴文托好各赠以诗
岁寒之谊要诸白首矣
石屏
竒峰置案头
恍忆包山麓
万朵洞天云
鞭龙入林屋
琴
一鹤复一琴
翛然成太古
朝来岳麓僧
寄我潇湘谱
劒
鹿卢秘空匣
十载无精光
昨夜飞空去
龙吟大海傍
书笥
三万六千卷
一卷供一朝
百年双白眼
不向世人骄
玉磬
谁将一片云
置此禅床侧
相对寂无声
南山下秋色
五岳圖
援琴对五岳
流响入青云
犹胜四壁立
独拥卓文君
碁
一枰秋色里
时翻古人局
飞霜击画廊
邓艾收西蜀
胆瓶
折取三花归
琉璃贮春碧
三十六峰云
昼绕维摩室
笛
手挽铁龙君
登楼唤黄鹤
万顷碧天空
梅花何处落
茶灶（水记桐庐第十九）
夜凉起南轩
然藜煮雀舌
山童荷担归
满瓮严陵月
杖
青藜携作杖
霞色照人明
偶过刘中垒
翻疑太乙精
琴石
何年空林中
置此太古石
岁远莓苔深
片云无处觅
博山垆
月影下苍苔
闭门无剥啄
白云一缕高
幽人卧初觉
麈尾
玉柄蟠蛟螭
隱见前朝字
逍遥七百言
花照瓦棺寺
羽扇
羽扇白纶巾
寥寥坐清宴
千秋广武军
谁知阮公叹

芒屨

足下两青鞋他时作何状白日五龙飞
昆仑三万丈
卧室四咏

芙蓉帐

梦寐青莲诗千篇谢雕饰却笑江文通
花生景纯笔
湘竹簟

携来六尺云恰称衡门夜一枕洞庭秋
万山明月下
胡床

散发踞胡床徐看白云过时有麋麋来
胡床相对坐
石枕

至人本无梦何者蕉中鹿松风满石阑
任意黄粱熟
遊囊杂咏五首

蜡屐

长物不随身周游信双屐中天泰华云
絶顶蓬莱日
席帽

秋风饭颗巔吟成一登眺日暮谪仙来
相逢应大笑
如意

摩挲三尺锋虬龙挂寒铁万古英雄心
歌成唾壶缺
布裘

清晨偶出山一衲挂枯树向晚白云深
蒙茸不知处
药壶

五城十二楼高悬炼金液朝来费长房
误入神仙宅
秋日独遊兰阴山五絶句

兰阴山

午风吹芒鞋独往忘日夕指点山阿人
衡门在萝薜
西樵岭

落景留空山无人自来往一片白云中
时闻樵语响
圣罗庵

一钵坐禅床清斋自朝暮经年不出门
忘却前峰路
显教寺

探竒兴不尽秋思满林薄祇园掩夕阳
小坐昙花落
龙湫

波光满沙际夜景湛林樾山僧抱瓮来
摇动潭中月
杪秋再遊兰阴过精舍见前壁问题怅然
复书一絶

谢客访石门杜公懷岷首万古一伤心无言对樵叟
漫兴四絕

斟酌千秋事何人一瓣香
江宵梦断月色满空梁
一代汪司马怜才海内闻
乍日传书至殷懃问白云
十载吴明卿相闻不相识
遥夜武昌楼梅花飞铁笛
可恠滇南老雌黄信笔成
那知陈晦伯剖击更无情
少室山房集卷六十八

●钦定四库全书

少室山房集卷六十九

（明）胡应麟 撰

○五言絕句八十五首

题李惟寅山房三十八咏

清啸园

为园学步兵筑台五千丈
清夜啸声流冷然万峰上
松關

爱此松风吹柴關抱麋鹿
白眼四无人涛声满空谷
阳春台

高堂挥彩笔字字濯云霞
锦帐三千女齐歌玉树花
芙蓉阁

杰阁起千寻芙蓉不盈丈
为有谪仙人含毫坐其上
清风馆

一径入深篁翛然碧云墮
凉飏四面来吾将北窓卧
先站台

中天白玉台高挂九千尺
薄暮海东云先送嫦娥入
涵虚阁

平湖千丈寬中有涵虚阁
静夜时推窓星辰四檐落
度云桥

青鞵趣桃花杳杳赤城路
石梁千仞横自蹶飞云度
浣花池

方池六尺强风吹众芳
墮时有杜陵翁扶藜石栏坐
拱辰阁

危栏跨长空星辰俯手拾
独有紫薇垣可望不可即
藏真洞

藤萝垂洞口空谷四无人
恍惚天台路难寻两玉真

白云峰

移来十丈峰虬鸾舞虚牖面面白云生终南亦何有
翠微亭

荷锺入中条云霞导双屐山腰翠渐微冉冉孤亭出
凝秀轩

轩窗洞然开正对西山碧十日忘朝飧饱此莲花色
来云洞

去家十里遥结茆在深树白云洞口来忽与幽人遇
虬峰

苍鳞剥苔藓千尺自成趣朝来云雾生缥缈欲飞去
钓矶

八十曾无恙苍颜出渭滨宁知汉飞将黑发画麒麟
鳌屿

海上钓鳌客曾闻太白翁何如置孤屿圆峤在庭中
琅玕亭

十万琅玕枝个个青欲堕不分王徽之借我亭中坐
芳草斋

幽斋只数椽科头抱书读经句不出门芳草上阶绿
青霞馆

朝吟白雪斋暮憩青霞馆羲皇以上人脚赤发仍散
松室

危阑系铁絙高悬四松上千尺凌云台晋人何足尚
青莲阁

虚阁倚青莲恍入庄严界悠然清浄身万古长不坏
贝叶斋

一出恒沙河弹指几千劫金刚在舌根何许贝多叶
会心处

聚书三十冬插架三万轴开卷时忻然三公岂吾欲
苍玉馆

帘内延湘妃帘外种湘竹秋风何泠然淅淅动苍玉
制芟轩

湖上秋风生推窓绿无数不制三闾裳但制三闾赋
疑舫斋

虚斋官千尺恍忽阿融留何须疑陆处天地一虚舟

浮白斋

左手鸬鹚杓右手鸚鵡杯拍浮酒缸中万事何有哉
草玄居

翩翩白鳳凰夜吐青藜馆何人坐吮毫莫是扬中散
梅花亭

孤亭十尺藏梅花万株列中有姑射仙肌肤若冰雪
澹然阁

事业等唐虞浮云过太虚何如高阁上支卧一床书
如如境

兰若何翛然焚香拥孤衲兀坐万緣空绳床下黄叶
滋兰室

移将九畹芬散植雕楹畔悠然丈室中如坐潇湘岸
綠雨楼

飞楼瞰平津空翠散遐瞩山雨暮欲来萧萧入窗綠
留客处

十畝辟强园寒风洒亭榭何须问主人日坐琅玕下
延春亭

南园红药尽西坞綠阴重别有藏春处胡床未易逢
沙上晚泊即事

叶落枫如撼花鼓桂若崩白头溪上叟闲坐结鱼罾
月下船窓独坐寄内是夜系缆东昌

憔悴鸛鶴裘飞霜正暮秋亦知妆阁上频夜望刀头
席上戏为崔孝廉贈所欢

妖姬年二八艳色妬名花莫问张君瑞崔莺是婿家
王恒叔山居杂咏十首

紫芝山房

何物东园翁老作储皇翼后夜呼茆君乘风起八极
松澗

飞楼跨四松杳杳拂云汉白日广陵涛飘萧起天半
莲社

西来有别传自得碧筒趣肯使柴桑公攢眉独归去
嘉树台

千尺摩云霄百围蔽林莽逍遥双树根不作大槐想
钓亭

玉璜钓姬公羊裘钓汉祖竒哉清静君玄成钓万古
忘归石
双矶渍莓苔赤脚此闲坐偶逢邻叟谈不知夕阳堕
芙蓉城
层城粲朱华彩艳照林薄新篇露下吟一一谢康乐
曲水濂
玉匣閤昭陵聚讼欲成藪千载真兰亭复落王郎手
云碓（李诗水春云母碓风扫石楠花）
林钟踈北岭茶杵急西家湖风亭子外扫尽石楠花
龙藏
前身阿难陀种此青莲舌何事五千函虚谷尽贝叶
春日同叶唐赵郭朱包诸生遊兰阴作
百雉云中虹水面晴曲江春事蚤随处丽人行
为赵宗鲁别驾题屏菊四絶
玉蕖迎风粲金英浥露开东篱遥怅望拊掌白衣来
直干经时雨蓀英午夜霜灵均餐不尽艳色满潇湘
簪来盈宿露插处炫明霞布帽须频落何烦笑孟嘉
裊裊依危石亭亭照暮山羨他甘谷水千载驻红颜
胡谷元池亭杂咏十二首
深雪庵
幙被璽云窝清虚四日照门前乘兴来或有王郎棹
凝香寝
斗室罗尊彝名香坐中发何处佳人过援琴鼓白雪
蒼卜斋
虚斋植蒼卜香气何缭绕一路闻碁声琤琮出花杪
水竹居
千顷竟何为万竿复何处居然五畝园独领浣花趣
清华榭
朗吟池上篇构此数椽屋禽鱼互亲人恍惚见濠濮
浣花池
方池六尺修为深劣加丈游鱼不畏人泼刺清波上
悬萝径
何年卜此居恍入子真谷一径悬飞萝孤亭吐乔木
丛春馆

堂上三千宾堂中六一叟无日不开花无时不携酒
不染亭（周植芙蕖万本）

翠幄何亭亭朱霞亦濯濯周遭十二阑飞香透帘幙
秉烛轩

敲碁坐明烛微风动清夜迟我同心人落花满亭榭
飞啸台

高台四无人啸声堕林樾彷彿罗浮仙空山弄明月
竹素园

亭亭风雾中琳琅自成圃何言对此君大业在千古
沈氏园异竹数竿俨如红玉客话于余乞一絶纪之
淇园晕紫霞恍作赤城色为问石家郎珊瑚几千尺
题寺壁二首

青林带平楚杂坐惟渔樵回看万峰里一径入中条
楼台出林杪入望杳难分半夜投龙去千山尽白云

黄河大风商舶阻絶姜计部仲文遣人觅舟载余一夕遂抵淮上因得口号六首却

寄

茫茫大河水一叶向江南不遇姜公子何人借布帆
扬帆度吕梁回首见萧县桃源何处村千家寄高岸
四月桃花水归帆处处看南风薄暮起停棹向新安
黄河九驿路驿驿旅人懷飞流六百里一夜到长淮
浑如白帝峡千里一朝还独少阳台女双蛾碧雾问
长风破巨浪一苇下三吴那羨扬州鹤腰纏上帝都
园中即景

庭树清阴满园林翠色交数竿春雪重摇折紫云梢
题画

水绿红衣净沙翘白羽幽尘中骑马客谁见五湖秋
题祝生无殊潇湘坐同司马汪公二首

万绿围轩窓蒲团弄秋色时聽湘夫人云中鼓瑶瑟
兀兀幽篁里槁梧同嗒然科头抱双膝目尽九疑天
徐象先以薛生素巾花卉五圖乞题各系一絶

不作倚门妆尚假倾城色何似薛家娘巧心悬素质
右山茶

飘然姑射仙亭亭出林藪宛似薛家娘霜天濯素手
右梅

瑶琴月下弹罗带风前解大似薛家娘幽香匀素彩

右兰

霜飘金奏沉风动玉声碎可似薛家娘秋闺鸣素佩

右竹

泠泠冰玉姿独立潇湘岸恍似薛家娘寒涛披素练

右水仙

少室山房集卷六十九

●钦定四库全书

少室山房集卷七十

（明）胡应麟 撰

○五言絶句七十三首

别业灏溪之南平湖远岫幽谷长林登顿沿泗颇擅独往之趣暇日效右丞辋川体
为五言絶三十章并拉诸同好作焉

春灏草堂

幽居武陵源背城止十里泛泛桃花舟春江灏纹起

谷口

绿堤十数家萝蔓相萦带亭午闻鸡声翛然白云外

灏西

爱此春风吹持竿坐溪畔粼粼灏西水浮萍聚复散

灏东

桂楫横沙棠沿泗殊未已落日漾中流莲歌四面起

三径

青山在南邻绿水在北牖为问柴桑翁径中复何有

华严精舍

焚香延衲僧偏袒坐林薄相对谈华严西岩夕阳落

兰薄

采采幽兰花清香畏零落何处佳人来含情坐林薄

谈玄室

玄亭落花遍兀兀把壶酒山童懒应门失我同心友

柳庄

今朝好风日策马东郊行双柑挈斗酒往听黄鹂声

薈卜斋

偶结清浄缘幽斋种薈卜凄迷月色下馨香不忍触

芝坪

深林斲黄精冉冉白日暮千岩与万壑不记来时路
啸阁
静夜无人声微风动梧叶散发踞胡床忽上南楼月
北窗
赤脚仍蓬头焚香坐长夏何处来清风泠然北窗下
沧浪亭
言从刘伯伦荷锺载壶酒一醉眠沧浪蝉声在高柳
梧阴馆
夜凉起南轩梧风时澹荡疎雨滴阶除复溅池荷上
萝月轩
横琴当绿萝万籁夜俱寂凉月何纷纷飞萤暗中入
乌石冈
信步不知远蒙茸入深树悠然乱石中忽与樵人遇
寒林
深林四无人秋意满长薄日暮牛羊归寒烟出篱落
废寺
一榻悬空林寒蝉满窗户但记入山年不知出山路
樵坞
曳杖随寒山遥遥不忍别欲趁斜阳归亭皋遍黄叶
丛桂山房
扳援桂树枝秋色俄已半为报山中人花开正如霰
鹭查
连山带返景依约澄潭上白鹭时惊飞衔鱼入深巷
芙蓉汉
何方向奇客扁舟载尊俎欲采芙蓉花悠然向南浦
潇湘岛
偶作潇湘遊置此江中屿万绿围轩窗九疑何处是
明霞洞
尺素随桃花传情报仙媛为扫石床霞殷勤待刘阮
苾刍园
闭户动经旬长斋度晨夕不知园中草苍翠已盈尺
药房
手持长生瓢随意坐林薄凉风吹古藤时复数花落
柴桑里

凌晨出东篱采菊动盈手悠然南山色落我杯中酒
梅屿

素手何亭亭新妆俨明玉谁怜絶代姿岁暮倚空谷
雪岑

清晨策蹇驴正见梅花发独往灞陵桥千峰乱飞雪
秋日同郭朱吴郑四子登大寺山寻东峰亭遗迹（亭故有唐人冯宿记）

扫石坐危颠高天下双鹤欲问冯郎碑东峰夕阳落
秋日送僧遊五台山二首

挂锡辞吴峤支筇入晋關秋风秋叶里独向五台山
五台五百僧日暮鸣钟待独有病维摩未赴文殊会
蚤春同惟敬诸子登显应宫阁望西山霁色即席赋
立马蓬莱岛千门霁色通西山四百寺处处玉华宫
即事

文杏作雕梁卢家白玉堂武陵双侠少下马入垂杨
九日李环卫招同诸公登显应观阁不赴

寂寂东篱下黄花意自真笑杀龙山客空迟落帽人
夏日集古堂阅宋元诸名流画题十絶句

短桥留夕照烟树隔江深过客应迴棹疎钟出定林
前途风色起孤舟暂停泊寒鸦不断飞残晖在山阁
一卷南华子科头抱双膝时有鹿麋来殷勤似相识
芒鞋不觉遠目与归鸿遇万壑无人声天风起孤树
醉吟緑蓑底孤舟系渔梁不知沙头水夜添三尺强
深林四无人徙倚白云坐山风日暮来吹我鶡冠堕
赤脚步青沙斜阳照古查鳧鸥太欺客相趣入芦花
散发孤峰顶去天不盈尺四顾中原空悠然独扞虱
汀洲黄叶落一望弥蒹葭美人隔秋水相忆空瑶华
前村风月好杖藜时不厌一径荳花明数家松叶暗
夏日双树园闲居彙括昔人成语作十絶句

悠然濠濮邻会心岂在遠鱼鸟时亲人不觉白日晚
乞得真形圖五岳在指掌抚琴一动操欲令众山响
蓬蒿满宅前中开一行径高树八九株挟书坐余荫
可人费招呼俗士且迴辙入室惟清风当窗但明月
山静无人声焚香坐朝暮苍藓盈阶除落花遍庭戶
空斋种白杨悲风时谡谡人生不得意千岁复何益

长啸临高台白虹贯四野龙泉与太阿汝乃知我者
何劳邨侯书绕架三万轴痛饮读离骚居然名士足
庭花昼合围松竹蔽行道淡面邀缙流相对豁怀抱
左持鹦鹉杯右把鸬鹚杓拍浮酒缸中生计长不恶
独酌逍遥馆醉中拈笔漫书五絶

薄俗难共居红颜不长好吾将跨大鹏神遊八极表
振衣望天汉六翮来长风翩翩佳公子胡为浊世中
仰面看屋梁著书阅千古谁为扬子云作计徒自苦
长笑山中醪千日夸酩酊安得遊华胥万劫时一醒
巢由抱箕颍尧舜开虞唐何须论得失臧谷俱亡羊
瞻堂十景为大叅徐公作

一环楼

底事爱楼居楼居自堪爱千峰翠若环不断雕栏外
翫月堂

南峰流素华光彩荡林樾胡床人未眠翫此瑶台月
碧练湖

一镜涵空明波光倒楼殿错诵玄晖诗澄湖碧如练
古柏

移来蜀相祠曾息轩皇驾乍宵风雨声恍惚苍龙下
岩泉

何来千仞壑贮此百尺流莫令到人境畏引桃花舟
綠野堂

禾黍被郊原綠畴自高下何论十仞堂将筑万间厦
咫尺松楸

松柏啼鸟鸟楸梧下雀羣咫尺亲颜在无劳望白云
人境舟车

悠然人境中舟车任来去底事论避喧本无喧可避
阳峡倒流

泠泠清溪水倒流向幽谷任洗高人耳不濯凡流足
峰霁金光

突兀金台尖去天不盈尺中夜五云飞正见蓬莱日
题大隱园芭蕉二首

年年学临池赫蹏苦不足种取綠云笺窗前三百幅
六翮何飞扬含苞翳深树朝来觅羽人共跨青鸾去

少室山房集卷七十

少室山房集卷七十一

（明）胡应麟 撰

○五言絕句五十三首

程氏息园三咏

绣佛斋

萧然丈室中焚香自朝暮午夜文殊过窻前遍甘露

挥塵堂

盱衡长史锋缓颊中军笔门外真长来气压孙安国

卧云馆

愁看巫峡云懒醉罗浮月静夜楚天遥黄陵秋万迭

题渔樵耕牧图四首

持竿俯碧流莫学蟠溪客白首向岐周抛纶事西伯

观棋坐斧柯四面青山色回首一千年桃花烂春碧

时邀石户农耦耕放黄犊翻笑历山人移情九州岛牧

大隗在何方襄城亦奚有莫言五尺童曾稽轩辕首

题画

四山晴送色孤榻午生凉伏枕无余事幽禽噪綠篁

偶题四首

上下五千年纵横三万轴高凭百尺楼远送乾坤目

不读昔人书那知当代旨自信阿龙超任将周顛比

落落诸年少沾沾问字来莫嫌双眼白白眼更慵开

骆生去灵隐八咏何人识寥寥婺女傍一片寒山石

秋日同友人登兰阴山小憩华严精舍作

支筇上寒山石磴连云陟兰若无人声禅关堕黄叶

寄江云楼

危楼倚太空袅袅一千尺美人期未来江云四面入

寄松斋

箕踞长松下一斋大如斗白眼双飞扬人间复何有

寄雪廊

虚廊寂无人饱看琼瑶堕想象释迦文頽然雪山坐

寄江菴馆

朝梦江菴开夜梦江菴落如何二十年不到江菴阁（右四题俱朱在明园亭余未能往作此寄讯）

出郭望西山诸寺二首

柳色带平湖桃花拂钓舫斜阳下南垞一片辋川图
西山四百寺寺寺金银台莫言去天远回首见蓬莱
题祝生玉华馆图

孤亭寄华顶去天仅容尺时有牧羊儿招邀煮白石
题花石狮猫图

长日花阴下安眠雪作肤玉人春梦醒何处唤狸奴
题朱光禄园中杂景十首

江蓠馆

一夜江蓠花乱吐山房侧唤取汨罗人窻间弄秋色
江云楼

何年驾飞阁缥缈凌天风朝来五千丈半入江云中
雪廊

羽扇白纶巾瑶琴坐来歇山童无处寻一片长廊雪
松斋

悠然四松顶置此六尺斋事事张功父何论十二钗
雨花庵

手持净名经高座挥玉麈长爪何铮铮庵头遍花雨
筠房

苦竹数百竿中藏室如斗试窥隔岸人可是王猷否
凝香室

博山燎沉水鳳巢拥羣娃双烟结一气烂漫凌紫霞
鹤院

感君刺臂恩聊此休六翮夜来警露声时堕清音栅
啸台

鼓吹出层颠恍奏钧天乐气慑阮嗣宗声从半空落
快阁

中天构层台登临何快哉披襟一长啸万里雄风来
题画四首

半亩疎烟合危峰落照含苍茫白云里有路入终南
右樵

禾黍满前村桑麻自成邑千古桃花源秦人余古迹
右耕

平野何苍苍空林动寒影扣角晚归来斜阳堕西岭

右牧

隔岸远山色苍茫生暮愁孤舟烟雨际独占楚江秋

右渔

题九华精舍册为颺上人

五岳行踪僻三山去路遐何如北窻外坐卧九莲花

张伯起幼予邀集别墅观白公石戏赠

峥嵘十尺幽谁辨白公留试唤香山丈时时解点头

伯起园池中鸚鵡数十头甚驯扰戏赠二首

暂去三冬候重来六月中何如陇山翼空忆主人翁

为笑支公鹤凌云杳莫攀羨他池上翼飞去复飞还

憩陈从训湘竹榻戏题

大梦全忘日清音半杂云遽然修竹里恍忽下湘君

嘲老杜

笑杀杜陵狂题诗欲断肠宁知谪仙子捧研在沉香

余既赋瞻堂十景矣而意有未尽复三絶句写之

翠盖何亭亭苍虬舞天半恍忽真人游金支夜璀璨

右古柏

■ 〈彳 虢〉 ■ 〈彳 虢〉 幽岩泉源流自东鲁中有杏树坛莫认桃花坞

右岩泉

一柱障中流洪涛渺难越已见回百川何论倒三峡

右阳峡

题章氏园亭四首

偶逐武陵人移家来絶巘日暮碧桃花沿洄出深涧（红云坞）

长夏懒着冠经旬闭门睡偶来深院中万朵红云碎（绛英台）

何年植此君苍翠压林杪十亩渭川云山童寒不扫（修筠馆）

绰约孤亭中梅花斗清絶高天一万株乱洒罗浮雪（万玉亭）

题卷二首

世事了不闻峰头数椽屋鬪取华山云长歌下空谷

右终南山樵

家临洞庭口门对君山色微风卷钓纶万顷湘潭碧

（原阙）

少室山房集卷七十一

●钦定四库全书

少室山房集卷七十二

（明）胡应麟 撰

○五言絕句三十九首

自淮上挂帆便风一夕遂抵梁下

淮水何汤汤布帆疾于矢一夜东南风吹船七百里

吕梁阻风

百尺牵大河一步一回首懊恼石尤风多于故人酒

题于生芦雁四图

落日燕山道寒风汉水波碧空秋万里锦字数行过

右飞

不断征人泪全消旅客魂一天疎雨过灯影暗长门

右鸣

漠漠秋清月萧萧野岸风寒芦休拣尽全树上林东

右宿

乍可餐菱苳那能豢稻粱数羣烟雨外恍忽似潇湘

右食

寄居穀元池亭陈生为除室张榻酬以二絕

雪阻燕山道风寒易水尘独怜陈仲子扫榻待幽人

一家犹道路十日寄并州幸借元龙榻安眠百尺楼

送祥光还白门四首

为爱三山色金焦问法幢一酌中冷水浮杯夜渡江

布衲披云去蒲团向月裁故园芳草色应遍雨花台

片锡长安去珠林照紫霞横经高座寺讲席半天花

四百南朝寺青鞋处处游何方驻瓢笠古刹寄牛头

为盛生明元赠淑卿二首

嘹唳莺初啭轻盈燕欲飞应知杜陵老日日典春衣

远山眷绰约秋水睫滢洄好觅张郎画无烦魏帝催

九日同莊静父俞羨长登宝所塔（时歌者顾生戴黄花侑酒）

突兀龙山色登高豁旅愁黄花亦无赖偏逐少年头

河梁话旧十絕句送左辖吴公之山西（有序）

忆壬午计偕晤莆田吴公于白下仅京兆府一交臂耳其明年吴公遂以上第扬翥列藩飞沉异途垂二十禩庚子秋羈寓武林吴公以右辖破例存枉屈指旧游杳若陈梦而吴公气谊缱笃不啻久要未几而公有晋中左辖之拜河梁斜日挥袂黯然漫述短歌以代骊唱通计前后都得十篇兴集神流亡论工拙（吴公别号霞城）

粲烂朝霞色峰头幔作亭长城一万里天接太行青

太行何崔巍千崖界空紫异日吴使君功名亦如此
使君本人杰挟策游蓬莱朱颜映绿鬓片诺雨花台
雨花台上游黄金馆头别一鸣空骥羣排云叩闾阖
闾阖皇皇开青袍脱蒙茸烨如太阿剑白昼飞神锋
神锋入腕飞青冥掣雷电上考书吴公第一明光殿
明光寄陝服朱旛沧海头东方簇千骑出入偕轩輶
高轩惠然来光照寒士寓笑揖大将军争夸汲长孺
亡论汲生慙祇益卫侯贤何限飞沉事黄梁二十年
分携二十霜腾蹕九万里高咏河梁篇涕泪尽知己
再送左辖吴公十絶句（有序）

公将以便道还七闽却赴晋辖之擢余词有弗尽写者后十絶所繇续也

一代丝纶寄千秋保障名高牙拥大旆西入晋阳城
白头徒自新倾盖俨如故蔽芾越东西棠阴十万户
飞鸿游碧汉尺鲋泳沧浪脉脉穷交意相看大海旁
当年京兆府一面覩荆州詎意飞腾速鳞符覩玉旒
百吏咸趋风千官竞回席人生得意年天门骋八翼
旬宣既南国保厘复西土著绣还故乡朱节震华鼓
灵泉汇九漈瀆洞浮苍云飞书乞佳梦为报九何君
左淬莫耶锋右淬干将锷宇宙两神龙延津当昼跃
楼船济汾河中流渺云雾耐可鲜荔枝不到桑干渡
烨烨承明庐上考书第一白首洛阳才呻吟卧蓬草
（原阙）

少室山房集卷七十二

●钦定四库全书

少室山房集卷七十三

（明）胡应麟 撰

○六言絶句三十三首

长夏闭关散发高卧吟诵之暇时或焚香鼓琴殊有羲皇之适信笔六首
开卷小酬岁月出门便畏风尘十洲三岛游客万壑千峯主人
谁言名教乐地懒着沐猴衣冠午睡不知日落晏起欲废朝餐
科头不出城郭散步或傍檐楹前身灌园处士今代闭户先生
尼父六经日诵邺侯四部时开领取千秋万世从他九棘三槐
小草自甘惭忸大椿终古逍遥不梦有莘五鼎高挂箕山一瓢
东郭飞花晏坐北堂芳杜晨兴回驭王阳自得絶裾温峤何能

题画四首

桃花夹水千树柳色垂堤万重何处数声鸡犬人家只在前峰
南涧新篁雨过西岭长松日斜散发孤亭相对忘言一卷南华
窻北寒光露满篱东暮色云低地僻黄花自采天空白酒谁携
千岭槎牙古树万峯摇落孤梅试问长安高卧何如剡曲空回
端居述怀六首

千劫总归眼底万缘不入胸中散发狂歌宇宙侧身高卧崆峒
朝见许由行逊暮看虞舜明扬黄屋翻成重累不如枯坐禅床
千古登坛大帅一时出塞诸侯试较两家得失莫将毛颖轻投
户外时时豺狗床头日日晨鸡可道敬通戚戚须知玄靖栖栖
烂漫图书自惜萧条门户谁持莫笑枚乘年老游梁剩见佳儿
二女九男有底三公七贵无由架上乾坤万卷毫端日月千秋
园中四时歌

春

北郭寻芳冉冉西园载酒迟迟晓日含花紫燕春风绕树黄鹂

夏

午日阴阴枕簟凉风习习窻纱绿染芭蕉一丈红舒菡萏千家

秋

偶约南邻二客扁舟湖上从容不省停桡何处秋光万顷芙蓉

冬

白蛤孤吟蹇卫红裙低唱羔羊何似陶家学士龙团煮雪溪堂

客岁病留瓜步且三月今年春仲复过此值江鱼大上每至友人家玉尺银条咄嗟
便具殊厌馋口余越中不能尔也

夜夜三更灏水年年三月扬州饱食河豚江鲚何论越鸟吴牛

富贵曲十二首

翠靥霞生玉镜红妆日耀金钿后院花开百合前庭柳学三眠

妙舞谁同静婉清歌莫辨娇娆绮阁珠帘半卷画堂银烛高烧

腻玉搓成素颈松云绾就乌丝午夜灵光赋就人人高唱新词

灼灼朱唇澄雾亭亭素面迎风夜合花梢月上王昌近在墙东

西北浮云隐隐帘垂百尺高楼罗袖风前试卷玉钗斜拨箜篌

宝屣参差步障银缸烂漫窻纱一扫如椽万字酣歌笑拥如花

杳杳笙歌院落煌煌灯火楼台十二金钗对舞三千玉蝶齐开

缥缈湘裾曳地翩■〈衤迁〉洛袜凌波院院红绡国色莫将磨勒来过

赵媛燕姬作队秦娥卫女成行尽日纶巾羽扇弦歌荳蔻花傍

骤见争如易别相思入骨难禁南陌花开并蒂西陵草结同心
鳳辇晨游绮陌羊车夕叩纱窗长信宫中第一昭阳殿里无双
日暮木兰舟上罗裙玉腕从容北浦遥通菡萏西洲竞采芙蓉
少室山房集卷七十三

●钦定四库全书

少室山房集卷七十四

（明）胡应麟 撰

○七言絕句八十二首

再送茂卿还晋陵四絕句同童山人子鸣作

草色萧条六代宫故园回首叹飞蓬秦淮一夜西风急落尽芙蓉细雨中
客里黄花别季鹰清秋残叶洒孤灯归帆忆尔江城下半夜潮声泊广陵
楚塞吴关望里賒遥遥云水接蒹葭秋山何处幽期近缥缈峯头一片霞
扬子汀洲起暮潮片帆南下雨萧萧他年共访苏台月携手垂虹百尺桥
寄陈稚冲一絕

綠发青袍易水涯东风频过酒人家为言上苑三春雪何似长干二月花
唁陆茂才二首

谢家庭树正茏葱莫拟探环向别藁白玉楼中题记罢他时来作顾非熊
潦倒青毡气未除莫将流泪洒长裾聊堪剩取双眸在老向西河学著书
别惟寅入燕四絕

星散交游二十年两人相对白门前西风无赖长干柳吹送千条上别筵
白鹭洲前白浪高飞帆晨发广陵涛浮云万里燕台上击筑何人伴彩毫
十载酬知泪未忘携来烂漫洒河梁愁人最是秦淮曲月落霜飞上去航
片席遥分大海流宝刀持赠若为酬黄金台馆三千尺截取长虹寄石头
黎秘书刘观察刘金吾丘计部李环卫周明府康茅朱三山人出钱即席赋
骏骨黄金且未哀飘然裘马赋归来河梁日暮骊歌发回首高天郭隗台
满坐青山照客装风尘憔悴旧荷裳吴钩莫问尊前色白日长虹堕太行
四海论交碣石宫一时携手向西风惟应别后严陵钓千尺重悬大海东
高天击筑暮云屯大陆飞霜满蓟门莫向尘埃惭浪迹十年词赋在乾坤
寂寞妖姬旧酒楼南归金尽鸛鹑裘阴符匣底犹堪读可怕机前少妇愁
潞河舟中再别惟寅裕卿汝修絕句五首（时余将由越适楚）

雨色荆门树树哀武昌黄鹤暂徘徊西风玉笛危楼上万片梅花落酒杯
乱山台殿楚江头极浦蒹葭夹岸流二十五弦湘水瑟月明何处不堪愁
神女祠前落日低祝融峯外乱云迷那堪重作高堂梦万树清猿岳顶啼
一望巴陵楚峽分木兰舟上雨纷纷中流无限潇湘色日落君山起暮云

衡岳千峰雾里看洞庭波色照阑干扬帆自为青山去漫拟当时白雪寒
华阳杂咏八首

垂虹岭

万仞危岩古木低翠屏回合上丹梯桃花流水无人问一路猿声夕照西
小石梁

云际飞梁压水开翠岩丹壑自萦回扪萝欲记天台路片片青霞履底来
水云洞

积雪苍茫涧道分空林麋鹿自成羣夜来洞口飞泉过流出西岩几片云
武陵洞

云压重嵯午不开石门烟雨护莓苔分明记得秦时路曾到仙源采药回
涵碧池

池上藤萝岁月深半空寒影动青岑携琴欲寫潇湘意夜夜蛟龙水面吟
浴云潭

絕壑东回鸟道微隔山流翠转依依西风落日空潭上满地寒云湿不飞
飞来石

片石巉岈倚怪松清秋寒雨滴虬龙苔深不记飞来处疑是崆峒第一峯
步虚台

缥缈天都十二楼银河遥望不胜愁何因醉逐飞琼语谪向人间五百秋
西湖竹枝歌四首

四山楼殿锁清秋一水萦洄岛屿幽咫尺蓬瀛休道远画船箫鼓在中流
听乐鱼龙出漾陂学飞鳧雁绕昆池青林半锁瑶台暮綠浪平铺画舸移
倚棹汀洲草色齐回船涛浪满苏堤万家杨柳青门外一片芙蓉綠水西
双鹤徘徊几夕阳孤山云水似潇湘重游好探东风信万树梅花舂雪航
送胡文父还匡庐五首

尔去匡庐第一峯翠屏千迭紫烟重何时共拾金光草对倚青冥跨白龙
秀出香炉万岭西远公精舍夕阳低怜君我欲逃禅去相逐寒云住虎溪
栖隐峰头树色分传书遥寄紫阳君一声铁笛千林晚片片桃花落彩云
闻说年来李梦阳青鞋曾遍踏苍茫扶筇何处天池近指点银河百尺长
九迭云屏雾雨余海风江月望来虚携书倘逐青莲兴乞取匡君旧结庐
挽陆文学一絕

廿载青衫阅岁华宾宫遥映夕阳斜春风何处山阳笛落尽棠梨万树花
湖上即事二首

一派笙歌拥大堤春风携酒画桥西回鑣竞挽青丝骑苏小门前柳色齐
垂柳朱门十万家青帘红旆各年华苏小墓前寒食近碧桃无主乱飞花

渡钱塘七首

一夜天风挂海涛雪山零乱舞江皋轻舟忽渡钱塘水万仞扶桑日色高
赭龕回望两山屯天削银屏障海门白浪昼看三百里不知谁唤伍胥魂
浊浪东排万里天平分吴越海云前凭谁为乞支机石坐拥浮槎到日边
十二楼台倚碧空安期亦在紫云东瓠车笑指相逢处摘取蟠桃万树红
江色浮空四望遥青山斜倚木兰桡何人共击中流楫散发回看大海潮
十载长安祇浪游扬帆东蹴海天流含毫秋斗思光赋万壑鱼龙起暮愁
坐拥轻桡入乱山蓬莱东望彩云闲麻姑是处堪携手重迭秋江倚翠鬟
夜发钱塘以风涛迅甚次日遂抵桐庐

暮云飞尽海门开越客扁舟万里回一片青山涛浪里不知帆过子陵台
裕卿业与余为钱塘之约余以归计迫不及待輒留一絶

飞流如雪洒篷窗一夜离心拥去艘回首不堪相忆处千山明月满桐江
登钓台四絶

重迭岚光倚翠屏天风吹客上危亭持竿试着羊裘坐何处长安有客星
挟策初从帝座回系舟重上子陵台峰头日暮狂歌发万里浮云海色来
欲向桐君话隐沦千峯寒色对嶙峋青袍可是游燕客不染玄都半树尘
百尺纶竿俯碧流危阑天半夕阳愁山灵似识携家意十里鱼龙送客舟
邦相游烂柯不遂戏为四絶询之

底事双鳧向碧空洞天重迭锁芙蓉虚疑王质云中去仍见王乔县里逢
乘风百级上莓苔樵者峯头唤不回何似归寻胡伯子石屏霞谱为君开
当年仙诀妙通神下子蟠桃十度春一自移居兰水上烂柯岩畔更无人
一局纔从石上看人间千日已阑珊何如共载溪头酒剩作平原百遍欢
问喻邦相病四首

闭阁经旬卧起迟青山长日对支颐吏人莫讶休文瘦政是初成八咏时
名姓曾闻在赤城衙斋一卧万缘轻惟应剩取清羸骨白日飞鳧上太清
十年归卧茂陵居长日惟删旧着书最是汉庭怜汲黯病来犹得伴相如
尔闭高斋送夕阳余愁肺病卧空床何缘对挟飞龙去万仞青天坐石梁
题方山人听秋轩

密磬疎棂翠筱中碧天遥挂二梧桐何时自挟蒲团至坐领阶前万叶风
斋中绘五岳为图称卧游焉各系以诗

泰山

玉殿琼楼起太空扳藤遥上碧云中中宵不辨星河色万丈天门海日红
衡山

拄杖飞萝上百盘狂吹玉笛和青鸾回看月色千岩吐不道峰头日是广寒

嵩山

远下昆仑度玉华黄河九曲照三花空明洞底无人住散发中天弄紫霞
华山

太华三峰削不成巨灵高掌矗咸京相携玉女朝天去朵朵莲花足下生
恒山

绛节回看上帝台金茎云雾接蓬莱不知碣石青何处万里冰天雪色来
秋日南轩栝发忽数茎斑斑焉漫题二絶志感

未到潘年已二毛胡床箕踞白云高犹胜寓直秋风里寂寂寒更赋骑曹
绿鬓全抛旧日容一庵秋色照蒙茸凭谁试摘三千丈挽取羲和驾六龙
七月十五夜小亭翫月

尊酒凭阑客思孤万家明月对冰壶不知檐外秋多少一夜飞霜下井梧
谢章仪父惠家酿二絶

玉碗香飞琥珀明自呼南斗吸长鲸河清莫道今难俟已换王家月旦评
一饮挥毫一百篇何人真是酒中仙应知他日来民舍不饮麻姑石上泉
送人之会稽

问水看山兴未涯十年瓢笠寄烟霞青鞋夜宿云门寺好趁千峰向若耶
秋日寄友人山中

白雁丹枫尽作行霜天何处问重阳东邻老衲归来晚静夜猿声到竹房
寄洛中友人

浊酒青丝照玉壶信陵公子对呼卢狂歌莫问燕台客零落秋风傍狗屠
寄张炼师

构得茅斋傍玉华芙蓉伏火炼丹砂清秋絶顶朝元夜白露千岩湿桂花
韩逸人西游二华持扇索题戏为书一絶句（时韩寓余城东）

豆蔓松花护客居半床云色半床书西游何处烧金液太乙峰前旧结庐
送人入蜀

远下荆门客思浓清秋落木遍千峯猿声一夜孤舟雨愁杀巫山十二重
送何生游边

翩翩书记向龙堆白草黄云大漠开落日固原飞檄少题诗频上赫连台
寄黔中刘从事

崔嵬铜柱乱峯前迢递乡书隔岁传醉卧桃榔明月底不知人在夜郎天
秋日送人之夔州

黄牛峡口暮云愁白帝城前江水流落日片帆秋色里千山行尽见夔州
少室山房集卷七十四

●钦定四库全书

少室山房集卷七十五

（明）胡应麟 撰

○七言絕句八十三首

秋夕纪梦十絕（有序）

夜梦至一处万山嵯峨白云载之其上有金银宫阙丽甚榜曰碧落洞天余徘徊其外良久不得入而寤因戏作十絕纪之

芙蓉一枕自徘徊恍惚钧天帝子台长啸八公携手去万峯云色驾蓬莱
足蹶安期两赤虬飞行忽到海西头青山一片昆仑顶乱落星河满崩缙
晓入瑶池殿里行珠帘斜卷月华明天姝十万花如绮不省何人是智琼
十五神鳌戴白云三山长揖魏元君不须远问灵飞篆玉佩金珰尽秘文
永夜银河送客槎吹笙遥赴阿环家狂抛织女支机石携手扶桑万尺霞
龙蹻泠泠踏紫烟罡风吹向大罗天白云满地秋如水十二琼楼独自眠
一局王乔对未残飞书何处到青鸾骑龙夜赴西池会三百明星乱玉盘
玉榜琼楼次第开梯仙灵境乍徘徊花前舞罢山香曲万朵红英落绛台
树树桃花玉洞前成都卖药已千年秋来跨鹤腾空去月满仇池第一天
缥缈羣仙列上清天都齐送佩环声归来莫道无人见两袖霞光罩赤城
夜登金华絕顶慨然有怀作步虚词五章

两袖明星拂绛河天风吹客上嵯峨无劳更觅梯仙界半夜鞭龙入大罗
长揖元君向紫宸中天楼殿矗金银如花座上三千女携手先过第一人
礼斗坛边下夕阳焚香絕顶奏虚皇不知谁唤羣仙到零乱星河白玉床（洞中有
仙人石床莹如白玉）

一谪仙班下海涯梦魂长绕阿环家西华旧业荒芜甚老却瑶池万树霞
左揖龟台右木公仙坛瑶草暮茸茸金华自有骑羊客漫许留侯事赤松
新秋郭鸿胪吴文学过访留饮小斋至暮

一自华阳罢和歌频年白眼卧山阿玄亭莫怪秋来启刚为侯芭到绿萝
嘲小杜

舟泊广陵忆杜紫薇青楼薄幸之句戏成此絕

花压虹桥水压城玉箫吹月到天明当时自少挥毫客可道青楼横得名
喻邦相即署中建楼题曰信美索诗为赋四絕

胡床明月坐高秋碧瓦朱甍大海头十二危阑宾从满一时传作庾公楼
画槛雕阑瞰越城平湖十里最分明公余半卷珠帘坐四百楼台弄晚晴
婣娟一片起檐牙影落临安十万家丝竹管弦清夜满何如迁客在长沙
不道青衫客异邦钱塘江外是浔阳扁舟若趁滕王宴一夜南风到豫章
戏赠贞吉中尉兼柬唐惟良

来鹏姓僻人希覩司马名成帝未闻独有故人先识面豫章前殿旧将军
灵洞山房杂咏为赵太史题五首

古洞栖霞

石磴崿挂紫烟芙蓉万朵石羊眠寻仙不用卢敖杖双跨虬龙入洞天（洞名双龙）

中巘干霄

鸟道千盘压翠微中峯突兀锁烟霏天风两袖扞萝上不道金丹白日飞
三山环壁

十尺幽轩锁碧桃三山罗列画屏高登临忽忆吾家近万仞扶桑压巨鳌
片石飞云

萧然行橐赋归农琴鹤斋前但故踪莫道岭南无长物罗浮携得最高峯
山亭樵语

万籁无声昼寂寥小亭徐坐看花飘前山何处来人语一片归云下晚樵
读方侨山人集二絶（有序）

方侨山人太古从子也学五言律有清韵如霜清渔艇集雨暗客帆收野水通泉脉
山云露石根藤交山寺僻溪截野桥横细草幽绿径新篁密蔽檐晓树笼云暗寒山带雪
竒湿含鸠雨细香赚蝶风轻等句率晚唐余味视从父可谓青冰第才具不多耳尧治又
侨之犹子既从汪王两司马乞太古传与铭复哀侨遗草刻之而惧其传之弗永也索余
题二絶其后云

廿载寒溪曳短筇何人携酒日相从林中偶遇飞觞客把臂无劳觅仲容

尚记蝉声过别枝韶卿亦与谢翱期（方干有句云蝉曳残声过别枝方鳳宋末婺
人字韶卿）流风莫叹诸方尽五字重吟铁马诗（山人有题铁马诗颇可观）

再送吴师入洛四絶句

翩翩行旆逐西风十郡材官指顾中屈指大廷推第一河南宁羨汉吴公
珠履三千各赋才向来门客尽邹枚高牙大纛鸣鞭去白日遥登古吹台
二室东西并拂天中天楼阁拟云烟抽毫絶顶嵩峯上一线黄河坠槛前
七圣襄城驾不遥三花紫气拂轻霄遥知问道崆峒后鹵簿相催入圣朝
客有至自吴门者传周公瑕媵人将就馆喜而为诗询之

台深铜雀锁斜阳高唱将雏待凤凰筵上不须重顾曲吴门今是老周郎
叶明府校士钱塘五絶余邑方大有秋故末首并及焉

曙色兰阴照锦袍飞檣遥下越门涛高秋棘院抡文夜万树天香入彩毫
明远高楼百尺悬寒光遥夜动龙泉由来宝剑司空识紫气行看北斗连
紫绶绯袍焕陆离画堂灯火彻帘时湖头十里秋风色两袖天葩上玉墀

■〈山截〉 蝶双高上紫氛迢迢三竺架青云雄飞好趁仙鳧翼一顾能空万马羣

处处黄云足稻梁家家秋色贺登场东南竹箭三千尺更逐伶伦到上阳
日暮风起仲嘉戴一布帽复落赋此嘲之兼呈汪司马
谷口天风起暮笳笙歌催客咽流霞亦知阍内非宣武布帽何须落仲嘉
访汪士能不值吴生留饮狭斜席中漫兴二絕
潭水桃花闭綠萝一尊其奈片云何何时更发青莲兴饱听汪郎白雪歌
满蹊花色绣平沙自在娇莺唤落霞莫笑杜陵衣尽典曲江还醉四娘家
又戏作寄汪六

漫诧莲花似六郎须髯如戟太昂藏若为骑鹤扬州去十万朱提照画堂（汪适以
会计入郡）

晨发题壁

春风一笑引流霞占尽扬州十万家惆怅碧桃何处落银屏珠箔寄天涯
为沈生题扇（沈生善歌余使习司马大雅堂四剧诗以勗之）

清夜琵琶搗落梅香山司马玉山頽若为长恨歌成诵一曲千金意未回
夜同汪六吴三过城西酒楼巨觥飞白堕数十巡旋取余所携金华更酌小奚拨阮
二竖子歌弋阳潦倒申旦乃别俳语一絕纪之

潦倒垆头作酒狂青衫重入少年场那堪醉忆琅琊语满酌金华听弋阳
杨孝廉邀游河西酒楼歌者持扇乞书

垂柳垂杨千万条春风留客董娇娆他时怕唱清江曲二十年前旧板桥（戏用唐
人原句）

即事

萧萧风雨坐莓苔百罚深杯未拟回莫怪桃花闭春涧刘郎今度是重来
歌者屡召不至汪生狂发据高座剧谈水浒传奚童弹箏佐之四席并倾余赋一絕
赏之

琥珀蒲桃白玉缸巫山红袖隔纱窻不知谁发汪伦兴象板牙筹说宋江
赠吴美成

崇兰满室坐飞香十二楼头白玉堂自是宣和词赋手莫将年少诧周郎
睡起作

绣衾霞褥卧徘徊啼尽天鸡唤不回无限悲欢十年事一宵齐向梦中来
岩镇遇雨宿汪士能斋头隳括唐人絕句作续惆怅诗十二章（止成二首而止）
骑鹤吹箫空月明乱山风雨闭荒城那曾一觉扬州梦赢得青楼薄幸名
仙源何处觅琼浆万朵飞红乱夕阳莫怪桃花贪结子芳菲元不为刘郎
答汪仲淹

寒雨巫山闭楚台七香俄载阿香来不因宋玉能相挠日日行云未肯回
又分得花字代歌者答

胡麻何处问仙家忽有明妆出乱霞自是刘郎重到晚莫将风雨怨桃花

司马公既命片云矣更谓余命一字忆公高唐记神女小字瑶姬请遂辍以字之公笑曰可并为赋一绝句

仙姬环佩下瑶台（戏借用传奇语）握手桃花万树开日暮巫山行雨去莫教人拟片云来

翌日吴肇成招同司马泊诸君浮筏遇雨泊梁下有挈歌姬赵某至左手三指爪皆长六寸余司马记中所谓邯郸才人者也

方平遥驻五云车勾引麻姑出绛霞莫向蔡郎矜指爪夜深留取拨琵琶（席中方演琵琶伎适赵姓亦奇）

绿发红颜照舞衣门前车马未全稀若为湖上参禅去长爪铮铮法雨飞
别汪仲淹二首

痛饮狂歌夜不休华堂风雨促离愁相思何处偏惆怅三月桃花病倚楼
篮笋扶携出钓矶河梁别泪乱吹衣不堪重执汪伦手潭水桃花扑面飞
别汪士能二首

野店相逢匹马黄画楼红烛照霓裳虬髯自是前生貌莫向扶余作国王（是夕适奏张伯起红拂传奇）

绿酒银灯露未晞红妆深夜舞明妃无论车笠他年事已共咸阳作布衣
邦相卧病金华寄讯二绝时余亦伏枕山莊

八咏楼空月色饶青衫憔悴沈郎腰西风露白金盘冷咫尺恩波下绛霄
挟策归来似转蓬卧弹长铗送飞鸿金华旧是寻仙地可道双旌驻葛洪
同祝逊父叶叔明诸子登大云山

万井楼台夕照间青烟明灭锁林峦凭谁寫寄中原客一片关仝画里山
是夕赵汝元祝无殊同游市中观灯

荧煌灯烛照山城携手春风入画行歌罢落梅清吹合恍疑笙鹤在蓬瀛
祝太学昆季过双树园不值

三径蓬蒿昼不开落花长日锁苍苔何因看竹西邻去忽报羊求二仲来
雪中二祝生携酒过访

四山晴雪照疎棂片片兰阴入座青试问成都携酒客几人能过太玄亭
将游新安叶明府传送人舟即席赋谢二绝

竹箭春江二月流桃花红映木兰舟聊因叶县神明宰一借仙鳧灏水头
宁国新都一水间朝游白岳暮黄山乘风坐啸天门上遥指双鳧入汉关
张元春为余作书斋四图各系以诗

金华三洞

万仞朝真天际头双龙飞瀑望堪愁何如坐对王维画四壁青山尽意游

少室三花

三花晴色际天开尚忆当年二李才（李渤李荃）莫笑书生长寂寞碧油车引上
元来（封陟事见广记）

二酉山房

海外徒闻二酉山昆仑玄圃隔人寰生绡拂拭高堂上彷彿曾驱八骏还
兰阴精舍

溪上秋兰带暮春万峯晴色照嶙峋他年莫使阎侯见认作僧繇第二身
春日送高生楚游

云涨平湖绿满堤片帆朝挂武陵西春山尽日无人见万壑飞花杜宇啼
方山人章叶二太学过集

龙门何客曳长裾年少翩翩各起予不是元龙豪气尽十年湖海断来书
同胡孟弢王永叔李季宣游曲中戏为二绝

十年沽酒共持螯沦落长安气尚豪银烛绣帘春似海夜深重奏鬢轮袍
蒲萄新绿照人明急管繁弦四坐倾莫道春明能久住朝来仍别润娘行
同房仲过云间舟中听赵五叔远夜歌作

楼船明月夜如霜一曲清歌赵五郎贪听阳关第三迭不知行色在吴阊
潘张两生小饮舟中时童子阿四侍侧众以黄四娘呼之余赋一绝

骑曹公子各翩翩黄四娘娇压玳筵狂杀杜陵歌扇底烂烧银烛坐霜天
赵生以歌者范三至再乞余诗

淋漓尊酒醉还醒嘹唳歌声出锦屏最爱赵郎情性好双眸时为万山青
再赠小范歌玉簪

欲解终袍换绿衫梅花明月夜■〈毛参〉■〈毛参〉不因赵氏连城在那得尊
前听玉簪

幼于所欢王姬携酒饯别戏酬以小诗

最爱风流黄四娘偏能问字浣花堂他年细检成都札犹恐才人是洛阳
少室山房集卷七十五

●钦定四库全书

少室山房集卷七十六

（明）胡应麟 撰

○七言绝句八十首

邓远游贻书远讯纚纚千言副以绝句十章如龙泉太阿不可迫视间颇为余致前
新之愤不知余比为浮名所累无地自藏知我者希我且贵矣四绝寥寥用谢良友
珍重双鱼到草堂暮云春树话偏长仙山咫尺携家近满把青刍饭石羊
昌黎漫诧蚍蜉横中散休嗔蝮蛇豪濩落乾坤元我辈纷纭月旦任儿曹

散发垂竿大海东羊裘无计掷西风雌黄政尔须贤辈一扫浮名万累空
十斛明珠颗颗圆骊龙光射草堂前论心不为钟期在廿载震旦抱絶弦
金华山杂咏八首

朝真洞

徙倚明霞上百盘石门天际敞高寒峰头生读黄庭罢遍礼羣仙白玉坛
水壶洞

一线悬嵯鸟道通石床锤乳斗玲珑飞流万尺无人到谁缩庐山此洞中
双龙洞

洞底双龙挂碧流蜿蜒十里暮云愁朝来拂拭仙人躄携尔同登十二楼
二仙祠

台殿崔嵬锁玉京白云遥按步虚声他时辟穀堪寻汝绛节双飞绕太清
芙蓉峯

万仞嵯峨雾色重青天谁削紫芙蓉扶筇恍忆西游日玉女盆边第一峯
赤松涧

鹿田西下接鱼矶千顷寒流照客衣薄暮乱山风雨过不知潭底玉龙飞
紫薇岩

文采曾惊六代豪紫薇深锁白云高何人为启藏书穴摇落青山伴彩毫
石羊峯

絶顶寒云挂玉清三山何处有蓬瀛乘风自叱羣羊起不向黄冠道姓名
调安茂卿时安携妓湖上

一舫朝移入画图亭前苏小斗携蒲徘徊十里春湖色忘却吴松旧钓鲈
寄祝鸣皋

落魄长安旧酒徒五陵花色劝提壶别来肝胆凭谁问一片霜华照辘轳
湖上寓目

猎猎轻风试碧蹄羣儿相逐段桥西不知何处双鸳度十数金丸落大堤
过吴门不及入访喻邦相寄怀四絶

锦缆牙樯出太湖楼船箫鼓入皇都那堪此夜吴阊外断雨凄风问客途
越国山川处处留吴门花月更优游何人不道神仙吏四百楼台任意游
燕寝凝香画戟开云间太守旧怜才萧然一榻黄堂畔飞骑时迎二陆来
玉尺银条照座明鲈鱼午夜到江城秋风斜日长亭畔更向何方作步兵
河渠歌十首为大司空潘公作并奉怀前大司空朱公

大海波涛静不流长堤云雾似龙游千秋玉帛朝仙苑万国车书会帝州
鼓吹连天发棹歌旌旗耀日午风和波摇柳色通淮甸水泛桃花入潞河
宝应堤成不避风高邮湖远若行空由来饷事今年蚤四月楼船尽过洪

大圣曾闻出泗州司空重起镇淮流河开砥柱三千丈殿锁琅玕亿万秋
铁骑云屯汉武年翻愁瓠子变桑田何如此日新梁就南控长淮北控燕
六月边头未请粮河西已到万余皇欢声欲沸三关士满载嘉禾出太仓
锦缆牙樯照碧天黄旗十道晚风前山樱未入吴姬口乍日中官已进鲜
朝行齐鲁暮淮徐沐雨栖风志屹如业就耻方徐内翰功高不数宋尚书
三十年来治水劳白头犹自驾轻舸河边莫漫夸千骑海上曾闻钓六鳌
随山刊木两司空万古勤劳夏后同试听河堤行客语朱公一去有潘公
抵淮上友人邀饮狭斜迫归不能舫棹

新水黄河没钓矶一帆高挂暮云飞红妆十万无颜色笑杀当年杜紫薇
别苏别驾南归四首

邂逅相逢兴独豪平原十日醉葡萄风前忽奏阳关曲别泪千行堕宝刀
红粉清源十万妆亭亭高髻绿罗裳那能不滞狂夫兴满目飞云是太行
桃花新水木兰桡挥手离人出画桥何处相思偏入梦嶓江飞雪越江潮
才大君犹困执鞭书成余亦倦游年惟应匣底湛卢色夜夜双飞北斗前
送黄季玉还楚四首

一棹依然入五湖数声长笛楚山孤岳阳楼上高回首何处长安旧酒徒
神如秋水玉如颜赢得殷郎唤阿环若向黄陵祠畔过莫教风雨妬湘山
电影霜蹄八骏材盐车犹自困蒿莱亦知龙种元西极不向黄金恋故台
布帽垆头扑旧尘貂裘愁杀蓟门春洞庭湖上南归雁莫忘芙蓉寄远人
憩白牛精舍梦游湖上听歌作并寄郭鸿胪

翛然文室卧楞伽一枕江南兴未涯三十六陂春水色画船箫鼓载吴娃
食河豚

鼠肝虫臂任乾坤修短茫茫一气论絶粒五旬身尚在何妨残喘食河豚

河豚味在诸鱼之下仅腹中腴可赏昔人目以西施乳亦稍夸矣余骤食此鱼颇有
声过其实之叹戏题一絶以俟定论物固有遇不遇也

掩映银盘白玉壶质如鸡卵味如酥若将西子胸前较未必鸱夷泛五湖

记十八九时章二宅中食江鲚狂饮剧醉豪兴欲飞迄今二十余年再过瓜洲食此
此物风味不减畴昔乃余发则种种不复能作少年态矣

玉盘金缕按霓裳曾倚瓜洲作酒狂二十余年重下筇一生江鲚几回尝

鲚鱼水族中佳品也江淮惟二月有之故亦谓时鱼昔人恨鲚鱼多骨此物鳞刺尤
多余酷重其风味每食必尽数盘座中戏题此絶

最爱鲜鳞出素波金盘玉筇荐银梭人生事事元堪恨岂独鲚鱼骨太多
渡江一絶

一片归心付倦游碧桃花尽大堤头沧洲不借凌风舸二月春江似箭流

过晋陵欲访朱在明安二茂卿云在明以先一日往京口矣十载之期竟左成约殊
怅怅也

萧萧风雨一帆开恨杀篙师捩柁回不信习家池上饮十年长是梦魂来
再寄文仲一绝

千峯回合碧云迟想象吴阊日暮时何日双柑寻旧约一尊湖上听黄鹂
夜过长安酒楼作

垆头飞雪万家寒琥珀香吹白玉盘歌罢落梅天渐晓不知门外是长安
夜读献吉仲默廷实昌谷于鳞诗漫兴五首

回首开元八百秋莫将蹊径细追求巨灵自有移山力手擘黄河万里流
自得西方最上诠莲花千仞扑青天由来騷裹鸣銮足可作风螭步骤传
北地申阳各僑流中原名誉本鸿沟当时误作攀鳞客王后卢前特地愁
肝胆平生献吉闻金丹炼就肯离羣时人浪自开门户点染高流入墓文
七字高华一代知若为诸体遍称奇犹龙莫讶宣尼赞自是难忘问礼时
采菱曲十二章（有序）

采菱者髻事纬真今长矣余乃遇于三衢屠谓余是子知诗冀一言附集末追数
其旧为采菱曲十二章

风情老去似徐娘犹逐王孙负锦囊莫驾轻车残雪里人间无处觅萧郎
碧衣长袖伴瑶琴欲拟方回更自矜学得新诗明月底含羞不肯向人吟
十院名花院院开高悬明镜在瑶台碧空万里天如洗飞挟娉婷夜半来
红颜二八定谁如三十专房宠未除头白楚宫看似旧登车何用泣前鱼
风神秋水照华筵怪得王孙掌上怜惆怅后庭花底月凭阑回忆破瓜年
绣帽罗衫恰称身绿丝布裤最撩人愁中开府看如扫梦里司空认未真
那曾调笑问当垆惯向书斋直唾壶蓦地闲行寻不得画廊东角斗携蒲
焚香懒着鷓■（义鸟）冠长日东君带笑看好是绿窻明月夜潜身行傍曲阑干
旧识花卿在锦城相逢高唱少年行那堪回首东风恶吹送青帆入四明
玉雪肌肤姑射仙天涯挥手剧堪怜明年定挂山阴雪人在阳明赤水天
玉树相辉照画屏朱陈遗事最堪凭含啼却笑文君拙不遣相如聘茂陵（是子姓
陈又朱生年差少同事）

十年声动大长秋一笑如花越水头为有薛家红线在何须重上木兰舟
送董大之会稽

风雪离人下灞桥长歌不断董娇娆梅花两岸清溪色船到西兴正落潮
再别惟效观察一绝

阳台题罢复琴台夙昔风流擅楚才君到川南相忆处海棠烦寄一株来
寄观察陈座师

千骑西南最上头雪山晴色照吴钩高牙大纛行春暇满酌郟筒酌武侯
入晋陵复不及访朱在明怅然复寄此诗

廿载飞书醉白沙乱山寒色限孤查南园一夜西风急无数江蓠尽落花
枫桥夜泊梦与房仲诸君欢饮达旦觉而怅然寄此

玉立红妆照画船终朝寒梦不成眠风流何处王公子落尽莲花玳瑁筵
湖上酒楼听歌王检讨敬夫汪司马伯玉二乐府及张伯起传奇戏作

光阴百岁迅流霞一曲东篱擅马家何似翰林新水令秋风迁客走天涯
水云深处木兰航白雪纷飞大雅堂莫向五湖寻旧迹于今司马在郟阳

掩径频年侣博徒阳春堂上白云孤才闻北里歌红拂又见东园演窃符
赠黎园邵生

艳舞娇歌向月明金钗罗袜斗轻盈何缘饱听花卿曲今日钱塘是锦城
幼识歌者何生一别廿载相对恍然为题一绝

回首高阳二十年何戡重对各潜然渭城是处殷勤唱遮莫明朝送画船（俗传有
渭河边倚画船一曲）

忆以修拏舟钱别至魏湾执手恋恋闻某直指垂至乃发迄今令人怅然偶值清源
鸿便輒题二绝寄苏并讯易惟效蔡景明

脉脉盈盈一水头何须七夕笑牵牛秋来两地如相望夜色天街万里愁

四倍平原饮酒期牵衣犹自恨临岐遥知送客河梁后不向襄阳倒接■（卍离）

（余曩在清源三君旦夕谈燕今易擢关市蔡归闽中矣）

寄亭四绝为邑文学祝宗旦题从其子树勳请也

缥缈千峯列翠屏八窗云气透疎棂遽然一枕南华梦别有乾坤在草亭
科头箕坐一亭空白眼青天送断鸿几许豪华驹隙内何人先觉大槐宫

高峯攒翠落精庐五斗颓然不愿余举白持螯应自快着朱骑马定何如
风潭百顷和沧浪坦腹遽庐万事忘睡起秋山扞虱坐不知斜照堕胡床

少室山房集卷七十六

●钦定四库全书

少室山房集卷七十七

（明）胡应麟 撰

○七言绝句八十首

武林送吴山人北游

雪里钱塘一棹孤送君寒色满长途黄金台馆三千尺曾伴荆高作酒徒
哭李惟寅太保十二首

大将星沉易水头五陵城阙暮生愁那堪落日临淮第珠履三千觅故侯
笙鹤遥天拥上才何年华表一归来黄金惨淡名流绝落日阴风满坏台

秋色辕门照大旗塞垣金柝夜迟迟危楼十丈中天月尚忆司空坐啸时
细柳营中柝夜停衣冠朝野惜精灵无烦更树中郎碣潮海千山尽勒铭
露洗长空散郁蓝无穷秋色庾楼南胡床寂寞珠帘闭不见征西月下谈
羽扇纶巾白纻袍声名华貂羨人豪不知累代凌烟上若个如椽擅彩毫
梵宇金银簇画梁湖山晴色遍奚囊鱼龙寂寞仙槎去四百楼台挂夕阳
十万貔貅静不哗青门归熟故侯瓜城头一夜飞霜急落尽桓伊笛里花
百尺层台近潞河琅琊二美数经过华阳座上谈天客强半追随入大罗
燕子矶头落叶黄秦淮南去是金阊分襟最忆河桥畔明月千山堕屋梁
忆共春宵禁籞东玉鞭驰骤两花骢六街明月天如水谁唤词人碣石宫
国士提携最少年青衫联袂洛城前重来恸哭西州路万树棠梨咽暮蝉
哭曹子念六首

厯落嵌寄赴九泉伯通椽下最堪怜扶风何处归妻子恸哭梁鸿废冢前
乘风先到鳳麟洲二舅星冠话昔游树树棠梨娄水上殡宫何处问曹丘
一病相如困茂陵玉楼魂梦夜飞腾亦知鹤背难胜汝应逐齐谐跨大鹏
三尺须髯十尺躯便便大腹定谁如莫言饱食曹交粟七步才华四部书
縲紲宁当罪冶长当年书记羨邹阳只今何处寻遗草无限春风属野棠
避地金阊岁不遥葦门萝径晚萧条钟声送客寒山寺恨泊吴枫第二桥
送谢文度还武夷二首

长江天际一帆开拂袖离歌下越台君去幔亭回首望霞光犹似赤城来
凄风残月大江濱送尔津亭见白云摇落万山秋色里何人同谒武夷君
过齐东不及持斗酒酌鸣皋墓二絕寄怀

满眼寒山卧北邙修文人去尚为郎无劳更下杨朱泣曾共斋头种白杨
殡宫遥锁石门寒浅土齐东寄伯鸾惆怅棠梨飞欲尽乱山无语夕阳残
天香馆

缥缈孤根立翠峦扶疎晴影拂仙坛瑶台十二金风起吹送天香出广寒
空翠亭

翠葆林林夹画墙万株寒玉锁烟霜闲来此地堪逃暑满榻清风伴上皇
红蕖沼

徙倚清香动曲池赤栏亭榭午风迟红妆半掩青鸾扇疑是温泉罢浴时
来鳳冈

百尺亭亭翳紫苔清阴长夏满楼台风前漫作琴声听白昼天池鳳鸟来
断桥斜照

夹岸轻风上柳条桃花晴逐杏花飘游人不道春光晚箫鼓楼船入断桥
漳塘霁月

明月娟娟漾碧沙银塘秋水浴蒹葭凉风忽逐双鳧起零乱中流白藕花
天井平原

古木寒林四望幽经过麋鹿共淹留倏然不起红尘念坐占平原十亩秋
鹤阜清风

何年孤鹤此徘徊引步僊风拂岛来永夜月明秋万里满空零露湿瑶台
灵鹫峰怀童子鸣二首

行尽天台三十峯春烟重迭锁芙蓉孤云不作还家梦卧听僧堂雨后钟
翠拥千林路不分夕阳回首一钟闻天南词客留题处惆怅西岩满寺云

忆同俞羨长张元春何主臣吴德符游宿湖上弹指隔岁孤坐小园横塘烟雨甚思
四君挈木兰飞白堕共之輒题一絶便面寄吴生传致三子

好风凉月大堤傍何限秋光扑画墙回首乱山飞鸟隔一林烟雨满横塘

王山人希曾记室戎行廿载矣归武林寄止穷巷门庭萧然余偶过啜茗其中为题
此絶

老傍东林学种瓜当年投管事龙沙胡床独坐秋风里门巷无声落豈花

忆与王生酣眠小玉馆中迄今垂三十载武林邂逅纵谈畴昔则同事酒垆者什九
岱宗矣把臂潜然輒复赋此

三十年前宋子侯名花倾国烂溪头箫声断絶秦楼闭何处重携弄玉游
送徐茂才

竹窻萤火记当年心折兰陵系酒船纵是相逢犹有恨西风憔悴菊花前
送王生之白狼幕中二首

不逐游闲抱隐囊翩翩结束事戎行闺中秋夜长如许莫遣音书断白狼
廿载封狼忆旧筹悬腰霜色粲吴钩殷勤脱赠秋风里五夜飞餐日逐头（时方有
事日本）

病卧旬日焚香小斋偶扶杖过墙东则池上芙蓉尽放矣秋色三分倏忽强半捉笔
聊赋短章

肺病寒窻卧绿纱竹床支枕诵南华不知湖上秋多少帘外芙蓉尽落花

王生希曾以文犀琥珀贖余序其滇游诸稿余诺之未暇也会生有事白狼戏成二
絶句柬之

灿烂文犀粤岭来竹皮冠小正堪裁异时牛渚休然却留伴温郎玉镜台（右犀导
）

一寸寒光万里心怀中明月梦中寻莫将玉盃移相傍看作兰陵旧鬱金（右琥珀
杯）

少与徐文学同馆万松别去二十四载一时诸子邈如晨星今秋邂逅武林因各举
大白为寿题小絶以纪之

一毡犹记共钱塘举白持螯思未忘二十四年弹指过莫教容易赋河梁
祝生如华旧从余学诗溪上一别三载余是秋余羈寓武林忽棹扁舟来谒投我七
言律四章风骨峻嶒殊可喜愕于其行也走笔五絶勉之

一枕梧堂乱叶飘新诗何处掷琼瑶数篇风骨峻嶒甚可道青衫业未消
寸管纵横白雪飞夜光前乘簇珠玑从他赤帜收全赵斟酌登坛在布衣
尽道寥天跨赤虬那知深狱闭吴钩自知匣底千秋在无奈寒光逼斗牛
騶駟飞黄并絶尘太行高坂骨嶙峋君看异日登台客可笑于今伏枥人
一棹河梁系白沙芙蓉江上未开花十年句践罗倾国投老西施学浣纱
再送汪山人兼寄余督学君房六絶句

玉鳥双飞大海晴河梁斜日断云平凉秋试蹑青莲躄一问黄冠到四明
一曲君王赐鉴湖苍生能起谢公无云门寺口青山色忆对金陵旧酒徒
悬圃层城碧海头何烦徐市说瀛洲月明天姥三千仞对挟飞鲸梦里游
回首南皮旧迹存当时词客半销魂由来笔札君房妙一柱灵光镇海门
洞壑潮音阿耨前金银楼阁太空悬三生大士容听法净洗军持供白莲
望气频过大禹陵甬东城郭近西兴天风万斛潮声起人倚浮图第一层
看花湖上人家覩闺中四时障子为题乐府四章

绣户重重闭綠苔桃花一树晓风来罗衫乍试娇无力淡扫春山上玉台
一枕相思梦未成银屏珠箔画楼明石栏杆畔榴花发相对狸奴坐晚晴
万户寒砧接暮笳征夫何处未还家相携女伴瑶台上五色金盘弄月华
窻外寒风正袭衣流黄那复理残机鸣箏炽炭围炉畔高卷珠帘看雪飞
柳枝词二首（湖上作）

湖上春风万万条纖枝长学汉宫腰凭君莫奏清江曲无限情人忆板桥
袅娜轻盈拂画楼佳人金络控骅骝同心何处真堪结树树青丝綠水头
衢陆君七旬矣而嗜奕靡倦过余茆堂竟日索诗为别一絶

蚤岁巴邛遇橘仙枯棋三百思通玄何当戏叱羣羊去独占青霞洞里天
楚余生千里过访乞诗四絶以赠其行

握手新知话未央狂歌深夜舞鱼肠兰陵百斛犹堪醉莫指宜城忆故乡
车骑翩翩灏水头朱弦彩笔羨风流元龙豪气今余几为汝重登百尺楼
零雨萧骚滴夜眠送君愁上木兰船征途不为南风恶何限黄鹂碧树前
皓齿明眸照玉台清帆濒发更徘徊凭君小适山阴兴明日溪头挂雪回
题扇

满空飞雪堕阑干长信宫中夜不寒自是寿阳妆额蚤错教人拟落梅看
中秋夜小亭对月独酌四首末首怀邦相明府

危阑十二倚长空寂寂楼台露气中吹断碧箫天似水玉盘初上海门东

玉露无声桂宇高小亭孤坐一挥毫百篇斗酒聊今夜斟酌骑鲸欠锦袍
万家秋色武昌楼楼上霜华静不流好踞胡床成独坐几人年少解悲秋
楼阁嵯峨练影开遥知仙令亦含杯不因桂树飞香满真作山阴夜雪来
戏赠相者吴生

痴绝平生顾虎头只从丘壑擅风流由来寸管千秋在莫诧当年万里侯
题叶太学会心处

四面青山护草堂芙蓉万朵浴银塘黄庭一卷焚香罢散发胡床坐晚凉
送赵明府之同安

新捧铜章下灏川同安百里候朱弦飞鳧慢忆双龙阙少驻仙家十六天
送郭生游金陵二首

灏水兰阴不耐游飞帆遥入帝王州石头城上花如绮为觅长庚旧酒楼
满载金华百斛春青袍绿鬓紫纶巾珠帘半卷长安道争唤投壶郭舍人
赠章生从龙

绿鬓红颜学楚狂看花携酒过溪堂生涯莫笑扬雄拙老挟玄经不下床
小憩长春圃作

谷口云深护翠峦科头长日对盘桓一声山鸟夕阳堕满榻长松生夏寒
送陆孝廉

玉匣丰城剑气重暮山重迭照芙蓉应知洛下诸词客彩笔分行待士龙
吴之卫过访迫行不及往报率尔寄怀

邂逅吴郎曲水头吴天霞色照吴钩孤航不奈明朝别千树寒枫尽作愁
安二席上重听轻红歌作

深夜西林棹雪过一尊其奈故人何宁辞大白千钟醉饱听轻红百遍歌
少室山房集卷七十七

●钦定四库全书

少室山房集卷七十八

（明）胡应麟 撰

○七言绝句八十五首

夜饮郭金吾斋头同韩刘两生奕达旦归寓则晨餐久熟矣戏走一绝柬郭君并韩
刘二文学

谈棋说剑更呼卢绛蜡烧残白玉壶痛饮不须愁禁夜主人曾是旧金吾

病目初起汪象先太学以玉簪十二馈我即取小军持承露分贮几上觉茅斋秋色
种种撩人报以口号二

双眼婆娑病色含不禁秋梦绕江南风流最是王公子满把霜林赠玉簪
荏苒秋光遍六街玉妃联袂到空斋军持满插文园露何似华堂十二钗

夜饮仁夫馆大醉吐顿因借所服绿衣归诗谢之

五斗醒来恣所如幕天席地坐蘧庐酒阑人静披衣出满路晨钟下玉除
马上望天宁寺浮屠作

十层珠瓦乱云齐百丈金身落日低几许慈恩高刹上千秋惟覩少陵题
登玉华峰寺西山絶顶处余夜宿其中题此絶于岩石

絶顶秋光万壑悬青萍摇曳乱云前峰头五夜聊伸足莫讶孤星帝座眠
湖上

风起平林月色低飞香十里禁城西不知人在清凉国万朵芙蓉夹大堤
题董体仁壁间

二十年前灞水傍垆头晨夕纵清狂天南海北凋零尽赢得君家玉树长
柬苏叔大乞黄花鱼

徙倚东篱日渐春南山何处见秋容凭君乞取罗浮脍吟望飞云四百峰
无题五首

戏恼李王元三子珠箔银屏玳瑁梁何人低语合欢床金笼鹦鹉浑多事（窗外频
呼李十郎霍小玉事）

金水桥边白玉堂人人争问薛家娘青衣屏后褰帘看不是王郎是李郎
文君颜色斗谁强十样鸾笺总在唐一片蒹葭秋似水月明何处问元郎（相国稹
最属意薛涛）

红牙敲彻总寻常指点倾城在末行歌到玉门杨柳句诸君端合拜胡郎（见集异
记）

风流千古擅词场濯锦江头正夕阳花发小桃寒食夜莫将魂梦恼元郎（戏用李
昌祺余话田洙事）

射所墙东书事

门掩湘筠翠色虚将雏语燕入庭除不知金犊何时返闲坐樱桃第四株
歌者陈邵两生别余二十余载忽与遇长安邸中一曲辞去

廿载桃花灞水头腰肢垂老尚风流相逢一笑番成别月落参横下酒楼
偶题

独卷纱窗昼漏迟春风含笑画蛾眉东邻预订黄昏约夜合花香月上时
春闺曲

春衫斜卷越罗轻女伴西园作队行荡子不归三月暮百花深处乱啼莺
秋闺曲

沉水香销白玉壶薰笼斜倚月明孤狂夫尚作潇湘客夜夜金风落井梧

题毕余兴未尽戏用唐宋人元句缀七言二絶末行（此题薛生绘事五言絶后者
薛尝以素巾绘杂卉五种为一图余系以五絶句）

五色毫挥五彩裙五言诗灿五花文薛家少妇行原五传玩争看五朵云（用宋韩维句五图共绘一巾伊若郇公五云体云）

独步江东杜紫薇横行塞上薛明妃君看彩笔双题后万古长如白练飞（用唐徐凝题瀑布诗以入羊欣事差不恶也）

为象先题画后薛生偶见特以精绫绘五卉见饷而易山茶松石岂其以岁寒盟余耶漫赋一绝

浣却红绡着翠盘亭亭云色堕雕栏分明蜀国鱼笺样莫道青楼不耐寒
潞河留别王行父袁微之李本建徐象先四绝句

潇湘才子王行父燕赵佳人薛素卿千秋一字神偏王一笑千金目未成
悬弧正值中秋夕设帨仍当乞巧筵天孙云锦千机细月姊霓裳一代传
当年画识真真面此日绡看素素题南岳地仙宁再下上元天女会重携
袁宏徐干各风流李益王维兴未酬回首素娥天咫尺片帆无赖出并州

潞河南发永叔黄门舟中话旧因读余少作绝句石梁横截海天流明灭飞霞挂岭头及蒲桃新绿照人明三语则余皆忘之并失其稿矣戏为足成二章

石梁横截海天流明灭飞霞挂岭头好去大罗仙子宅碧桃千树倚苍虬

鬱金沉水未称豪喷玉飞泉助彩毫北塞迩来饶薏苡西凉何处问蒲萄（永叔出都舟空亡一物第载薏苡酒十数瓶）

黄生石父碁于吾越为第一手而诗思亦翩翩是夕赋一律送余南还酬此

一吐瑶华字字奇星芒寒逼丈人诗青萍暂隐吴阊博可道长安似奕棋

卧病舟中旬日永叔命郎君过讯走笔赋赠二章

半腮迎日斗鲜红累叶詹山赋颺风屈指乌衣三世后新诗重覩薛奇童（苏长公幼子过赋石榴诗半腮迎日斗鲜红又■〈风贝〉风赋亦附见坡集）

霜寒秋色净枝头又见王郎白石榴笑杀子安才欲尽风帆犹趁大江流（仲君年仅十四王子安序滕王阁正兹岁云）

忆与永叔丙戌上春官永叔至安平镇登陆今屈指十载乃余附永叔舟再过兹地追忆曩时王生据鞍上马状恍惚在目相与拊掌大笑即席漫成

对倚青萍夜不眠雄飞雌伏漫谁怜衰杨古陌安平道回首西风已十年
稚升席上再与永叔言别

九陌洪涛昼拍天城阴聊系孝廉船殷勤淮水东头月重向河边照别筵
狄明叔新居河上所幸美人十数辈筑台榭以馆之余过戏赠此绝

秦台双凤太寥寥铜雀徒闻大小乔何似霓裳三十二月中楼殿斗妖娆
次孟城稚升使者以酒费追至再赋二绝寄之

双鲤迢迢尺素传飞驹遥问孝廉船江风不为离人住恨杀孟城片月圆
敲枕篷窗月色澄屋梁犹记共青灯多情似逐长淮水一夜随人到广陵

永叔别余入天台四絕送之江上

天末飞檣挂海涛江头晨送木兰桡当筵忍送阳关唱断雨凄风遍客袍
玉洞明霞树树催青鸾先傍大罗回春光满酌高堂上拚取胡麻作寿杯
洞天曾宿上清扉双送刘郎出翠微斜日乱山归路远桃花千树赤城飞（余尝梦
游天台二仙子洞中伊如画图所遇故屡及之）

万里长淮挂北风大江东下雪连空虚疑瓢笠王郎去翘首鸣珂碣石宫
出塞曲十六首（为周元父题周尝为大将军李幕客精骑射兼习琴奕丹青）
曾随飞将夺天山横槊诗成顾盼间万里玉门沙似雪生还曾未鬓毛斑
书生骨相未封侯暂逐荆卿卧酒楼腰下鱼肠公莫舞大荒曾挈郢支头
年少江东智畧饶长驱日本破天骄不縁羽扇能挥敌铜雀春深闭小乔
高宴从军乐事多白登城上夜如何数声清啸迎风发十万前驱尽倒戈
受降城下战初回无定河边画角哀落日沙场秋色满题诗人在赫连台
磨灭雄心仗翠钿幽兰一曲暮云前从知顾盼仙郎熟不向人前误拂弦（周生多
狭邪游）

幕拥青油夜漏迟从军尔亦解观碁不知淝水风行日可似张玄授策时
骏马雕弧铁裯裆何人不羨独孤郎横戈夜度炖煌戍直取凉州献未央
跃马阴山白日低拂云堆上醉如泥弯弓错拟旄头落并坠双雕大碛西
八法纵横擅彩毫何烦抛掷事龙韬聊飞尺檄萧关外已报单于雪夜逃
一笑能空塞北亭寒光闪烁射青萍歌残杖杜长城下万仞燕然自勒铭
渔阳东望海云平横笛偏吹骠骑营绕夜落梅春不断千山明月满龙城
青海城头月照沙黑山何处问琵琶长纓尽缚呼韩将重取明妃入汉家
短小周郎五尺躯侯门花色照长裾莫言谈笑无竒策百雉聊城祇片书
君卿唇舌纷纷笔札兼传谷子云怪得五侯鯖满座铁椎曾夺信陵军
拂袖行歌入帝都灞陵亭上醉相呼过从頼有任安在使酒何劳挈灌夫
渡黄河抵吕梁再寄徐参知即景舒怀共十絕句

千顷清淮匹练长使君高谊重余皇布帆无恙南风正日暮行人到吕梁
漫说陈登百尺楼十年湖海浪成游多情好是徐元直一借仙槎问斗牛
星宿黄河浊浪澄长淮飞雪罢奔腾金堤万国输王会玉盃千秋镇茂陵
栲雨梳风事若何古来师克在人和飞刍直接桑干塞转粟新成瓠子河
花照桃源百里红班荆曾此聚羣雄虚疑仙子栽灵药莫认渔郎系短篷（桃源县
俗传先主聚义处在彭城下）

龙起曾惊大陆前书生今握万夫权轻裘沛上分曹处鼓吹牙门白日悬
千仞云龙列翠屏乱山环匝楚天青干旄絶顶行人过遥指元戎放鹤亭
芒碭龙飞大泽云高台戏马送斜曛胡床何处邀词客清夜黄楼万柝闻

豹略熊韬冠世姿双龙腰下剑雄雌封侯莫讶儒生薄谈笑曾纒十万师（廉访尝定淮南变为天下治平第一）

进履桥头国士踪穀城山下记相从功成屈指封侯日重向金华问赤松（君尝从家大人游在总卯时已铮铮播露竒颖）

灑元亭上听歌作

花竹周遭十二栏万家明月满长安夜深庭院天风起队队霓裳出广寒
秋日卧病灑元显卿厚之皞民过访

老病秋来话息机满阶梧叶梦魂飞亦知极乐华胥界无奈西风撼竹扉
十年消渴梦魂摇驴背风烟又灑桥玉露金茎何处问汉宫秋色正岿巍
再别惟寅十絶句

三十年来击筑场白头相对又河梁双龙莫讶经离合满目飞云是太行
乱云残叶晚凄凄挥手长安日渐低眼底只今饶醉尉不烦追送灑桥西
君向青门话种瓜余归亦卧武陵花扁舟后夜堪乘兴雪满山阴十万家
千里行歌出蓟门何年同住杏花村衰杨古驢卢沟道歌到骊驹各断魂（余拟卜居秣陵与惟寅相晨夕）

十载青萍赋浪游萧萧羸马塞门秋那堪茅店鸡声夜落月梁间梦李侯
日夜西风起潞津余归君住总伤神相看脉脉燕台上地北天南两病身
易水燕山半草莱萧萧风色暮偏哀悲歌屠狗凋零尽无頼黄金百尺台
玉河流水暮潺潺行李西风出乱山一路相思秋色里孤云何处秣陵关
极目天南雁鹭羣荷衣深入五湖云华阳碣石当年事憔悴西风不可闻
十万貔貅罢枕戈中山无奈谤书多祇今铜柱留遗迹谁见当时马伏波
柬李汝藩四首

万斛鲸波大海头扶桑东指乱云愁玉门生入殊堪乐莫羨当年定远侯
憔悴东还泣数竒亲闱南国倚闾时谁言敬仲操戈怯剩有交游鲍叔知
归来无恙旧楼船赢得鸡林字字传不是王阳难九折千山云色太行前
不解征衫客异邦兴阑初返木兰艘东游可道风波恶题遍新诗鸭绿江
巧巧素素皆薛生名也而字特未称余与行父定议曰瑶英庶于二名不偏亦以古有兹字也

翩翩长袖越罗轻玉骨冰肌照眼明莫道元家人已去千秋重覩薛瑶英
滕观察先生招游湖上藩臬诸公咸集命余赋诗

弱水盈盈一望中羣仙环佩起天风青霄尽敛浮云色紫气遥临大海东
少室山房集卷七十八

●钦定四库全书

少室山房集卷七十九

（明）胡应麟 撰

○七言絕句八十首

再题大雅堂七首（为东阳卢生）

十尺荆榛峡口涛千年遗构蜀云高堂成莫话幽忧事列座王杨尽彩毫
半壁天南八咏楼阳春今在灏溪头华堂肯借抽毫客五夜如椽拂斗牛
千树桃花送夕阳莫愁家住石城傍从今再覩清商调絕胜当年白玉堂（李义山
诗又入卢家妬玉堂）

灵隐高僧卧佛庐参军亦傍紫薇居丹梯莫话卢敖杖三百篇成奏玉除
清川如玉抱前村处士当年旧华门破屋数间君莫笑千秋大厦有云孙（韩赠卢
全诗破屋数间而已矣）

珠箔银屏赋浪裁美人何处问瑶台郁金堂上双栖燕妬杀君家少妇才（沈卢家
少妇郁金堂又玉川有当时我醉美人家诗）

屈指河山罢酒徒华阳重见李生无知交尚有卢鸿在如意狂敲碎玉壶（卢尝及
李能茂游盖其全邑人）

汪明府以校文来武林旬日别去追送四章

乍拥轩车到六桥不堪江浦系兰桡飞檣百尺西风里万壑千岩送暮潮
堤上明霞跃紫驺接天弦管带琼楼漫将桃李夸梁国采尽芳兰灏水头
迢递朱弦百里鸣朱衣仍傍棘闱行新栽何限淮南桂满路飘香入帝城
星斗昆仑一柱悬文光千丈烛龙泉浑忘鹵簿江州贵寂寂衡卢问太玄
同黄生过方生仲闇适沙棠入湖曲因寄声留棹子夜同醉狭斜中
天际楼台挂碧空芙蓉十里褪残红岳王祠畔狂歌发何限湖山夕照中
缥缈寒光石磴幽佳人无赖木兰舟青帆莫便乘风去子夜钱塘载莫愁
祝逊之订约新秋过湖上不至

湖畔秋风日夜过东来舴艋定如何蒹葭满目澄江上不分兰阴坠露多
秋晚再寄祝逊之

老去冯唐不解愁南山秋色暮悠悠歌残白石无人和荒草斜阳独饭牛
闻弇州续集杀青寄怀王罔伯昆季四首

四部重开詫汗牛千金悬市定谁雠风霜字字遥天外怅望如椽白玉楼
副在名山更杀青茫茫元气走羣灵从知百氏毫端废可道传家但一经
百尺危栏跨紫虚青藜遥夜烛前除莫言中垒慵疎甚阁上曾雠太乙书
万颗骊龙抱月圆江河不废异时传琳琅何限阶庭下次第三株拂斗躔
新秋再寄罔伯

柳色金闾半夕阳鲈鱼虽好未堪尝莫言方外狂司马多少楼船鸭绿傍
梦弇园怀逸季茂才

极目娄江大海浔弇园秋色梦中寻兴怀莫话兰亭序玉树琅琊正满林
黄生九斗携所业千里过访于其别也赠以绝句六章

万仞潮头溅客衣布帆无恙雪中飞推篷面面青山色已到严陵白石矶
千里遥遥问字船海天长啸白虹悬还家莫话相如璧携得成都旧太玄
袞袞青云结驷游沾沾白雪断鸿愁何来意气纵横甚昨日龙门御李侯（时诸士
以宾兴至）

缥缈仙都挂碧空石门飞瀑乱云中他时尚为名山出双屐岩前候谢公
秋风秋叶乱山苍踏尽秋山到遂昌问讯故园樵牧侣只今谁住郑公乡（郑遂昌
元佑在胜国有文名）

扫石题诗坐绿苔黄家羣从最多才无双漫自夸江夏次第三珠照玉台
题册赠凌别驾二首

弦歌百里画帘深桃李千家接上林试问佩刀临澱水何如飞舄向兰阴（凌时署
篆邑中）

仙吏仍浮剡水槎天都缥缈接金华官衙尽说囊如水携得芙蓉几片霞
题林孝廉园池四绝

百顷风潭照玉壶清鳞白石拥菰蒲沙棠独抱夷光卧何事风涛泛五湖
右浣花池

八面疎棂挂夕阳楼头云色尚飞扬屋梁咫尺亲颜在不用褰帷望太行
右飞云榭

古桧崢嶸映夹池虚亭十尺锁涟漪朝来载酒谁相过正值扬云赋就时
右清涟馆

缥缈精庐入望遐芙蓉秋水旧生涯如椽莫笑书生笔十丈亭亭照暮霞
右振秀轩

题祝山人树勲栖云轩四首

掩径萧萧木叶闻干将明灭动星文青山独据胡床坐闲看中条石上云
木末飞轩面水流终南遥挂万峯秋玄关白日重重闭不放飞云去岭头
一径莓苔尽日封匡床云色卧双龙罗浮四百青天外不认飞来第几峯
十二巫峰挂楚台高唐新赋定谁裁莫言神女朝行倦夜夜闲云卧榻来
送祝如华二首

抗手玄亭话别离青衫憔悴越江湄那堪独宿孤舟上潮落钱塘夜雨时
十载高山托素琴朱弦无处觅知音飞霜落月河桥畔惆怅行人发武陵
履素使君邀集衙斋中嗣君出迓仅五龄风仪韶润而衣裳楚楚如老成人赋赠二

绝

三尺龙渊掌上持亭亭寒玉照风仪机云漫自夸年少又覩云间小陆奇

径寸骊珠夜色悬衣裳楚楚画堂前抽毫异日兰台坐会学盈川赋浑天
吴德符损饷宣德茶盂二枚因瀹天池新焙赋二绝以赏之

柴汝官哥各浪传摩娑秋色到龙泉筵中宣德新磁在笑杀何郎食万钱
把赠双珍破寂寥龙团翻雪乱云飘琅琊旧着煎茶赋已说宣窑胜定窑
卧病经旬吴生持所业新诗来谒讶其精进赋赠二章

何人不羨济川功策石虚传大海东莫笑老为题柱客当年曾住玉华宫
独绾金绳系法轮重施宝筏架迷津亦知黄蘖前身是肯作恒河自渡人
兰江竹枝词十二首（夜饮浮梁怀大学士赵公）

两岸清溪中有洲山花红白遍溪头闻说西门好风景大家同上木兰舟
兰阴苍苍北固遥中洲水面似金焦欲把湖头比溪上若个三山在六桥
饮水白虹千丈强来来去去罢褰裳中流不碍蚤行客隔水休呼夜渡娘
渡口狂风掀白苹惊波猛浪不愁人乍宵西崦踏青罢明到兰阴赛水神
苧萝村中花满蹊庐江亦有仲卿妻银钏金钗照溪水往往来来唱大堤
严陵东头七里滩家家门户钓鱼竿良人乍夜趁潮去将船卖酒入临安
四柱凌云排六鳌铁絙高系最坚牢水母难兴泗洲浪蛟精不作九江涛
溪上浮梁春涨平蒙蒙烟雾懒回程风秋潭上踏歌去水远山高无限情
郑村渡口风浪多鱼船来去疾如梭相邀女伴到梁下一时同唱采菱歌
三百阑干浮碧空笙歌缭绕暮云中天香夜半广寒落错认银桥在月宫
金台尖高高插天俯江楼俯夕阳边当年板筑遁荒野今日舟梁济大川
城南回望告天台衢婺悠悠二水来清献前身为时出萧然琴鹤在蓬莱
赠霓裳十二首

响遏行云未足多阳春流水定如何夜来小玉飞银汉传得开元第一歌
一枝明艳照窻纱曾事仙人萼绿华唱彻山香蓬岛上瑶池千树尽飞花
玉面朱唇陌上逢香车油壁乍从容莫教行雨峯头去寻遍巫山十二重
睡足纱窻昼漏迟白樱桃下画蛾眉珠帘百尺重门闭沉水香销月上时
金屋何曾盼阿娇临春歌吹总寥寥遥空一片飞云驻人倚危阑弄玉箫
月底朱丝竞管弦风前红袖趁秋千争夸静婉腰围细不解湖头唱采莲（乐府有
张静婉采莲曲）

紫燕双飞掠画楼黄莺百啭和笙篴妖姬十五颜如玉底事长干唤莫愁
女伴相携斗晚妆风鬟云鬓若耶傍乍宵湖上归来晚阿姊同游字蕙芳
振袂飞霜袭彩毫新声频奏郁轮袍十千长恨真堪买三百灵光漫诧豪
瘦妻羸女各伤神紫凤天吴拆洗频笑杀杜陵溪水畔云鬟香雾是何人
七香霞佩午珊珊骏马金鞵照玉颜跋扈飞扬湖海上前身莫是李东山
园桃巷柳色纷纷素口蛮腰并出羣不信寒酸饶下驷西京谁并卓文君（艺苑卮

言云退之桃柳乐天蛮素皆寒酸所得)

题艺苑五游册(有序)

新都程太学文东博雅多艺能摘词染翰外琴奕丹青咸跻其妙余为题册曰艺苑五游

玉轸闲挥望太空目随中散送征鸿无劳郢国千人和白雪晴飞大海东
右琴

杖底双龙跨夕阳荒村仙姬坐更长枯碁三百无人共零乱青霞满石床
右碁

八法纵横晋永和鸾笺十幅照春罗科头独抱兰亭帖散步临池看白鹅
右书

沉水香焚白玉壶洞门深锁碧云孤窻明几净人声绝闲写初平叱石图
右画

独坐匡床枕半敲山堂寒雨涨秋池夜阑松子前阶落吟得襄阳五字诗
右诗

曳杖村西闲步见壁间二语甚佳而不知名字漫为易数字足成之
红白花开篱豆齐野人茅屋乱云西庭前桑树老无叶日午邻鸡飞上啼

少室山房集卷七十九

●钦定四库全书

少室山房集卷八十

(明)胡应麟 撰

○七言绝句八十一首

题徐惟得冲漠斋十二绝(有序)

徐惟得使君人貌天行超然物表筑茅斋数椽于楚水之上而以冲漠名厥旨邃矣海内诸名流竞赋新诗烂然卷轴顾独于名馆之义阔焉余乃窃取古今达人微言奥旨与冲漠相发明者始壶丘太冲终昙阳恬淡凡十有二氏而各系七言一章义取循名馆中山川景物略而弗具使君有读当仍举桑落十余觥頽然捧腹于北窻之下也

壶丘示观

寂寂玄关闭万缘頽然一榻抱枯禅天游未许时人识正是壶丘入观年
姑射凝神

肌肤绰约莹秋霜绝顶凝神眺八荒得丧窅然天地外不知身世住何乡
郑圃御风

羊角鹏程快羽毛罡风八极送飞涛窅然天际真人度始信长沙蹋翼劳
南郭隐几

静坐焚香一亩宫灰心槁念夕阳中那能滥作吹竽客凭几萧然万虑空

化人躡景

振袂翩翩到北辰中天城阙跨金银谁言半亩差容膝十二瑶台属化人
华胥梦游

勇退何人犯急流分司犹摄醉乡侯朝来梦入华胥界一榻轩皇尽意游
摩诘散花

掷戟归来理钓竿不将零露望金盘飞花散尽三千界丈室分明有大观
少林面壁

勇猛精修万劫离穷年枯坐更何疑为言一苇浮江日可似三花面壁时
雪山空寂

战胜归来岩穴间空花落尽闭禅关大千世势冥心处恍惚当时坐雪山
五台清凉

古寺清凉辟草莱三湘门巷半莓苔翻然杖锡腾空去闲看飞云落五台
漆圃逍遥

一枝殊自慰鸛鷓身世千年付沈■ 〈沔〉北海南溟俱莫问长空何处不逍遥
昙阳恬澹

空山寂寂午闻鸡一路桃花照旧蹊漫说娄江恬淡观真仙今在武陵西使（君居
去武陵甚迩故云）

又题八绝

藜青阁

迭构危梯入窈冥长空不断暮天青松阴竹色凭栏处次第千山入画屏
白云洞

石洞苍茫闭水帘碧窗云冷玉龙潜不妨行雨邀巫峡犹记为霖出傅岩
水竹居

袅娜千竿翠欲沉一区烟雨坐来深君恩乞与潇湘地闲听苍龙日夜吟
习家池

峴首穹碑百尺遗襄阳仍覩习家池如泥不学山公醉自唱铜鞮岸接■ 〈郢离〉

九玄室

画栋雕甍挟斗牛瑶箱琼笈锁层楼五千何代传周史三万当今跨邺侯
适意轩

九列三孤亦偶然能将簪绂误流年归期趁得西风蚤何限鲈鱼七泽前
四顾亭

万壑千岩照眼明中天苍翠扑檐楹凭栏四顾皆秋色疑是山阴道上行
偃息居

水击天飞快羽翰巢林聊借一枝安参差已熟邯郸道枕上从他万劫残

即席

刺史苏州欲断肠腰围尺六舞霓裳若为并作卢家燕双宿双飞玳瑁梁
万伯修中丞东巡歌十首

大纛高牙拂绛霄青袍白马似风飙千帆掣海鲸波静万礮抟空蜃市消
三千门客报晨鸡八百家丁耀水犀何处精兵逾代北由来飞将出山西
平倭望海说刘江闽越新传戚继光底似中丞文武畧弯弧飞檄到扶桑
平壤王京铁骑屯西飞青政尽游魂笑他定远空投笔华发萧萧望玉门
对马洲前积甲悬黑云东起雾连天辕门夜缚平行长露布星飞北极前
关白头梟太白旗白狼河上羽书驰楼船却笑文皇帝百万瑯戈困不支
麾下俱封万户侯金戈净洗萨摩洲山城肥后诸酋长叩颡遥天拜玉旒
诗才旧压丁都护将畧平欺霍冠军一代鸡林传丽句千秋麟阁画元勳
烂漫黄金百尺台将军飞骑入蓬莱何须更奏征东曲十八铙歌尽手裁
万甲凭陵大海东清江鸭绿乱流红元戎奏凯归来日天子晨开碣石宫
送安头陀还兰阴作同少傅公四首

野鹤孤云去路长袈娑随处谒空王楞伽一卷焚香坐先到裴公绿野堂
百丈金身照绿苔青莲瓔珞护瑶台天龙一指犹堪竖莫詫西方大士来
十年湖海话禅机归问云山旧衲衣后夜月明金锡冷遥空笙鹤不停飞
六洞三山次第看白云回望满长安何须更觅莲花藏一代金轮属宰官
东园四时词

尺书何处候青鸾吟遍东风十二栏金谷楼台春尚蚤海棠憔悴不禁寒（春）

熏风长日度帘钩河朔园林总胜游珠箔银屏清吹满石榴花底按梁州（夏）

朝来檐树着新霜小玉银筝抱雁行红蓼碧芦秋十里不知亭榭在潇湘（秋）

雪片高天坠草庐瑶台鸾鹤望清虚梅花万树孤山下何似桥头策蹇驴（冬）

王太学至卿一子四岁未能言尝两遇大厄梦异僧获存或夙生有縁习也一絶纪

之

似梦如痴画阁前前身谁为问梯仙三生我亦琼楼客一堕风尘四十年
王生庭中二雏鹤见余甚狎即席赠诗二章

尺八翩跹凤鸟文雌雄追逐气凌云怪来花下如相识曾是当年鹤鹤羣
凌风相逐下瑶池雪羽霞标灿陆离自是主人多逸兴庭前双鹤解看碁
题浮屠秋溟卷时以姑布术游都下

扶余国小漫称王定远封来白发长自是青莲多傲骨错将奇句恨昭阳
射虎年来渐白头南山风雪夜悠悠他时太史传飞将肯信平阳第一筹
万伯修东巡歌八首

麟阁由来画虎头辕门此日拜貂裘金泥玉玺从天下御笔亲题定远侯

闻道将军武畧饶频年横槊絶临洮酩酊一醉楼船上十万雄师已渡辽
亲提精甲到平襄汛扫鲸鲵百丈强莫诧伏波年尚少大标铜柱在扶桑
征马翩翩度北风干将曾授白猿公胡床静夜梅花落万骑长驱一啸中
铁甲三千照大幢金戈百万洗长江前茅壮士讴歌发一箭天山夜请降
无定河边息鼓笳受降城下听琵琶何劳更问燕然碣万丈穹碑勒海涯
山西诸将定谁贤烈烈营平四海传尽扫先零何足道千秋勲业付屯田
露布千言尽手裁霜笳奏凯入蓬莱西京枉貌麒麟阁文武何人吉甫才
王行父惠簞赋谢二絶

伏天无处避斜曛水簞何由借鹤羣漫作巫娥云雨梦月明环佩下湘君
珠帘十二照华堂一卷湘云白日长已悉王恭无长物莫教残夜踞胡床
再送远游明府二絶

一叶晴飞大海傍东南云色满钱塘谁言蓟阙三千里夜夜双鳧入上阳
千秋重覩豫章材五夜狂歌雪色来莫向斗牛占紫气雌雄龙剑合燕台
玉城十景为侍御泾邑叶公赋

石门锁翠

峭壁危岬暮靄屯桃花开落自乾坤中天积翠无人到万岫飞霞锁石门
天柱凌空

一柱凌空不记年嵯峨秋色敬亭前虚疑玉笋排云上自是金茎浥露悬
鸞岭迎晖

千仞冈回倚石梁扶桑霞色对苍茫长鸣独向朝阳下人识清时有鳳凰
豸峰吐雾

古岫飞霜日月寒动摇山岳惠文弹谁言绛阙仙人屨恰是乌台柱史冠
兰津望月

种竹聊依宛水头栽花仍记灊川游万家明月悬秋浦千尺飞虹锁暮流
柏坞飞霜

翠盖亭亭绣作衣虬髯龙甲互相依风棱恍惚台端见霜色参差柱后飞
考水涵珠

喷雪鸣环断世尘胡床谁识洞中春花浮片玉来青涧树列三珠对紫宸
桓城映玉

万堞嵯峨照水明纷纷鸾鹤下瑶京狂来欲趁罡风起十二楼台望五城
五老排云

晴峦一望紫烟重玉洞桃花处处逢蚤晚排云闾阖畔天门遥插五芙蓉
三台辅斗

鼎立苍峰峙翠苔遥看银汉列三台谁言拔地三千丈斗色平连上帝台

余家藏道复水墨牡丹纷披老笔而扇头折枝浅绛丰肌曼色嫣然袭人更题一絶于便面右

谁寫天真第一枝盈盈霞色照轩墀多情错认杨妃醉亭倚沉香日暮时
永叔挟小友郑生入都生年甫十六美秀工奕酒中持素册进余乞诗戏成四絶
石梁天际梦魂劳双别仙姝渡海涛绮阁纱厨春书永一枰闲对郑樱桃

清簟疏帘奕未停楚江云雨正冥冥莫教夜半成虚约辜负灯花落小亭×杜楚江
巫峡半云雨清簟疎帘看奕棋)

綠发朱颜羨子都楸枰拂拭倩华褙摧锋漫自夸年少一着还须让老夫（宋人送徐师川语）

长铗翩翩海上游明光谒帝暂依刘无劳更赌宣城郡一局龙阳已拜侯
题赵太常山居四絶

眠云洞

迭岭层崖落照悬桃花万朵浴飞泉玄关尽日封云气一任羣羊化石眠
凌翠楼

杰构中天翠欲流罡风回合乱云愁何当八翼凌空去长啸三山十二楼
薜荔园

流水柴门白兔宫一区晴锁万山中成功会着荷衣返入梦休猜蕙帐空
綠荫池

千綠萧森映夹池此君长日对支颐冷然诗思清神骨何似山阴夜泛时
寄祝华父郭汝冲盛明元

夹岸晴波漱綠苔青帆遥遡大江来相逢问讯兰阴客蚤趁桃花上越台
一夜帆飞灑水浔南屏山色望来深灯花落尽棋敲罢两屐春风到武林

春日过皦生斋头米仲诏倪迂扩本在焉披阅数过吴枫秋色照人眈睫恨不携綠
蓑青笠容与其间作竟日主人也

野渡无人尽日闲茅亭斜插乱云间不知檐外秋多少一片关仝画里山
题壁

千觴欲尽尊前酒七盃曾倾月下茶莫笑卢同怜赤脚当时曾醉美人家
赵相国以丝布衣材见贻

雾展霞舒簟色匀清风两腋度纶巾从知黄阁丝纶在不是尘中襤褸人
谢赵相国借湘竹榻

落魄宗郎爱卧游十年湖海梦魂愁朝来一榻平津至何事陈登百尺楼
少室山房集卷八十

●钦定四库全书

少室山房集卷八十一

（明）胡应麟 撰

○序九首

弇州先生四部藁序

（原阙）今称集大成焉学者往往谓六经匪可以文章言而仲尼之集大成庸讵槩以文章之一节姑亡论已语文章于三代之下则在百氏矣辄以儒周以道非以法不韦以杂短长以纵横丘明高赤以编年向固晔寿以纪传斯以书谊以论江左六朝以偶俪唐宋而下诸子以杂文原玉以骚卿云以赋唐山子乐以乐府乘陵操植以古风勃照邻宾王太白以歌行佺期之问维颢颺昌龄参以律絶皆杰然各名所长乃上下数千年间未有总撮会萃而统于一者谭艺之士不得已则判途为二而取汉之迁唐之甫以当之咸曰集厥大成矣夫迁吾亡论其声诗即一史外若骚若赋若子胡以弗少槩见也甫吾亡论其纪述即诸律外若乐若选若絶胡以弗皆中程也曰迁曰甫诚哉数千年间出而较彼一偏之技犹然陷缺若斯矧乎摹百氏之长极二途之趣洋洋纒纒以自树一代之言之人也姬周而降可易得其仿佛哉盖至明而东海之上有弇州先生出焉高皇帝手辟洪荒载造区■〈宀禹〉文轨所讫悉主悉臣拟诸汉唐功德辽邈而二百余褫綦隆之化烝熏灏灏洽为泰和于是乎造物者始尽发天地之材全畀名世之士而弇州王先生巍然崛起东海之上以一人奄古今制作而有之先生灵异夙根神颖天发瓌质絶抱八斗五车眇不足言弱冠登朝横行坛坵首建旗鼓华夏耳目固已一新中罹家艰载扬台省暨乎晚岁籍僊苑覲帝宸中间动息起居拙信荣蹇造次颠沛壹发摠于文章虽咳唾呻吟嬉笑怒骂世咸传诵以为法则当嘉隆万厯际亡论艺士鸿流薄海内外无思不服即婴儿走卒里妇担夫西南裔夷江淮草木靡弗知有弇州先生也者遂使金石之藏延亘六合珠玑之散充斥八表至四部二藁出而古今著述尽废于我明矣其为卷也四百有奇其为言也兆亿靡量合宫衢室轩豁其规模大吕云门邕和其音调火齐木难绚扬其色彩湛卢飞景震耀其光铓祥麟瑞鸞容与其威仪天骥神龙跌宕其步骤夸父巨灵坚强其骨力皇娥赵燕绰约其丰神赤明龙汉渺邈其津梁兜率须弥愴怳其境界何体弗备何格弗苞何意弗规何法弗典何辞弗铸何理弗融何今弗离何古弗合九骚则屈宋之闳深也十赋则马扬之巨丽也逸篇则左国之瑰玮也札记则公谷之嵯峩也序说则孟庄韩吕之雄高也志传则班刘陈范之瞻密也书牋之凌厉纵横其比踪上蔡乎论著之丰溢浑厚其合辙长沙乎四六之整而流艳而发其含吐江左蹈藉唐初乎性硕之文俶以奥韩之力去陈言乎山水之文卓以诡柳之大放厥辞乎廊庙之文达以昌轼之源泉混混乎而雅颂祖述商周饶歌宪章汉魏乐府憑陵八代古风驰骤两都歌行出鬼入神胜擲乎骆卢崔李律絶超凡入圣奔走乎沈宋岑王总先生诸所撰造周视乎古昔宗工不必执甫以难迁第即迁所长与迁角而迁弗胜也而迁之短于所长者先生饶为之不必执迁以难甫第即甫所长与甫角而甫弗胜也而甫之短于所长者先生饶为之不必合迁甫以难诸作者第即诸作者所长以角诸作者而诸作者弗胜也而其凡

有所短先生又各饶为之大哉先生之于文章乎犹昆仑峻极中天而五岳其佐命犹渤澥溟泓大地而四渎其支流犹清宁奠冒羣生而象形靡弗该犹化育范型庶彙而气韵靡弗肖庶几哉混合大千深入不二兼收广蓄亡所成名战国以来一人而已乃先生学术尤有不易言者卮言宛委笔记诸编核元会运世之始终酌皇王帝霸之高下洞仙释怪神之宵眇抉昆虫卉木之幽微以迨一技一长之浅深工拙王仲任秘其论衡张司空删其博物刘参军谢其类苑虞少监失其秘书梁太子隘其选裁锺记室陋其品藻是又畴昔文人蔑能俪得先生顾网罗囊括恢恢有余嗟乎先生之于斯术也可谓至矣极矣美善尽矣蔑以加矣三代六经既玄既邈不有先生孰与集文章之大成哉不有先生孰与集文章之大成哉卽以宣父门庭而差文学之科标词命之轨先生非升堂之素相则入室之上宾司马汪公有言宇宙文章维先生独维先生亦自谓前亡昔人后亡来者谅哉言乎不我欺也应麟束发操觚服膺大业次公介绍获附忘年猥择刍蕘面命兹序倘曰阿私所好古今方册具存昔翰林属撰于阳冰吏侍申盟于皇甫千百世下当以不佞为知言已

两岳游序

方可大谪官汝南亡弗以吏事难可大者卽知可大能吏事又亡弗以冗秩难可大者乃可大闻命无几微怏怏色也顾大喜自得曰吾梦寐嵩岱两岳十年矣今谪官汝嵩三十六峯在吾几席间而道出齐鲁岱宗梁父复当吾车辙庸詎非造物者以一官私余游哉于是亟命驾而东要友人于太史可远相与蹶天门日观恣揽封禅万家遗迹秦皇汉武所驻驛处夜半观日出大海扶桑方丈云雾焜煜荡胷决眦洋洋乎宇宙大观也已乃飘然一苇浮河入洛下车莅政民用太和公事之暇屏去驺从扶杖曳屐登太少二室絶顶俯首中原千里一色空同王屋浮丘广成若可左右望而招者神情飞动逸思横发长谣短歌寓目輒书合前与太史同赋得杂体若干首而总目之曰两岳游而走书灊水之上曰冀吾子一言序之夫域内名山大川无虑百千十而瑰玮絶特以岳称者仅五五岳相望奚啻百千里而岱宗为羣望首嵩高当天地中尤世所争先快覩者史称尚子平游五岳至屏家累絶人事而严君平氏终身游仅得其四天于畸人逸士犹或靳之可大特以一谪官不阅岁而两陟其颠遍穷其胜且歴以诗篇纪之为篋笥中物胡造物之独私于可大也可大尊人大司空宏勲茂烈震耀今古以身为斯文盟主四十年而余猥以童子当国士之盼曩者南还之夕定交可大称觴秉烛穷日达旦语语开元皇初上事乃今三复兹编气骨高华声调闳爽真若与泰岱嵩高争雄万仞之表者非其才横絶一世能然乎哉昔屈原贾生皆以忤时贵见摈斥比余读其文词诚极才人之致而凄怆愤郁识者病之可大少年材美无谢两生顾所为诸诗特悠然旷适过长沙三閩远甚固宜随试輒效当盘错位卑冗而卓然颖脱无难也虽然今可大且踵大司空故武膺内召入承明勒著作于石渠金马卽欲复为兹游不可得而余幽忧疾病自放尘世之外方图以雕虫敝帚托之名山大川可大行矣两岳之游造物且以私不佞矣

素轩吟稿序

素轩先生诗一卷古体若干首五七言律絶若干首洎诗余若干首邦相明府既以属不佞校之矣则复命不佞为之叙素轩先生者邦相尊人封缮部公也先生少习举子业稍不售輒弃去筑文室龙沙上命曰素轩朝夕卧其中取古今名能诗家语恣读之凡境有所会情有所钟遇有所触以至牢骚愁怨燕游赏适寄忆酬赠一一而鸣之于诗既邦相成进士先生沐勋封膺宠命显重矣而其好为吟顾愈益甚时时出游西山南浦间分樵青牧子半席骤而遇之一翁苍颜野服跨蹇驴执鞭策作推敲状童子操几杖其后大类深山穷谷有道者不知其贵人父也先生质力材具于诗故足跻上乘方极轨而其大旨要在陶写性灵标举兴象以自愉快不欲以矫峻刻厉自见故其为诗冲和恬泊优游雅适宛然太古康衢角里之遗即伟词奇句时出间发而卒归之用意忠厚其于诗家者流盖粹乎根极情性之正非世称述文人墨客可比迹上下也明诗之盛盛于弘正李何一倡诸君子从而和之声调未舒异者輒议其后嘉靖中李于鳞氏出而献吉复尊至王长公勃兴江左遂操百代风雅柄次公继起齐驱竞爽一时周旋中原肩荷大业者亡虑数家而嘉隆之际几轶唐汉若邦相其最著者也邦相雅善两王先生顾以其余谬推毂不佞不佞既素习邦相而于其来令吾邑也益相与提挈为不朽计恒意其文辞得于天挺独诣乃今而得之素轩先生夫江出岷岭其始滥觞河流之发昆仑涉者可褰裳渡及其排砥柱絶吕梁汇为洞庭彭蠡云梦之泽浩淼瀕洞滔滔日夜以赴之乎尾闾之壑而后江河之大观斯极乃以穷其源则谓非出岷岭昆仑不可故夫读诗者读素轩先生而邦相槩可见矣先生于词尤工是岁以邦相迎养来兰不佞获以通家子谒庭下不阅月輒促驾曰吾以返初服也诂以吾一人故旦夕旷子百里任吾得归卧故素轩中足矣既抵家则以一奚囊贮诗若词谓邦相善为而翁论次付之梓庶几俟他日扬子云者毋令而翁今世藉而爵位重而后世复藉而文辞以重也盖先生所为自期待者如此

方外吟序

鹿城雁荡之区奇秀甲天下故生长其间者率清远夷旷皜然埃壒之表至发为诗歌亦往往与其人类盖山川之助云余所知者布衣康裕卿裕卿以诗名家隆万间余与交最久且善裕卿下世余亦谢病溪上杜门高枕不复通一客壬午之岁忽有投刺称永嘉林山人者余倒屣揖进与语覩其状翩翩野鹤然居数日輒别去是岁山人再过溪上手一编谒余余亟取读之则山人近游武夷泊关中诸作也山人于诗偏好王维孟浩然故不为刻酷雄深莽宕语而兴象萧疎神情玄畅如藉茂草荫长松临水登山嗒然竟日每一诵之輒使人有轻世遗累蜉蝣方外意即亡论其格极其才穷其致摩诘襄阳门户无难入也谈者以为山人家雁宕而客武夷奄有二方之胜宜所为诗宛类其人若此今秋山人益谋泛舟下钱塘并四明遍走吴阊白下贄其诗以谒海内作者因固请一言为临歧之赠余辞弗获则进山人谓曰子游方之外者也吾何以赠子虽然子今橐中装亦仅一武夷耳夫会稽秦望天目之山大禹之穴洞庭七十有二之峰金陵石城龙盘虎踞

之气浸以具区汇以长江控以大海其胜不知视武夷何如其巨丽瑰玮什伯武夷不啻然皆余曩昔杖履间物也今于子之行尽辍以赠子异时再过溪上手一编以示我更有进于是者庶子之游为不负而吾之赠为不虚哉山人曰诺敬奉胡先生之教以行

吴生德符诗序

新都诗派肇自许宣平李供奉读其静夜明月穿云翠微二咏至以为神仙歷千余载而汪伯玉以閔深杰异之才壁立嘉隆诸子之际风骨棱然典刑大雅重以兼收广纳流壤靡遗一时彬彬家隋珠而人和璞盖司马之勋于是为烈而词场接踵有指不胜屈者矣乃余独以吴生德符为难能吴生溪南巨族也少从父祖业鹺客武林歛人占籍武林亡虑十三四率富商名贾以费力泉货自雄子弟游闲鲜裘马饰舆隶挟毛嫱子都张吹六桥三竺间据湖山为汤沐最上畜书画鼎彝然香煮茗容与太平之世而生顾翹然自奋于诗歌凡众所竞趋裘马舆隶毛嫱子都亡一足芥其中而滑其好即书画鼎彝指一间染焉而有未尝数数者僦居委巷■〈木走〉一室青苔黄叶中捻髭拥褐朝呻夕吟梦寐所游从羹墙所揖逊亡非汉魏盛唐也者其口呐若不能言而纵谈古今则悬河注海而酌之莫穷其际其容瘁若不胜衣而扬挖千秋之上则抚剑顾盼而追逐作者于九原其意矫矫举一世鲜当其衷而独以昌阳枣茭之嗜偏注于不佞其为诗扫去一切巧曼浮诡尖纖之敝习而力追大雅之上乘醇乎太羹玄酒之遗味冲乎高山流水之遗音邈乎土匏瓦缶之遗轨沈而深之扩而大之其必传于后世断断乎其亡惑也嗟乎诗至嘉隆声律之途斯为极盛而熏莸禾稗并蔓丛生间者二三遗老相继丧颓子夜繁音沦浹心髓即豪杰儁流时溺其说生也独崛起纷华靡丽之交正色抗词推而远之匪其勇兼人其才轶俗其识旷世足万一语此乎此余所为戛戛叹其难能而每读其诗輒为之击节而三倒也俾司马公在且把臂入林延之上坐惜乎其弗可复作徒使生以昌阳枣茭之嗜日偏注于不佞不佞于是侘傺乎有余慨矣

医括序

医肇迹轩农长沙发其独智首揭羣方津筏千载继之稚川之肘后思邈之千金洎近代刘张四氏备矣顾载籍浩如伏习者类不无望洋之叹而晚近世病情纷拏百变刻舟缘木又往往以陈言束之此易水张元素氏所以有古方今疾之叹也新都张君柏弱冠客游吾土輒以医知名瀾中今年垂七秩矣生平汤剂全活自通都大邑以及下里穷乡殆不可数计乃君恒不自满足复虑一人之仁蔑能遍咸■〈宀禹〉内则以间日类集试验诸方括为短歌数十百首至病情稍涉疑似反掌死生者又绪为诸论以剖析之其取效若符左券其阐微若烛秋毫且俾世之学流一披阅间旬月之功可人人抱其术以仁寿天下噫是何其虑之精而识之邃也明兴才谲辈出自学问词章以至百家众技类能驾轶前古独医门眇覩其人王纶氏之杂着径捷旁通最为方家尸祝而推之近日稍扞格而难行盖阳有余阴不足固彥修不易之定论而寒凉胶膩銳情克削或反以伐其天和楚失而齐庸得乎此余身以疾尝而洞彻其脉理者知李朱二氏世靡得而偏重

明也君治医一以补中为橐钥而旁撷诸名家佐之故病者获其诊视虽未心奏奇旦暮而算计见效往往迄于万全其贤于剽轻诡遇之夫不待明知而后策也是编行君之仁且遍咸■〈宀禹〉内即长沙诸公不得颛耀其美而余之言亦且与之俱远故不辞而序以复之

印谱序

印章所从来远矣自李斯以昆吾刀刻秦玺两汉而下官私传流博雅之士代有编集若王顺伯吴孟思宋元诸模谱迄今云间印藪会萃古今参伍载籍斯以勤矣乃余自髫髻客长安三十年来耳目覩记亡虑千百顾氏所录什九未遑盖承平奕叶陵谷变迁虫鱼科斗之迹杂出于荒林大隧沈沙断壁坏础间固非一人闻见能尽搜括也镌印入国朝亡出长洲文氏父子世济迨今后褫祿二家大抵待诏之工法为政博士之妙意为师法胜者往往局于法之内而精意时拙而意胜者又往往溢于意之外而成法时乖剂二者而酌其中俾法不泥意而意能无骖法斯上蔡之真源而长洲之喆胤矣四明张大木年少才高以篆刻游燕中余邂逅于黄生六治馆轩轩然霞举埃壙人也已视余所镌诸印淳质典藻俊而弗冶宕而弗流一展翫间古色苍然隱映睂睫蓋庶几哉能剂量于法与意而独擅其解者异时繇文氏而努力前规以驰骋于六代汉秦之列余固未知其税驾所也大木将归越持谱诣不佞顿首曰入长安遘逢胡先生大幸遇胡先生而蔑能只字等之乎亡遇耳愿得数语勒简端梁也终身奉之噫子云老不解事仆仆长安市即奇字多识其何以语侯芭生生归矣宿舂粮曳芒屨长啸入四明洞天读灵文于上清石室回视人间世六书得无复躋一格耶审尔其更镌一石曰石羊生后身以寄我

两都游草序

此张孟孺两都游草也先是尊人佐虞以诗名鹄起介胄司寇王公盖尝上客客之而沦蹶中道余每读伐檀诸集輒恨与若人并世而不获把臂于东西双弇间比入都晤俞羨长亟称佐虞伯子孟孺其材诣亡谢乃翁余私衷愈益向往焉顾一水盈盈即奇伟菰芦亡从物色是秋始遘伯子湖上未及问姓名别去去明日而羨长以八行来谓乍所邂逅即孟孺其人今且持所业谒门下矣余倒屣出迓视其状孤云野鹤翩翩然亟拂席命坐坐定命酒酒至命酌微醺抵掌扬挖古今语语埃壙之表余倾耳侧听不自知膝之前于席而席之前于宾也已孟孺袖中出一编长跽进余曰惟先君子之臭味门下也敢介俞君而以蝇附请余展卷疾读之韵高而旷思沈而澹调逸而新如片石孤峰清池皓月兴象泠泠标揭人外即骤见似坦易无奇也者而微词隽致引之弥长而绎之弥远达其材竟其诣亡论跨灶异时以较孙仲谋氏之于破虏坚庸讎难于步伐也嗟乎诗自三百下迨弘嘉汉唐以还于斯为盛顷者仪璘匿景磷爝当空衰诡尖纖之态沁人心目孟孺方考业兹时而亭亭独上一举而尽前之非诚所谓颖脱于尘坩而轩举于闾闕者哉忆琅琊次公疏世说谓玄晏文匪三都亡传理余絶叹为名通兹孟孺两都虽寸窗片截居然有振衣千仞意而余言谬以糠核抗颜前导而弗辞者知孟孺之必传于是编而不

佞且并传于孟孺也

李仲子集序

吾郡李仲子能茂天才瑰迈奔逸无前自束发为诗歌已駸駸有吞虎食牛气里中先达或以年少易之覩其落笔吐语惊人句相属咸逡巡却避其锋仲子顾弗以自足也益肆力别心友千古士于汉则两司马于魏则三曹于唐则杜甫明则李梦阳李攀龙弱冠补邑弟子员为督学使者苏君禹识拔已纵游秣陵吴会间卒業弇州四部乃击节大叹咤曰起八代之衰者其斯人乎亟陈启自通纚纚数千言弇州大奇其材数寄声不佞子国有李子子其知之余唯唯庚辰之夏有持刺叩门者自称东阳李生余方饮投箸踉蹌出屣不遑倒既执手晤言挖扬上下逡自昊穹近迄昭代亡弗悬契则又起大叹咤曰与子同里闰三十年而毋相值微今日者几失之余非夫哉今而后所不以不朽谢子有如日余忻然而笑莫逆于心遂定盟焉自是仲子归弥月輒有所撰述輒走尺一命苍头三百里持诣余凡仲子所为文大都陶冶秦汉偏长独造则记问启札为尤每一援笔大者河决澜倒雷厉飙驰即寥寥只词亦委笃隼永妙思横流采绚溢发总之神动天随非斤斤研墨畦径者诗歌则其生平精力萃焉七言律之高朗鸿丽五言律之严雅清新高者揖让开元平者驰骤元和诸子歌行絶句时有离合浅不逗俗深不堕魔至五言古则几逼建安吾婺中千余年所仅有也总之仲子天才絶出而又能师古匠今焚舟舍筏厝力篇章故克以少壮之龄骤臻此域过此以往余弗知其所税驾矣仲子素蔑视一第以青紫可芥拾既数困诸生默默也又以好吟故呕血久惫卧床蓐间一旦籍其生平制作洎杂文若干篇緘奚囊授余曰以不朽累吾子茂曩昔所息壤于吾子者在耳而仅仅若兹命也吾子其谓何噫仲子休矣千秋之业旦暮且而属矣而且务摄药餌抑思虑专精神而又年甫壮业甫就名甫走宇内而未克彰造物者忍以彼其材畀子而竟天■〈门外曷内〉子中道乎吾为子序焉为异日先驱计可也仲子字允达父青州公亦能诗饶著述有集行于时

少室山房集卷八十一

●钦定四库全书

少室山房集卷八十二

（明）胡应麟 撰

○序六首

黄说仲诗草序

越山川瓌丽甲天下钱塘富春四明三竺南北二雁幽奇靚峭薄海外内罕与伦乃天台尤以灵迹着石梁亘空瀑流峽道赤城之标高揭万寻曩读晋孙绰先生赋輒豪兴勃勃如神游金庭玉壶与二仙姝目成霞外者亟思拉同好偕往庶几晨肇之一遇而难其人丙戌计偕晤李大将军剧谈天台黄君说仲不容口心翩翩慕向之明季扁舟淮汭谒世叔通侯则说仲俨然在焉把余臂欢剧欲狂中夜造膝欵言缕覩洞肝腹已袖出是

编进余曰不佞寤寐吾子三十年于此矣惟是不腆敝帚不敢有所隱也敢悉索以累下执事余受读卒业而三叹赤城之郊磅礴郁葱之气至说仲而彬彬尽泄也说仲故天台世家蚤歲才情蔚起与蔡仪制稚舍王黄门永叔结词盟东海上而厥先宗伯公绾实从世叔王父文成公游世叔以勲胄仗钺登坛龙门峩峩一代景附说仲首居戎幕为上宾操觚授简而外元戎喜怒一切置若罔闻也者独■〈木走〉丈室坐蒲团如苦行头陀浹旬足不履户闥童子钻穴聚窥第闻喉吻间隱隱嗫嚅声两手伸缩往来据几作推敲状时而掀髯时而拄颊得句踉蹌起探赫蹠掌许録之句累成篇篇累成卷卷累成帙帙成则世叔趣为剞劂行诸世说仲用是愈益自信发舒沥思覃精亡虚日亡论鲁连却秦冯驩振薛毛遂激楚古岩处畸流往往有以殊勋奋记室者而说仲规图大业回睨诸人漠如也今總萃其生平诗歌为什亡虑千数计为卷亡虑十数计左提右掣大都得之世叔为多选体之夷旷雍容长短句之轻新婉达合作置鹿门辋川嘉州集复不易辨五七言律絕亭亭独上百尺无枝朗抱冲襟汛洗尘俗清者大厯旨者元和淳者咸通质者长庆司空皇甫姚郑复生说仲无忝孟季乡先达载式之辈宋渡南号巨擘较说仲才或少羸以格藐乎卑瞠乎后矣始说仲名籍郡诸生中弃去占■〈亻毕〉弗习习诗歌诗歌成而占■〈亻毕〉废乃余■〈山钦〉崎瀆落放情宇宙胥国能家武失之今头颅业俱种种而邂逅合并穷途得微赤城之灵果有意吾两人者之为兹山主耶吾乡黄初平炼药处去天台仅仅数百里旦夕曳敝青鞋入飞流悬瀑中觅晨肇曩时遗迹胡麻之粒庶几一载遇焉即身后不朽名付诸蜗沫区区人间世鸡肋其何足以撻之说仲亟从余归矣二仙姝振衣霞外迟余与说仲久矣

王生四游草序

余识王山人在癸酉甲戌间始山人在灏上从诸年少饮狭斜一日邂逅余当垆酒家问姓名踉蹌前揖曰象不敏蓬游江湖习闻胡先生稔矣乃何幸于此获一当先生亟罢饮持刺候余门余与语移日壮之以千秋大业勗焉山人悦尽谢诸年少而从余学诗俄挟策辞余走秣陵谒李惟寅太保闻问中絕三十载丁酉夏余羈卧武林忽閤者以山人报余闻倒屣出覩山人乘高轩拥上驷从苍头五六翩翩来其风度亡少颓于昔而意气神貌油然睟然盎然殆非复吴下蒙也余甚怪且慰趣呼酒坐山人语之曰自子之去吾溪上一时过从朋旧聚散浮沈不知凡几变迁矣而吾与子若鲁灵光迄无恙兹复合延津谓造物者无意乎胡以巧为吾两人地若是也子别吾三十载矣中间踪迹何方交游何人占■〈亻毕〉何状其悉有以语我来山人遽从囊中出一编避席长跽曰微先生问之象固且从容请之始象辞先生走秣陵已遂由秣陵入燕悲歌黄金故台觅庆卿渐离不可得则复南迈而之楚浮洞庭泛云梦吊二妃九疑藁竹间则复西折而之蜀挽舟巫峡瞿塘白帝蹶草屨三峨嵎洋洋乎震旦第一观矣则复益西南折而入滇穷竟碧鸡金马昆明点苍声迹几达于缅甸富良而后以吾兴尽而返吾初服大都五岳之胜得于吾之杖者亡虑十之九九州岛之内得于吾之目者亡虑十之六六合之外得于吾之

耳者亡虑十之三生平感遇忻戚纷纠万端一于吾诗歌发之是编固曩昔先生余教也不揣徼惠一言附异日青云之末先生幸卒宠施之余读之喟然击节曰有是哉子之游也今■〈宀禹〉内名能词赋不啻数十百曹大都矜幅尺树门庭高者自托于狂恠怒张而卑者纖阿浮狡优童市娼角容泽甚且折辈行捐泉布博游扬之口于曹丘而韦布之鲜修者酗酒踞坐借口灌夫祢衡致庙堂之上吏议主逐客而山林之下明诏忘求贤盖诗道与游道迄于今胥病矣卒之声称随泯于月旦而行履蔑能逾寻常固也山人发轫海东携一剑自南而北复自北而南至接壤南交西竺而后返覩其人五尺恂恂匪有乘蹻履风之术而周歷四表若步武于宫中此庸詎可以声音笑貌冀耶余读山人诗一再过清而婉秀而宕新而弗刻高者毋为亢卑者弗纳于衰盖粹乎一规于风雅之正而絕出于晚近侪流习尚畛畦之外者固宜愈遠而游亡弗得狎魑结偶雕题而坦然户国无碍也余别山人溪上且易世即诗歌屣倍兹编而足迹自燕吴齐鲁外无能越一境余固甚愧山人者而胡以叙山人诗以山人沾沾余言甚力也姑援笔纪其岁月且以征余之知山人三十年犹旦暮云

林贞耀观察覆瓿草序

国初称才之盛者无若吴下四杰岭南五子咸彬彬合轨一时云而闽中以才著称者凡十较二方不啻倍之而林员外子羽又翹然为十人者之冠郑继之王道思崛起弘德嘉靖间迨今日而闾閻词章几于家灵蛇户罔象矣而闽之尤称极盛者亡若晋安之林荣名奕叶焜耀于一门三世之中父子弟兄更倡迭和而山林枯槁之言望之自失若今观察贞耀先生覆瓿草其一斑已先生王父文安公尊人文僖伯氏文恪皆以良史之才擅藻木天联翩八座其鸿裁巨轴紬之金匱石室而播之通邑大都者固已人人讲习之而先生特以蚤岁成进士扬歷中外已而养高岩穴十余年所而以其生平全力萃于诗歌吟咏故尤为精诣亡前其体自河梁以迄辘川无所不悬解其世自黄初以迄大历无所不驰骤其人自苏李以迄钱刘无所不取裁兹所传覆瓿一编不佞麟受而伏读未尝不三击节也五言选体温裕和平薄太康而上之而五言律为尤胜如茂林丰草幽谷长松味之亡穷索之逾遠七言近体清融婉亮兼天宝而有之而七言古为尤超如流水行云回风急雪排荡莫测操纵自由他如大篇长句鬯丽而春容庄严而富縟短章孤絕优柔而闲旷逸发而秾纖即鼎中一馘全牛固已目中大都先生之治诗才高而絜之以法气厚而标之以韵骨澹而永之以思情与景适象与境谕比兴弥深而觔节靡減盖卓然自名一家而侈大三世之传籍第令陆氏两生见之君苗焚研之弗暇而敢以三都覆土瓿也嗟夫古今所炫称簪绅阅阅极于汉之袁杨顾其人菁华不少槩见唐之窦宋之苏蝉连竞爽而率壤坎宦途求其膺于仕者一不可得又仅仅一载传而骤止以今先生较之通塞久近其果孰与仲多故不佞窃以先生一门殆造物者阴纵完畀詎惟昭代亡两亘古今罕覩其伦非虚语也而不啻已也先生从子计部郎天迪方以文辞雄艺苑不佞尝序其诗谓闽有两林员外行且嗣先生之业而益传之无穷而林之独盛于当代也

行且不可以世数计敬因先生命序而陈说私所艳慕如右俟尚论者执余言为左券云

李临淮青莲贝叶二藁序

夫绛灌无文隋陆无武才之难兼盖自古叹之云乃仲尼称有文事必有武备诗歌吉甫为宪万邦而春秋美晋郟穀敦诗书而说礼乐此其人宁亡一二槩见也岂歷数盛衰固人材所繇高下而瑰伟殊絕命世之英挺生间出则造物者亦有时而独纵其全与汉李少卿首创五言河梁诸篇上继三百惜也没身塞外摧败之功靡足自赎药师以雄畧佐文皇混一县■〈宀禹〉而挽近世所传兵法龐猥错杂荐绅先生罕言之两君子皆旷代人豪奋迹行伍揆诸二者犹戛乎难兼若此矧世胄勲华身际丰亨豫大之朝而坐极膏粱都冶之奉即父祖箕裘置为长物而词章琐琐奚足以云此余上下数千百年而不能无心折于余友李惟寅氏也惟寅故歧阳冢嫡髻髻从尊大人楚游白雪山房一编海内喁喁亟称寡和既用才谕受知当路宿卫羽林慨然遐思迹古作者与余辈结社华阳当代大家名流琅琊歷下武昌新蔡长兴南海之伦朝分廷而暮造膝而尤喜折节寒贱士士挟一长操一曲靡不蹶屣而走临淮嘉隆庆厯之间风雅大弘词场四辟上自王公下迄韦布洋洋纒纒同声合辙咸惟寅作新振起之即古巨匠宗工身关世运隆污者曷尚焉乃惟寅迄未尝以文事拙武备自居督府守陪京极而位戎列师保百万之众操纵掌握登坛忼慨宇宙肃清当西夏弄兵东境窃发中原士庶岌岌皇皇惟寅坐镇庙堂声色不动而长鲸折角羸豕献俘穷发顽酋匍匐请命即古重臣元老身系社稷安危者曷尚焉乃惟寅迄未尝以武备辍文事功名日起闕闕日崇九域之人望焉而震而吐哺结袜念弗少衰花晨雪郊大集名胜据胡床而挥彩笔一篇一咏甫出而人争诵之以及羽书纷沓尺素淋漓顷刻百函交授并发今其制作大都哀成宏若青莲贝叶二藁可较覩已其格也典鬯和平而尽削巉崖诡峻之状其调也清融亮节而一扫尖纖浮曼之风其神情之来飚如翼如如登九成之台招阊风而滄沆濯其色泽之传温如焯如如入万花之谷濯春月而坐冰壶读之而泠然大雅之音翫之而雍然泰和之象明一代诗求絕去宋人唇吻而一禀于大厯开元者舍惟寅将畴归耶盖语文事则篇章接轨陇西而勲劳遠迈语武备则韬铃比踪卫国而藻绘弥光非所谓瑰伟殊絕文武兼资崛起于珥貂横玉之中而并包乎垂绅贯札之业若春秋雅颂所称述三军司命万邦为宪者否耶然耶余与惟寅交總角迨今逾三十载人谓知惟寅者世莫余若而余亦谬自谓能知惟寅輒因二集之成而备述其生平梗槩如右后世子云者作庶几哉以不佞为知言虽然余之知惟寅与世之艳耀惟寅特功与言二者其笃而论之谓深知惟寅未也惟寅宿根天植少即栖心玄寂皈依太上之初故所居斋阁一以青莲贝叶名之其意旨较然可覩异日者履脱浮荣出函关而化西域即山河大地彼且一切空之而奚有于二者噫嘻浅之乎余之所以知惟寅矣浅之乎余之所以知惟寅矣

瑞云楼藁序

自昔名世伟人肩将相文武之业者蓋莫如汉之诸葛武乡乃唐宋以还胡寥寥弗

遗见也逮明而吾越两文成后先并起括苍刘公伯温以雄略翊真主而以其余事偕高杨辈振一代风雅于明初会稽王公伯安以雄略戡大艰而以其余事偕李何辈振一代风雅于明盛余尝慨慕两公冀一为之执鞭弭而阨于世代之弗相及而犹幸得交王公之后若今通侯世叔君者余读其瑞雪楼藁未尝不三叹息云世叔为伯安先生冢孙髻髻即以清标令望照映蝉冕尝邂逅不佞李惟寅第中恍然天际真人令人俯仰自失稍长辄以弓裘自奋居恒有驰伊吾絶大汉之想凡所为挽强执锐披坚跃骏介胄之士见谓缩朒难胜者率道之谈笑间既身袭龙阳公封以列侯督枢筦董江防其雄才大略若龙泉太阿陆试犀兕水试蛟鼉投之所向砉然理解天子亟心异之未几遂有总理漕镇之拜国家西北九边数十百万之众朝夕待命世叔建朱节震华鼓舳舻载道刳挽如云廷中翕然拟之长城大树乃世叔不惟韬铃冠世而间推其余力于文事尤矫矫絶出一时每临江而横槊出塞而据鞍分阃而运筹登坛而仗钺以至留宾西第乘兴南楼坐啸霜空轻裘雪夜兴会所触一发之于诗歌若今黄君说仲所校辑瑞云楼藁特其鼎中一截已余尝受读卒业窃以世叔之诗挥洒性灵淘浣风骨思深以遠绪密以清于情靡弗达而御之以格于景靡弗会而谐之以调于境靡弗探而裁之以法于体靡弗备而标之以神庄严而清庙明堂华重而大弓宝玉婉畅而行云流水奇峭而白鹤朱霞纖秣而芳草落花间澹而长林藜薄葢世叔于诗歌絶去雕镂刻削浮曼儿女之态又概不为牢悻愤郁无病呻吟之词而一稟于三百篇十九首优柔平中之余韵真泐泐乎大国风哉无论诸彻侯中邈焉寡俦藉以韦布苦吟之客挟其一技以与王公大人争千秋万世于身后者其能德色所长以自侈于世叔否耶异时近述远宗屹然为东南赤帜俾吾越两文成故武有所恃以永永弗坠匪世叔而畴其人耶虽然伯温氏启运国初高杨诸子大都因袭元政伯安先生崛起弘正间李何甫洽业已游精太上骈拇艺文故尝窃谓两文成勲伐品流诚超百世而诗歌犹若弗能无待焉者今六合为家八荒重译即世叔雄才大略媿媿两公亦将局于时之亡所试独声律自嘉隆再造几奄黄初宝厯而有之当此时气运之隆较前人不翅倍屣而世叔夙以鸿篇巨藻惊弇州之座且春秋鼎盛中尝欲然自下若溟渤之受万流彼其税驾之所余恶得而窥诸日新富有挈斯道之上乘主风雅于一代视两文成之世奕奕乎有光焉世叔所躬自期待意在兹乎将相文武之业行且于其身卜之而胡以云唐宋以还寥寥也

西湖百咏序

武林山川胜絶钱塘天目等区为东南游赏甲而西湖之韶靚秣丽尤震旦国第一观澄波镜空万顷如席外环三竺傍峙两高玄宫梵刹四百八十金银丹雘照耀其中恍惚窈冥殆匪人世始余读穆天子东方生书辄谓寓言亡当比周歷湖上乃知方壶员峤聚窟闾风诸书所谈境界即此而世人弗警类驰想于大瀛穷发之墟致足哂也自秦并六合祖龙车辙几遍域中乃燕楚晋梁往迹眇覩而吾越遗事简册班班藉人口吻得微以神仙藪穴灵药易求故耶古今题咏香山詹山两刺史而下充栋汗牛田氏志余葢尝

备载顾前人所赋或总挈大凡或标举尤最湖中景物轶漏滋多迨今黄刺史禹钧百咏出而毫发无遗憾矣禹钧故富才情饶纂述筮仕一州意有弗欲翻然拂衣迈往大业乐武林风土妍美遂定居焉紫阳之麓咫尺大堤（阙）

少室山房集卷八十二

●钦定四库全书

少室山房集卷八十三

（明）胡应麟 撰

○序十首

范浚先生集序

婺自刘骆两才人肇兴其后迄以文献甲■〈宀禹〉内惟吾邑据瓯闽楚粤水陆之冲山川之秀发林麓之窅眇岩壑之瑰丽风气之淑清迥出诸邑上而上下数千余载仅贯休氏以浮屠称诗唐末五代间而著述遂亡一显者其以著述显而遗集迄今传于世实始自范浚先生先生生宋南渡及考亭朱氏游考亭尝过先生而会先生出顾案上得所撰心箴读之大击节赏叹手录以归今附载孟氏书中是也是时郡人陈同父以气豪一代而尤尊事考亭考亭与同父论学往复札动盈卷轴缕缕不啻数万字皆抨驳不少假同时横浦张九成金溪陆九渊辈并负海内声高位置持其说不相下考亭一切攘斥为异端距之弗遗余力而独先生乃虚怀茹纳若此盖自伯恭敬夫二大儒外夔弗再覩者即先生学术醇然度越余子可弗问知也先生生平所著述甚多多散轶今存者尚二十卷余读之其于道德天人之际深博矣其诗文不甚概于古其持论甚破窾而才藻辞令奕奕足以发之非齷齪守章句椎朴俚儒比尤慷慨好纵谭天下事所上皇帝诸书及李富两柄臣启抵掌万言率引喻古今洞达彼己凿凿可见施行至传翟义说李孝逸志徐徽猷雄辨瑰略百折弗穷而忠义激烈浩然之气诵之犹若淳郁于简编而飞动于翰墨是又足规先生肩抱之奇伟匪槁首山泽锐于忘世者也俾南渡君臣一听其言而委之以国必载造式微之宋而起之而徒以空文托诸异代可悲已乃先生所陈策虽废弗售而遗集流传自宋迄今行且与刘骆两公后先不朽则造物之庇于先生固远且大其亦无足悲者矣胡应麟曰余盖于范浚先生为后学云余尝及过其故居即今集所繇名香溪者范先生聚族居溪上兄弟同气凡十人九人皆登制科跻膺仕独范先生以布衣终其身而独以著述显今去宋南渡绍兴仅数十世而九人者之名卒而问诸范氏之子孙莫能一对而范先生集烂焉为吾邑宝玉大弓而九人犹得以科名自列于后复于兹集乎赖焉于戏挽近世夸毗之子往往挟腐鼠以吓鸛鷀其弗思亦甚矣夫吾邑自范先生前歷数千百载未始有以著述显者而有之实自兹集始而余猥以后死而得与于兹也则夫兹集之序非余序之而谁也

吴中往哲图赞序

大司寇弇州王公图吴中往哲遗像自先世两司马外起高太史季迪韩襄毅永熙

叶文庄与中吴文定原博王文恪济之至祝京兆希哲沈处士启南唐解元伯虎徐迪功昌谷王太学履吉李太仆贞伯刘参政钦谟杨礼部君谦都少卿玄敬陆太常浚明桑博士民恠黄孝廉勉之文待诏征仲陆少卿子传王吏部禄之蔡孔目九逵俞山人允文皇甫司直子安司勳子循凡若干人人为传传为赞而虚首简俾不佞应麟序之吴之为国粤自商泰伯至德建邦遠矣春秋之世闾閻以功札以言皆皦然悬炳竹帛若伍行人之忠孝义烈言吴公之文学精华厥功厥言尤非末世人材所及汉唐而下虽才代不乏律以商周或少降焉至于国朝而吴中人才之盛斯极槩观司寇所绘兹图瑚璉豫章人龙天驥可歷指数也不佞髫岁读太史迪功遗集则私衷勃郁恨弗一当其人执囊鞬鞭弭之末至襄毅文庄之勳名希哲启南原博伯虎履吉济之征仲诸君子之才艺烜赫乎旗常而纵横于毫素流风稔泽百世而下尚犹使人矍然兴奋然起独其体貌之瓌奇神明之炜烨仪观容止之肃穆而恬愉散朗而逸迈者业已俯腐草木化为尘埃矣夫以不佞之生去诸君子仅数十百载一旦而过吴物色其里閻而推求其属胤尚有弗尽获者而矧乎其与人偕逝石火而电光者也乃今入弇园拜司寇揭兹图而谛翫之曾弗崇朝而三吴先哲巨公伟人俊士一目而在吾眚睫恍乎聚首乎丈室之中而俨乎交臂乎一堂之上所谓瑰奇炜烨肃穆恬愉散朗逸迈者往往并其人得之使人羹墙寤寐之念勃焉飞动于寻缣丈素顾恋徘徊而弗能自己司寇之所为显暴前修而发扬潜懿者心甚盛哉虽然兹图于吴中先达备矣而揆之太上不佞犹以非其至者司寇起诸君子后鸿德骏猷悬揭海■〈宀禹〉而文章之盛絕出古今遂举明一代制作而商周之蓋东南千古大观至是而后极非可以吴中一方槩也异昔江左名流有若曹不兴顾虎头辈以冠世之笔写先生兹图之末以附列两司马后后学泰山北辰之仰将于是乎在太史迪功诸君子且侧席避矣鄙劣弗文公命为序谨识所窥测一斑而并发明斯义于末简蓋当今已有定论无俟议之百世也（司寇祖父两司马皆列图）

增校酉阳杂俎序

志怪之书自神异洞冥下亡慮数十百家而独唐段氏酉阳杂俎最为迥出其实实譎宕亡根驰骋于六合九幽之外文亦健急瑰迈称之其视诸志怪小说允谓奇之又奇者也唐会昌而后文章衰飒弗振极矣成式与温李辈同时其才力豪劲特与杜紫薇类而学术遠过之惜其亡所用心而托好于是殆滑稽俳笑之雄耳然非是亡以抵后人之好而永传不废至今夫世固有享大名显当代制作盛行身歿而其言继之泯焉偕草木腐而小说志恠之书即笔力遠出杂俎下乃遗籍什九烂然而其人之才气豪劲素奇于文而制作末繇考见者尚因小说之传而获覩一斑则段氏之托好是书要未可以尽訾也昔杜征南勒文于石率一置山上一沈水中以豫防陵谷之迁毀其苦心为身后谋可谓备极至于石有时以泐而征南之术于是遂穷然则欲为不朽计诚亡若著述之足恃而著述传与弗传又未足以尽凭则亡若大肆其力于遠且难而小见其能于近且易则好之弥众而其传可必于后则杂俎之流是也故大丈夫志于立言固当以删诗书制礼

乐为首务（六朝张融语见本传）而业成之后间一染指于斯俾吾之不朽于来世可以万全亦岂非征南勒石遗意哉段氏书近多雕本而鲁亥殊众师儒老宿弗易征又轶漏几过半余谷居孔暇稍稍据广记校定之并录其所谓续编通三十卷藏篋笥中吊诡士旦暮遇将羣起互传之若其为说致诡诞不可尽信则余业蔽以滑稽俳笑之雄君子毋求备焉可也

羲苍漫语序

自仲尼出而六籍传自六籍湮而诸子作不佞幼则沈酣四部博考古今窃谓子书之变大槩有三春秋战国文不在经而在子子不在儒术而在百家汉晋而下文不在子而在史子不在百家而在二氏唐宋而下文不在子而在集子不在二氏而在诸儒故夫战国而上之为子者子以文唐宋而下之为子者子以理盖文与世污隆而理弗以代为升降故也明兴而子以文着则刘青田之郁离崔相台之士翼以理显则薛河汾之目录罗豫章之困知自余彬彬未易指屈庆歴以还谈文者盛纪述谈理者眇见闻著作既拙焉乃今读羲苍先生之为漫语也庶几乎剂文与理有之矣先生英质絶人弱冠颖脱举乙丑上第出宰吾兰治平之绩为一时最中扬歴清显车辙所臻颂声塞途一旦移疾山中却扫闭关盈十余载既以朝命强起分部岭南署面挹罗浮背枕大庾烟云万变吞吐胷中默照静观神动天解凡宇宙之穷际元会之运行阴阳之屈伸以及圣真贤喆之吁谟皇王帝霸之经略极而草木昆虫勾萌蠕动之微琐鬼神僊释之怪迂亡弗洞极其要归而烛鉴其情状随所得而笔之书而未尝以示人也盖先生中岁好道絶去一切骛名之念渊通综练不沾沾为博阔深瑰杰不岳岳为高故其为漫语也文不必战国诸子而有今之人所难及者理不必赵宋诸子而有昔之人所难言者其传而之于后世也断乎其亡惑也是书业已为倪司理强而出诸帐中属之劄氏矣郭生时腾复谓余髫髻时先生所识拔士亡一言跋诸末简弗可也輒因其请而以鄙说敬质之先生

百家异苑序

自汉人驾名东方朔作神异经而魏文列异传继之六朝唐宋凡小说以异名者甚众考太平御览广记及曾氏陶氏诸编有述异记二卷甄异録三卷广异记一卷旌异记十五卷古异传三卷近异録二卷独异志十卷纂异记三卷灵异记十卷乘异记三卷祥异记一卷续异记一卷集异记三卷博异志三卷括异志一卷纪异录一卷祖异记一卷采异记一卷摭异记一卷贤异录一卷他如异苑异闻异述异诫诸集大槩近六十家而李翱卓异记陶谷清异录之类弗与焉今世有刻本者仅神异述异数家余俱弗行乃其事大半具诸类书郑渔仲所谓名亡实存者也第分门互列得一遗二虽存若亡余屏居丘壑却扫杜门无鼎臣野处之宾以遣余日輒命颖生以类钞合循名入事各完本书不惟前哲流风藉以不泯而遗编故帙亦因槩见大都遂統命之曰百家异苑作劳经史之暇輒一披阅当抵掌扞虱之欢昔苏子瞻好语怪客不能则使妄言之庄周曰余姑以妄言之而汝姑妄听之知庄氏之旨则知苏氏之旨知苏氏之旨则知余类次之旨矣

赤松藁序（今名华阳）

赤松子者神仙传所称黄初平叱石成羊事旧矣乃刘氏山栖志则以赤松为雨师何也夫雨师本列仙传炎帝时赤松非黄氏弟兄明甚第孝标博极群书其说或有所受神仙传出葛稚川列仙传出刘中垒晋与梁世代相去不远其时书无刻本稚川所录孝标未必见之列仙籍曰中垒而文匪两汉要亦晋人伪称咸不足据惟留侯辟谷从赤松一语可征盖二传皆因是附会而孝标流寓紫薇遂与兹山共敞天壤则人间世所谓长生诚在此不在彼其有无无足辨也第兹山穹窿延袤雄峙东南朝真冰壶双龙三洞天幽深窅绝往往人迹罔到固宜有仙灵宅之余束发慕孝标比年病困枕席翛然有轻举远投蜉蝣蝉蜕之想因自呼曰石羊生将弃室家负瓢笠遍行金华穷谷中物色其人赖天之灵间有遇合即留侯所从中垒稚川所传第居一焉亡弗可者否则踪迹孝标托栖遗宅异时获以片言并峙兹山例诸不朽安知三氏者所云赤松不偕仆而四乎因首缀兹篇假以名集而略陈其意如此云

养痾藁序

不佞客岁之秋奉命家严治装北上朝辞灞水夕次武林角弓遘疑寒疾陡作始于膝理旋中膏肓二竖恣其凭陵三彭邇相侵扰惊风同乎宋鹁喘月甚于吴牛延及孟冬舟抵瓜步饕飧并废非赤松而辟谷五旬药饵遍尝类秦穆之复苏七日犹以简书载至龟勉前发抵淮腊尽入沛春初适大司空有事河渠筑堤济上舟航阻绝行旅不通车马纷纭咸从陆道而余蒲柳之姿不任霜露萝薛之性屡梦林泉昔人兴尽剡溪尚言何必见戴况以三折之肱扶再腓之足涉大行之险蕲定远之封哉夫孝大于显亲显非必于三事行隆于养志养有出于万锺且也惟疾之忧远游之戒谆谆尼父诂曰空言畊于宽闲畋于广莫莱彩用代貂蝉菽水是充牲醴奉大椿而偕乐树萱草以忘忧取义达生喻言卒岁斯亦可矣爰寻初服言返故栖感遇述怀咸缀兹集雕虫小道贻诮大方笔研未燔聊复尔耳

唐诗名氏补亡序

唐诗之盛无虑千家流传至宋半已亡逸度南而后诸家所畜仅三百余盖五百之中又逸其半矣今世传百家唐诗十二大家二十六名家益以单行别刻纔百数十而已余夙嗜艺文至于拮据唐业颇极苦心购募残编钞眷秘录之外凡散见诸书附载羣集稍堪卷轴靡不穷搜摠之不盈三百之数间阅宋人书目有制作至繁而字里行藏邈无可考者嗟夫昔之文人学士平生精力咸萃兹途当其驰骤名场飞扬艺苑只辞之懿半简之工咸以纸贵鸡林价倾洛下孰不悬衷结念宇宙自期诂意零落异时遽同草木鸿函巨椟散若晨星充栋盈车鞠为黄壤此太史所以蹲躅于名山元凯所以欷歔于片石者也夫一线尚延千秋如在义存后死忍没前规因据三史艺文五家经籍以及列传野记之中凡遇编名輒加捃拾芟除复杂融会有无具列兼收以贻同好夫载籍云亡姓氏昭灼后之君子披览斯文兴言曩哲倘可以慰作者于九原遯遗风于百代如曰踳驳淆

乱速朽为宜则杜李以还例应焚擲余固亡所容余喙矣

青芝稿序

芝之灵于羣卉也则古以瑞称矣三秀之柯烨烨煌煌陈于合宫荐于清庙肖其形摹其事而侈诸四方即五尺童子有弗征其瑞者乎而吾以芝之灵也匪仅瑞于一世已也厥有大于是者焉增城阆风玄圃羣玉诸洞天福地絶冥之巔无底之壑日晶月英磅礴轮囷勃然而芽蓊然而茁如道家者流亟称五芝之属樵青牧竖所不能窥达官贵人所不能逢而明王喆后所不能必致惟列仙羣圣时得茹之寿至与元化相毕此其瑞固以百千万世计者也而匪仅仅焉瑞于一世已也厥今之业儒者起占■〈亻毕〉奋贤科往往绩三载之勤乘一战之捷大者君刚成侯平津次亦序鹓鸿骏驥经纶际九域而黼黻横八荒非芝之陈合宫荐清庙而五尺之童共征其瑞者乎周之雅鲁之颂楚之骚汉魏晋宋之乐府五言唐之歌行近体絶句作者人与代偕逝并遐而姓名族里亘于今而为烈彼其带砺湮钟鼎蚀而片言只字之悬于大造愈久而愈无穷若是者将无列仙羣圣所茹之芝百千万世以为瑞者也噫瑞而计诸百千万世几于无何有之乡广莫之埜骤语之乎少年銳进之夫彼执以为诙彼执以为幻将羣然而哗而诮而侮而孰从信之蓋余读余郡张生诗而异焉张生用善于宋太史公为同里瑰葩逸藻挺出于辈流甫弱冠缉诗成帙而命以青芝是固弗沾沾一世而蕲瑞于百千万世者也匪直惟弗哗且诮且侮而已余读生诗一再过光黯然而幽色黝然而苍味冷然而冲隽然而旨厥有当于芝允矣輒因其请之力也而序以复之

二西山房书目序

自羲皇画卦书契肇与周衰仲尼辙环列国退而定六经程百代说者以为坟籍之始余考纬书古文开辟以至获麟蓋三十七万余岁云诸史如合雒禅通之属络绎繁伙至帝皇封禅文字万有余家仲尼观之不能尽识则上古之书其数不可胜纪后世乃谓三代以前无书可读者不深考之过也秦不师古烧燔诗书项氏继之咸阳三月先王典籍实始荡然汉兴除挟书律武帝表章六经诸子往往出于破壁坏冢不数十年而刘向氏七略遂至三万五千余卷非古人述作素盛故掇拾煨烬存者尚如此哉王莽之厄至于东京班氏艺文视前仅三之一厥后魏晋六朝兵革勦■〈彳荐〉毀■〈彳荐〉收不盈七略之数元嘉中谢灵运摠萃书目六万余卷齐王俭所録万五千七百卷梁任昉二万三千一百六卷昉俭并称博洽与灵运时代相次不应多寡殊絶蓋灵运总萃一时所藏而昉俭芟除重复故也隋嘉则殿藏书之富至三十七万余卷其正本亦止三万七千惟开元帝累叶承平异书间出一时纂集及唐学者自着八万余卷古今藏书此为极盛赵宋诸帝雅意文墨庆厯间崇文总目所载三万余卷累朝增益卷不盈万宣和北狩散亡畧尽至淳熙四年书目成乃得四万余卷蓋歴代帝王图籍兴废聚散之由大都具矣夫以万乘南面之尊石渠东观之富通都大邑之购求故家野老之献纳而累朝着録不过如此蓋后人述作日益繁兴则前代流传浸微浸灭增减乘除适得此数理势自

然匪力所强也至荐绅先生博物君子收藏遗书若张华之三十乘任昉之四万卷邺侯之三万轴宋公垂叶梦得尤延之代称宏富大略相当若渔仲氏之志略端临氏之通考则又槩录前人不必要代之所有家之所藏也余尝总览历代艺文以及诸家所录而参之当代经则十三家注疏外丁孟夏侯传授仅着空名其余六代以还流传绝少惟宋儒诸说盛行海内大槩存者十三史则二十一代类梓于太学单行于各州编年自荀悦袁宏至司马朱氏不过数家而诸起居注实录野史之类传不能半大槩存者十五子则老庄列氏外宋鉞关尹淮南吕览盛行星历讖纬间多湮没而汉唐宋诸小说纷然毕出传者殆十之八惟诗文诸集六代以前甚寡唐宋至今乃始大盛而最不易传即唐诗八百余家宋人有得五百家者余方极意搜访手抄集录仅得二百余家文集则唐以前存者不过数十家而宋元诸名公不必能文之士皆有集行世迨今尚数百家而国朝尤盛盖世代远近然也余自蚤岁营心载籍累铢积寸至四万有余卷虽今人所自为书居三之一倘有以释道二藏来售者尽鬻负郭之产以当之则余家所藏几可与前代等不可谓非布衣之幸也第凡物盛必有衰聚必有散即前代帝王名公巨儒竭天下之力畜之而一旦且散秩而不能保则余今所得庸讵可据为已物因略叙其意录四部书为二酉山房书目藏于家

少室山房集卷八十三

●钦定四库全书

少室山房集卷八十四

（明）胡应麟 撰

○序六首

大中丞刘公奏疏序（代臬长梅公）

万历乙未春河间刘公奉命以大中丞来填越公至则周视境内而条画其便宜凡先后数十百疏先后数十万言诏一一报可越三载威惠诞敷环海以东鲸鲵之属竦息待命于是藩臬庶僚某等咸请公颁刻所上封事揭四裔而垂千秋不佞得以次伏读卒業叹曰猗欤盛哉文章之用其最巨者宜莫如经世之文其最巨者宜莫如奏章唐虞三代都俞一堂亡论汉则贾太傅之治安伟矣顾其言弗効于用甚且弗能一日安其位于朝廷说者谓长沙通达国体王者之佐而立谈太息则自用其才者非也唐宋以还其人之杰然名世而疏草之焯然名家者亡若忠宣陆公文正范公乃陆公生唐季运身际庸猜晚辑方书以避谗构君子弗能亡憾于其君范公当宋用兵西夷跳梁先忧后乐卒爽成言君子弗能无憾于其国两公而外卑卑载籍古今名实罕覩其人若夫肩皇王帝霸之猷事神圣英毅之主际鸿庞熙皞之会而树倜傥无前之烈者舍刘公奚适焉不佞某謏劣无似无能为公役万一第读公封事而知公有大造于越者六事曰核吏治也曰振民穷也曰练师徒也曰肃戎政也曰汰冗滥也曰恤灾伤也嘉隆以降吏不迹古窥瞞成俗偷惰相师户口为增熏莸错列公于是有核吏治之疏钱塘具区海■（六禹）乐

土岁比大侵重以疫疠流莩枕籍苍赤嗷嗷公于是有振民穷之疏会稽甲楯触斗成风綦隆日久纵弛潜滋卒弗服习将且予敌公于是有练师徒之疏勾践遗教君子六千一二狂狡脱巾潢池首恶就金余孽观望公于是有肃戎政之疏承平极际奸蠹藂生费出无经吏缘为市诡窜名籍坐縻县官公于是有汰冗滥之疏全淞居氓枕江抱湖洪水时行灌溢川泽鼃鼃杂处人不聊生公于是有恤灾伤之疏加以大庭之上万机旁午时务孔殷朝鲜亟则公有排难之疏日本张则公有戡暴之疏戍兵发则公有善后之疏矿使临则公有豫防之疏自公之开府两越章亡虑数十百上上亡虑数十万言大都纏绵于忧国激发于爱君普讯博谏长虑却顾务凿凿可见设施而弗为迂远矫伉之谈以诡众昵俗故上于公之诚亡弗格而议亡弗行亡论洛阳少年即陆范两公未覩其弗贰弗疑若公被遇于今日也距兹三载大淞东西吏职民怀师武戎戢冗饷毕空天灾潜弭风声震乎遐貊而窥伺絶乎近郊匪所谓仁人之言其利甚溥社稷之臣以安为悦者哉且贾生少年銳气一蹶弗伸两公陈力富强弗获久于其道致厥就寥寥简编公以三十之龄建旄秉钺而老成持重絶无沾沾喜事之心即方今勋业烂然异时达公之年而竟公之绪宁詎弗遠軼西京近軼唐宋而与周之吉甫同为宪于万邦也不佞某寤寐三代之英久矣顾阔焉未覩何幸于昭代一遭逢之而于公一亲炙之敬缀不腆之词当左券于琬琰之末

送大中丞山西万公经理朝鲜序（代）

今天下称极隆盛际矣四荒九域玉帛来王蠕动含灵咸若大造独倭奴负固穷岛包藏祸心比者徂伺■〈氏鸟〉张躡我藩服上赫然震怒特简重臣以经理为名提十万众张皇境上阃以外若巨若细听便宜凡诸罪人务在必得戊戌秋铨曹以员缺上闻上博综羣议僉谓今大中丞山西万公威望夙着宜往诏报可公受命趣装刻期明发某不佞忝公属僚快覩公被遇上知树壮猷絶徼外则于启行之次作而言曰圣天子之以东伐畀万公也岂不诚为社稷得人哉夫才不虚生变不虚兆故非常之才生必有赖非常之变兆必有繇故瓌玮鸿硕冠世之勋非纷纭盘错亡繇以自致摧陷廓清救世之略非横决溃崩亡繇以自显斯两者其人其事始恒互相需而卒未始不巧相值也不佞恒窃志三代之英而下上其世若成周吉甫为宪万方尚矣春秋而降郟穀氏之诗书诸葛氏之礼乐盖彬彬焉彼其人皆絶类离伦文武兼济出而将入而相定倾弭变业亦如之明德邳隆人才盛极以不佞耳目覩记当今之世躬非常之才遭非常之变伟然以七尺躯负天下望如古所称社稷臣者舍万公而畴属焉公生长西陲服习介冑髻髻即以儒自奋高步词垣器度巍峩望之若岱宗溟渤莫知颠岸而下士若渴蹄涔蚁蛭具网毕罗先是上雅知公才拔自曹郎专制一面垂十余稔狡夷狂噬用观察旧使超大中丞履任未朞海波澄澈兹东藩移镇节旄所指长蛇封豕亡穴自藏不佞奚容缓颊第以非常之数窥测天人而知公之树壮猷威絶徼者匪偶然也倭奴古不经见陆梁元初蒙古驱混合之锋乘全盛之势曾不能折其半镞高皇帝肇造函夏沿海诸卫遍置重兵虑深远矣

俄而望海竭之捷屠磔靡遗嘉隆以来实始滋蔓吴越七闽战亡虚日迩复掩袭我藩邦蹂践我边域六师萃止犹扬鬣鼓鬣拒死岩城之中自北边受盟未有暴戾犷顽剧于斯寇者揆诸世变允谓非常而公适以非常之材遭兹运造执言问罪奉行天诛是役也庸讎直抚靖遐方扫除逋孽已哉楼船十万飞度重溟生缚酋豪俘献阙下列扶桑为郡县编穷发于版图复千八百国之封疆荡六十四洲之氛祲较诸城濮创荆泸水禽获弥有光焉凯旋之晨勒石大荒纪颂圣天子功德文焰武烈震耀简编所谓万邦为宪吉甫其人非耶所谓才不虚生变不虚兆否耶然耶乃公以七尺之躯系中国安危先■（宀禹）内忧乐当宁恃为长城苍生庇为大厦孟轲氏亟称社稷之臣匪公之攸属而繁谁属耶不佞幸以臬僚朝夕接见奉公教甚久而狎公爱最深是役也既为圣天子社稷得人庆又为公奠安社稷以上报圣天子知遇庆敬于马首之东布斯言高牙大纛下以壮公行色

送锺天毓归苕罗序

余自丙戌罢归不上春官者凡十禩甲午奉大人命青衫蹇卫蹙蹙入长安中则曩时髻髻交游悲歌屠狗之伦什九物化间一二存者李大将军辈仅仅如鲁灵光每曳履黄金故台盱衡四望阴风飒然万里北至若相对歔歔于华阳碣石间嗟夫犬马齿既日益增而前辈风流浸微浸灭若为得盛年好学瓌迈不羣之士提衡扬挖以庶几畴昔之谭天即繇此终身吾以为遇之旦暮已乃今而邂逅锺君天毓盖庶几其人焉天毓故贵介公子尊人观察公歴仕通显声实彪炳一时天毓少厌刍粱凡世所艳趋狗马子女玉帛诸好意所向宜亡所弗极顾一切扫去而独沾沾以不朽自期弱冠身所师友既已尽越之隽豪而犹以未足居恒念大丈夫生明盛操七寸管树百代称必游道尽一世而后亡遗憾惟是皇都四方之极而太学又四方贤士所走趋吾方欲尽交一世独奈何局促辕下以不费奉妻子耶亟长跪请观察公从二奚奴束书担簦下金陵渡扬子击楫长淮大河驰骑东北走青徐齐鲁卫赵之墟所至发为篇章盈篋盈笥既抵燕市入成均公卿而下列署之英六馆五陵之彦向慕之如饥渴就之而发其椟藏靡弗恍然自失曰锺君信盛年好学瓌迈不羣士也君既度爽神清尤敏妙饶能事行草佩鐻声歌琴奕多所娴习而赏鉴其精高辛颡项夏后之鼎彝柯亭之材赤堊之治汉碑唐碣五代宋元锺张顾陆吴李米赵楮墨绢素之遗一望而核其真贗缘是士益向附之出其下乃君雅不以自多日鳃鳃然以弗获尽交当世为憾一日与余把臂通侯宋君座而喜可知也诘旦踉跄摄衣冠伏谒余寓曰英不敏越中豪儁无所不缔交顾独弗能得之胡先生赖天之灵长安中望见先生颜色先生幸卒赐一言既英垂橐以覲观察公于生平无遗憾嗟嗟天毓不佞故嵌崎歴落魁也世所称狂而可笑宜莫余若者子独恶所见而乐闻其言而骤欲得之自余三上春官而发几种种燕市悲歌屠狗之伦什九物化亟思获一盛年好学瓌迈不羣士与游乃吾乡有天毓其人而又雅好余若是余则恶能以默默也天毓行矣都人士业皆有言为天毓壮行色不啻和璧夜光惟是鄙人之言臚焉以糠核先之观察公

骤而读之其能无掀髯噓耶虽然余与天毓家相去仅五百里而遥异日者操扁舟负瓢笠访天毓苕萝之下彼姝之子翩翩然出而迓焉即曩时击筑屠狗之伦群起要余余弗与易矣余且从天毓老矣

寿郡伯张公五秩序（代陆太史）

万历十有二年甲申六月实维大郡伯桂林张公五袞初度之辰诸邑属吏汪君可受辈谋祝公遐筹跻于大椿冥灵以仁寿当世则相率问序于余余不文不能称公寿顾窃从诸大夫后窥公所为治婺与婺人所为祝公而卜公获算于天未艾也夫今之太守非虞廷所称牧伯周诸侯汉二千石哉坐黄堂驾五马裂千里而为封疆秩贵倨至亡二也顾守之秩于民若甚尊而守之职于民则甚亲晨兴坐堂皇阅簿书发号令午而听讼狱一政失环一郡氓庶怨咨之一政得环一郡氓庶爱戴之爱戴之弗已则羣起咏歌之又弗已则羣起祝颂之故夫仁逮一乡者颂止于一乡一邑者颂止于一邑守之仁则一郡之民千万姓之口同祝而薪其寿者也以千万人薪一人之寿则寿虽诸福之首造物者亦靡得而靳其算矣太史氏曰以余所覩记于今良二千石张公厥其人哉张公用经术起岭右服官南昌治平为天下第一入拜台御史所在捐小苛崇大体务矜恻广惠怀至解剥忠邪振饬纪法则风裁稜然山立岳峙弗可夺卒用此失当事心谢病去天下望公为祥麟威鳳而公终不忍抱其仁民之具小试而藏于一壑一旦竟驩然出上方念婺越东岩郡非公莫可輒以婺八邑畀公公始下车趣行郡覩学舍庠陋叹曰婺为文献藪窟自沈隱侯以风流倡唐宋胜朝代有其人国初文士雄跨海内而胡近寥寥也则黉校之地非耶爰相厥宜建鳩工庀材新之不日且为会城中罗一郡之秀而月课其殿最士自是喁喁向风矣则又以为纪纲之沦斲繇胥隶之作奸也于是汎狴犴肃科条毕虑殫精旁睨却顾爬搔蠹穴遏絕幸门大猾巨狡奉法惟谨则又以为左右之售欺繇宾旅之壅遏也于是缮輿梁饬邮传一命而上通刺请谒握发倒屣发胆露肝八荒洞如蔀隱毕达而又以其间劝农桑行赋税访耆硕恤孤嫠挫豪强格钞窃蓋张公之为婺曾不再岁而士奋于庠氓饱于野旅优游于途贪黷革盗贼屏縉绅作气诸执事师以成风太和之象旁皇四境乐惠之声浸淫九野公之仁无所冀于婺而婺人沐公之仁不能不颂公而快覩其寿而造物者亦不能不为婺人而阴以上寿畀公天子旦夕用颍川故事征公入禁庭筦枢轴公之仁一郡者且将扩而仁天下而公之寿亦且将由五袞而六而七而期颐而五百八千岁为春秋而绵绵未艾也诸大夫仁寿一世之祝意在兹乎抑余有进于是金华之山突兀巉岩穹然造天夫非皇初平叱石冲举地耶公始称寿而适守兹土其偶然耶抑造物者有意耶有如公由此极人臣备五福一旦念婺旧游曳杖而寻所谓金华赤松子者余虽老尚能候公朝真诸洞间以快覩大还之为公有当不啻如大椿冥灵已也于是诸君起再拜曰伟哉太史公之言寿也敬载斯文觴公郡庭为八邑大夫士倡

送大参李公擢楚中廉访序（代）

万历丙戌冬十月大冢宰以湖广按察使员缺闻皇帝曰楚幅员辽巨冠

）内厥民剽轻厥俗犷悍洞庭云梦大泽间奸宄伏匿窃发责咸委按察使非他方比其慎择大藩之良以往于是吏部上浙大参李公名诏报可时李公职分守越以东三郡婺实公首治地八邑令长方君辈骤闻公行恋恋如夺怙恃相率走书币太史氏乞一言太史氏辞弗获则进币扬言曰夫诸君亦知圣天子与大冢宰庸李公意乎国家昉古建官外藩自郡县而诸司无虑十数而独按察称外台外台吏自清戎督学而诸道亡虑十数而独按察使称台长按察使之职上之则奉行纪法昭圣天子威命爽灵下之则佐两台核羣吏禁非剪暴锄恶刑弊剔蠹环一省之中数什百万之众俯首听命于三尺之牍其权至崇峻亡抗而其任亦至丛巨不易胜也世儒斤斤论治体非宽则严按察司狱讼视刑书势不得越严而任宽然咎陶理官也重华之命一则曰惟刑之恤一则曰刑期无刑此曷以称焉夫务姑息溺长厚其弊也选懦无当或靡称国家任使而工督责习文深武健暴伉任法寡恩即贪夫墨吏望风解绶大憝元慝屏息于潢池之畔谓培植国家元气何故夫按察之职宽者体也而严者其用也仁以恤矜义以剖劓内奉无私外秉至明声色弗动而讼简刑清百度以贞岂直惟按察一方执此提衡天下易易耳则李公其人哉李公繇名进士起家江右始以御史按楚楚人业家颂而尸祝之既出守吴兴备兵海上所歴治行无弗称天下第一者比分部东越下车之始三郡士民喁喁回视易听公日坐堂皇夕引宾客纠劾靡事而污瀆鐵心钩巨弗施而龇猾屏迹耳目罔寄而陇亩隱忧閭閻疾苦洞达于函几之上盖李公之为治不为小惠而为大德不务小察而务大纲宽而有制严而不迫默养宁静和平之福布于令甲播于讴歌以故圣天子烛照万里大冢宰衡鉴百执咸以臬事非李公弗胜也夫全楚之任非浙东西比而按察使之重加于藩参顾李公视之曾不足当小鲜何论盘错李公第行矣躬其化导何遠弗平励其风猷何氓弗率彼剽轻者将革而归厚犷悍者将淬而好礼洞庭云梦汤汤王泽詎惟永絕萑苻之警宁静和平之福昔被于越之一方今且洽楚之四境矣虽然兹不佞抵掌楚事耳有如圣天子軫念海内晨下尺一书以臬陶举公以社稷累公上佐当宁格心之化俾国家刑措不用如成周公之泽庶几尽究哉则是行也楚实始基之矣

贺张明府子环考绩叙

盖尝闻之太上有立德次厥有立功次厥有立言夫三者则德也始基之矣匪托之乎言亡以垂百世永千秋德矣言矣功弗効于行事将德为徒善将言为徒文夫庸詎可以轻重后先论也要以其二在人其一在天适逢而交构古昔难之以余所覩记若今华川张侯盖独操其盛者哉侯家世温陵温陵才谓薮窟贤科自奋往往数十百曹而侯尤名能邃于其业戊戌抡魁制义亡弗人人诵者侯自视弥益欲然以赵宋度南幅员仅三之一而大儒崛起闽遂以荒服配鲁邹明德邳隆追踪三代胡紫阳而后继作寥寥也则苦行湛思枕籍其遗编而扼趋其故躅凡域中雅言名理者亡论春粮蹶蹶必虚往而集其长复以当今之世士持学术则摛词章谈词章亦拙学术是二人者所为皆过也蚤夜皇皇程古匠喆上遡秦中歴汉下讫唐而一稟之乎风雅之优柔谟诰之浑噩盖侯以眇

然一身交负并荷曰德曰言咸足乎已矣乃侯之器亡弗苞材亡弗缮厥功之首试吾得诸华川士民又有更仆未能尽者焉华川婺东岩邑其风朴其俗犷其讼狱繁当嘉隆未造数与岛夷角壮者负戈老羸转徙户口凋閤阨壕隍亭传旷弛弗营侯下车周览怆焉而会上所遣中贵人适以采矿至矿议所繇起者婺诸山皆峒空独华川南麓传有金银气覆其上浙以东侠徒亡赖甘心奇货久而中贵人衔上命来众益汹汹将复酿戊午之变侯推几勃然曰何哉彼所谓矿者是倡乱之囿也矧邑瘵若斯默弗言焉用令趣上书当道极陈矿不可启当罢状即罢矿有他令以七尺躯当之当道黠侯议力争之中贵人役中辍四境大驩侯既沮止中贵人则晨起坐堂皇朝吏役而示之政曰讼之繁也匪民之讦也繇听之失其平也于是开诚布公屏奸烛幽醴滞囿圉一空此邑中有大狱株连千家侯讯得其情立破械纵之而以反坐坐诬者民志大畏无情之词噤弗敢吐矣侯则曰未也民之犷也吾且以仁让师之于是享儒先肃耆旧比邑诸黔首而劳以乡方朔有期望有会岁有稽不逾时而郊圻之内揖逊蔼如侯又曰未也民之朴也吾且以礼乐文之于是隆师傅揽俊髦罗邑诸青矜而别以艺业日有程月有课季有录不逾时而里社之间弦诵彬如于是諏农隙视公余发赎醵振废坠弊者更之庠者拓之高者培之下者浚之莠者除之溱洧之间久病厉揭大捐俸入鳩工庀材梁成其上万众赖焉盖侯之试邑甫三载而讼息刑清化洽政成百废具兴颂声沸腾监司征侯绩茂异考上上报铨曹当宁纪侯名姓于御屏之上计日下龙章黜象服显扬之孝光于四方君子谓侯德立而弗为徒善言立而弗为徒文功立而弗为徒効握三事之全胥不朽之盛垂百世而永千秋若侯者诚瑰迈倜傥振古杰出之士匪有待而兴者也不佞跼伏草茆凡郡邑大夫靡敢冒昧通一刺独于侯忻慕为执鞭而纂述其行事实于中有深缔焉敬因二太学之请而首揭其大如此若夫牛刀之割发硎百里而上之而九列而极之而三公皆侯异日所必至惟是侯生平所任之重者与道之远者弗与存焉即沾沾为华川士民祀要不足以当侯一映也

少室山房集卷八十四

●钦定四库全书

少室山房集卷八十五

（明）胡应麟 撰

○序十首

送张参知睿父擢江右宪长序（代）

高皇帝稽古设官上律三代其于外藩众建分部之秩所以树屏翰而寄旬宣盖即成周召伯分陝保厘之遗意焉厥为任至崇巨也惟我三郡都全越上游而婺自高皇帝抚运应天率先归化故圣心系属尤厪特为置大参知行省于郡城以控制东国非德望穹窿才猷烺烺者例不轻授至满秩奏迁輒有非常之命所为报称劳伐甚殷若今擢大观察吴郡张公尤其卓卓者也始公由高第列木天博学宏词中秘无两上识公稠人以

为古之遗直亟遴诸史局俾长掖垣公夙夜矢心言无弗契会儉人挟私构讐蜚语蔓延天子赫斯玉石咸坐公飘然一苇泝越入闽徜徉七台九曲放于琅琊所在以文事饰吏治公余纂述充栋汗牛代醉一编传播■〈宀禹〉内久之公论益明遂以大参知分部东浙是时三郡并以水陆之冲丁疲繭之候壤瘠民劬财殫力竭游闲掉舌武健操矛猾黠舞文顽嚚聚讼豪强影射孱懦流莩公下车周览四境喟然叹曰是庸讵可以多事扰也于是建之以惇大馭之以寬柔触之以真诚鼓之以信义作之以礼让期月之间喁喁向风既而教洽化流仁孚耻格暴戾而驯狡创而愿贪激而廉懦振而立库藏实户口增狴犴空萑苻絕甘棠之阴蔽芾万家故老遗黎咸以宁谧和平之福数十年所未覩也余待罪鞶轂凡奏最都门者交颂公之为政不绳而联不约而剂不斤斤而办不察察而明且也崇祀前修弘獎后学式林泉之耆宾山泽之癯盛节高标名言莫罄兹豫章命下台疏竟留白叟黄童攀辕属路蓋允矣上对帝衷下厌群望无论庖丁之解全越有余即由此跻九列宰百司皆恢恢游刃其于公又奚难焉公治装在即惟是居婺日久故婺人德公弥深是行也荐绅逢掖争致命犹子凤城征不佞片言以祖公前道余闻公先君子佐理三衢膺蠻名宦仲兄明父氏吁天代母精贯穹冥公后先济美忠孝比肩固宜其政绩之瑰异不凡也余岁比乞休误恩未遂目睹公誉命腾蹕行且用成周召伯故事入禁廷筦枢轴棠阴之蔽芾三郡者益推而大厦四方余虽耄且惫犹能操天禄之管计日为公颂之姑勒言以当左券云

信州土瓜诗序

信州土瓜奇产也生深林土窟中形质菌蠢类山蕨而色香味絕与梨同至醒酒之功即李太尉平泉石弗过也余九龄行脚燕市与四方贤豪长者游颇歷噉殊珍独是物未登牙颊仲冬客三衢适李司理以文艺定交夜燕出此驟尝殊不能辩载询乃知因叹物固有抱灵孕秀而沈伏草莽埋没于山嶠者即以兹瓜之奇上之曾不得偕吴柑闽荔贡御府荐寝筵下之复不能如冬薯春菘交布田畦妇人童子咸识其形食其力非好奇如司理则终吾世且无繇覩之嗟夫士之遇弗遇亦犹是矣虽然老氏曰知我者希则我贵而物之贵于天下亦往往希有焉然则瓜之弗遇政其所以为贵也夫瓜也司理识之余食之既弗为弗遇矣而俾其名竟没没于后则虽遇犹弗遇乎夜归倚酒輒赋五言律二章以呈正于司理焉

更定九流序（详九流绪论中）

余所更定九流一曰儒二曰杂（总名法诸家为一故曰杂古杂家亦附焉）三曰兵四曰农五曰术六曰艺七曰说八曰道九曰释儒主传统翼教而硕士名贤之训附之杂主饰治揅偏而旁蹊末学之谈附之兵主法制权略而纵横占候之籍附之农主稼穡蚕桑而饮饌药餌之方附之术主蓍龟厯算而禽星宅相诸技附之艺主书计射御而博奕绘画诸工附之说主风刺箴规而浮诞怪迂之录附之道主冲退恬愉而房中炉火符篆章醮附之释主经典禅观而论宗戒律梵呗机缘附之夫上圣哲王之治亡尚六经故

首之以儒崇大道也异端衰世之观咸徇一典故次之以杂核支流也国所重在戎故次兵以审大机民所天在食故次农以植大命术虽浅数神智工巧之规寓焉故次术艺虽末流弛张游息之务存焉故次艺说出稗官其言淫诡而失实至时用以洽见闻有足采也故次说道本柱下其言放荡而难遵至齐物我达死生不可易也故次道释本西方其言荒忽而亡据至明心性破尘幻不可诬也故次释而九流之事终焉

罗氏路史序

三皇而上若存若亡矣史迁絀绎旧闻肇基五帝盖暴秦烈焰载籍焚如祖述尼经用当前导云尔六代凌夷史才中絶马贞补传刘恕外纪语焉弗详罗氏此编最称后出乃独穷搜眇邈剧探幽微图书河洛之文封禅云亭之迹旁逮大隧荒林之窃伏下兼颓垣败壁之深藏片款只词一章半策有关前乘具网周罗遂俾辰放以还燧人而往遐踪絶轨逸事奇闻缀属森然粲如指掌斯其辍羹谢馈之劳闭户然膏之力固已至矣乃若灵篇秘籍散见羣书久缺传流向湮纪录者率赖是编提携弗坠后世亦因综核大都良哉学圃之邓林词场之宝筏也特其才高意广见戾识偏异说放言纵横亡忌且矜靡炫博鲜所折衷揆厥研磨仅当草创有能整齐笔削勒成不刊上翼麟经下恢马史则明诸君子有木天金匱之责者当亟为究心云

贺张侯考绩荣封序

海阳张侯之莅吾邑也下车之始播扬仁风倡导德意替之岁纪纲飭令甲新越明年大稔农有余粟夜户弗扃又明年化洽教沦礼乐具兴颂声沄沄彻于大廷于是大冢宰以考绩报侯课上上天子既录侯姓名于御屏复追念侯笃生所自赠侯父瀛峰先生如侯秩而侯母某太夫人封孺人命下之日士驩腾于庠农踊跃于野商若旅播布于涂荐绅先生摩肩接毂于侯堂皇之上咸上赞圣天子之明而下庆侯与二尊人之遇博士庄君陈君孙君邑佐桂君唐君乐观盛典相率诣不佞乞一言纪之不佞鄙曷足以知侯顾窃视侯政之大而谕侯获福扬休之未艾也今之仕者释褐而当一命孰不曰大丈夫当树无前之烈成踔厉之勋使事功暴一时声名揭■〈宀禹〉内乃愉快人心耳不佞窃以为非然论治道莫辩于六经载治效莫良于诸史诗称子民必先岂弟史传贤吏輒首循良彼庸不知威仪徽察多赫赫之光葆大舒徐为闷闷之政哉盖令长之秩于民最迩于下最亲故其称则曰父母其事则曰拊循故恫瘝疾痛咸切厥躬菑瘳颠连若蒿而目生之殖之化之诲之斯父母之任已即养有难遂困之劳之教有弗率楚之撻之亦父母之任已世代波流吏不师古恃督责为精明袭鞭撻为教化彼其当时建竖詎不斐然顾黎元气脉日铲削而月枯稿亡论三代岂弟之风两汉循良邈不复覩于天下矣若张侯之于吾邑岂非所谓岂弟循良民之父母者哉兰踞两浙上游瓯闽楚粤之所馆毂声名文物之所会同舟车廩饩辐辏传邮案牒簿书旁午道路科徭税敛狱讼斗争纷纭轆轳堂署之间盖东南最岩邑也顷者大役频仍户口流移岁比弗登教尼弗行侯始下车叹曰是胡可以峻法绳而多事扰也视篆之明日大戒于郊与民更始一切烦苛悉宥悉

除于是挈纲总维开诚布公集思广益建之以惇大畜之以宽和镇之以静谧作之以勤敏舟车廩饩先事而储案牒簿书当机而发征徭税敛絜力而科狱讼斗争平情而听行之暮岁宾旅如归氓庶复业讼简刑清政且有成侯曰未也闾阎未实孰愈流离则躬俭节以先四郊絶苞苴以风羣下洁粢盛以召天和观树艺以罄地力精诚布假澍雨应期百谷咸登道靡拾遗侯曰犹未也礼让弗兴曷取饱暖则又申约束以导乡闾播声歌以谕俗习敦贤达以示范型一彰瘡以昭惩劝德义熏蒸教化大明薄渍而敦戾革而仁盖侯之令兰至是仅三载而吾邑之民始勃然苏继盎然足终陶然化即诗称岂弟史传循良繇昔揆今孰侯愈者固宜大冢宰征之民风受之监郡以上考録侯而圣天子崇褒宠命上逮二亲备存歿之荣极显扬之愿也夫为民者戴吾父母而遯念吾父母所自生则覩侯二亲沐崇褒膺宠命而欢腾踊跃播告相贺尤其情所必至藉第令侯以威严飭下皎察驰声即与古赵张衡烈邑之黎民有革面戒心而已欣欣喜色弗谋自集胡为乎然哉虽然兹特侯始事耳侯博大閔深肩巨克胜纳繁不乱固屹然台铉器也异时循吏往往由郡县而入三公圣天子方大搜牧保之良以风厉海内旦夕用故事擢侯心膺之任侯之政将自一邑而四方而二尊人之封将自一命而九命庸讵止自今已哉于是庄君桂君等咸耸然曰善乎胡先生之颂侯也敬书文绮为异日征

贺严封翁泊孺人锡命序

余读太史氏书至天道无亲常与善人輒击节其言达于天人之际乃其究归之间巷之人必附青云以施于后则未尝不私窃陋之夫士也砥节砺行甘困穷亡悔要以弗欺其意讵宁有尺寸希冀于天哉卒之天久而定郁遏其始而厚植其终隐约其躬而崛起其裔身不出闾巷之下而望隆乎冕黻之上是之谓无用而用挫名而名太史氏所称天之报施善人匪虚语也而鳃鳃焉挟一长矜一善苟依托显重以薪没世之称语于狭小丈夫可耳胡以谓善人胡以谓天道耶以余所覩记嘉定严翁泊谈太孺人益信严翁者婺邑侯浦阳君尊人也以厥考南皋翁故自称曰梦皋南皋翁蚤即世翁甫壮起当户尽推故殖三孤弟而淬励其仲以儒显与人豁达大度把臂洞肺肝至慈愍惠利好周人缓急尤天性亲故迫患难以情告翁輒罄所有输之坐是家旁落几废箸翁亡毫发介颜面独与太孺人勤垄亩自给日夕屡空晏如也而太孺人尤能以德义相翁姑葛病躬汤药视寝溲十岁所遇臧获絶诃谇声妯娌遠近风其德咸相率为孝谨太孺人之好周人缓急一如翁翁平居銳施予比穷折弗自振犹欣然有以相乐皆太孺人为之内也而是时明府君甫髫髻已颖脱羣儿日诵读数千万言矣翁顾谓太孺人是儿昂昂千里先大人遗命经术教子孙其何敢失坠亟节饘粥馆明师课迪之稍不给太孺人簪钏随其后明府君用是感奋甫踰冠业成以周易试南省试南宫连首掇既对大廷授政百里贺者牛酒填里门翁与太孺人顾相对不释然曰儿幼未习吏仓卒负任使柰何趣为教赐明府君勉以廉平字恤凡当官务甚悉太孺人亦数寄声儿为县第视而翁居家状毋浮慕赫赫称明府君敬奉教治青溪治改而治东阳东阳复大治今皇帝戊子明府君报政成

大冢宰署君考上上而后翁泊大孺人喜可知也曰审尔吾夫妇高枕亡虑矣天子既内嘉明府君政绩诏推其爵爵二尊人命下吴乡族姻娅庆于闾婺父老吏氓庆于邑咸啧啧严翁有子而明府君以大孝扬其亲于是一时同官吏方君辈币而诣不佞若翁年家子诘容无一言纪之夫梦皋翁用布衣起闾巷皇皇仁义如弗及岂其骛奇吊诡苟附托青云以要来世哉要以独行其意自愉快于心其惓惓课督明府君亦以先君遗命当尔卒明府君用经术奋推二尊人泽灌溉一方而翁泊太孺人烂焉沐恩纶袭冠帔声实际乎九重景曜烛乎当代非所谓无用而用挫名而名者耶所谓天之报施善人非耶方翁力行善致困穷八口仅千年百楹烬于火律以天人际宜不能无少动翁顾力行善自如其识量诚过絶寻常万万宜迄能待天之定而遥观明府君之硕大其后也虽然不佞言尚有进于是明府君方以循良最天下异日者柄枢衡筦喉舌将益推二尊人泽布海内而二尊人食报将益与明府君展布之泽相为无穷万锺之养九命之锡翁一切视之泮然无加损乃不佞固与诸君子执左券俟矣

贺叶母赵孺人七袞诗序

太孺人邑明府叶侯母也桃叶宜家柏舟当户清水矢志匪石为心训贤胤以一经卜芳邻于三徙精诚所格维帝若临福佑所鍾维侯克大花封驯洽云霞回百里之春叶县飞鳧雨露藉九重之赐维孟秋之朔日为设帨之嘉辰金风乍起于庭除玉宇初澄于院落四郊赤子讙呼禾稻之登场万室黎元快覩蓬莱之锡命紫凤衔书北极虹光挟婺彩以齐飞苍龙传诏东华奎画跨金垣而并耀地控兰阴之麓如阜斯登天悬灏水之流犹川甫至蟠桃洊熟祝王母者三千年寸草长春颂神君者八百载七言偕赋十韵俱成

登赵鸿胪溪云阁诗序

赵君文镇新居北浦别构西泠缥缈飞楼高插星河之上嵯峨杰阁俯临云汉之中左顾则兰阴横峙耸翠壁于千寻右瞻则灏水斜来濯清漪于万丈胡子元瑞登而乐之輒抒彩毫爰赋四韵落霞秋水匪云远附才情芳草晴川抑或同舒兴象云尔

大参知张公二难双美诗序

二难双美者大参知长洲张公乔梓昆玉也先是参知太孺人呻吟霜露淹歷岁年叔子明父氏匍匐庭闱周旋床第神祇上下无祷弗虔巫医近遠亡技弗奏痛蔑施于人力竟吁代于天曹真宰鉴观神明有赫太夫人既康宁宿障明父氏亦委顺初心俄参知繇明经奋巍第读书秘省都谏掖垣象服龙章褒崇备极而叔子精诚之行卓絶之踪遂益以艳耀三吴流闻四海时人咸谓季公之孝匪叔也莫为前而叔子之孝匪季也莫为后即陈氏二方蔑能尚已乃兹者大参知分辖之境实曩昔太封翁遊宦之乡去思未遐故老犹在沐保厘之新泽者咸追悵弟于风闻沦抚字之深仁者弥快旬宣于世及君子以张氏一门众善毕臻盖不惟佑启感通肇家声于莫二而显扬继述弘世业于无双于是邑诸生郑云鹏辈目击躬逢踊跃盛际搜罗篇什垂贲千秋以不佞应麟受知国士被化州民属赋短章俾同輿颂通家子弟谊弗容辞輒用秕糠前导金石云尔

松茂兰芳集序

今皇帝万历庚子清源蔡景明先生七秩加四矣悬弧之旦为仲夏朔三日而嗣君适以前三日举先生冢孙于是姻友之昵先生者咸共传谄绘松若兰为图而诗歌以侈大之不佞伏读卒業作而叹曰天道之报施善人抑何婉而彰曲而中也当江陵相之擅国炎炎之势上蒸乎朝署而下铄乎乡邦一时巧宦之士薪旦夕速化其门即社稷生灵彼且窃而中柄臣之欲而矧乎一名第之微也而癸酉之岁先生以棘事莅楚闾同官目案头卷亟称奇货不可失先生心知为权相子自念以名器纳交贵幸臣节之谓何卒摈之孙山外用此大拂当事心投劾罢而当是时他藩臬以衡文自媚者往往雄飞直上推而余膏剩馥溉子若孙而先生秩不过下大夫禄不过二千石悬车之日行道之人亡弗以志业未售为先生愤而宗嗣未立为先生忧先生夷然穆然无几微介颜色第掩关却扫时取故所藏法书名画三代尊彝彝鼎卣鬲之属摩娑抚翫之间用诗酒琴奕取适里中者十余载一日轻装小舸度钱塘历吴会访古秦淮石头东行越齐兖青冀鲁卫间穷竟诸方之胜者又十余载而后归归而嗣君候门则已昂昂汗血居然千里之驾先生为一掀髯笑盖至于悬弧之旦冢孙并诞于一朝而先生喜可知也世方以大材蚤售为先生惜先生顾得以葆真茹和卷其未试者还之造化以倍易乔松之遐算且得以望八之龄覩兰芬于奕世而以身所未竟属之而彼一时也市宠乞荣之徒不旋踵而褫夺澌尽并其子若孙之忝窃亦缘手化为子虚而先生方逍遥乎上皇以坐照其成亏而付之乎一映彼苍之捷于报施抑何其婉而彰曲而中之若是也昔陶元亮以折腰束带故去彭泽就孤松其劲干挺节诚磊砢相肖乃五男之咏弗能亡怅憾箕裘谢太傅欲芝兰玉树并生庭阶于时子姓羣从亦曰彬彬而文靖之年曾未及登乎太上是松也兰也两者并跻其盛固难而交遘其盛不尤难之难也先生颖迈天植十四即以异数燕宾兴距今政一甲子而冢孙适诞于初度彼其歧嶷夙成行步武先生之故躅而造物所为娱先生于晚暮者且绳绳乎日升而川盈兹集也特其嚆矢云耳輒为弁其端以俟之

少室山房集卷八十五

●钦定四库全书

少室山房集卷八十六

（明）胡应麟 撰

○序七首

艺葵园草序

万历癸未春余北上公交车时黎惟敬欧桢伯并在燕而张助父陈玉叔诸君以奏计至胡孟弢区用孺诸君以射策至余咸以旧好过从甚洽也而独大来未识面心窃窃倾乡焉一日大会于吴山人馆亡虑三十余曹轰饮夜分应门报大来至时同人以疲繻几散去什之九余独留晤大来覩其状颓然穆然汪汪然千顷波也已促膝共语则又泠泠然入于耳会于心间发一难析一疑若庖丁之解牛而老吏之折狱乃作而叹曰豪杰

士故有真哉彼中亡所有而色取于声音咲貌之间若河伯未离龙门曷与言海乎未几余两人各以下第去后十年余株卧一壑大来亦数困春官丁亥之秋叶明府子木来余邑首出大来札授余乃知明府大来嫗家而大来属余于明府也寻大来再入试都下则崑然掇上第以甲次出宰西昌矣湛卢大阿之锷精光久閤函石之中一旦拭华阴而试盘错将上干牛斗中裂犀驳下斲蛟龙奚往弗得而有于百里之邑也大来下车西昌甫期月政声四驰刑清讼简覩公署傍隙地芜秽輒葺而艺葵其中春夏之交华叶芬敷日手一编独坐吟讽长谣短章积成巨轴邑之士民争乞梓焉因自命草曰艺葵而属序不佞窃惟葵之为卉一也公仪拔而传记播于前大来艺而赋颂传于后岂所谓道不同不相为谋者哉公仪相也相师表百僚闾阎之计吾何暇亲焉故公仪之拔利民也拔而民获其劳也大来宰也宰父母百姓场圃之工吾何敢忽焉故大来之艺亦利民也艺而民享其逸也藉令大来居相职拔一葵而利天下詎曰弗为公仪子而宰一邑乎西昌之葵有加艺而亡加拔审矣第公仪以拔葵达相体而鲁削滋甚来贤者无益之讥身当战国中处曾孟立言之际其文词不少槩见岂其果有余于识不足于材乎乃大来之为西昌曾不阅岁仓廩实户口增教浹化沦百废具举且也案牒纷如文词烂发飞觚纵笔驰大厯而骤元封盖识固兼人才尤絶世洗洋淳汇畜极而流故能超然独往追百代而上之视晚近尺寸形骸奚翅千里故欲知大来之制作即大来之艺葵而居可绎也余孱且陋于大来亡能为役惟是三都之附窃艳于中輒缀数言篇首行且燔笔研以俟大来矣

盛母双节序

葵之东十里而遥有巨浸焉曰葛湖渟泓弥淼都一郡之胜堤上下旧族盛氏环居之其少而隽者世魁有客癖贤豪车辙踵户外而羣从世弘四昆季雅同志倡酬湖之名遂駸駸闻于越云世魁贵介翩翩世弘弟兄咸奋自农亩属者余泛舟湖上即其庐止焉飞甍若鳞危栋若翼回轩曲榭靡不有致以为厥先遗构也而丹堊涂赭烂然而若新诧问焉世弘颦蹙曰先君子甫壮弃诸孤不腆敝庐皆拮据二母氏手孤弟兄受成事而已繄岂惟敝庐即不肖孤龟勉成立以庶几先人堂构丝毫二母氏力也当是时嫡母曹下世已十载余钦其风素大书其册曰赋鹄丸熊越明年友人屠长卿系至复为文歴序二母贤而谬荐余言实之余窃愧未有当也未几祝母亦乘駟仙去于是世弘伯仲介门人祝华父持册诣余庐请曰当先君子卒弃藐诸孤二母氏称未亡持门户其别心蒿目有人子咋舌不忍言者赖天之灵不肖孤弟兄奉慈训获有今日乃祸延曹母溘亡犹冀祝母健匕箸酬乌鸟寸衷而竟无幸矣惟是锡大造于二母有文章巨公在屠先生业命之惟长者无靳片言二母氏死不朽余悲其意请輒援笔序长卿后曰节之称难于宇宙也詎弗彰彰哉塞两仪横六合亘万祀而垂千秋皆是物也故大块之赋材他无所独靳而独靳于节而儒者之藻镜人伦百行备而节少亏其余槩无足观已乃士君子涵贯古今学术融而操趣定临大节而不可夺者子輿氏犹子子焉而矧乎闈帷之习婉婉之姿矫焉而以节特闻此其难不尤倍蓰亡算也刘向氏列传所称蹈白刃而赴黄泉伟矣第或

深于情或激于义或颠连而诀或迫切而捐较诸抱影穷年荼苦九折而靡悔憾者其久暂犹径庭也且或骤见一乡或间见一国甚或仅见于一代盖节之难于宇宙而大块之弗轻畀可知已若乃一时并见而震耀一门者惟盛氏二母然矣始曹母室盛翁四旬未育母日夜怀宗祧忧一旦束装趣翁客金陵吴会间广觅宜子者翁入武林馆祝氏覩室女贤挈以归逾岁而骈举思达弟兄曹子之已出不啻祝母亦卑卑自牧嫡曹母而奉之俄翁抱微恙捐馆舍二母俛各殉以身顾两孤子未立也于是阃以外曹任之阃以内祝任之门户斩然衅侮不作人以盛翁弗亡矣已两孤子稍长立成童则罄资给延明师诲以义方课以艺业二子感淬奋励卒能以遐陬僻壤来海内诸贤豪而登坛匠哲如吾长卿者操如椽而侈述之母之行籍扬大廷登良史传百千万禩而未艾而奚以余言重轻惟节之难言希邁古昔乃今顾并耀一门岂婺女之墟元精孕毓磅礴蕴隆大块特纵之而靡靳耶噫此固余所为沾沾齿颊而诸盛弟兄之贤且藉是蝉连闻海内不仅止越焉已也若二母节而且才以茕茕未亡葺前人之绪而大貽厥后有巴妇清望而慝焉者则屠先生之言备矣

黄尧衢诗文序

古今人之材果弗相及乎哉古之世之称材者词章问学出于一而今之世之称材者词章问学出于二夫诗而枚曹也杜李也古之人有不必文兼也者乃其诗藻绘蕃葩故未尝废问学也自南渡严氏之说兴而诗自三唐外汰百家矣文而左马也扬韩也古之人有不必诗兼也者乃其文渊综富硕故未尝废问学也自北郡李氏之说兴而文自两汉外屏百代矣夫汰百家而一于唐以为诗似也顾百家汰而后世之诗卒无能登枚曹杜李之坛而夺其帜屏百代而一于汉以为文似也顾百代屏而后世之文卒亡能驰左马扬韩之垒而角其锋而徒俾词章问学判为两途而惴惴乎其弗相入是何古之立言者为术之工而今之立言其为计若是左也余不敏结发操觚輒秉斯谈以谄诸同志而二氏之指举世靡然即有喙三尺鸣将畴和盖自丙子之夏晤琅琊长公而入可知也乃今于闽而得黄子尧衢若而人者岂亦所谓旦暮遇之者耶尧衢故文献世家弱冠雕龙英英汗血当世所称贤豪匠哲靡不控橐鞬辍鞭弭逡巡退舍以避前茆而尧衢雅不以自足益虚怀励往追逐古初诗则褫枚曹祢杜李如洛阳少年汉滨游女风流格致婉约靡加望而知其诗唐也而诗匪足以竟尧衢也文则享左马配扬韩如幽燕老将河朔名流气韵襟灵逸宕自恣望而知其文汉也而文匪足以竟尧衢也乃至搜罗二酉紬绎五车大而天地日月之不废不坠遽而元会运世之无始无终显而皇王帝霸之衰盛废兴幽而神鬼僊释之推迁变互微而昆虫卉木之蠕动发生靡不总统其要归而是正其庞谬今勒成黄氏之言区分畛列亡虑百■〈弱，左半〉藉非其才轶人其识旷世竭乙夜而殫三余胡以萃体制之全穷淹贯之实之若是也盖尧衢所为诗若文法唐非不犹严氏而未始竞焉若严氏之于唐法汉非不犹李氏而未始局焉若李氏之于汉故诸所结撰驰百家骤百代即以追曩时名世巨公吾见其进而未止厥今所诣固已起弇州

之廊庑而直闯其堂皇矣以彼其才究竟业成而论定身后夫孰谓古之人果弗可及而今也词章问学之并擅者或是之亡也尧衢都盛年负盛气顾独以三都前导谬属于余亦越五载而余未有以应迩复悉索篋中浮双鱼东海上曰履康生不幸稟赋孱弱且方罹幽忧一旦卒然冒霜露君虽恨于臣将若之何噫余之发已种种矣经国大业不朽盛事皆尧衢所自有余何能为尧衢役尧衢勉矣格有所必程法有所必比辞有所必炼思有所必抽入之九渊而毋堕于魔放之八极而毋荡于幻举之千仞而毋激于峭按之万钧而毋滞于麤博而核之精而莹之俾异日为子云氏者后之视今亦犹今之视古也此余所谓古今人材未尝果不相及者也亦尧衢之所为属序与余序尧衢意

也观风录序（代）

昭代之文至于今而极盛矣而于越以东南大藩翹然冠羣省而出其上其文之发为时义以演绎圣真宣泄儒术者称极盛中之尤盛焉盖自大禹涂山之盟玉帛万国实开辟以来文明所繇肇歷汉唐宋氏艺士代兴至胜国而鹊起联翩侷割天下十之七以为明前导迨我高皇帝统一区■〈宀禹〉宋文宪刘文成旗鼓并建若王若方诸君子羽翼而先后之而经世大业遂咸萃于越之一方乃今时义之工特其余事顾二百年来三试而皆首列者仅越商文毅为然而他方不一覩即其故可推已余故尝艳称越中文物之盛客有盱衡而诘恒为之神动色飞兹猥以官守揽轡而东单车疾驰不阅月而抵御儿之境其山则天目秦望穹窿翠嶽盘郁而造天水则钱塘富春浩漾滉洋瀕洞而浮地其外环以渤澥峙以赭龕洪涛巨汐之震荡激春为观之卓诡有独擅于六合之内者固宜鍾为颖秀缬为英华光藻舄奕与三吴分道互驰即诸方之矫矫者亡论也余既以职事巡行兹土复自幸得以巡行余隙纵观越诸士之文每奉玺书临郡邑彰瘴激扬之暇輒檄所部青衿程其艺业而殿最之而间录其文之一二尤雅者大都以谭道则肆而昌以析理则缜而邃以杂物则该而洽以叙述则贍而典以论辩则核而衷彬彬哉质有其文即未必家连城人歷块要以策贤良应举选居然有游刃而亡乏材则是编也其鼎中之一裔矣虽然吾尚有谗于越诸士文词之极盛莫逾于今日而文体之变衰亦莫有甚于今日者始也程朱之不足则抗之而左史以为高既也左史之不足则放之而庄列以为奇终也庄列之不足则遁之而贝经竺典惝恍窈冥昏惑不可知之域兹三者非必越一方为然而越诸士故其嚆矢顷大宗伯数上言至布章程申令甲而弊也迄于今而未已彼其思愈深工愈笃词愈修而圣贤之旨趣愈益乖经传之面目愈益远究且为牛鬼为蛇神司世道者有隱忧焉尔越故亟称天下巨藩将以首善率先诸省会若之何任其溺而莫之返也余兹一与诸士约宁以平毋宁以诘宁以朴毋宁以纖宁以显毋宁以幽宁以实毋宁以幻诸所结撰务约诸先民之轨凡迩来占■〈亻毕〉流弊汛扫而一空之异日者繇时义进之古文词又进之而功而德繇文毅上之而文宪文成又上之而伊傅而姬孔庶几尔今日之肄习为亡忝而余他日所厚望为弗孤哉于是越诸士亟以为然而乞余次第书之以冠诸篇首

忠清里林氏族谱序

钱塘之有林氏也其先世盖徙自大梁云徙当宋渡南时谱系绵邈弗可考胜国初提领公首以仕闻提领生士民士民生居义居义三子仲曰荣入皇朝以孙章贵赠通议大夫太常寺卿荣子三才文森才隱德弗耀文永乐庚子举于乡歷柱下史森亦以子贵赠官如父荣才子秀性至孝博通三教书爰自吴山大井巷徙今里中森子章幼敏工八法景泰中有司以神童荐歷官太常寺卿从一品貤封三世子二长应祥以荫官太仆主簿次应禧亦用有司荐入中书为人强直自遂武宗朝不肯阿逆瑾挂冠去瑾败复召歷官尚宝卿顺天府丞父子皆饬好修相继馆簪组登九列立朝余七十年负郭庐亡寸溢州里伟其为人至方诸胡威子父秀子二曰峦曰冈冈生宠及奇奇生梓梓进士起家至云南按察副使冈负气任侠业贾宾客倾四方以同事中伤坳縲继识者悼其非辜扼腕天道当有后俄五子舜爰受孚爵咸克世其业以高贲雄里中旣而受嗣絕从子逊嗣爰子念絕继功嗣受孙孟春絕之蕃嗣世代数更子姓岌岌如线林氏此时号中衰而舜子思思子文明始皆用儒术自奋恩年十一孤弱冠入太学负场屋声弗售賚志歿文明十二亦孤再试太学不利絕意进取屏居一室以经籍自娱读史博综古今成败得失利害至端木计然诸传喟然曰大丈夫当身名俱泰岩处长贫贱诚足羞史迁因是至欲后之人讳谈仁义则惑滋甚也陶朱氏三致千金而散之吾师法盖不远始大肆其力于治生身与童仆尝甘苦视百货缓急而时操其奇贏旣饶智虑多亿中亦会数有天幸不拙乏岁入滋稔益规恢其已成之绪不数十年而武林田园庐舍腴上者相率归太学家一时里中素封靡敢差甲乙乃其好施予利泽人尤天性比閭族党空乏以情告人人厌其意去数捐己贲佐大兴当宁重嘉其谊为棹楔树閭閻太学子曰之盛之芬之芳之盛少卓萃不凡虽寢处膏粱而下帷焚膏与寒素士竞占■〈亻毕〉声藉甚冠诸生丙子与余同计偕再上公交车报罢慨然蹶屣登岱宗拜阙里周歷大河淮泗已浮扁舟入石头吊古秦淮北固间归而学殖弥遽诸侪辈争俛下之方淬励盛年攄夙抱以建树当世而会太学嬰疾亡母安人张偕逝之盛执二丧伤功名未逮怙恃相继溘焉卽异时万一适逢而终天之恨殆不可复于是乘幽忧余隙捃摭先世积累之自为林氏家乘传之诸子若孙谓不佞年家子宜有序序简端輒因之盛所自述而稍次第之以俟后之紬金匱石室者且以征林之所繇硕大繁昌非一朝一夕故云

石羊生曰余读司马氏书至货殖诸列传未尝不窃陋迂之无识也彼所沾沾卓王孙程郑乌倮辈皆贾人之雄耳身旣薄仁义弗为其先世靡有功德之素子若孙又斩然蔑闻卽倾国都亘阡陌君子唾去弗暇而侈诸载籍其奚以称焉余观林自崇善公迄太学父子积操彙行蓋世世然矣致奕叶擅富饶以义声奔走一郡非侥幸至也孝廉齿力富强且益扩太学公所未究以润泽当代诸仲缤纷蔚起多材能林之称甲族于■〈宀禹〉内将駸駸与陇西太原诸族伯仲竞爽而有弗可一方限者余不佞计日望之矣

祝生草序

诗能穷人甚矣东阳李生能茂以振世之姿遑遑占■〈亻毕〉顾不能博一第与白面经生伍又不能存如线之脉以慰若敖氏之幽魂而赍志之年曾未逮乎四十乃暴戾恣睢之夫黄耆遐龄至生平一善亡称者孙枝绕膝日升川盈而未已岂其人诚贤于颜渊冉牛而才于王勃李贺哉余固日问诸天而未得其解矣吾郡刘骆两君子首揭文学两君子以穷着前代后有作者固宜穷李生则余交臂而失之者今祝生树勋之穷殆又甚焉祝生家亡担石仅一妇供饘粥复终岁病床蓐间而其激昂迈往之气虽鹑衣百结而不少衰每举觞白眼旁睨一世亡足少当其意独时时过余玄亭扬挖风雅其英识宏辨若悬河放海而无所底止间出其诗歌读之輒殷殷留金石声余每顾其人奇之而耳目其穷又未尝不为之三叹也嗟嗟古今所艳称世禄世家大者十余传其极三数百载耳矣骤而执途之簪绅之子而叩其祖翁即贤且好学蔑能对其行履之悉他懵然莫知字与名者比比而文人骚客特以片词只语永天壤同敝之令名欲彼苍之中泰然靡争而不困阨其躬而齟齬其后得乎生既落落于时而好为诗歌弥甚锄屋旁隙地为园园中空无所有第种竹数千竿汪司马为题曰潇湘坐而余亦屡赠以诗生日俛仰葱蒨间或竟午突靡炊烟意恒蘧蘧然适也一日持其草若干篇乞余涂抹评定之且曰幸胡先生同世惟赐之一言即■〈车臬〉軌终身亡憾噫若不佞者■〈山钦〉崎歷落举世之所讪笑而生乃沾沾蕲得余言得亡愈益其穷乎哉昌黎氏为文送穷卒烧车与舩延之上坐而令名迄今不磨藉第令生身弗穷才弗丰穷弗甚诗弗工穷日益甚诗且日益工而名且日益遠穷于生亦何负也生齿方盛强异日者子虚达于承明天子欣然召见殿上未可知余独悲李生之卒穷以物也因其请序漫及之

唐长公诗集序

古今称文献则首三吴矣而吴之才至国朝而犹盛国朝诗凡四变而吴凡四踞上游初则太史导其源盛则迪功探其委中则皇甫扬其澜迨弇州而地负海涵古今之诗几于尽废一时吴会彬彬迹弇州伯仲而起者亡虑十数皆不佞愿为执鞭者也然而全盛之极芽蘖潜萌外道出于菰芦而与二乘角伎心侈于调达幻术大于登伽其尖纖浮艳扬袂市门之态亡论壮夫忸怩即唐余元末诸人有啜嚅喉吻者而扬眚瞬目意且笼一世而趋之嘻毋亦已甚乎哉往余游歷吴閩每与周公瑕氏纵谈斯道未尝不叹太音之寥落而末法之凌迟也乃今而得云间长公诗余读之至为之三击节云长公髫髻即銳意千秋大业弱冠屈首青衿汛扫博士陈言而一缘饰以西京战国同事诸人咸谓夫夫也衣狐貉而当暑长公置若弗闻也者俄而声实崇隆沸起黉校蓋身未离逢掖而誉藉寰中矣卒之上公交车掇巍第因以大肆其力于文章释褐莅官出宰百里鸣琴之暇篇什輒形其才无所弗悬解而学无所弗究极古风乐府镕裁于汉庀材于魏而旁茹晋宋诸名家近体歌行范格于杜擘调于唐而近遡弘嘉诸前辈气之雄而厚也幽燕老将之行兵也骨之沈而深也河朔酒人之任侠也体之大而庄閎而栗也入清庙览明堂而百辟裳衣雍雍而济济也声之鬯而和色之丰而丽也秦青之振袂而玉环靚妆也思之

颖而发韵之逸而玄也供奉之沈酣而步兵长啸也时乎而朗月繁星时乎而凄风急雨时乎而高江巨涛时乎而迭嶂危峰读之使人神动天怡心惊魄轶而一轨之正始之门大方之家藉匪其姿绝人其识旷世则方彼郑声合奏之时豪杰隳流且将倾听忘倦胡以澡濯潢污皤然氛翳而力障狂澜于既倒哉曩者琅琊次公尝谓不佞少游中原力追大雅而不为柔曼儿女子之习不佞恒愧斯言乃今当之长公允无惭色矣余与长公素昧平生第目击江河而不能无扼腕于世道辄因三都脱藁而僭序其端如此盖声气传合随叩辄鸣即小挺巨钟靡当鲁卫亡暇辞逊也长公文奇伟瑰迈直闯东西二京尤足以砭尖纒浮艳之聳瞶丰碑巨碣业已盛行当世余不复具论论其诗

少室山房集卷八十六

●钦定四库全书

少室山房集卷八十七

（明）胡应麟 撰

○传三首

中丞滕先生传

中丞滕先生者名伯轮字载道闽之建安人也六世祖礼部郎中员殉难土木祀学宫员生弘恩弘恩生彝彝生海州别驾澍是为先生王父澍生赠礼部主事鹤龄即先生父也娶封安人陈氏以嘉靖丙戌冬季诞先生先一夕陈太安人梦日轮浮海起幔亭亭如车盖一金紫伟丈夫拱立睨其傍厥明先生诞维肖赠公悦爰命以今名先生警颖殊绝髫髻受经日常数行下弱冠补邑弟子员时赠公已前贡乡书凡五与计偕始谒选得南安倅莅任歿于官先生匍匐奔赴号恸感路人赠公吏洁廉先生扶柩归家壁立瓶粟弗继先生恒晏如益发愤下帷潜心神圣大业自洙泗洛闽下逮新会新建诸家言无所不洞极而期于弥纶康济沛泽黔黎当是时先生身未离黉序已隐然负天下望矣会大司空万安朱公来督学朱公伦鉴高一代得先生制义大奇之曰是将为异日儒宗亟拔多士右乙卯秋试果抡魁壬戌第进士以甲次出宰番禺适潢池弄兵势张甚先生横身排决筑外城以捍寇缩浮费三万余缙盗野无所资羣就缚于是两台使交疏褒荐以上考迁秩礼部郎番禺故南海剧地明珠文犀充斥先生束装度岭行橐仅梅花数枝宰司廉知状趣超改先生文选先生持公壁立苞苴肃清久之政府权贵人多不悦者乘先生移疾归即家拜贵州按察副使先生奋然曰昔尼父欲居九夷矧今贵竹匪唐汉三苗夜郎彼耽耽奚能难我立就道俄今皇帝御极榱栋一新冀得耆宿鸿儒挽文风以回世道金谓微先生莫可遂仍故秩督学校浙东西浙人才炳烺霸天下顷年奇袞溢溢有识隐忧先生下车申约束树章程叛道离经虽才必黜自余纒长曲善藻镜靡遗是秋乡贡士毕出先生门亡一阑入者明年大合浙东西不及贡髦士三百有奇捐俸入饷之会城而躬谒台使者萧公万公示以天人性命之奥时时课其艺业殿最之间拔文之尤雅者为录若陆太史可教鍾太常化民朱省元用光蔡茂才大节悉矫矫著称场屋后先驰骤

宦籍亡虑百余曹谈者以先生振励陶镕师模冠絶明兴二百年所未覩也先生声动大廷旦夕翱翔九卿列属台使某欲贾人子补诸生檄先生按令甲先生申报幸门久塞不宜启某恚揭蜚语中先生仅叙迂浙藩右参政先生虽职司会计而浙诸髦士竞从之如云先生提携海谕视督学时无少倦谤俄白擢岭南按察使番禺老稚襁负拜瞻壅阨道路先生至则以政暇登罗浮絶颠观日出方丈扶桑探勾漏良常朱明所在穷其胜纪以诗歌罗旁凯旋先生赞画机宜功第一幕府奏闻优诏锡金帛迁右布政浙中故事右辖第雍容闲局先生励精任职蚤夜弗遑镇巡见以为越俎庚辰入计言官遂希旨齟齬先生先生慷慨投牒归■〈木走〉关谢絶一切例予告卿士大夫有司岁月给輿阜先生愿言麾去幅巾杖履徜徉七台九曲间里中归宗岩林莽翳郁先生庐其下默照静观飘飘有尘芥六合想守相达官屏干旄踵户闕先生为弗闻也者亡论嫫媿乞援即亲子弟郡邑试未尝寸牍入公门乡邻为不善闻先生风素相率化人以司马端明在洛不啻也先生屏居岩穴仅六载七闽以南童孺走卒亡弗寤寐先生而冀其大用监司推轂章十数上先生卧益坚既而朝命敦迫其使者冠盖属道途先生强起补粤中右布政河工讫超南都察院右僉都御史阅江防先生殫心擘画条便宜八事上之上嘉纳趣命以右副都御史填浙中先生之吏浙凡三政教而且富氓庶併冒若二天兹复秉钺一方山川草木色飞相庆先生亦惓惓过化视官维家严冬〈风贝〉风起濒海堤堰冲决极望无人烟先生多方赈恤民倚赖全活无算诸恶少白昼剽善良法其尤不逞者而反复示羣党予以维新悉解散浙自辛壬间载被兵居人岌岌先生轩輶莅止万众帖然黄门章君尚学特疏方诸古社稷重臣人谓无愧色上方且大用先生而先生胎稚苦痰疾岁壮渐增比填浙复当多故日夜拊循其民人以事烦食少屡陈疏乞骸骨上温旨勉留有谋猷宏博志虑忠纯等谕先生弥感励薪尽瘁答主恩因犯颜力疏改折漕纲停减织造等六事上一一报可已丑春先生督材官防汛海上渡钱塘疾大作忽夜侦岛夷盛集余皇犯内地先生投袂起部勒诸将奋击大破之馘首虏数百计余丑魄夺絶流遁而先生神虑耗竭疾深入腠理不可为矣凯旋省僚属迓于郊覩先生颜色异常日先生犹畴咨民事刺刺不休时暮春望后十日也越五日集诸藩臬诸司拱手逝词组不及私事闻上嗟悼赠先生兵部右侍郎无何科臣以海洋功上特旨赐祭及葬既抚臣复以海塘功上事下大司空曾公同亨曾公具疏先生勋伐勤劳宜加恤朝廷是其议予一子入成均制三品未滿考无乞恩请荫例即祭葬仅半给惟先生全得之异数也先生修七尺有余而躯干魁岸长髯拂膺望而知为巨公长者自卯岁研精太上嘉隆儒硕罗公汝芳陆公光祖许公孚遠孙公应鳌泊家大人辈盛推轂先生为任道之器其在北观工部政则丰城雷公礼主吏部事则蒲坂杨公博并以累朝勋旧折辈行谏时务于先生至开府留都海忠介公瑞尤称莫逆人以两公刚方毅重其意气实相契云先生故以立德立功为上节而兼收互畜时逮词章大司寇弇州王公左司马新都汪公文名震曜庆厯间先生恒乐道其长未尝蓋之以学业即不佞应麟雕虫末技无足厕先生下走先生一见遽宾之上座授以

前茆既而忘分忘形所为卵翼抚摩不遗余力盖应麟之辱知先生埒于生成怙恃古所称国士无双风斯为下矣维是应麟忝窃门墙余三十载而碌碌尘埃靡尺寸仰酬大造敬掎摭先生行履之槩俟异日传名臣者万一考焉

林茂才传

林茂才者名巽字健伯钱塘忠清里人也父曰林仲公受母刘先仲公卒继潘孺人仲公繇积着起家镪万计中年未有嗣夫妇以为忧吉月輒祷祠高禱嘉靖庚戌秋仲公梦神人介而金胄坐堂皇呼曰而知而之季妇娠且俛育乎所育非季子而子也仲公寤持潘臂流涕果尔者吾其邓攸氏矣潘力赞神言听之吉因趣仲公往视则季公妇已前卧卒闻叩户声心动遂以厥明生茂才茂才生有奇表仲公耳其啼曰英物也林氏宗非是莫亢立取金钱绣襦数事授季公畴昔之夜神人者业以而子命余矣季唯仲氏欲之即微神人敢辞命明年仲公寝疾且亟遍召宗人申前诺见茂才于先庙而命之名罄籍所藏镪二万七千属季公牛羊仓廩室庐称是期他日嗣子壮则按籍以归又为教贻茂才属以母潘洎媵人爱女甚悉季公奉茂才拜受教棊而藏之仲公目遂瞑茂才幼警颖异凡儿五龄授章句塾中占对多奇捷九龄习经书义篝灯丙夜大寒暑风雪以为常二十补邑诸生试高等寻受饩学宫凡后先黉序十余年校艺自监司下迨广文亡不褻然冠同列然至大期率不利茂才喟然曰以吾下帷之勤即三事可翘足待而遭蹶一第乃尔天乎詎可以人力争也因稍稍罢占■〈巳毕〉以菽水娱二亲先是季公缘茂才受仲产徒手一朝赍橐巨万数中不能无侈心既子女弥益众嫁娶繁殷方士羽流竞从所好为奸利駸駸漏初籍过半会归橐且及期季公熟计无所出则呼茂才谓曰余年迈而往矣尔方壮任产顾而父遗籍在罄兄弟贖弗能偿奈何茂才泣数行下曰大人休矣儿一身毛发皆禀之大人金于奚有大人第以轻贖畀儿往母即推遗籍儿以不肖身任之季公大悦悉索余镪五千缗畀茂才归母潘得茂才果欢甚既而亟讯故父遗安在茂才谢有之己长跪前说曰先大人之以厚贖遗儿也亡他上而蒸尝下而甘毳世世毋失坠也儿诚不肖仰藉先大人宠灵厕姓名多士末行博一命用冠帔荣二亲蒸尝甘毳固余事矧金帛倘来物庸暇较多寡有无母潘异其言而未能骤信欲试以诸艰因屏居一室诸仲公所存器物锱铢加扃钥而独以门户委茂才茂才谓室人沈曰吾母之为是也阨我耶尝我耶玉而成我耶吾闻之龙泉太阿非盘错固无以自见即踊跃前受事凡经费委输徭役倚办宗戚问馈亡弗若然中肯窳人以仲公且不亡而仰事母潘于子职尤兢兢及仲公所遗诸眷属多方体恤无使有纖芥后言盖母潘久之遂忘茂才之非己出曩季公所干没置之恬然矣茂才虽以身后仲公而爱慕所生怙恃不少替弱冠母沈病痼茂才晨夕亲汤药娶妇仅再宿即率之左右病姑歿痛服缘礼降为心丧三载季公晚而瘵寄息帷床茂才扶饮膳掖寝溲委身巫祝亡虚日病革哀毁逾笃至竟以一恸弗能兴未属纊前一日犹自力拜母潘曰儿不孝事吾母弗获始终惟吾母一委之天命遗令室人沈以婉孌承姑欢子际春以端慤成父志遂卒得年仅三十八云茂才内行固甚修其

外与人交尤慷慨尚义侠始饩学宫念受业师某贫推廩食之终身不奉一饷入他姻族多赖以举火婚者周以财居者授以室葬者给以地应接不暇中闺簪珥脱继之其卒也里中亡问识不识咸咨嗟扼腕或号恸至失声当茂才齿盛气盈视青紫不翅橐中物既屡试弗效恒邑邑寡娱中陈力母潘属季公橐垂之候拮据匍匐艰阻备尝幸家庭亡间谪而会所生怙恃相继湮迄捐驱以成孝虽天年蚤终志业郁而未畅于为人后之谊两无负矣世锐言古今人弗相及以茂才躬所蹈槩之传记所艳称庸多让也茂才娶妇沈先后事二姑具阍德子际春儒朗嗜学以儒术世其家胡先生曰当健伯周旋二尊间戛戛乎难哉潘母躬抱抚无异属毛季公托孤矣令按籍索遗赀当潘母心谓窘季公何即不难倾橐奉所生而潘也坚持成命季公其奚词解焉阳委顺以适潘而阴输恫以遂季遗赀旁落庭亡谴诃卒之令潘也忘其赢而季也忘其拙媿哉孝思之格彼神人之预启仲公弗虚也至捐廩廩师然诺缓急此其人诂晚近世偃有哉身虽困闾门弗彰所为貽谷后昆者绳绳乎未艾矣

贞慧唐母传

贞慧唐母者祝氏邑太平里人也世为望族王父比部公以制科显父光禄君修頽然长者而特善居积起家巨万称素封母生而令淑端颖异凡孩始笄字唐太学廷倬即宫保文襄公诸孙而宫谕思济先生冢嗣也为人豁达无城府町畦母年十八嫔于唐筐篚资送千计太学一不问悉阍以内政授之族中率易母年少骤而当盘错非任母受事综理擘画咸井井中规晨昏服劳大者姑嫜侪者妯娌微者娣侄亡弗厌其意人人以宫谕公有贤冢妇云而太学亦用是佳公子称藉藉太学虽生长膏粱然恬于世味独雅好与欢伯游而量故洪甚既得母亡复内顾念益发舒高会平原河朔间一饮濡首旬月母大以为忧恒多方譬谏至涕泣下沾襟太学心善之而未能用竟坐是得沈痼疾母躬视汤药掖寝兴衣带不解百昼夜卒不起母号恸吁天俛以身殉地下顾遗孩宗本呱呱弥月也翻然曰是藐焉者唐氏宗百代攸系吾奈何轻一死因稍稍进饘粥为抚育后人计杜门蓬垢絶膏沐称未亡一切人间世纷华靡丽屏去耳目寒灯夜霜形影相抱起居寤寐惟唐氏一线是图唐自文襄登八座宫谕大魁禁庭闕阅高华冠■〈宀禹〉县已太学早世未几宫谕继之未几两姑又继之胤嗣单危僮奴背叛园田室庐芜秽弗治姻党比邻之豪黠者往往持两端观望成败当是时即健男子未易支乃母以葢葢一簪含辛茹荼介以褫躬强以励志勤以率下俭以治生爬搔拮据四十余载若史迁所记丹穴妇清自卫以财人莫敢犯间推其余润以沾溉困穷俾太宰太常之绪已债复兴垂斩复续秋毫皆母力也今母行年六十而宗本服膺慈训踵躅前修祖父家声浸假光大且育丈夫子二人矣于是邑黉士李生惟聪等羣上事督学使者曰窃见故太学生唐廷倬妻祝氏逾笄而嫁阅岁而孀弱息露珠高堂风烛而祝栢舟自誓之死靡他共子职于妇仪抗师模于姆教迨今年逾五纪行矢一贞里闾观刑乡邦慕颂愿亟加崇獎以励风猷使者下其事郡邑人无间言因棹楔闾左且具列始终将以次上闻当宁乃是月七日适届母

悬帨之辰宗本率其妇子戏彩称觞罗拜膝下母含饴弄孙意蘧蘧适也已潸然大息曰乡者而父之歿吾业已蓬垢称未亡所不从游地下徒以而未立故赖天之灵而既室既后而父逝不复返吾胡以独乐为宗本默默不自得则介绍郭生来谒九顿首请曰不肖孤匪母亡以有今日繄岂惟不肖孤先太宰太常之脉胥赖母以延以母含辛茹荼劳苦百倍本也卒亡能报称万一惟是微惠大君子片言庶几当华袞之锡先生幸卒宠施之余时方逃谢笔研乃余庐去母居仅仅数十武母生平行谊皆余所夙习见闻且也家大人国士文襄而余及宫谕门忝忘年小友之目于太学固奕叶通家也以母之大节凜然不欺其意即微宗本力请之且揭其高节以风示海内矧郭生之代请尤力也余安能以笔研辞作贞慧唐母传

少室山房集卷八十七

●钦定四库全书

少室山房集卷八十八

（明）胡应麟 撰

○传二首

长安酒人

传长安酒人者吾里祝鸣皋也父璋躯干絶伟修八尺有余而好勇负气比邻王谢子酗酒狎璋广座中璋跃起奋拳拳其齿几折坐客大惊已睡毗一市魁袖铁椎狙伺得诸巷叱令匍匐呼乃公偃蹇者立椎杀之魁不意皇駮乞命抱头去自是璋勇气闻一乡乡远近相戒莫敢犯其父及弟兄虑仇家报复为患害且连坐有司号泣禁沮之璋意不自得脱身走长安更折节为谨厚以鼓琴游公卿公卿善璋者为授室纳燕媛逾年而娠鸣皋先一日母梦大鸟缟衣玄裳耸翻而唳于九霄卜史占之曰吉是惟男子之祥当以文彩知名于当世乃其性乐云汉恶虞罗终亦非世途所继鬻矣占既而鸣皋生鸣皋生慧甚日晶晶数行俱下总角占对数有奇稍长读三唐两都七国诸汉魏诗家言心勃勃慕效之父璋抑而徇时艺始治易春秋补京兆弟子员试高等以连最饩学宫非其好也而慕效古文辞愈益甚时发其意于篇章一撰出一咏成传録长安城殆遍诸木天贵人争愿事鸣皋而鸣皋雅自负下视一世又■〈足斤〉■〈足也〉蔑礼法弗耐籛籛贵人前而诸贵人之愿事鸣皋徒阳浮慕冀为代言地而已实亡能推毂祝生者鸣皋覩其微凡高盖大冠呵殿持刺来輒谢病弗迓即迓无所报里中儿或白眼视之以是暴得简倨声而独好饮酒其天性一举白淋漓数斗弗醒终用此困始父璋垂橐留长安一蒯■〈糸侯〉外悉倚办五陵豪家其歿也豪家子羣起赙殡之鸣皋藉是得遍游豪家子长安俗豪家少年子相率危帽绣衫挟金丸骋名马击球擘阮蒲博联翩狭斜为声容太上攻奕道书画辟园墅春明旁以意气结要聚族效河朔平原饮鸣皋故洪饮出羣少年上又辨口滑稽弗穷至则尽倾四座众群少年大驩谓饮非祝先生弗乐竟推为祭酒鸣皋顾世方落落而群少年所尚得我心慨然有东方氏玩世想因遂浮湛曲蘖中为簿书

期会以次发夙日告治具届期宾至毋得后月宵花晨螯吸鲸吞散发披襟左手持蟹螯右执如意击唾壶呜呜诵杜陵赠李谪仙痛饮狂歌空度日之句时而大呼时而恸哭群少年拊掌窃笑政以酒态当尔尔趣御者亟进觞巨测其寄寓指也醉甚则以头抢地竹林诸狂夫安在哉夜台沽酒客无祝生尔胡以豪也一日过羣少年饮所观案头庆卿传亟取读终篇攘袂曰惜哉荆高二庸竖操剑筑靡秋毫嬴氏子遇我者齏粉矣其喜为大言类如此非狎习而骤睹靡弗惊而鸣皋意自若益发舒问其姓名睨而弗答迫之则漫应长安酒人乎其后谒刺达官长者亦自署长安酒人某歛何生以篆刻受知今皇帝特为鸣皋镌印章佩之一时名公卿李惟寅沈纯父辈挟日与沈饮繇是酒人名噪长安而是时石羊生业已从按察公至与鸣皋遇华阳碣石间惴惴然莫相知已问知为酒人则跃然已就酒人语则洒然已遂把臂为剧谭已遂促膝为剧饮迄三昼夜弗忍舍去咸自恨相值晚也间以其私臆语生举世汶汶莫知余乃今于里中获元瑞天乎吾其真酒人乎哉自是稍谢去羣少年而从石羊生游减异时酒中故态什六七鸣皋为人嗜古文辞放荡不羁矜意气重然诺厌薄俗子浮荣皆与石羊生合尤偏嗜读书三坟五典八索九丘下迨百家亡弗窥家故贫鬻文所得钱罄持授书贾妻子冻饿啼号为弗闻也者而四壁琳琅缣素炫心目石羊生固有书癖两人缘此弥交亲昕夕过从扬挖古始大而宇宙细而昆虫明而圣王幽而老佛河悬灏翻电掣云蒸机锋所谐麈尾尽秃语小极呼茗饮浇之长安曲米春继进饮已复谭谭已复饮至雌黄艺苑月旦人羣有好必投有恶必斥两人恒自詫形骸为二肝胆维一也盖鸣皋短而肥石羊生颀而瘦云善谑者或举沈昭略王微事为絶倒隆庆戊辰春两人徒步入西山置瓢笠废禅房周览金银宫阙四百所长湖巨岑裊地浴天没日更决策裹粮穷极人迹弗到处所至横尽笔端弥月归倡和篇章盈篋好事家多剗以行鸣皋既自放酒中又修古与时尚悖博士少俊者据高座嚙啗临之鸣皋天愤懣柰何以鸡肋檻而翁裂衣冠飏然去其籍羣豪家子覩鸣皋数蹭蹬场屋今且并博士籍去之中厌而狎相侮了无曩时罄折风而石羊生以按察公外除复将返溪上鸣皋愈不乐处京师会所善邢直指为买田济濶遂先发妻子赴之而身留长安酒楼与石羊生十日饮饮已为别泣数行下曰平生不解作儿女悲今别知己诚不知涕何从也又曰足下方以盛年勉荷不朽大业余不幸自放曲蘖中今已矣长为农夫以没世矣千百世后齐东野人之语或有称述者吾其识之鸣皋别余之齐东居五载以岁俭入长安询所知适故人邢直指来报命会晤甚欢牛饮过丙夜甫就榻痰涎泥膈间欲路弗得时吃吃有声童子以鸣皋醉梦呓语耳迨明直指就呼之死矣直指为经纪其丧卒返之齐东直指名侗字子愿故齐东产也始鸣皋居长安以酒人自呼既去之而复入一以是终竟符其讖

野史氏曰伤哉鸣皋之困于酒也昔唐李杜两布衣偕死于客而偕厄于酒鸣皋亦尔尔岂其苗裔耶古之湛于酒者文士弗经见竹林而下浸有闻彼肩瑰负奇而所如弗合或顾人间世一无足事事始假以遗外俗焚诚不得已而托之酒第其狂易自恣若晋

刘阮氏之属尝疑史泰甚其辞乃今以余所覩记鸣皋否耶然耶鸣皋以酒人自命而竟死于酒至今愚夫佞父姍笑之里中儿维甚嗟嗟彼未覩刘阮氏耳千百世后颂颂酒咏咏怀者能复以酒人名之耶且非酒人而能若是耶虽然里中儿则奈何使之解也

赵先生传

大庭而降风会茆然靡矣士尚论咸以古今人弗相及然而孟轲氏称豪杰輒曰虽无文王犹兴何也得非苞灵孕和哀然挺出者代有其人耶余束发走四方恒思一当孟氏所称而未获顾得之里中赵先生砥行褫躬里中五尺童能抵掌道乃四方或未习闻也作东华赵先生传东华赵先生者名佑卿字汝申东华其别号也厥先宋清献公扈居三衢元末少府君挈家徙灏上十一传而为赵先生父处士公以独行着母童夫人感异梦娠赵先生先生幼有至性常跣趺危坐识者诧非凡儿弱冠补邑弟子员歷试高等岁丙午举于乡是时赵先生于书槩已无弗窥尝读左丘明三不朽语慷慨击节曰士生天地间驹过隙耳不及时蚤努力树大业三公五等朝菌奚殊耶始发愤下帷潜心太上自洙泗洛闽以及荀况董仲舒扬雄韩愈昭代薛吴王诸家言咸洞晰旨归而发扬其所未及作悟思等録前后万余言间以暇日讲竟皇帝王霸之略度方今天下可施行者竟有所触发为诗若文根极性情置汉唐名流靡媿色矣赵先生业既日益进名亦日益高顾每试春官輒不利居恒自叹一第足以当不朽即十上吾甘焉不尔者吾从吾好可也乙丑谒选得高安教授倡明师道为黉校先隆冬沍寒大雪压庐集诸生谈艺其中矻矻丙夜俄就黔中衡文聘取士得人为多学使群江右秀彦于会城念教事非赵先生莫任者赵先生则奉檄往晨起据经坐上坐青衿环侍千余人质疑发覆人人自以意得去铨曹雅知赵先生儒者负经济材毋令久间局擢知县事建平建平故水乡也圩田岁久污坏什七八民顾赋靡所出相率流殍他州赵先生至至捐俸募役夫板筑并请仓粟助其成圩迄亡害逃亡归倭寇四起当道令悉城属邑无城者而建平次当城赵先生曰大役也若疲邑何顾城不可已则多方斥浮滥抑送迎得奇羨若干先城邑四门余楼櫓堑堞以时就民大悦争勒石颂成功当道几用上考荐而州以议马直积与县不相能赵先生复争诸刺史前甚力刺史恚拑摭浮言中之印马使竟用此调任之保康民雨泣遮道挽留请得抱牒诉阙下赵先生挥手谢曰良苦诸父老第此王命也单车疾驰不挟日抵保康邑踞郟万山中奸民目无长吏白昼杀令尸堂上称最岩赵先生下车则大召四境氓谕以祸福而剪艾其一二败羣者以渐饬壕隍繕器具稽什伍挖逋逃而开诚布公弘以更始之路巨猾惴惴告自新无何兰谷公讞至赵先生徒跣奔归治丧事骨立苦块间阖邑咨嗟其孝服阙补龙溪邑屢中倭疮痍之家十室而九抚摩其疾苦而噢咻之岁暮念穷民无告呼入出已鏹置坐隅寒者衣饥者食病者疗不资公帑寸钱民德赵先生若怙恃以入覲便过省太夫人冀偕往太夫人苦瘴雾惮行赵先生泣曰母不行而吾行温生絶裾哉亟移文乞终老当道报可俄太夫人遽危疾夜叩天割股肉以进疾良已太夫人竟享遐寿不及耄者三服阙再入都补乳源令擢别驾雷州地密迩珠池亡赖子衿衣重铠

出没海岛以盗珠为业吏追捕往往杀伤相当赵先生察知不胜愤甫入境日夜励士众以待贼叶宗权等余皇数百趋博里我兵奋勇击之馘斩卤获百数余党骇散入诸洋同事叩赵先生计安出赵先生曰贼尚众未易一举殲迟之除夜彼揣兵莫至方乐饮吾出不意纵火焚可使无遗类议克合而督府驰檄抚之赵先生以单骑入贼垒至则诸营各罗拜请命惟贼首十数怀狐疑因具以状闻督府命便宜从事赵先生密侦贼所在遣两吏贾人装蹑其后而锐士数十持兵仗继之贼果不设备悉就禽是役也凡招贼舶二百三十二禽贼首一十九濒海氛翳一空赵先生力也当道方倚重为长城而赵先生以年老坚上事乞骸骨台使督其诚不忍拒行之日饷遗慰勉有加赵先生既以完节归慕司马君实范希文故事与从弟今大学士赵公太仆卿徐公泊家君躬服古道化乡闾风俗为一变以清猷名德盖宋代而焚香告天事尤伟则建议举宗创祠庙而独捐金数百台其上曰告天并辑处士公而上水部公而下积功累仁事为一编命之曰传香录自余乡先达伟人刘孝标骆宾王辈皆着论暴其忠节当世翫之性澹泊恶纷华独寄好山水时时挟名胜探幽奇长吟短谣翛然自适方秋作感怀十咏腾播一时他篇什工者尤众盖赵先生自罢别驾还里中及余辈相唱酬十年所如一日也始赵先生业以不朽奋晚年顾事功仅小试而词章又小道无足为且德成名立思有以进是者遂殫精性命筑礼斗台键关据梧取参同悟真读之行其术有奇验既益读楞严圆觉金刚诸书乃大悟曰噫嘻道至此乎夫儒以淑世仙以度世梵以出世函三者而一之丈夫事尽矣因著书曰三逃记作佛宫奉大士日跏趺相对宛如髫岁时识者知其宿根所植云赵先生年且大耋矣而色若孺子修眉方瞳步履轻越望而知其稚川弘景辈流至与谈竺干内典则真觉妙明圆机朗照令人身世并忘又鲜不以为维摩诘龐居士也赵先生于余为丈人行余少赵先生二纪余然里中称习赵先生莫余若者赵先生命为传余不得辞輒稍次其行事传四方焉

石羊生曰孟轲氏所称豪杰舍赵先生畴属哉世沾沾徇耳目七尺之躯浮沈于声利之途而举世莫能拔最上侯平津班定远极矣彼其视不朽为何物赵先生独蚤用三大业自期俛得之而暮途弃去益逃诸无何有之域务解脱死生而后已此其人宁有待而兴者夫孟轲氏所称豪杰舍赵先生畴属哉

少室山房集卷八十八

●钦定四库全书

少室山房集卷八十九

（明）胡应麟 撰

○传三首

补传一首

补唐书骆侍御传

骆宾王越东阳郡人也父为博昌令（见本集与博昌父老书中）宾王生七岁能

诗尝嬉戏池上客指鹅群令赋焉应声曰白毛浮绿水红掌拨清波客叹诧呼神童比长天才逸发与王勃杨炯卢照邻并以藻绘擅一时号垂拱四杰云先是唐起梁陈衰运后诗文纖弱委靡体日益下宾王首与勃等一振之虽未能骤革六朝余习而诗律精严文辞雄放滔滔混混横絶无前唐三百年风雅之盛以四人者为之前导也永徽中歷官侍御史时高宗孱不君后墨擅国宾王覩唐运且密移数上书言天下大计后墨怒诬以法逮系狱中作萤火赋以自广久之谪临海丞高宗崩后墨废庐陵改唐物宾王耻食周粟即日弃官归赋宝剑思存楚金锤许报韩之句会英公徐敬业起兵诛后墨宾王仗策从之敬业雅慕宾王名得之大悦引至戎幕中羽书文告之属一切谕焉既而义师大集将直指长安宾王援笔慷慨为檄文以谕海内诏云伪临朝武氏者人非温润地实寒微密隱先帝之私阴图后房之昵践元后于翠翟陷至尊于聚麀犹复包藏祸心窥窃神器君之爱子幽之于别宫贼之宗盟委之以重任呜呼霍子孟之不作朱虚侯之已亡燕啄皇孙知汉祚之将尽龙漈帝后识夏庭之遽衰敬业皇唐旧臣公侯冢子因天下之失望顺宇内之推心爰举义旗以清妖孽南连百越北尽三河喑鸣则山岳崩颓叱咤则风云变色以此制敌何敌不摧以此图功何功不克公等或居汉地或叶周亲或膺重寄于大廷或受顾命于宣室言犹在耳忠岂忘心一抔之土未干六尺之孤何在云云檄传四方振动墨读之至一抔六尺语凜然曰如此材而流落不偶宰相之过也敬业进兵拔润州败伪周将雷仁智与李孝逸遇下阿击其前锋大破之敌垂遁适星坠营中魏元忠纵火围逼敬业军遂溃党与悉禽独宾王变姓名逸去削发为浮屠居天竺灵隱间十余载考功郎宋之问谪官岭表宿寺中赋诗得鹫岭龙宫之句思不属方苦吟一老僧卧禅榻问故遽续云楼观沧海日门听浙江潮之问大骇质明趣访之逝矣识者云此骆宾王也以是知敬业之败有司虑墨以檄故必蕲得其人因斩貌类者以献云始宾王父早亡奉母竭力裴行俭再辟幕下皆陈启峻辞意致委笃人以方李密陈情表世传士先器识之云殆匪实录至奋身为国举宗百口弃置若遗其忠孝天性然也宾王既以起义亡无敢哀其制作者庐陵复辟累诏访求鲁国郗云卿始集传之天宝以还唐风载变后生轻薄齟齬前薪杜甫氏以凌跨百代之才特推穀宾王至拟之江河不废李梦阳王世贞本朝称大匠咸归甫论笃而斥行俭为腐谈新都汪道昆尤重宾王檄泊帝京畴昔二歌方诸秦汉间作者当孽墨革运滔天剝剥生灵毒痛九野蓋开辟未闻之变一时唐之臣子宋璟姚崇娄师德辈俯首北面蒲伏裙裾殆不知庐陵何物独宾王仗义执言大声其恶墨虽漏网逆状累累千载读之輒磔靡过视行俭目击愠淫苟全污浊者器识先后何如哉自唐世因仍周歷日以叛臣刺戾相沿郡乘邑志咸屏弗录明万厯丙子滕观察伯轮董浙学事于是门下士胡应麟婺人也首上事讼宾王云窃见故唐临海县丞骆宾王大节高风瑰材卓行词华冠代学业超群至孝笃于平生孤忠竭于始仕微官奉母任武功簿而不辞直道事人谪临海丞而靡悔属牝晨之篡国玄枢撼而八极摇奋雄略以登坛赤羽呼而万众集恻一抔于故主问六尺于元凶歷数屠兄杀子之奸鲸鲵褫魄亟发酖母弑君

之恶■〈豸契〉獠寒心既首建义旗将裂渠魁于七庙旋身膏逆刃尚飞灵爽于千秋伟哉器量无双詎曰文章寡二乃史氏颓靡弗昌言于纪述而州民謏陋迄罢享于蒸尝诚亘古不白之沈冤实阖郡当先之巨典伏惟阐发幽光播扬茂烈聿修废坠广励风猷俾乾坤壮气恢弘于崇正之朝海甸英魂鼓舞于右文之日书上事垂下所司适擢去不果已苏督学浚至亟申前议列祠郡城已洪督学启睿至复采凤闻专祀邑里三观察使皆闽人雅尚风节而后先继至故自宾王举事歷宋迄今八百余载而公论始定于一殆若有天意存焉于戏宾王不死矣顾新书文苑阔略未详而刘昫旧唐论述尤谬因稍据临海丞集掇其忠孝大都暨埜乘稗官之足征信者为骆侍御补传以传

胡应麟曰吾越之言诗文率繇宾王始非直婺一方耳也乃余产婺中于宾王实晚进云宾王檄后鑿大恶数十义炳日星而史臣以怨诽■〈言蔑〉之伪周羣鼠倒置君臣大伦以媚鑿可也而亘千百载而下而皆周之史何也大明御■〈宀禹〉覆盆洞鉴勾萌蠕动有滥必伸而矧于宾王于虞歷世久而公论明蓋记之古昔矣

家传一首

家大人歷履迹

家君讳僖字伯安一字子祥厥先安定先生瑗安定先生仕宋教授吴子姓留吴兴遂世世家其地胜国兵起徙兰溪五传而为赠奉政大夫礼部仪制司郎中富是曰先大父先大父质而愿与兄弟同业贾独重然诺安义命用是贾日困而家君总角则已悉读素问灵枢金匱等穷其说忽翻然悟曰大丈夫生明世当用仲尼周公道沛泽万里胡株守一技亟弃去业儒补邑弟子员试輒高等是时太宰唐公龙方请告偶读家君文大奇之立召见家君甫弱冠衣弊衫草屨进而神彩秀彻风度朗朗玉立一坐客尽倾太宰顾谓诸君是宁独艺文即器识亡两几欲以女女家君中夺母命止然自是遇家君特厚岁问遗无虚日巳酉当省试督学丰城雷公行校士得家君卷快甚为私识其处适万安朱公以督闽学至讯雷公诸生义雷公杂取家君卷授之朱公阅未竟击节曰此空羣足毋失也雷公徐摘示所识处为抚掌一大笑两公皆当代文辞宗牙颊奔走天下士顾交重家君若此是秋赴省以名高谋僻寓习静得潘氏园夜束书至则羣蚁坌集室中无隙地一仆夫请纵火焚之家君颦蹙曰若以是蠕蠕非生类耶一举火数万命立尽胡忍也遽踉跄还寓越数日入试精思首义至日晡竟三义阖闾烛矣复属四义草忽蚁集笔端如猬阁笔稍稍去再举笔再如前时漏且二鼓家君顾事急则不复属草而録三书义甫竟夜过半旋纵笔书四义文思輒溢出如泉涌而蚁亦絶不来辍卷申旦矣已中式谒座主方祥先生谢方先生迎谓吾读子四经似非人间物也始信为羣蚁报云巳未第进士迎大父母入都岁歉甚家君罄俸入市白粲大父母而身脱粟俄郑太宜人病匍匐吁天竟不起奉丧还瘞瘁骨立阖郡嗟咨其孝癸亥服除以郎中公春秋高欲终养郎中公趣之乃行授礼部仪制司主事乙丑提调场屋爬搔宿垢百废具振竣役条陈便宜十事将上之会闻郎中公讣奔归毁瘠如丧太宜人礼而贫愈益甚聚徒自给靡寸牍入有司戊辰

再谒选太宰蒲州杨公夙习家君名即出他精膳郎以家君补其处踰岁迁祠祭员外逾岁迁主客郎时谳达以孙巴罕故乞款塞举朝叵测宗伯潘公咨主客郎家君谓敌一小入杀伤卤掠不可以亿计今纳款岁费不过十万缗而于朝廷体甚尊许之便诸大臣议以克合凡宴锡赉予悉委所司家君擘画处置凿凿中窾政府大以为材骤迁秩仪制郎亡何穆皇帝上宾一时登极改元覃恩肆赦诏书宣布中外踊跃咸以数十年所未覩也于是当以大典劳迁九卿铨曹虚秩待而会有陝诸王袭封事高皇帝制诸亲王庶子封郡王亲王絶而将军中尉继者仍故封不在例而王某故由中尉入其次子亦欲得郡王封家君持不可而某觊觎王爵甚行万金大珰恫惕扇谤旁午家君弗为动曰吾不过罢仪制郎耳奸高皇帝三尺即幸漏网谓臣节何事迫权珰乃授旨吏部出家君湖广右参议盖不踰月袭封典行矣楚岁比大水荆襄二郡弥望鱼鳖而大司农方日夜持尺籍责委输家君下车太息即日请行郡身暴草野中三月尽得虚税蠲额十之四民大悦颂生我而二郡故江陵相里也江陵相新得柄威福甚诸奉檄楚者伏谒视家臣而家君过其门仅一刺江陵父治第宅四方馈饷币山积家君公覲外毫不私江陵子若弟赴省试诸司率毁阶级降礼貌家君曰吾天子藩臬也不复能折腰事权贵由是江陵积怒而当事者遂上章按家君督饷亡状例运艘渡江三月淮五月后期责所司而是岁楚艘皆先月度道路扼腕而江陵从中主竟夺级调云南按察僉事家君被命去楚吏民遮道留以千数已乘扁舟浮洞庭度沅湘吊九疑益西南行夜郎贵竹万山中揽观夷夏大防天地日月所穷际出没凡百日抵滇莅政愈益以恩信逮下不为时尚阻讼牒斗争輒赐粟帛解散之境用大治所辖地邻缅甸缅以大理饶涎沫久而属夷刁氏父死兄弟争立其兄尤黩猾自分庶孽不得请则操戈为缅前当道旰食下其事家君家君飞檄缅谕以祸福大旨谓若不过中国一郡县当若盛时悉若众窥我我沐将军以偏师殄若亡遗类今皇帝神圣横如倭强如夏悉心委命若乃无故入奸人言若朝启天朝大兵夕至鞠若地为茂草若熟计利害毋悔缅得书震怖谢家君则身驰至刁氏立二人庭下责大义令疾自新两人誓且泣誓世世不复倍因为中割其地还报抚臣大喜与台使交推轂家君仁而有勇遂以僉事晋藩参不越岁超臬副家君前后扬歷滇四载所至桁杨罢陈囹圄若洗深山穷谷耳胡使君名輒顶礼呼佛子然家君为人持大体捐小苛乐拊循恶迎合属僚自守令椽丞感刺骨靡二而同列文深与直指责倨者往往衲凿癸未大计卒从不及论疏有满腔赤子等语家君慨然曰阳城心劳抚字吾岂以鹰鹯易鸾凤哉且吾行年六十间关万里博一官一级何异味鸡肋今者吾得我即日拂衣还里中大召亲族故旧日燕饮相劳苦穷乏不能婚者损赀授以室丧暴露者畀吉壤毋令后时宗人数百指日夕待家君以举火间有阳请乞而阴背訾者家君如弗闻他日更以穷归益复厚遇之其乐为人所难率此类也家君博大慈祥忠信坦厚皆天授宿植幼即慕司马文正公为人三尺童子不加一谩语无疾声无厉色无城府无町畦絶口不谈人过人以横逆来恒乐受至乡邻有斗则引咎自辜不能安寝食尤好揉患恤灾老弱病躬调药饲饘粥下逮丐徒贱役

靡不然赖以全活甚众生平祭祀外未尝杀牲而于小物微命逾谨尝大会燕中贵宾宾垂集顾檐前一蝇戢蛛网惻然取置掌理其结结纏纠十数重家君竭心目力自己至申卒活蝇而后举会龟鳖螺蚌之属必重购投深渊日以千万数即蜂蚕亦不令人伤第谨避而已家君外和而内介与居终日挹畏不自胜一遇大节临大义则贲育莫能夺故一扼于中貂再扼于权相又再扼于台使者皆坐此也始用布衣奋闾巷中间空乏隐忧险阻毁折靡不备而意常豁如视宇宙百物一亡足婴其内自以少时抱羸疾数勤大父母稍壮即断一切嗜欲今年踰耳顺形神甚茂鬓鬢黑而貌敷腴骤而望之四十许人也雅好读书诸子百家靡不究业以扩见闻不薪为博长吟短章援笔立就业以畅情素不薪为名居常不谈性命而被服仁义闻望伟然自嘉隆来荐绅先生童孺走卒无问识不识以为鞠躬君子大学士李公春芳都御史何公迁天下称儒硕咸忘分倾盖延至家塾命诸子拜床下善人伦者金谓家君孝谨类万石平恕类刘寛刚操类严挺之雅量类娄师德乐善好施类白乐天范尧夫至仁恤息至昆虫草木靡不周遍则于古罕见其比盖实录云家君他嫩不可更仆尽不肖麟自束发服膺庭训迄今靡尺寸树且身抱狗马病大惧一旦溘而令家君淳德泯泯于当世用是不量谨掇拾大都如右以俟当世大人君子之秉椽笔者

自叙一首

石羊生小传

石羊生者金华山中入金华山道书曰三十六洞天故黄初平牧羊处也生少迂戆好谈长生轻举术又所居邻上真于是里人咸谓孺子不习当世务而游方之外岂曩昔牧羊儿耶生闻輒大喜自呼石羊生云生父宪使公母宋宜人人生五岁宪使公令出侍客客占对必属九龄受书里中师业已厌薄章句日从宪使公篋中窃取古周易尚书十五国风檀弓左氏及庄周屈原司马迁相如曹植杜甫诸家言恣读之宪使公奇其意弗禁也十三四为歌诗稍稍闻里社中十六补邑弟子员已挟书从宪使公北下钱塘浮震泽并吴会金陵击楫大江益东走青徐齐鲁境踰赵入燕乞食长安市悲歌蓟门易水间所至兴会感触一发于诗时庄皇帝御■〈宀禹〉八荒救宁万里重译荐绅先生际会綦隆絀述古始吴则王司寇太常歛则汪司马楚则吴参知蜀则张司马洛则张中丞皆龙奋虎蔚为世宗匠生每慕悦其人顾诸君子或扬歷四方或退居一壑亡从识面俄黎惟敬自南海来从友人邸读生闲居十咏咄嗟何物宁馨诗四壁冠也而徐子与周公瑕戚希仲欧楨伯陈玉叔何启图康裕卿沈纯父祝鸣皋先后至咸交口誉生盱眙李环卫惟寅方盛与海内诸贤豪谈天碣石一日耳生名亟虚左席以上客迎之由是生歌诗颇传播长安中诸长安贵人往往愿交生亡何宪使公以袞封忤大珰指补外藩生侍宋宜人还越宋宜人患头风生日夜治汤药遂感羸疾跳匿金华山而会大司空万安朱公驰驿过灊水始朱公从长安覩生诗数物色至是发使要生山中舫舟待载移日生心感朱公知愧亡以报则述公治水颠末赋长歌七百言以为献朱公击节示督学滕先生曰奈何

当吾世而失此人滕公读大奇之亟移文博士廩生并檄生入武林时侍御萧公万公合试越东西士千人再拔生文冠次年丙子以经义荐于乡生始愿从赤松兄弟牧羊穷谷间中屈意当路恒勿勿每摄衣冠则揽镜自笑是楚人猴而沐者然用二尊人故未敢遽绝去丁丑夏北还杜门溪上适王太常先生自吴中来顾谓宪使公阿戎安在吾愿就与语浹谈竟两晨夕濒行王公握生手曰不佞纵横艺苑自于麟外鲜所畏差强人意独生耳则又曰生幸及家司寇胡可弗一游其门先是生读弇州四部集谓古今文章咸总萃是幸太常介绍剧欢輒以尺一通司寇司寇业闻生得生恨晚首为生序少室山房诗挈衣钵授焉生自揣亡能万一弗敢承也司寇数期生海上坐宋宜人未能赴盖自是不上春官者六载邑明府喻邦相娴于诗意不可一世独善生游览倡和亡虚日壬午宋宜人病稍瘳而宪使公屡自滇发使督生偕计生顾长公知（阙）假北上亡从面因努力治装过吴谒司寇弇山堂叩昙阳太师恬澹观恍如蹶阆风升兜率揖金母而拜木公其明年癸未与张中丞遇都下张中丞者新蔡张助父也生素不相闻邂逅朱山人汝修馆词组投合肝胆形骸几欲为一即传称倾盖如故不足喻也俄再下第还里则张大司马前此弭节过访生且属宪使公必致生幕下生则复入武林报张公而少司马新都汪公至自歙生则复谒汪公湖上汪公持生刺倒屣出于坐间脱匕首视生此戚大将军赠也生能吐奇语赋此乎生夙慕汪公甚即援笔缀长歌千言既戚大将军至叹曰名下无虚士生果然汪公旋挟生过弇州伯仲于中路序生诗所寓寄弥笃至泊抵娄江张大司马亦取华亭道来会诸君子合并乐甚剧饮沈酣生以一年少翩翩盛集诸君子咸国士属之人人意得也生结发从事词场于当世名文章士仅吴明卿未识面目余鸿硕俊髦交游莫逆徧海内然于时尚益枘凿丙戌入都复不第盖自是三北礼闈矣人或咎生背今趋古生闻輒迥然笑若欲以万锺不朽我乎生性喜静寂恶纷华于世味声色狗马轩冕玉帛泊然独偏嗜古书籍所购经史子集其世自洪荒以至昭代其梓自吴越以至燕闽插架几四万卷治屋三楹贮之黎惟敬大书其楣曰二西山房而司寇为记生日坐卧其中毋论里中儿虽同室罕覩其面又少慕尚子平为人而稟赋孱弱乏济胜具因绘图斋壁缀诗其上曰卧游室以自遣性尤好纂述所著书有寓燕还越计偕岩栖卧游抱膝三洞两都华阳兰阴畸园邯郸养痾娄江白榆湖上等集六十余卷诗藪内外杂编二十卷笔丛三十六卷丹铅新录八卷艺林学山八卷弇州律选六卷他未行世者六经疑义二卷诸子折衷四卷史藪十卷婺献十卷皇明诗统三十卷皇明律范十二卷明世说十卷古韵考一卷二西山房书目六卷交游纪略二卷兜玄国志十卷酉阳续俎十卷全姓名考十卷搜辑诸书有群祖心印十卷方外遐音十卷两司马录二卷考盘集十卷谈剑编二卷采真游二卷会心语二卷类萃诸书有经籍会通四十卷图书博考十二卷诸子彙编六十卷虞初统集五百卷以婺先达无若刘孝标骆宾王二子孝标博洽冠古今当梁武伎君不少殉而宾王武氏一檄为唐三百年忠义倡世率以文人亡行视之于是合传二子而辑其遗文为一编会闽苏君禹来督学读生文称善相属即日檄宾王入郡祠千载

郁阨之疑暴濯一旦生亦颇自厌意云生疎矜秀目长身望之癯然野鹤姿长经月不梳栉科头松下夏则袒裼裸裎爇沈水据槁梧翛然莫窥其际隆冬盛寒于雪中戴席帽着高足履行危峰絕壑折梅花满把咽之当其为诗歌冥搜极索抉肾呕心宇宙都忘耳目咸废片词之合神王色飞手舞足蹈了不自禁以故人相率曰狂生至性孤峭寡谐慕雅士若渴恶俗子若热又相率病生狷惟生亦莫能自名姑随俗牛马应而已始生齿发盛强寤寐古人囊鞬当代銳欲敝帚一家追随百氏之末乃今疾病殷忧年踰三十颠毛种种自顾项颌腰肢匪尘世物亡论一切有为视同梦幻即文字结习且一洗空之旦夕将从赤松兄弟采药金华石室间呼吸灵和永絕世缘参乎大业游乎混元斯生所夙负然哉惟是生平歷履大都不亡足述者惧久益泯泯因稍掇拾为石羊生小传以自考焉

吊诡士曰士诚各有志哉夫当綦隆豫大之运畴不欲自奋以取世资石羊生独厌薄一切为澹泊亡媒之业此其志可知也左丘氏亟称三事言若匪所先者他日之论鲁大夫臧文仲也独曰身没其言立是之谓不朽此其说奚以征焉要之德与功非言弗树若孟列达尊轻重各有攸当必以上次论溺其指矣夫刘骆两生是非旁午歷千余载至生而始定生业今方覆瓿百年之后或盛以青黄文之惜当世子云不得与异日为子云者一交臂语悲夫

少室山房集卷八十九

●钦定四库全书

少室山房集卷九十

（明）胡应麟 撰

○记五首

二酉山房记

二酉山房余所构藏书室也书以经类者三千七百余卷以史类者再倍之子三倍集四倍凡三万六千卷有奇友人黎惟敬过而乐之题二酉山房云始余受性颀蒙于世事百无一解亦百无一嗜独偏嗜古书籍七龄侍家大人侧闻诸先生谈说坟典则已心慕艳之时时窃取翻阅十一二从家大人宦游燕燕中四方都会故鬻书藪也而家大人亦雅负兹好每退食诸贾人以籍来余輒从與其旁市得輒乞取尽读而是时肃皇帝末年旱蝗迭见大父母复就养京师俸入不足恒乞贷乡里以故帙繁而价重者率不能致间值异书顾非力所办则相对太息久之已家大人再丁内外艰余再从还越戊辰复上京师时余年十七始娶亦会家大人官礼部俸入稍优于是极意购访凡寓燕五载而家大人出参楚束装日宦橐亡錙铢而余妇簪珥亦罄尽独载所得书数十篋累累出长安自是余奉母宋宜人里居十载中间以试事入杭者三入燕者再身所涉歷金陵吳会钱塘皆通都大邑文献所聚必停舟缓辙搜猎其间小则旬余大或经月视家所无有务尽一方乃已市中精绫巨轴坐索高价往往视其乙本收之世所由贵重宋梓直至与古遗墨法帖并吳中好事悬贖购访余则以书之为用枕籍揽观今得宋梓而束之高阁经岁

而手弗敢触其完好者不数■〈弱，左半〉而中人一家产立尽亡论余弗好即好之胡暇及也至不经见异书倒度倾囊必为己物亲戚交游上世之藏帐中之秘假归手録卷轴繁多以授侍书每耳目所值有当于心顾恋徘徊寝食偕废一旦持归亟披亟阅手足蹈舞骤遇者率以为狂而家人习见弗怪也自余为童子至今年日益壮而嗜日益笃书日益富家日益贫家大人成进士扬歴中外滋久乃敝庐仅仅蔽风雨而余所藏书越中诸世家顾无能逾过者盖节缩于朝晡展转于称贷反侧于寤寐旁午于校讎者二十年于此矣山房三楹中双辟为门前施帘幙自余四壁周列度二十四度尺度皆齐一纵横辐辏分寸联合中遍实四部书下委于础上属于椽划然而条岌然而整入余室者梁柱榱桷墙壁皆无所见湘竹榻一不设帷帐一琴一几一博山一蒲团日夕坐卧其中性既畏客客亦畏我门屏之间剥啄都絶亭午深夜焚香鼓琴明烛隠几经史子集环遶相向大而皇王帝霸之事功显而贤哲圣神之谟训曲而稗官野史之纪录葩而墨卿文士之撰述奥而竺干柱下之宗旨亡弗涉其波流咀其隼水意所独得神与天游陶然羲皇万虑旷絶即南面之荣梵天之乐弗愿易也昔人谓酰鸡处瓮中蔑知六合之大而终日饱食没世无闻为天地间一蠹余自束发受书即妄意掇拾一家追随百代乃今甫壮而衰亡能万一自见而徒以七尺之躯沈痼于遗编敝简而弗能出则当今为二物靡宜莫余过者顾余父子累积之勤嗜好之笃与诸书之聚余室皆非偶然于是歴叙梗槩所由志之山房为一公案非海内同好不敢以出示也

关忠义侯祠记

汉代關忠义侯义烈英灵炳蔚万古而祀典之盛极于本朝庆厯间今香火蒸尝薄海内外孩提走卒靡不知有侯者独侯生平终始大节陈寿寥寥数简缺略未详且笔削之正肇造紫阳自朱氏前即名世巨儒犹系統于曹魏则侯之效命先主譚者大都以尽心所事而已其于翊卫炎精恢复汉室之谊槩乎未之有明也乃至东吴诸人名魏仇讎实汉蠹贼自孙策周瑜辈皆不过欲乘时寇斂跨割江表传之子孙曷尝有纖忽为刘之念权既破操鼎足形成纒图父兄志满意得乌林之役昭烈奋身矢石以启全荆而权百计忿争必瓜分而后已此其肝膈底里固可洞见侯睥睨其人曾斗筲弗若而肯俯与婚乎盖侯之絶婚孙吴即其辞爵曹魏方寸昭昭揭于天日乃后人聋瞶动以侯躁忽寡谋过也若荆州之失王公元美以先主不当委侯（阙）旁援后劲曾亡一旅之师其失当蔽之昭烈余则以孙氏三世江东士暇卒练赤壁长驱中原岌岌而周瑜敝全吴之甲曾不能乘锋席锐铲江北之弹丸比权亲率大众窥伺合肥张辽以偏师一击只轮靡返则侯之举襄围樊滄七军而震华夏允谓百代之殊勋三分之上略其难其易未可以浅薄窥也当其时鲁肃未亡法正犹在吴军徐沛蜀军秦川努力同心掎角大业则中原之复即侯一人负荷有余昭烈武乡高枕而议礼乐矣天不祚汉仁宰则留操迁则止若权若逊为鬼为蜮盖世之伐毁于垂成汉事至是遂无复更可为者盖冥冥之中阴若尼之不待武乡沦丧而后决矣然则侯之存亡匪侯一身汉四百载存亡实侯焉系而判于蒙也

长江全据之一言此余所为掩卷咨嗟太息痛恨于吴寇者也今侯之精爽巍巍赫赫宇宙亡穷回视东吴君臣奚啻犬鼠独世人习论成败槩侯生平往往若有遗憾焉者而絕吴摧魏浩然之正气穹然之伟绩习矣弗警郁而未彰余甚愤之輒因蒲东赵公命记侯庙而详着其说如右若堂构之崇隆侍卫之华焕与兴作之岁月日时前人纪载已悉而余方为侯鸣不平于千载之上固亡庸于贅錄也

白岳游记

白岳东南一奥区也虽胜槩不越寻丈间而天造神工炫心駭目游人往往诧为絕奇余夙有少文之癖尝得齐云图揭之斋中每抚琴动操山灵响答久矣尚以未及攀陟为恨仲春过新都去兹山百里而近既复过汪司马肇林则兹山仅咫尺间会坐中有谈及者余豪兴勃勃欲飞司马及诸仲仍从舆之适暮春三日当玄君览揆之辰爰觅笋輿发峪口薄暮抵休宁宿旅舍中倾白堕十余巡数浮屠自九华至举似白岳问孰优曰九华外拓白岳中撮其胜故未易甲乙也诘朝蚤起行休宁郭西游女方浣纱堤上平波涨空草色迤邐肩輿过之袍袖皆绿属舁者为缓行亭午达岩下曳屐上东天门饭棚梅庵次日斋服谒玄天太素宫香炉千仞突兀霞际折而东曰紫霄岩行小倦取磴道百级而下憩无量寿宫宫司马新建极华靓可观千山环拱黟水一线横拖其前背负三峰矗天而起曰紫玉屏即女娲炼石巨灵削成宜不及此而旧志絕不齿之又稍东穹碑屹立勒文其阳曰三楚升中颂藉第令以鸟迹鑱之末不署司马姓名几以为汉秦遗碣矣又次日携酒登文昌阁望五老峰旁三石离立曰三姑余谓弗善易三娥取峨嵋音近也通诸胜得诗十二章白岳游人足迹所常至故世所共征者弗列列胜之后出者如右自余槩于诗中见之

溪云阁记

渡灏江并嵕行五里而近有山巖然横峙曰兰阴俯控城闉仰属霄汉邑西南最胜地也山之背重冈沓岭延袤而下若凰翥若鸷跃抵洲上而稍就平是为兰阴之麓大云对耸闾闾万家飞梁界空舳舻千丈又兹山最胜地也乃赵君文镇即其地为书斋游息焉堂五楹颜其楣曰草玄室朱帘翠幙位置甚都堂之后为轩曰嘉色取柴桑公采菊语也傍隙地艺丛菊数百本枝干窿穹饱霜露率逾丈羣木既脱幽芳错呈烂然庭除组绣夺目凡邑中言花事者咸出赵君下轩之下甃方池池渌淨不容唾金鳞尺余拔刺藻荇间阳琢石为平台中散植牡丹芍药山茶葵榴之属右为燠室牖户蒙密亡纖隙受风以冬贮兰蕙素馨左为便房设木榻棊几桐琴四壁图绘多名手古铜觚彝鼎官■〈𠃉上可下〉泉定诸窑焚妙香瀹嘉苈杂贮江梅岩桂菖蒲而闽中盆卉若牙松若拳柏亦列置其次焉循曲房稍东为仄径径窈窕穿重壁穴旁为天窓以受明计其衡尺有咫而纵亘五丈折而北又旋折而东升石磴垂二寻磴穷得方檻小憩平畴沃野弥望皆绿憩者为跂足弗忍前舍磴缘檻歷飞梯二十四级梯凡三折每折级如之迤邐絕顶而至所谓溪云阁者雕甍翼然金碧焜耀如费长房夜入壶公壶朝而耸翻阆风之杪举阎浮提界

在我目睫弗啻也阁四周施画楯楯之内为风窓三十六皆洞开河汉纵横象纬出没双溪如带合流跨其前九峰若屏■〈禹佳〉立峙其后振袂而歌赤松则朝真芙蓉紫薇诸崑岫飞动于檐隙已曼声长啸骋望于严濑富春之际羊裘翁持钓竿曳草屨贸贸然来矣盖兰阴之胜据吾邑最山麓之胜据兰阴最而赵君斋阁笼一邑之瑰丽而尽收之又山与麓之胜之最也胡先生既用赵君请数止宿斋头时纵目乎溪云之上乃喟然而叹曰观之不可以已如是夫夫蛙之羣居于埵井也仰而窥夫苍苍正色者瓮然焉耳矣釜然焉耳矣夫若是匪苍苍者之眇也地之卑势固宜尔也一旦而登杜甫氏慈恩之刹而吾之呼吸且泠泠通帝座焉彼浮屠虽高矗霞外而岫然一柱岂诚什百于埵井乎哉乃厥覩相万万其地势高下殊也赵君斯筑崇不逾十仞而广仅足数筵大都孟轲氏所称五亩之宅也而能笼一邑之胜而收之即其人磊砢扶疎亭亭独上超然广莫之表匪齷齪棍中流审矣异日者余将拉鸿蒙氏迟赵君化人之宫相与陟丛霄叩大罗歷■〈卜刃〉利兜率诸天而后返其观也当必有倍进于是姑为记以塞赵君而使之俟之

聚顺堂记

丁巳冬琅琊次公有豫章之役过家大人即索阿戎见见即抵掌语彻丙夜不休泊行送至兰阴山下携白堕蹶笈登巔南望九峰苍翠插天若青莲然蜿蜒下亘数十里而遥至风秋潭上止焉斯地也华山枕其后渔塘汇其前纡曲回旋于堪舆家言甚符次公指曰郁葱哉佳气此必有顺德君子若隱鹿门者流居其间哉余识之然迂延数禩未涉其境问其人也乃余宿有元亮之癖闻渔塘余君善蒔菊因同二三友人造焉门以外灌木交加艺菊数百本烂焉夺目渔塘君出迓则貌穆然则色温然则言呐呐若不出口然予私念曰此次公所云顺德君子若隱鹿门者流也迨入而其堂壮以峻其轩翔以朗其回廊曲栏秩秩而啾啾朱帘高卷花香入座而子若孙胥彬彬然儒衣冠侍余谓友人曰堂以聚顺颜厥有旨也渔塘君即九顿首请曰古自栋宇来肯堂构者多矣独昼锦三槐两堂迄于今若新则惟永叔子瞻之记是藉猥兹野人之居愿先生不惜片言记之异日得与两堂俱永先生之赐其在万世乎余曰唯唯夫顺之义大矣以毫靡乖忤言若导山泉而注之东也顺之聚难矣以毫靡缺漏言若蕙百川而归之海也闻君庭闈承颜则薛包逊孝顺以克谐焉而聚棠棣燕乐则姜肱让友顺以克念焉而聚琴瑟敦好则梁伯鸾输敬顺以克正焉而聚且也以其顺德迪子若孙若万石君之不言而躬行他日子若孙奉君教通登臚仕为圣天子将顺之臣则纶音下锡必曰此三代遗民为朕酿大顺之风者德足褒也此堂不更色飞乎哉君谢曰余不识聚顺之奥义不谓当耆年而幸闻先生教余曰君发鬢已耳顺乎此天之所助而聚之所致也立成五言近体一章寿之因与君约共葆兹顺德握手入金华山中为皇生石羊牧倘皇生乞余作赤松宫记当必有进于是者今日且醉黄花间毋为元亮所笑

少室山房集卷九十

●钦定四库全书

少室山房集卷九十一

(明) 胡应麟 撰

○行状二首

先宜人状

先宜人宋氏宋余邑中最着阀也聚族居尤埠食指无虑数百千即隶博士籍恒以十计而外大父最有声外大父字道亨震其讳为人倜傥负奇芥视一第甚既屡试不售中弃去摄古衣冠筑别墅曰雪溪堂聚书万轴卧其中经史子集环向恣读之间发为诗歌盈帙晚尤好方术家言自长生黄白星历纬候针石六甲五行无弗治而独形家得其宗所著风水井见舆地指蒙多行世达官巨室延至恐后外大父亦雅好游而体便登陟每出恒旬日一归归而宜人持橐钥饰笏簋谨候阃闾间外大父受成事而已始外大母首举长母姨女于黄次舅氏旦以疾废季乃诞宜人而外大母歿故外大父出游独宜人持门户外大父覩其经画斩然叹曰是女也仁孝庄淑则天赋乃其材矫有女丈夫风非贤如伯鸾吾弗与壻也时家大人以制义倾邑中未室外大父一见辄语门士施令喻旨委禽焉俄而家大人名曰益起己酉荐于乡归迎宜人盖十年长矣赠奉政公洎郑太宜人咸在堂得妇宜人欢甚奉政公家故饶既而烬于火家大人奋中微藉脯修以给甘毳是时江南诸从学就之如云宜人孑然一躯内奉姑嫜外奉宾客庀牢醴括米盐周旋中馈诸劳苦若固有之间以篝灯余隙刺绣辟纁佐家大人乏举宗藉藉诧其贤己未家大人第进士宜人侍奉政公太宜人就饩京邸以外大父春秋高固请偕值岁大蝗历齐鲁赵卫至燕中千里地尽赤宜人躬舂脱粟而多方张具奉二尊洎外大父驩俸入不足簪珥脱继之务各厌其意乃已明年郑太宜人病宜人扶掖视寝漉衣带纠结十旬竟不起宜人柴毁骨立从家大人扶榇归中途视膳奉政公尤曲至间密语家大人舅龄迫崦嵫迺鰥居恒郁郁而■〈执上目下〉御亡足司巾栉者脱昏夜骤有缓急吾两人曷从知家大人矍然起曰乍吾梦尔尔微子吾告几忘之立召命诸媒妁得天津陈氏女媵奉政公踰年生子佐奉政公抚而谢宜人吾赖若以有今日寻奉政公下世宜人匍匐苦块一如昔丧太宜人丁卯夏家大人襄大事于灊水源宜人主工役馈饷一切办兆以协吉寻奉政公媵陈相继亡稚子佐呱呱衽席宜人躬保抱鞠养之是时家大人以不肖独子纳貳室唐举弟鹏齿相若宜人懷佐而膝鹏两忘其非己出也又以舅氏旦痿外大父继体岌岌因力从舆娶于徐得子浩甫髫而外大父歿宜人擗踊呼天恸几絕捐囊篋以治丧仍悉索余貲畀弟浩浩感奋卒纳妇世其家识者谓宜人一身匪直胡氏宗赖以葆大宋之宗垂絕而续畴力也奉政公服阕从家大人入燕补礼部仪制郎自是周历四司凡五载适边人歎阙下今皇帝抚运应天凡登极改元锡封通市诸大议悉下家大人宜人握家秉槩以便宜从事家大人得精心展布品式典章朝野倾动俛以劳勩擢九卿亡何持庆王袭封议忤大珰出为湖广右叅议挈宜人便道还里中宜人顾从宦日久田园芜又不肖体素羸彷徨不忍割因请留处守而家大人入楚督漕粮江陵相诸子试会城家大

人靡溢礼其家盛鳩工治府第诸司奔命匠石家大人如弗闻也者江陵相积怒漕使遂希旨齧家大人镌一官移六诏稍迁至副观察凡三政不离滇中属弟鹏复殇而不肖艰嗣育故家大人自楚而滇越十载诸媵毕从宜人亡纒忽介懷抱每信使旋闻家大人健匕箸则喜动颜色居恒谓不肖吾无他冀第得而父康于官而体康于室南面之荣吾弗与易矣其恬于世分类如此不肖自丁丑一赴公交车旋絕进取念亦以奉宜人慈训不忍暫离也舍傍辟隙地为小园杂蒔桑苧葵榴时时御板輿挟子妇及诸雏翛然花木间竟日念同气惟一姊一兄姊寄迹穷乡而兄废髻鬢絕人道因岁时推负郭问遗长姨母而扫丈室延舅氏出居之躬抚摩存恤以为常舅氏徐于一榻凡九易寒暑大期至挥手告旁观吾以喘息腐余窃生人之乐晷刻皆宜人賜也人以为宜人孝友惠慈悉备众善槩之往籍眇覩等伦刘中垒所传古今哲媛彼其义激所形白刃易蹈至安常履顺无可釣之奇顾人情所难有特甚者乃宜人声色不动而尊亲之道事育之节纒悉理解女德之盛邈能其继矣既而家大人请老归自滇宜人以女弟殇感疾犹强起洗沐出迓豸袍翟冠金紫晖映白首晤言殊乐也诸侧庶罗拜侍席前无所问一笑颌之而已宜人自归家大人第举丈夫子一即不肖麟次女弟鳳年十四殇宜人以夙鍾念也惨怛甚卒湛思中痰久而痼不肖昼夜翻经方问医术聚羣儿杂奏宋元诸剧宜人覩不肖每强食自寬如是者亦越十载己丑仲冬朔晨起语不肖夜梦观世音大士导而往西方鼓吹音乐从者以百数何祥也岂所称极乐界耶不肖唯唯然喜不胜忧七之日忽风眩作于脾亭午正襟趺坐奄然逝伤哉彼苍者胡夺余圣善之遽也距生嘉靖辛卯夏去古希仅一间云宜人警颖殊絕虽不谙笔砚而诸史百家稗官小说下逮传奇词曲属于耳终身不忘诸妯娌杂坐亶亶谈说不去口家大人列方面不肖忝冠绅而寒素自将与人处油然亡少骄贵色词组间肝腹洞见絕不为城府町畦至普济博施尤慧根夙植稚齿即护覆众生昆虫草木不忍踐其命既归家大人日给不遑而务行其意闻人患难痾瘵切于身匱乏以情告必宛转周其急一日之间饥者食渴者饮寒者衣病者药丧者柩若山阴道中行应接不暇恒言吾乐此不为疲也逝之夕乡邻哭于邑族党哭于宗媼娅哭于堂娣姒哭于寝臧获輿隶丐者哭于途以宜人存日沾溉遍咸无物弗被故也宜人少蔬素礼三元北斗而于观自在如来敬事弥笃至朔望虔诚焚扫有疾辄梦大士以杨枝展拂之辄差鼓吹音乐之导盖往生西方时至云于乎人孰无母母孰无爱乃宜人之母不肖则爱絕常情一念精诚结于肺腑起居忧乐喘息贯通盖举世界大千无一足入吾母之衷而少夺不肖者至不肖依依膝下自少及强四十年犹一日无论妻孥燕婉弃置若忘即五鼎三公蔑知何物诚谓母子二人更相为命一旦溘然先朝露而不肖复以家大人迟暮不敢捐孱躯下从罔极昊天慕曷能以瞬息已也惟是先宜人百行在躬宜得命世鸿裁以传示来叶敬用幽忧余晷掇状万分伏惟大人君子躬当道立言之寄者采摭而赐之铭不肖幸甚先宜人幸甚

别驾吴君行状（代）

君姓吳氏諱某字某歙之海陽人先世自唐少微公迄宗漢公源流最遠詳載家乘中至君父鳳英而客死于楚君時方三齡兄禪亦在襁褓遺賫竟為某子甲匿弗予母劉孺人旦暮拮据鞠君及兄禪君甫有知問父狀輒擗踊弗食后十年劉孺人亦謝世君号恟骨立服除犹毀瘵不胜衣君既失怙恃独依伯兄禪以湖阴江左饶沃地谋僦居为治生计会女兄从令俞君之大田君徒步上谒俞君执君手与语大竒之何物宁馨匪碌碌辕下驹也亟命修贖就外傅力学居无何俞君逝欲卒業橐垂无寸钱喟然曰儒者业不讳治生顾今衣食靡所资而株守一褐奚为者遂与兄禪改业贾以信义著称交游资用藉藉起则又翻然曰吾大者既不能业儒其次尚可以刀笔自奋幸藉二先人宠灵获挂一命树尺寸功可无负七尺能役役老闕闕间耶始循例补郡功曹洁廉自持吏名儒行前后羣有司交口啧啧贤公以文无害授永平卫幕卫古渔阳境与边番犬牙错故事岁时发金币赐诸豪酋吏縁为奸徃徃饰滥恶干没奇羨公受事毫忽无所犯赏劳繒帛皆令人持镒致之吳越都会间精好什倍诸豪酋大喜过望世世奉约束称外臣督府以是材君举盘错政咸诿焉君被知益淬励自效凡征卫课督边储给营饷所至寢私杜谒厘弊剔垢振頽颂声四溢永平边郡雉堞圯君亲操畚鍤不数日奏功昌黎迁安令逡缺君再署二崑邑民上书求得君为眞令者累千人东事迫将越常格録用君直指行部荐章旁午总之无虑数十上时铨曹以左辅重地非吳公莫可卒擢君判通州余方待罪州将簿书鞅掌夺寢飭既得君欢甚内外诸剧务一切畀君职其羣州当孔道君所辖漕粮商税最艰巨又监司大农金以君有异能符檄倚办载道君恪共厥职一如官永平时狱讼繁兴君据案片言立决率以为神明富民妾以罪缢父母讼于官当道下讼鞫审君问状情得趣破械遣之富民懷百金顿首庭下君怒曰折狱辨冤余分也奈何持阿堵蔑乃公其人惶骇逸去大豪蚕蚀堤坼坝頽毀几不支君履亩悉复故经界貂珣缩手奉行其不畏强御类如此州土瘠岁侵逋负万计穷民展转枯槁什九囹圄君悉心抚字民赖以全活甚伙至家奉香火尸祝君君平居绳趋矩步恂恂雅饬即儒者自以弗如一临利害山立岳峙虽賁育莫能夺恒以少不获竭力二亲盛年操末业弁髦遗书为终身陷缺事既服官躬俭约饗殮草具烝尝享祀必备物致精捐俸入延明师海诸子弟皆崑崙见头角事兄禪克尽弟道白首无间言至处闈闈馭臧仆嗃嗃如也不佞顷被内召治装旦夕发顾徘徊不忍去君君亦恋恋河梁莫能别余为黯黯登车未几君疾闻又未几讣音至矣吏民被君德者环泣四境咸以吳公不啻吾怙恃胡彼苍夺之暴也君枢将以秋初行孤起龙具行实衰经踵门请曰知吾父者莫如公言足以信今传后者莫如公不肖孤匪遗骨归首丘敢丐状垂不朽余交君最久且深即不文义无容默默敬据诸孤所称述而笔其尤大较着彰显者如右公生年为丙午九月廿五日歿万厯戊戌正月初九日娶汪孺人次娶某再娶某丈夫子二长起龙某孺人出配某人女继配某人次起鳳某孺人出聘某氏女一女出适某孙男某孙女某俱幼未聘字公之枢行矣余束官守不能执紼泥途而素辱君同官为状皆耳目所覩记不敢漫浮借以点君生平惟当世立言大君子择马

少室山房集卷九十一

●钦定四库全书

少室山房集卷九十二

（明）胡应麟 撰

○墓志铭三首

嘉议大夫都察院右副都御史赠兵部左侍郎建安滕公墓志铭

庄皇帝初御■〈宀禹〉余承乏文选郎与今大司马粤西舒公前大中丞闽南滕公交莫逆也余在事弥年获免讐戾两公左右力为多是时上励精当宁中外有司更置略尽一时疏请什倍世皇朝赖天之灵两公以同舍日夜匡余弗逮乃滕公方抱痼犹为余强起勾稽功令铨次除目迄丙夜余以是德滕公尤深隆庆己巳春余竣事稍迁奉常请给归未几公亦予告嗣是余与公先后忤权贵人数起数废盖二十年间出处隐显之迹略同云顷余拜命冬官公适起填两浙方冀公旦夕内召披沥肝胆共淬晚节以报圣天子则公奄然逝矣余既偕舒代司空曾公作公合词驰奠公居恒念公赤心死王事冀得当以慰地下而未有会俄上命核海塘功余因得备疏公劳勩茂异上闻幸天子嘉纳诏予公一子入成均异数也又逾年公仲子万里匍匐持右叅朱君状介使函币载顿首庭下以公莹石泣请铭嗟虐余于公死生患难之交也即铭公非余畴任者按状公滕姓讳伯轮字汝载别号少松其先周子男国世居洛后扈宋踣侨■〈宀禹〉闽之瓯宁六世祖员郎礼部死难土木祀学宫员生弘恩以荫籍知邵阳县弘恩生镛镛生海州别驾澍别驾公二子长古松公鹤龄即公父也嘉靖甲午荐乡书授通判南安娶于陈以嘉靖丙戌十二月初五诞公公生而岐嶷幼不好弄始就学日诵数千言塾师駭异弱冠补邑诸生未几南安公歿于官公奔赴邸中哀毁骨立南安公廉介絶出居官日不私一钱公徒跣扶椽归家壁立公怡然不屑也下帷诵读伊吾声彻昼夜学使者行部至建安公輒高等名藉藉起诸生嘉靖乙卯举泽宫壬戌成进士观政水部大司空丰城雷公试诸进士备边策独才公游扬诸荐绅不絶口已授官知广东番禺县番禺故岭海岩邑适潢池弄兵势张甚公至缓催科审保甲浚濠隍缮楼櫓教技击至不遑盥栉兼以鎮巡趣筑外城调停节度缩浮费几三万缗两台交章荐激獎备至丙寅擢礼部主事寻改吏部考功愿主文选事时蒲坂杨公为太宰于诸曹郎慎许可顾特雅重公日有所咨访公徐条品目无弗犁然当杨公隆庆初以大庆赠南安公如公秩母陈氏配杨氏俱安人寻迁员外郎移疾归权贵有不便公者即家擢公贵州按察副使公脂车就道絶不以外迁芥膺中今皇帝御极广厉人文特诏公以故秩移督两浙学政浙人物声华甲海内而奇袞吊诡稍稍逊曩时公以身帅之敦本实黜浮华甫阅岁文体斐然后先仅三载士蜚英通籍名流自奋无虑数十百人寻转督储叅政修漕艘谨允运输挽如期擢广东按察使粤诸士民习知番禺政闻公来戴若慈父母惟公雨露霜雪迭出互施宪度张皇吏民咸饬罗旁之役公监领赞画功最大幕府言于朝诏予金币擢浙江右布政使会鎮巡争苛礼不相

能而风闻者妄意公构成间隙庚辰大计言官遂希旨齟齬公公投牒铨司归屏迹公府寄傲林泉至不知吓鼠为何物间以余隙读方外书要一二友人登眺里中归宗岩纵观瀑布之胜飘飘然有御风骑气想郡邑守长踵门请质属道路公輒键闕以疾辞权奸败台谏羣起推毂公癸未征补广东右布政使浚河役兴公简廉勤吏分曹课督所节费不费寻超擢南京都察院右佥都御史阅江防公念根本重地民匱军骄渐不可长亟取事關振刷者条便宜十上之诏报可长江上下竟公任无一苇之警擢都察院右副都御史提督军务填浙中公之再莅浙也虽山川草木莫不习公色飞者公念浙自兵民丛棘旱涝频仍地若瓠脱矣至则延见父老咨访藩臬大僚度不起凋瘵不已又值岁凶米价翔踊桴鼓昼惊盗萌磔起公掀髯奋曰乃公奉三尺第恤饥民詎长乱民耶趣移檄诸郡邑示谕黔黎多方賑济诸无藉恶少蜂屯豕突槩峻法绳之因力请改折漕纲停减织造以休息困瘵一一取中旨报可亡何疫疠兴死徙相枕藉捐俸糶瘞度二千有奇他如议常平乞赦赉少可舒民瘼者不憚反复疏陈必得请乃已公自抚浙以来朝夕饮水寢食俱废数陈疾乞休不允会■〈风贝〉风起扬沙拔木荡析民居而海盐防海塘堤震壞公悉心计划括全省无碍帑金八万资工费閭阎按堵若不知有大兴己丑春以防汛出海忽岛夷盛集余皇将入犯内地公夜召诸将校以方略掩击大破之杀获千计余什九溺水中捷闻上优诏褒赉有加然公自是疾遂亟凯旋卧床第者五日竟不起上念公薄伐功特赠兵部左侍郎给祭葬如例迨年三品未滿考予全葬自公始公为人外刚内和独持敢任生平慕包孝肃为人其介特天性然也读书耻逐逐章句留心性命之学闳深博大人不可以涯涘窥居官厯通显絕不为家山庄仅老屋数椽田数顷卒之日余俸百八十金至勇于为义矜恤困穷孜孜若不及人谓百余年来岭南人物公与何文裕海忠介为称首殆确论也公配杨安人出文敏公后多淑德后公二月卒子四长万申娶博士张袞女先公卒次万言殇又次万里国子生娶观察陈君烈女继娶游处士士璉女俱安人出又次防侧室高出女二长适庠生陈奎章次范有严公卒于己丑三月二十八日距生嘉靖丙戌得年六十四云往公之贵竹弭节访予山庄再信乃别后十三年赴岭表又期予出晤留连江介三日余因极谈建安山水胜絕谓数年后解官归当扫丈室俟予嗟乎孰谓公竟不待耶虽然予后死矣异日者归而善饭浮一棹武夷之曲拜公墓下以托于延陵之剑固有日也輒因仲子之请援手志公墓而系以铭

铭曰猗滕启宇自似麟若若累累延七闽公绳祖武降庚寅排云掣雾攀龙鳞弦歌声彻岭海氓天曹简秩超人伦秉铎三周髦士驯良知高揭越水濒建藩陈臬悬朱轮吏肃霜威民饮醇帝念三吴灾沴仍简书特厘控江濬载忧两浙多呻嚟量移节钺驱顽嚚鲸鲵筑观高由旬玺书三锡来枫宸凯旋饮至车辚辚鞠躬尽瘁殒星辰帝闻震悼焕丝纶丰碑巨碣鑱高旻公死不死视后人

太子太保工部尚书食正一品俸万安朱公墓志铭（代大学士许公）

肃皇帝季年河决华山絕沛趋昭阳漕渠受啮二百余里饷道阻焉天子南顾太息

咨羣卿士畴为我任渠事者金曰今大司寇朱公其人也于是朱公改司空视河公至则彭城之郊沮洳弥望又地当水冲即浚之必复啗庚啗庚浚费且无已时亟下令召诸父老征所见闻对或云城之东十里而近趾隆阜可渠曩胡公世宁创议开凿后盛公应期经始而罢者故迹尚存河势纾冲啗所弗及兼道径易漕复西渠不若穿东渠便疏入诏报可而故渠旁居民多贾人子藉渠为利流言沸腾中朝诸年少持空谈和之交难公以劳民殫财幸不可必成之役上意不能无动诏给事中何君勘议焉何君具言旧渠不可复者五而急宜治新渠议乃定新渠穿自南阳折而趋夏村东南距留城百四十二里复疏旧渠起留城南抵境山五十三里渠成而东齐吴楚舳舻五千艘銜尾而至天子大悦为歌诗纪之侍臣属和厯庄皇帝世渠益修楛石树堤建闸潴薛沙诸水于湖徙故留城水部及邮传于夏村而漕务大集盖公之规画纖悉委折至今覩若云明兴以漕渠显者及公凡五人工部尚书宋公礼平江侯陈公瑄武功伯徐公有贞兵部尚书刘公大夏皆因势顺导役不踰时未有如公之排众独往手县官金钱米粟巨万数划厚地为长河而功用竟成泽垂永世今徐邳以南济汶以北频岁溃决不恒而公所治渠垂二十年宴然如故此其一费百全暂劳永逸之明效也公家居十年所而寔应役兴今上思得练习渠事白首旧臣而任之公乃以其年七月戊寅弃宾客逝矣于乎惜哉讣闻上震悼下礼官议祭葬如令甲封阡造塚示异数而伯子维京倚庐布状来乞铭不佞尝幸于公即无暇何敢辞公讳衡字士南荐绅学士称鎮山先生上世居南康宋东京郡公孺庭徙万安遂为吉州人孺庭子良臣绍兴中以贡补进士良臣子诚之官秘书诚之子子厚子厚子致美当淳佑咸佑先后以伏氏书为解首数传而至彩者公高祖也彩蚤世遗腹子祖贵祖贵有隱行二子伯宠仲宪宪任婺源博士以子麟贵赠刑部员外郎宪仲子鹏为伯宠后即公父也鹏及宪俱以公贵累赠资德大夫正治上卿太子少保工部尚书鹏娶赠夫人陈以正德壬申正月二十日诞公东门庆元里先是有羣鹤盘空下回翔于舍日者谓公父而不闻当世有刘忠宣乎他日是已稍长就外傅颖异絕人日诵数千言目十行下赠公宪甚竒之亲授易解年十一补邑弟子员督学使者吳郡周先生得试卷大惊诧每饭辄食公号朱童子赋诗诵于人自后督学试辄首公辛卯公年二十遂以易魁其乡壬辰第进士授龙溪令踰年改婺源甲午擢刑部主事迁员外郎赠公病请告家居六年强起转郎中甲辰与大比武士乙巳奉勅録囚江南居子舍七日而赠公卒免丧补礼部主客郎擢福建提学副使久之叅政四川便道省陈太夫人居二月太夫人卒起补河南叅政明年擢山东按察使寻擢右布政迁左明年以都察院右副都御史填山东亡何晋工部右侍郎董三殿石工以勤办受知肃皇帝赐飞鱼服予一子入胄监改吏部右侍郎满三岁赠父鹏及所后王父宠俱如公官复荫一子而本生王父母不得与公因疏请移恩报所生特诏并给公两王父母寻迁左侍郎擢南京刑部尚书未任会河决害漕改工部尚书兼右副都御史总理河漕玺书严重山东河南两直隶咸受节度陞辞赐金币麒麟服隆庆初新渠成晋太子少保食俸正一品仍总漕戊辰召还部壬申科臣交疏荐复

兼右都御史出视河赐蟒服经理淮邳等处俄庄皇帝崩山陵事亟复召还癸酉虑囚奉勅主廷议所矜宥三十余人众称允乙亥言路承权贵旨疏诋公外强直中腹诽无人臣礼请罢公公抗疏乞归再疏再留众谓公少濡忍且秉铨公陈引益力于是温诏褒谕加太子太保乘传归初公守司空一日有诏遣工曹郎一人偕中使往造胡良河桥公知出大瑄冯保意也河故山水四聚势甚驶转石下榘劳费百倍工与新漕渠等遂疏言徒杠輿梁有司事无事烦中官抑王政有大体至尊上奉慈宁怙冒宇内如天无穷诘在济涉今公私方告匱罢之便疏入寝不报王大成狱起词连新郑羣情汹汹公急排江陵相因抗言曰一妄男子闯禁地付尉士足矣乃使蔓引株连此所關国体不细仍促驾谕金吾帅令速抵罪妄男子以息羣疑时变起仓卒掖廷骤以大狱付帅朱朱慢眩蔑知所措乡闻公言大悟即夕具狱上江陵意公右新郑内御之方议桥胡良时江陵相要公语宫中建造木抵累朝故事吾所先斡旋者数矣非甚蠹政第顺之公正色曰仆乃与公异公职在纳诲仆职在守官江陵嘿然盖言者前所指为腹诽而利公去者以此隆庆中朝廷清宴乘輿六宫所征服御器用动以亿千计公疏奏国计耗竭久愿勅中贵人毋滥征言甚倦笃监局将作多无赖子窜姓名籍中冒既稟公奋然请核之所汰去数十百人时司礼贵人滕祥监内工憾刺骨顾上方尊信公卒莫能难也其它諫张灯者一谏织作者再首劾阉陈洪再劾孟冲再劾李佑赵迁诸大瑄耳公名无弗缩首重足者其不畏强御类若此始司空葺承凋弊之余赢金厘厘七八万公在事六年乃余八十万穿漕河众十万余溽暑暴露往往成疠疫公噢休抚摩行视医药咸乐为尽力亡怨咨是时公年已及耆每栉沐风雨乘小舟犯洪涛登降陂陀粮裹时絕左右不任罢馁公益鲜监将作西苑肃皇帝从帷中望见问伟仪度者谁由是向意用公开府山东岁饥人相食啸聚弄兵公蠲赋省役以招徠之盗相率解散继大蝗公令民以斗粟易斗蝗蝗立尽四郊颂生我景藩之国貂瑄缙骑属道路公好语中贵人务为约节事办而民不骚在臬司一日呼积岁在官阉把其阴重罪数之曰若当死吾导汝以生吾廉知官中为蠹者种种因投牒于地令疏记实吾且显用汝一不合立扑杀汝矣阉惴惴无敢隱公按疏拔去蠹甚者椽曹大惊以为神督学闽中所甄士多名臣有魁天下者太宰默方秉铨公以事法其子弟宰婺源令出必行与宠臣太宰鋹忤所亲以祸福争之公邈然弗为动其强直自遂矫有古大臣风盖自少然也生平著述有东抚奏议若干卷河渠奏议若干卷司空奏议若干卷诗文集总若干卷公雅不欲以雕虫末技名而文浑噩尔雅存大体集史汉韩欧之长弗规规一氏诗清新丽密汛洗宋元頽习追大历黄初而上之正嘉庆历之间独公当一代称作者宗工嗣起王元美汪伯玉李于鳞辈交口推毂公以勋德词章雅相颀颀云尤喜引拔隼流得一善惓惓齿颊学者宗仰之若泰山北斗非独以功名盛也方公得请出都门憾者即摭昭陵方中事蔑公削宫御以尚书致仕公歿逾年守臣为力请诏复还太子太保享年七十又三元配刘封孺人累赠夫人继刘累封夫人子二长即维京丁丑进士歷官工部屯田司主事娶邹氏故祭酒文庄公女也绶京太学生娶刘氏三女长元配出壻刘应

宿季继配出壻刘士迁皆邑诸生其嫁庐陵诸生曾文昌者中女也滕彭出孙二大夏维京子大商绶京子卜以万历丙戌月日葬邑之双龙阡

铭曰煌煌大朱始卜万安自公孺庭代有显者迄司空世莫之与京休烈赫隆益阜以昌惟天笃生笃生名贤历事三朝为帝股肱河流汤汤延道弛离懷山襄陵沈璧蹇芟旰食宵衣畴咨大廷司空受简陞辞而往四载是乘徙渠便漕徐兗之间水土以平天葩灿曜侍臣廖和纪厥功成既锡玄圭遄归弼予帝曰汝衡眷倚方懋益输其芻多所匡正贵戚幸罔侧目耽耽萋菲横生请乞骸骨臣老宜罢非敢要名天子慰留引退益力赐传南征优游林皋返真于斯便房泉扃砬石坚臚藏闭中羨铭词可征不朽者三景鍾汗青万古全名

应文学墓志铭（代大学士赵公）

君讳召字可南古平其别号也先世自天台徙婺永康逮宋有孟明者与邑人陈同父及朱元晦吕伯恭诸大儒游历五传至君王父惇惇生璋是为君父东白公东白公由占■〈亻毕〉起家蚤岁担簦谒同郡章文懿公文懿一见辄避席呼小友乡先达大司空徐公雅器重之行实具载郡乘君幼警颖寡言笑异羣儿前进士徐君覩其神彩玉立以息女女焉业成试有司督学张公按部奇其文拔高等补邑弟子员孔公胤系至阅诸生卷得君大击节有深探理窟之评是时东白公亦用诸生高等授新安博士过里挾君与俱适增城湛若水先生谈道黄山白岳间君抠衣门下一时海内名士相肩摩声称焯焯起会母朱遭疾君穷日夜侍汤药不解带比终扶椽还值洪水涨溢枢展转急流君擗地吁天誓俱没俄厉风倏霁若有神竟舟达岸无害观者万人啧啧呼孝感寻东白公请老归君以冢嫡当户晨昏竭力奉颜色頤指悉当东白公心东白公繇此得一意葆摄天和登上寿以无疾终君毁瘠骨立蔬食饮水迄三载毋失容乡党推善居丧自君为标的既身代东白公握家秉益修明约束而光大之遇羣从子姓恩礼隆笃弗率务以躬切劇至出入比閭族党一秉以直道诚心猥薄者窃闻其风多自化环一乡亡问识不识交口颂古平公笃行君子也君素履雅以和洽称乃一当大节山立崖峙不可夺灵岩寺废斥卖县官有力者羣起睥睨君毅然曰先少师妥灵斯在奈何当吾世失之亟奋身废箸酬其直且建祠享祀以东白公配他独行往往称是中年数以文艺困有司慨然念男子生墮地业当不朽自期待即万鍾五鼎足加损我乎翩然裂青衿去其籍日取古先王六艺演绎之间以余力推能事于篇咏所撰述有周易质言道统錄灵嵩寺志古平漫稿等书君以万历丁丑闰八月卒正寝距生正德辛未三月享年六十又七配徐氏宋竹斋公女孙即前进士君冢息始笄嫔于君柔嘉婉孌更礼敬若宾主虽生长闕阅而简素自下有桓少君风事舅姑饗殮滌灑先意曲中诸娣姒怡怡如也以至遇臧获羣下咸有恩阍以内若大若小师其令淑生正德辛未五月卒万历庚辰九月享年政七袞云君丈夫子三人长昌期殇仲昌■〈日奂〉邑庠生力学有时望以例贡入太学授兵马副指挥娶徐氏季昌穆郡庠生娶季氏女二长适贡士周某子次适太学生徐一谦孙男九长处思

邑庠生次梦思孝思忠思太学生次明时亦邑庠生次清时进思盛时嘉时孙女一人曩余备员史局适昌■〈日免〉偕余弟需次天官因介绍襄大事余诺之未暇也既余南徙则昌■〈日免〉以南挥使至未几余复徙而北今駸駸十稷矣是岁昌■〈日免〉亦以服阙来燕匍匐持徐君师皋状拜庭下曰愿终藉师相宠灵余悲其意且诺责亡他倭乃稍据状论次之而系以铭

铭曰夫鸿妇光履直蹈方尔躬弗彰尔后大昌华山苍苍有阡在岗奕世永康是为应长君不朽之乡

少室山房集卷九十二

●钦定四库全书

少室山房集卷九十三

（明）胡应麟 撰

○墓志铭一首

明奉政大夫云南布政司叅议东阳王公泊封宜人徐氏墓志铭

阙逢困敦之岁庄皇帝御极改元家大人官仪制而同郡卢公仲佃在部中王公干章在台中朝夕过从昵甚也两公淳德望一乡而正气直节咸矫矫与时俗忤以故仕不登九列后先繇藩臬挂冠归于家大人盖相类云其后十年卢公伯子祠祭君以抗言杖阙下海内高其风而王公伯子孝廉君亦鸞举艺林紬千秋经国之业天之悬左券以报善人胡毫发不爽也余乡尝以童子识两公今卢公厌弃尘世久乃王公客岁之杪复以无疾终于是家大人京洛故交垂尽矣是春孝廉君舂粮三百里介斯生匍匐庭下曰世方急吾子片言仰藉尊大人宠灵之末敢以先考妣莹石请惟吾子惠然以不朽施之不孝亮将世世奉明德余悲孝廉君情致委笃抑通家故谊弗获辞按状公讳干章字顺卿别号震所自十世祖宋安抚使霆居婺之东阳奕叶为巨族国朝六世祖墀习形家望邑西南青云里有异气遂挈家徙其中载传而为公曾大父志志生公大父广济县教谕垓垓生赠奉政大夫四川按察使宽即公父也先是公母蔡宜人娠公方就蓐梦神人仪观伟甚鼓吹骑从翼而趋堂皇寤则诞公状维肖举族知非常儿既髫丱神颖秀发九岁能属文奉政公抚公背叹曰吾家两世治毛诗芥一第而均弗售大吾宗者非此儿也耶十四遣就安成受春秋刘某先生公独从一仆负笈往未朞岁尽得要领手録归始安成擅春秋相戒毋得传外境于是公之行也同舍生合谋祖道上而一二无赖胥公篋篡取之抵家奉政公询録乌有矣公大戚已奋曰彼能胥吾篋庸能胥吾舌也即朗朗诵奉政公前竟篇靡一字讹脱奉政公属耳大惊亟谓儿休矣奚以録为哉明年补邑弟子员督学刘公按部试崔浩自方子房论公操翰若飞陈汉魏两朝用兵事纚纚目击且言浩之运筹帷幄也批窾破的不啻超子房上之乃子房颖脱雄猜而浩湛七族于悍黠之主明哲保身戒胡方相遠也刘公披卷击节非文场老宿莫能立拔多士右既覩公仅踰冠弥赏艳锡楮币四倍至委不能胜无何奉政公寝疾公侍汤药衣带不解累十旬卒不起公柴

毁骨立惧伤蔡宜人意中夜拉泪令弗闻辛酉服阙荐于乡壬戌第进士授中书舍人转山西道监察御史巡视卢沟桥时世庙高拱穆清貂珰用事多不法宛平令强直自遂中以非辜系圜扉御史颜公鲸抗疏极论坐夺官是时上怒甚台无敢救者公独疏继之略曰宛平古所称赤令非受役中贵人者也夫中贵人行其意宛平令受其法意与法恒相左也陛下不罪中贵人而覆罪宛平令且连及御史若国家纪纲名分何因力请汰羣阉以肃城社还台諫以作敢言旌县人以彰奉职疏入留中人汹汹惧公祸叵测公气益发舒将具疏再上会阁臣列名申救上意解夺公俸三月以鹺政按山东长芦时例严夹带盐不以时掣稍稍踰故额辄用其罪罪之羣大贾疑畏不前公晨至夕疏议停罢贾称便属道途先时除解额取盈外岁竒羨往往溢万缗公秋毫无所问敝衣冗簏竟任不睥睨一钱复命论劾两藩臬不职事两人皆籍山西与铨衡相结疏入吏部果恚公而给事中某遂希旨盛称两人贤而公纠刺不以实公谓臣于僚属日耳而目之科臣鞞毂下何所从悉治状其承望风旨灼然疏俱寝不报俄命下按楚中甫旬日外迁四川按察司佥事时田蔡乱初平又播州酉阳地犬牙错其间号难治上特赐玺书兼兵备诰赠公考如公秩而封母蔡氏太宜人盖天子西顾特典也公入境身先僚属问民所疾苦而噢咻之川以东土风犷戾讼狱旁午公视事日理爰书数十以为常重庆民有悦邻人妇而挑之者妇砺锥桩其腹吏以未成奸抵妇罪公曰妇致死而加之辟是为宣淫者帑也立释之有翁甚怜其子妇姬疑焉夜窃翁衣履突妇床妇惶急咋姬舌几死有司当妇罪大逆公以妇所操者贞所触者误置弗问一日登郡城四顾慨然曰郡襟带二江盘踞巉壁称天险今弥望頽垣败堞险安在即出赎醵缮筑迄城就民不知有大兴先是叅将一控播州中废格不行而两台使欲追设如故公议曰播人心习服杨氏大而叅将所号令所鞭笞者皆其爪牙胁腹也犬羊之属刻木可以传信而吾以汉法治之如率鹰隼而搏豺狼彼有噬且鬪而已往叅将周表在播曰惟高卧杜门蠢首扬烈犹纷纷奏扰今一旦骤复之彼愈不自安从其愬而中止是天朝命将之权反制于蕞尔之狄不得所请恐西事纷纷浸从此始矣为今计莫如以不治治之浚濠隍斥烽堠练兵积粟以备非常彼畏威懷德耦俱无猜又何求焉议上抚按大然公得不置后三十年而播酋杨应龙竟酿乱人啧啧颂公遠识云东城隙荆书院爽垲宏洁简青衿慧者程督之所甄拔胥君从化汪君言臣张君似渠苏君雨毛君蔚相率取高第用是政声藉藉播都下俛内迁而太宜人讫至公哀毀深墨一如昔丧奉政公濒行诸父老扳送阗咽仍荆祠生祀香火不絕至今万厯改元以服阙赴部除河南按察司佥事巡睢阳督学使者迁公暂摄朝贵欲缝掖所亲意公摄官无拂理公貽愕曰青衿国家名器吾敢辄阿权贵人且吾任外台專纪法而骤以私牒溷公庭何耶使语答稍不逊杖而系诸狱弥月甫释之所拔士逾籍尤众安君世鳳甫垂髫试诸生第一癸未偕计果抡魁公莅河南四阅月迁江西布政司左叅议分部九江都昌剧盗何鳳等蟠据湖上恣寇钞吏督兵往捕鼠窜洪涛中稍解严徒党四出羣不逞揭竿助之杀伤官卒不可以数计公奋髯曰盗在吾四封而衡行若是不灭此何以朝食

哉第古用兵殲厥渠魁今有司欲一切搜猕之宜人自为鬪牢不可破也因下令揭通逵诛止二凶诸胁从槩罔治旬日间众面缚十之九因趋兵夜袭之逮明两大酋首毕函致麾下所驻南康负匡庐面浔阳形胜甲宇内公登临啸咏以隙日订五经同异録国朝北地信阳诸名家制作甲乙品题之时时捐月俸购古文奇籍有属令橐金篋中公发緘大骇召令切责之令惶恐几无地容满秩升广东按察司副使兵备海南兼提督琼州学政未行坐建邸失印镌一官先是建昌郡王湏于酒一醒辄旬日盗且即卧内攘之郡邑秘其事日潛索民间公时兼摄吉安复不相闻知盗就捕建康踪迹始大暴上震怒诸蒙蔽者悉严谴而公以分部抵罚同羣僚愕然请治装入自明上且无以罪公谢曰宦于朝譬操舟于水诸君乘长风破浪万里而吾至困石尤天也何言哉竟拂袖归归扫轨杜门足迹不一至城市既铨曹廉知江右状起公福建按察司僉事驻节福宁州时剧盗林道干郭东山等勾引倭夷猖獗甚而福宁据上游实汀潮门户旧设守备部千兵鎮海岛岛卑仅卷石寇舟至末及举烽已蚁傅城下已公亲率所属抵海上遥见一山隱起巨浪中距州仅四十里许促拏舟登之山外衍而中丰于海氛无所不目摄公以杖击地曰此所谓天堑非耶吾顿兵其中奚贼敢越此越此吾踵其后彼将亡噍类遗因状闻两台台报可竟公任果无害江陵握国秉汰藩臬诸司十之三公兼视七道事晨起据公座胥吏抱牍常累百公双瞳炯炯剖决如电人織忽不敢欺直指使者雅重公冬月虑通省大辟囚先一日檄公讞状公翻阅成案并释诸囚面鞫之所开释如建宁民丁五郎等三人则盗所仇逮自诬服者也漳州杨氏妇以弑夫寘极典讯其年距入狴纔十三公大骇详诘乃知妇夫实赘壻母孀居私恶少虑壻之梗也而害之给女任其辜且曰若年稚官必汝贯也无何母与奸者相继死妇遂永闭囹圄中福州民身首殊邸舍盗絕踪吏絜同宿抵以罪公以亡者亡寸挟邂逅剽以刃非人情夜具疏诸囚诬濫状御史是公并得生不尔五人者质明磔于市矣福安治环大海一夕风发水坟地几十丈壞城堞漂庐舍溺者数万人公驰往恻然出帑金置棺殡其骼大发仓粟賑流殍而为文吊其祸读者感动凄惻以方李华古战场是时刑部卿洪某忤权相放归江陵憾不置密旨以大狱寄公公廉知洪枉申启营救殊力当事切望之会仲秋省试七闽士公入为总裁官御史命试题藩臬诸公环视莫敢诘公越众请曰题诚美然传播道路稔矣御史不怡题中易而公亦以是月擢叅议云南布政司癸未春大计考功卒从不及论以二憾故也公闻报欣然曰吾一官万里视浮荣譬嚼■〈虫葛〉彼其以归老难余哉抵故乡悬车谢客斥余俸创别墅东郊高台曲池曳杖临眺无虚日性雅嗜读书杜门手一编贵交游罕得覩其面独寒士投刺匆遽中亦倒屣迎之郡人祝无殊邑人斯惟武李允达数过从扬搯公握杯酒相劳苦若平生间发一谈诸后进犁然絕倒咸以为先达未易窥也为文章援笔立就大都不加点尤工诗乐府新词所著浪游等集梁太素传奇并行世尝题壁弋阳署王次公行部九江读渔灯燃楚竹人语渐吳枫之句顾同寅郭公孝曰此咄咄逼人可畏公优游林下以文艺自娱者一十八禩卒万曆己亥仲冬距生嘉靖丁亥秋暮享年七十又三公貌和平而

气瑰岸兼擅政事文学之长即应接上官不肯少为籛篠态惟通人雅士能谅之蜀则台使两陈公楚则大司马凌公御史大夫乔公直指徐公熊公燕公安公皆交章荐辟恐后晚节宦闽藩伯某集众僚出示所作诗韵连失读者唯唯竞赞扬公却立微哂某怒形于色酌大白前浮公曰古行酒军法从事今公犯誼哗禁趣尽觞公遽曰师出以律不以律胡众之肃也某色愈厉中罢燕公出入谈笑自如乃至缓大狱争大典竟以是遭三黜直道之难容盖自古叹之矣公自奉甚约素款客则人务尽欢与人交由由然恶语不狎及奴隶以故争德公长者尤善以骨相观人李文学能茂数上诗公称其翩翩奇隼假年岁足逐鹿中原而不无太和缺折之虑李果先公咯血卒公素强无疾先一日尚康步良食命应门扫径灌花木俄有星夜殒里中翌日沐浴正襟坐中堂挥手逝卒应曩神人兆云公娶封宜人姓徐氏敏慧恪共始公为诸生食贫旦夕所需饘粥而瓶粟时告罄宜人躬绩纡多方佐公无几微愠见色公既贵迎养太宜人京师时春秋高多嗃嗃宜人怡声屏气必斲中其欢而后已凡逮事公逾四纪白首相对亡间言外而媼■〈女连〉内而妯娌微而臧获人人厌其意钟爱孝廉君特甚而弗为姑息严督以诗书孝廉自塾归诵制义公前宜人以意辨高下恒十中五六工治生绝不为孝廉君计曰男子生堕地桑弧蓬矢射四方宁齷齪卧蓬蒿守阿堵物哉居常谕孝廉而父子世受国恩努力铅刀呈一割之用异日居官受事毋负清白吏子孙可也公歿悼慕深至成痼疾竟以次岁庚子膈月终距生嘉靖壬辰春春秋凡六十九云子一即孝廉嘉亮娶卢氏叅军洪度女女一适侍郎虞公守愚孙应旗孙女三皆嘉亮出尚幼始公翱翔台諫及家大人游余年甫十二公一见以小友呼之比余婴肺疾雕虫刻鹜自放一丘而孝廉君顾盛见挽推引而纳诸作者之域则余于公固载世通家也不朽之责即言之无文其曷辞爰泚笔志诸石而系以铭

铭曰华宗十叶蕃东阳琅琊太原屹相望一经世授沉宫墙三世之后飞岩廊直词劲气吞豺狼矫如孤鹳鸣朝阳玺书持斧巡荆扬高牙大纛悬疆场政声炜烨驰明堂逡巡九列朝天王南金百练莹刚腸中山谤牒流螟蝗挂冠神武天茫茫初平握手呼羣羊遗编万轴堆琳琅缤纷制作罗缥囊婉婉中闺同颡颥白头比翼谐丝簧趋庭汗血神昂昂传家大业追三唐灵光一柱撑银潢胡乘白云归帝旁郁郁佳城蟠北邙贞珉百代垂玄黄遗风山高繫水长

少室山房集卷九十三

●钦定四库全书

少室山房集卷九十四

（明）胡应麟 撰

○碑铭一首唐令君新建信阳愿丰堤碑

常山邑全浙上游其地界七闽三楚舟车之所馆穀富商巨贾万货之所走趋钱塘之水实滥觞焉源发县东北郊逶迤百里抱城瓴建厯衢婺以达于江岁月滋久洲东港

堙水折而西去郭纒绕閭閻之溉汲行旅之灌輸咸病之又形家者言率以水遠弗宜于
黃序諸青衿士蚤夜皇皇冀得良有司以紓宿患先是弘治中令劉君擬築堤捍水使毋
西而合流港東旋以忱去弗克嘉靖初張倅尋劉故迹亦罔迄工今上改元甲午云間唐
侯以進士綰符來邑甫下車揖諸父老問一切政所宜先合詞稱築堤為第一義侯周行
境上喟然曰是誠不可旦夕緩顧大興匪可倚辦頃刻間越明年惠政四孚頌聲沸起邑
茂才徐仕升輩復請之侯曰嘻微諸士余豈其一飯忘爰白當路發贖醵鳩眾工相物宜
時農隙侯躬率僚屬即勒指麾靡遺余力始秋中迄冬末為旬僅十有五而版築告成衡
為丈若干有奇廣為武若干有奇高為尺若干有奇凡舊堤之材朽者易而良弊者撤而
新頽者封而固隙者繕而完庠者增而隆隘者辟而曠又環視港之壅者決之激者排之
溢者疏之膠者浚之沙者澗之礎者夷之飛流如虹襟帶城下縈洄顧盼亦拱亦留百年
之利暴興一旦士胥慶于庠民謳歌于野旅相率加額于途侯鑿石于堤而命之曰愿丰
逝將以地利人和而必天佑于是徐生介祝生樹勲輩羣詣不佞碑侯伐以志不忘不佞
槩觀載籍洪荒以降水之利害所關於家國天下甚巨而治水之任最為盤錯亘古今不
易其人勛華二帝如日中天懷襄之厄四岳九官舉遜避而推鯀微大禹几無唐虞漢武
席累代之雄驅山鞭石勢無弗行瓠子之決殷忱作歌至沉璧馬而后濟太史八書河渠
列于禮樂班椽十志紀溝洫以配天文誠重之也唐侯以明經上第初命而宰一方稍飾
抚字振催科掉臂而躋省闕固匪以堤之成否為殿最而堤之成否又未嘗顛責之侯若
他政事弗容已而侯則奮然任之鞭笞罔施声色匪大而數千百載無窮之利執券而收
之掌上非夫誠結于中仁昵于外抱絕類離倫之識而負規天條地之材其胡以及此抑
余嘗聞之文人無用則舉世以為然惟是唐之白宋之蘇兩使君者咸以築堤垂永賴之
烈彼其時寧無揚眉瞬目自詡任事之臣而以堤特聞■〈宀禹〉內者胡寥寥希邁見
也侯方以文學追馬班即兩使君猶將需之左席乃今愿丰告成文人之用彰彰耳目有
明效焉傳諸異代庸詎知其不與蘇白二堤同弊穹壤也不佞無能為侯役特以臭味忝
一日之知樂觀是堤之成不直為一時良吏快且為百代文人快輒援筆碑其事而系以
銘

銘曰姑蔑之淵錢塘之源如何昆侖發軔萬川沙墀中流既分既合胡然而盈胡然
而竭居人抱瓮行旅挈囊皇皇青衿旦夕望洋偉哉唐侯先忱后樂綰符下車首訊痾瘼
竒樟斯得桃李并栽偃室告成聿來澹台金曰河渠利病孔亟侯聞矍然堤此朝食爰戒
于邑爰次于郊沐雨戴星以先庶僚蒼赤累累奔走赴義譬彼嬰孩飢渴怙恃經始仲秋
迄于嚴冬我堤告成燁如長虹十旬非遙五月何速真宰上訴眾靈匍匐一水抱城蜿蜒
若留鵬躍鯤飛龍門上游禾黍盈阡是灌是溉我昔何勞夫負妻戴閭閻踴躍道路歡呼
寶筏金繩廣濟迷途巨川舟航明堂梁棟詎曰文人亡實亡用曰白曰蘇泊侯而三堤垂
宇宙伯仲之間峩峩曾城閭風玄圃欲駕靈槎泛彼銀浦堤石隆穹鑿碑大東百世永丰
自唐長公

○铭二十九首

古玉方鼎铭（有序）

得古玉文王鼎方腹圆趾以周尺度之高九寸八分衡广四之三纵四之二腹四周卧蚕镂刻精工而内外折旋纖悉中矩四足空中抵上鬲皆近代玉工竭力不能为者信斋合中奇翫也惜一足蚀土变苍下棱微挫丝忽中损连城耳然亦非穷措大宜有物是月以歲凶将鬻诸歛贾因稍述其形制而系以铭米元章所谓吾斋秀气从此不复泯矣戊寅秋半识于羣玉山房

奕奕阳精至自于闾历汉迨明千五百年法象乾坤腹方趾圓入矩应规天工折旋昆吾炼钢篆刻纠缠蚕卧螭游神物蜿蜒石匣秘藏虹霓在田太隧崇陵绣蚀隱然天发灵光烨煜市廛抱璞以归陵阳素緣白板精庐萧条太玄斐几铜尊沉水昼然拂拭焦桐泠泠五弦五鼎万锤浮云邈绵岁荐苦饥丰玉詎怜爰饰明妃以媁呼延懷寶迷邦诮彼圣贤我独何人韞椟自妍鸚鹄澄心勒铭如椽秀气吾斋千秋并传

白玉如意铭（有序）

燕市张灯從二三好事游侠斜得白玉如意长尺有四寸首琢灵芝身作子母螭上下相向蜿蜒若生古云玉径尺为寶此虽长尺余非径也然亦奇矣昔人以玉柄麈尾为王谢子弟物余之畜此聊取适一时而已因铭以识之

谁剖长虹自西极上座谈天绛宫辟白昼干人走碣石

斋头小弥勒博山炉铭（有序）

歛人斲壤得万歲藤根二为弥勒像一躯博山炉一座精巧瑰特俨出天成余两遊燕市得之尝合置斋头诸好事雅相慕翫暇日因命名像三曰圣菩提曰木上座曰龙树尊炉之名五万年芝仙人掌小崆峒旃檀座香象龕盖像惟取义炉则四旁上下各从其形且为之赞若铭颂十余大都颖传余沥存其半以谗滑稽

丈六金身示现寸草灵根不昧孰曰枯槁相彼伽文八十二好冢嫡在兹永世为宝又

而躬頽然而腹坦然而口莞然问疾维摩胡以欲然补处大雄胡以偃然吾弗知其所以然而然

又

超大千界入不二门于未来劫为无量尊不知者曰菩萨之幻相知之者曰菩提之上根（右像）

又

木上有火鼎君子以凝香晏寝

又

六鳌蟠五龙蛰吐玄云润八极

又

三秀草万年芝斲灵根树鼎彝又万岁仙藤九曲灵根玉霭兰芬永裕后昆（右彝

）

螺觥铭

东海波臣南山木客象彼牺尊为大白

鸱夷觥铭

营糟丘凿酒池载西施浮子皮腹如壶号鸱夷

又

翩翩者鳧中流一壶拍浮菰芦高阳酒徒

又

鸬鹚杓鸚鵡杯玉山倒非人推

又

木兮癭兮酒兮觥兮酌兮斟兮浊兮清兮醉兮醒兮

又

长生木瓢示真率浣花野老醉争席

海山琪树铭

太华峰头十丈莲少室三花凌紫烟

玉尘尾铭

白马酣苍虬驾辟华阳空稷下

九节筇铭

九华仙人九节筇飞行五岳如游龙西朝白帝上芙蓉玉女洗头下相逢（爽鸠氏为灵寿丈人铭）

壶公壶铭

须弥山纳一芥一壶中贮三界

大鸱夷觥铭

鸱夷公腹如壶挟西施泛五湖

又

南有箕北有斗千金一壶中流为友

湘竹如意铭

逍遥七百名理秩如维摩默如文殊怪如

水沉如意铭

龙树斯雕虬枝若亚画地隆中谈天稷下

长生瓢铭

承露天中俯八极饮泉丘中隘九域拍浮缸中醉千日

又

挂之高林由曰烦居之陋巷回曰贤虑为大樽周曰然帝锡长庚为酒船

又

维地有泉星在天饮如长鲸吸百川有能尽此诗百篇

青田核铭

尔腹枵然乎而背骚然乎而口■〈土幻〉然乎而饮飘然乎而醉嚶嚶然乎

旃檀如意铭

以击珊瑚汝先折以击唾壶汝先缺旃檀之座玄理彻烂熳天花坠春雪何物麤豪
逞锋鐵

赵文鎮一蟠木儿置斋头若翔鸾舞螭形甚怪伟乞予为铭余为铭铭其足

灵根万禩蟠蛟螭鳳舞鸾翔纷陆离晏寝凝香国华胥我欲嗒然从子綦

○颂一首

干清宫落成颂

大明御■〈宀禹〉奄宅四荒华夏再造日月重光神圣相绳余二百禩德化郅隆
遐格广被维皇嗣服克长克君薄海外内悉主悉臣高拱穆清幽隱毕达霜露所坠洞烛
我闕府宫一体台省肃雍仁裕卉木泽弥昆虫巍巍合宫靡润靡饰上法唐虞土阶茆草
端居高拱二十六年除旧布新象魏式悬天心弗违申命荧惑祓除故基示我物力帝其
明命夙夜咎躬揽一宏纲车书来同潢池既安疆宇旋定海外献琛从好从令大工伊旷
建树孔时公输效长将作请期皇帝曰嘻予罔敢逸仁爱自天惟毖惟饬庶司众职旁午
九闕金曰神居宇宙具瞻乃命工师乃庀林木选匠荆扬伐材庸蜀灵台经始苍赤景从
西山文石北苑椅桐帝念其咨经始勿亟父事子来堂构如翼业业言言两宫告成三光
在檐七曜在楹罍罍切云飞薨绶雾苍龙九旂鸾鹤属路干一以清坤一以宁维皇得一
天下以贞明堂既开清庙既辟抚馭万方永示皇极

○赞二首

李惟寅太保像赞

粹乎其容坦乎其躬廓乎其度藹乎其衷朗朗若万间之厦峩峩若干丈之松开国
岐阳元勋上公龙门之下虎帐之中解推尽海宇而不名其德安危系华夏而罔居其功
涌若耶于毫端流河汉于心胸祢供奉兮鸣皋禘都尉兮晨风髻鬢蜚声词林国工壮岁
登坛驰驱四封晚途学道两朝之业八代之文浮云之点太空容与乎青莲之阁逍遥乎
贝叶之宫孰貌兹图角巾蒲团穆然太冲吾诚不知为地文为天壤其殆壶丘之未始出
吾宗也耶

李允達像赞

而形伟然而容岸然而心胸廓然洞然苞千古而笼八埏食牛三朝倚马万言赋颂
西京声诗开元跋扈飞扬作者亡前荆玉双别蓬蒿蔽园矻矻扬亭以守太玄岁值龙蛇
命也弗延骑气乘风游于混元嗟嗟仲子畴丰而材畴嗇而年畴阨而遭畴纵而传鸣呼

仲子孰令汝贤造物小儿维汝实忌匪汝实怜予之胡昌夺之胡遄呜呼仲子余弗知其所以然而然

少室山房集卷九十四

●钦定四库全书

少室山房集卷九十五

（明）胡应麟 撰

○奠文十首奠

王太夫人（代直指萧公）

维坤元之肇毓兮挺茂德于姬姜降辎駟于巨阙兮佐鼎铉于明堂铄天孙之云锦兮衷月媛之霓裳御东陵之玉舄兮捧南岳之金珰夕西华而侍宴兮朝北极而偕翔辅皋夔于密勿兮翼旦爽于明光剂梅盐于阃闼兮纾内顾于岩廊昭肃雍于寝庙兮笃婉婉于家邦肆大廷之简命兮蜚紫诰于长杨茂贤声于纶綍兮永哲誉于缥緜峩翟冠之璀璨兮被象服之炜煌既柔嘉之尔式兮聿圣善之弥彰胎上真于紫极兮诞殊质于闈房授灵图于广莫兮阅人代之沧桑朝太真于丹阙兮职女史于轩皇挈琅琊之二辅兮吏香案于文昌泊鸛鷖之并育兮矫汗血之飞黄骋空羣之絕步兮俨特達之圭璋和阳春于郢国兮肩赤帟于调场猗妇仪与母训兮只今古而畴双极生人之竒邁兮軼明盛之嘉祥谓遐齡其川至兮萃百顺之繁昌起东山于捉鼻兮符渭水之琮璜斡璇玑于帝座兮縹黼黻于天闈耀千秋之彤管兮标令淑于旗常胡溘捐于一夕兮回鹤驭于穷苍超阎浮之混浊兮遡兜率之微茫恻萱庭之萎萼兮咽兰砌之摧芳锡珠■〈王郎〉于绛陞兮瘞合树之琳琅跂音容之聳絕兮杳河汉之汤汤望易迁于霞外兮渺去路之悠长某辱师门之铸造兮尾骥足于康庄拜緇帷于堂下兮窃懿范于羹墙骤聃音之耳属兮咏白马而悲伤纾惠文于邻境兮愕梦寐之彷徨束生刍以寄奠兮絮浊酒于椒觞惟凤箫之鉴陟兮歆薄酌于微肠尚飨

祭胡太夫人

维姬姜之窈窕兮毓灵爽于坤维降辎駟于南岳兮杂霞佩之离离繫惠心之婉婉兮昭四德之咸宜羗女红之驯习兮聿妇训之修持爰作嫔于巨阙兮蓁桃叶之维时肃瀟瀟于中饋兮荐苹藻于先祇相夫君于帷幄兮畅威武于边垂佐嫫姚于朔塞兮煜飞将之褰旗騰令声于帝座兮躬象服之纾徐維九苞于丹穴兮翩五色之长离肆丸熊之芟瘁兮俾典籍之如饴规词盟于坛坫兮濯文采于涟漪腰斗牛之双铘兮组云汉以为綦既肃雍于兰壺兮亦圣善于萱墀谓百齡之尔锡兮偕白首于娥眉覲侯封于燕领兮辨汗血于黄骊胡溘捐于一疾兮载天末之鸾旗升大罗于广莫兮满谪籍于僊期覲上元于高阙兮武萼绿而透迤目飞琼而一粲兮讶弄玉之来迟悲秦箫之独奏兮析连理之化离痛象贤之遐慕兮泪鸡骨之淋漓某等窃通家于载世兮钦淑媛之芳仪挹余休于令哲兮祝纯嘏之维祺闻聃音而踟躅兮麾白马而狐疑伤昊穹之弗吊兮纷扼腕而

凄其陈束刍于枯絮兮冀盼饗之如驰维素轩之来格兮下青鸟于瑶池尚飨

祭内兄舒允升

繫兰阴之嵒岿兮峙灏水之沦涟肇人文其蔚起兮毓灵爽于东南诞神明之华胄兮遡家学之渊源振衿佩于芹黄兮欽髻髻而誉延羌下帷而发愤兮絕步履于窥园驱卢王于后乘兮揖杨马而周旋美室家之窈窕兮协丽藻于莘繁通和鸣于阊闾兮鼓琴瑟于朱弦维槐阴之鬱茂兮茁世泽于芸兰俨三珠之林立兮森玉树于词垣肆棘闱之飞步兮夺标锦于青钱矫垂天之巨翼兮兆水击于三千既龙门之屡上兮亦陈赋于甘泉期彤庭之独对兮跃飞兔于天闲排云霓于闾阖兮畅鸿硕于奎躔轶经纶于董贾兮迈术业于欧韩胡溘捐于一疾兮仆遠志于盛年渺太清之独游兮蜕凡骨于尘寰载灵輶于道路兮歌薤露于新阡咽寒风于丹旒兮杳骑气之翩翩严亲白髮而闾倚兮痛长夜之漫漫總帷愴以独处兮望陇树而哀叹式诸昆之耸肖兮肯堂构于象贤泊孙枝之触目兮纷振后而承前虽永逝而犹生兮卑轻举于大还都高门之突兀兮忻结驷之駟蕃恫余心之震栗兮悼白马之迟延渺生刍之一束兮奠洞酌于穹泉维云駟之来格兮下笙鹤于瑶天尚飨

祭陈太翁（代巡台李公）

维岳降神是生甫申孰为之先积功累仁于赫封翁淳悃天授中州孕灵大河毓秀乐志丘樊鷲翥鸿騫矫矫亭亭羽仪八埏仲举高标太丘伟度日揭星悬海涵地负躬修至道畏垒之阳俗里熏蒸比屋善良靡畜弗通靡隱弗耀翳翳堂槐蔽芾清庙佑启我师名世儒宗六翮雄飞昌辰奋庸释褐轩墀鸣弦井邑桃李盈阡桑麻被域乃膺简命径莅淮漕刍粟千仓云屯田郊贪墨剧心豪强摄气南迨吳淞北讫燕蓟十襪霜台白简豸冠为社稷臣貽四海安天子曰俞抚我京国爰开大府百吏受职何教非翁师銳于承何泽非翁师沛于行驷马高车翁门既辟凤诰霞章翁既报食芝兰绕膝戏彩含饴五福萃躬若固有之拭目经纶霖雨一代遙观厥成兆姓允賴云胡二竖奄勿膏肓蹶雾乘飈游于混茫僊驭翩翩瑶台鸾鹤白云在天帝所甚乐载我师纯孝夙鍾罔极劬劳哀感昊穹翁卧一丘翁德万姓烏奕融昌全归奚恨某濫竽堂庑厠列门墙沿遡渊源叹慨望洋闻讞震惊匍匐奔走白马皇皇羈鬣官守生刍一束遠致微诚方寸飞驰摇摇旆旌有醴在筵有牲在俎徙倚青虬降格下土尚飨

祭刘封翁（代督学洪公）

于戏碣石之灵医闾之精挺生人豪太阿发矚焯若孤霞炯如列星百尺无枝矫矫亭亭慑暴锄强掖懦扶倾族党比闾恃公辑宁武略鷹扬文锋猬兴材捷数竒脱街浮名遁迹穷山修持姪婴布袜芒屨栖神练形草拾金光芝粲玉英丹霄跨鳧赤岸骑鲸穀貽冢嗣翬腾一经掣电西池抟风北溟试宰百里缤纷颂声帝曰循良首镌御屏作朕耳目天垣驟升有赫鸾章飞驰大廷鬱鬱堂槐邦家干楨伟哉维公遙观厥成移孝疇先勿欺是征苟利宗社毋恤生平黄门矢操维白维精请剑尚方朝阳凤鸣封事万言海隅艷称

檻折轮埋飞霜昼零公食为甘公饮为頽詎曰投荒天王圣明岳岳高风人伦重轻大宾乡举允协輿情紫气青牛回翔汉京谓越期颐千亿斯龄云胡一疾奄忽遐征拥雾乘飈十楼五城广陌哀恫穷乡悼惊国逝黄耆朝嗟老成某等夙叨世讲迈融若膺笔研追随通家过庭企祝嘉祥五福备登溘焉闻讣踟躅屏营白马生刍彷徨旆旌既束官守弥伤典刑洞酌陈词涕集如倾维公鉴格聿来云駟尚飨

祭刘太孺人（代观察林公）

灵光孕育兮维婺之躔顺德凝承兮繫坤之元肆籍龟台兮云裳雾鬢握手二娃兮降于江潭名门作嫔兮令闻广延舜华焯敷兮有渥其颜夫君式好兮婉孌静娴高堂视膳兮肃雍毖虔申椒杂芳兮陆离蕙兰禋祀克共兮拮据苹蘩妯娌缤纷兮阃无择言臧获优游兮强力自前操曰若光兮提瓮若桓彼苍胡夺兮一蹶弗旋喆胤垂髫兮泣血汎澜支床鸡骨兮抱经熊丸紫气烛穹兮太阿龙泉赐履尚方兮花栽邺樊八翼雄飞兮集于禁垣正笏垂绅兮驱除佞谗直声振代兮于维象贤纶綵辉煌兮圣善广传踟躅黄门兮板輿梦悬饮恨终天兮莫赎九原乱曰乘罡风兮鸣佩环左赤豹兮右文鸾厯瑶池兮餐大还灵昭昭兮乐蜿蜒从夫君兮日游盘阆东海兮成桑田产渥洼兮游天闲驾属车兮锵和鸾旷禄养兮渝斑斓忆劬劳兮哀怆烦嗟罔极兮恻潏潏美孝思兮剧纏绵和楚些兮垂千季

祭俞太封翁文（代张明府）

维公洞庭毓秀阳羨储精懷琳抱璞履素含贞隐迹丘园长啸云岫气轧虹霓胷蟠河宿七尺之軀万夫之雄龙泉太阿孰嬰其锋施弗近名善弗期报大德弗彰高门迭耀桓桓吏部玉质金相南宮奋迹天署翱翔矫矫令君人龙文虎擢桂礼闈抡魁天府于惟明公遙观厥成生人至乐宇宙孰荣居贵日虚处盈愈下闾巷青云乡邦大厦纳污含垢排难抚灾太丘之度义方之懷金谓燕贻维公足法金谓显扬维公为烈龙章灿烂凤诰荧煌朱紱方来于彼庙堂矢毕百龄维祺寿考为世灵光为时大老云胡一疾奄忽夜台乘风骑气返驾蓬萊月犯少微峰摧岱岳薤露兴歌松关冥漠皇皇哲嗣莛莛贤孙当官闻讣摧裂心魂某等忝窃同袍因緣年谊骨肉通家情均靡二方凭耆宿示我周行典刑漸没五内如崩敬束生刍将此洞酌来格惟公遙天笙鹤尚飨

祭陆黄门

猗欤陆公矫矫人龙豫章骅骝寶玉大弓奋翮抟霄剖符百里单父弦歌河阳桃李循良比迹豪犷革心仁孚赤子教洽青衿天子曰都汝来禁閼糾繆绳愆拾遗补阙猗欤陆公进思尽忠正笏垂绅百僚敛容直道难容一麾海峽息驾投簪徜徉啸傲裴公綠埜谢傅东山六合苍生延颈赐环帝念老成朝访耆旧凤诰频飞蒲轮遠就谓公复起握枢秉衡大廷耳目当宁股肱詎意云駟溘焉长逝九列兴悲万夫殒涕某髫龄沐教庇藉恩私提携卵翼慈父仁师洞酌载陈生刍载束伫望瑶笙聿来空谷尚飨

祭叶叔明文

奕叶华宗兮越海之隅诞降精灵兮婺女之墟南金贡阙兮汉维相如六馆肆名兮
翩跹长裾水竹会心兮人境是庐平原河朔兮聿来高车缙绅四部分邳架广储八代神
交兮三唐拮据瑰词藻发兮秋江芙蓉令誉光融兮木难琼琚捧檄金门兮趋蹕石渠枳
棘卑栖兮鸾凰乍纾武夷九曲兮洞天踟蹰霞色幔亭兮羣仙授书夜郎万里兮一麾扶
余昆明点苍兮九夷是居浊世诘谐兮戚施籛籛回首苾刍兮白云卷舒拂衣三径兮莼
羹鲈鱼骑鹤吹笙兮言旋太虚絮酒在筵兮生刍在除苍虬帝阍兮极目歔歔尚飨

祭太传赵文懿公（家君命代）

猗欤我明光岳鍾灵盛于世皇乃生名世诞生应昌期维灏之阳三策天人纚纚万言
大廷对扬天子曰俞五色云英轮困庙堂执戟彤墀如彼高梧晨栖凤凰直道匪躬正色
昌言狐狸遁藏一夫横行毁灭天彝百僚彷徨公髮指冠面折权儉以植大防贝锦赬赬
马首遂东驰驱夜郎爰集朱明歷探洞天耀真良常夜登罗浮絶顶题诗淋漓石床今古
贤豪始兴昌黎后先若望度岭遄归满折梅花以充宦囊焚彼银鱼栖我碧山岩阿芟房
涌雪紫霞玉露水帘回环画廊綠埜逍遥问道容成游心上皇神圣嗣兴地辟天开显忠
遂良首御蒲轮少宰成均清华歷敷诏下老臣汝作雨霖大川余皇元首股肱喜起賡歌
谟谋颀颀统万逋逃负固穷城主帅是戕公怒赫斯立命元戎剪锄乱蝗蠹兹有苗躡藉
藩市凶威陆梁公运神机魄褫羣凶欵封乞降中州易子西播弄兵海隅沸汤公坐阙庭
默夺潛消四空彗芒慨念皇储国本攸关夜寐弗遑力疾上书洞格宸衷老成虑长一十
二年身系安危化征越裳相业维公岌岌超踪汉唐帝眷弥殷天庥浥加百福炜煌
麟趾振振奕叶芝兰芬敷棣棠言念赤松累疏乞骸归侣二皇天子曰都莘埜渭濱期頤
帝傍公戢上知回首白云歔歔太行茕茕昊穹一老弗遗倾颓栋梁大星坠垣五位震惊
九列悼惶賻赠褒崇日月昭回赐车轡辂维公与余束髮同嬉翱翔棘场晚締媼■〈女
连〉兔丝乔松永矢弗忘屈指昼游太白望舒生平愿偿遐讎倏闻五内痼瘵崩摧若狂
于戲维公位极人臣师兼帝王于戏维公子姓孙枝云仍发祥公德九原公望三朝公勲
太常既尊既荣既寿既康公逝弗亡兰阴苍苍兰泽汤汤公骑石羊羽盖霞駟聿来故乡
鉴此薄觴尚飨

少室山房集卷九十五